





14-16. b. 1





III  
I  
13



# CURSUS

## PHILOSOPHICUS

*Ad usum Studentium totius Ordinis  
Minorum.*

### TOMUS PRIMUS

Completens universam Dialecticam ,  
nempe tam Sumulas, quàm Logi-  
cam magnam , juxta mentem  
subtilis Doct. Scoti ;

AUCTORIBUS

FR. PETRO A S. CATHARINA

E T

FR. THOMA A S. JOSEPH

Ejusdem Ordinis Strictioris Observantiae, Pro-  
vinciae S. Joseph Discalceatorum, in Hi-  
spania , Sacrae Theologiae Lectoribus.



VENETIIS , MDCCXIV.

Apud Paulum Balleonium 450

*Superiorum permissu , ac Privilegiis .*



## P A T R I A R C H Æ J O S E P H

*Alma Dei Patris Filia, Dei Filii  
Matris, ac Spiritus Sancti Spon-  
sa felicissimo, dignissimo-  
que Sponso.*



Non diu, nec ancepiti consili-  
lance, fuit nobis deliberan-  
dum, Sanctissime Patriarcha,  
cuius tutelæ, vel gratiæ mu-  
nusculum hoc esset offeren-  
dum; si enim quærimus tutelam, quomo-  
do in te non inueniemus, in quo qui tutor  
est omnium tutamen reperit? Sic testatur  
Rupertus, *a* qui perquirens, quomodo  
Deus, & Dominus sit tibi innixus? Statim  
respondet: *Utique tanquam tutori pupillus.*  
Si autem gratiam adipisci conamur, in  
quo aptius, quàm in te, cui ipsius gratiæ  
Mater torum cordis sui thesaurum (iux-  
ta nostrum Bernardinum *b*) liberalissi-  
mè exhibuit? Tibi ergo sit dicatum, sit  
sacrum exile hoc opus, & plenissimo iure  
tuo, & voto, ac debito nostro, ut illius  
frontem lauro semper vernante cingamus,  
& tempora immarcescibili anedemate or-  
nemus.

Huius voluminis materia te, tanquam  
Patronum, quærit; est namque illa Phi-

A 2 lo-

*a* Rupert. de Glor. Fil. hom. lib. 1. in Match.

*b* S. Bernardin. serm. de S. Joseph.

4  
loſophia rationalis, quam *Logicam* communiter vocant; ſi ergo, quod græcè *Logos* dicitur (ut inquit Auguſtinus *a*) *Latine, & rationem & verbum ſignificat*; quid mirum, quòd hoc verbum, hæc ratio te, ut Patronum, quærat, quum ipſum Verbum Patris, ipſa Dei ratio, ut Patris ipſius nuncupatione gauderes, tam ſedulò, tam avide (ſi ſic fari liceat) te quæſivit? *Inventus eſt itaque Joſeph* (declamat Metaphraſtes *b*) *qualem querebat ratio.*

Nec minus doctrina, cui in hoc opere adamuſſim adhæremus, te veluti Mecænatem, implorat; hæc etenim eſt iuxta mentem Mariani Doctōris, ſubtilitatis Magiſtri, Antefignanique noſtri Joannis Duns Scoti, qui tui extitit, dum vixit (quantum faſ eſt) fideliffimus imitator: ſi enim te Divina deſtinavit providentia, tam ut ineffabilis Incarnationis Myſterii eſſes aſſertor, quàm ut tuæ Sacraſſimæ Sponſæ Mariæ deſenſor eſſes, ac propugnator: Sic de te loquitur Ambroſius: *c Non putavit uberius proſequendum virginitatis Mariæ teſtimonium, ne deſenſor magis Virginis, quàm aſſertor Myſterii crederetur*; illum etiam miſit Deus (uti oſtendit eventus) ut de primo lumine ejusdem Deiparæ abſque originalis culpæ umbra ſplendeſceti

---

*a* D. Aug. lib. 83. qq. quæſt. 63.

*b* Metaph. orat. de educat. Mariæ.

*c* D. Ambroſ. in cap. 1. Luca.

5  
ti perhiberet testimonium, & illius de-  
fensor, tantique Mysterii, ut hoc omnes  
crederemus per illum, esset assertor. Et  
si ex singulari tua iustitia, tot ab infallibili  
veritate proclamata præconiis, quodam-  
modo quasi infert Origenes, \* tuæ San-  
ctissimæ Sponsæ illibatum, ac immacula-  
tum candorem; sic enim fatur: *Iustus erat*  
*Ioseph, & illa Virgo immaculata erat*: cui  
etiam non licebit, ex singulari Scoti erga  
Mariam devotione, miraue eius ingenii  
subtilitate, Sacratissimæ ipsius Christi paræ  
victrices immaculatę Conceptionis lauros  
inferre? Sanè nulli, si eum per celebres  
Scoti, quos vel fama ipsa in æthera tollit,  
erga tantum Mysterium triumpho non  
lateant. Si igitur quidquid Scoti est, Ma-  
riæ est: eo enim tendit mira illius sapien-  
tia, ut istam immunem decantaret ab ori-  
ginali culpa; etiam quidquid est Scoti,  
& tuum esse peculiari jure, Sanctissime  
Patriarcha, fateri tenemur, siquidem  
totum cordis sui thesaurum tibi Maria  
exhibuit.

Suscipe ergo, Gloriosissime nostræ hu-  
jus Provinciæ Patrone, hunc qualemcum-  
que illius fructum, ut a te ejus alumni re-  
petere possimus, & a te illum uberius, &  
utilius depromere valeamus; si enim justus  
es (*Ioseph autem..... Cum esset justus*) my-  
sticè, & Palmam, necesse est, esse: (*justus*  
*ut Palma florebit*) sit igitur in te huius tuæ  
Provinciæ fructus, ut gaudens hæc dicere

A 3

queat:

---

a Orig. hom. 1. in cap. 1. Matth.

queat: *a Ascendans in Palmam, & apprehendam fructus eius*: hoc enim ius ei tribuit nomen, & res tuæ cœlestis tutelæ, qua gaudet: unde felix proclamat. *b Sub umbra illius, quem desideraveram, sedi: & fructus eius dulcis gutturi meo*. Ergo accipe hos rationalis Philosophiæ Scoticæ fructus, si tuos quidem, nonne & nostros? Et nos sub umbra tam nobilis Palmæ sedentes, in illam ascendamus, ut illius fructus apprehendere possimus. Fructus utique tuæ pietatis, ut suscipias, tuæ celsitudinis, ut foveas, & tuæ dignitatis, ut faveas.

*Fr. Petrus a Sancta Catharina.  
Fr. Thomas a Sancto Ioseph.*

Cen-



*Censura RR. Admodum PP. Fr. Petri de Sacerdon, Sacra Theologia Lectoris, Concionatoris Regii, olimque huius S. Ioseph alma Provincia Provincialis Ministri. Et Fr. Francisci à Sancta Clara, Theologia Lectoris, Catholico Regi Nostro a concionibus, Sancta Inquisitionis Consilii Qualificatoris, prædictæque Provincia Custodis.*

I. M. I.

**M** Andato, & iussu nostri Charissimi Fr. Joannis de Sancto Dominico, Lectoris Theologiæ, & huius Provinciæ Sancti Ioseph Discalceator strictioris observantiæ dignissimi Provincialis Ministri, adstricti libenter legimus, & libentissime perlegimus. Cursum Philosophicum accuratè elaboratum, subtiliter evisceratum, & utiliter aditum à nostris Charissimis Fratribus Fr. Petro à Sancta Catharina; aliàs de Atiença, & Fr. Thoma à S. Ioseph, aliàs de Madrid, Sacræ Theologiæ Lectoribus, doctrinæ subtilis Doctoris validis propugnatoribus; & circa prædictum tractatum possumus dicere cum Plinio; *In quibus ceensoria virgula nihil: laudis multa reperimus;* laudis, inquam, quia ad juventutem erudiendam, ita ut cum D. Bernardo, in quodam sermone, dicere valeamus; *Non minus pium est docere animum scientiam, quàm præbere escam corpori;* ad hoc autem dicti Patres multos Authores, Doctores, & Scoticæ Doctrinæ Scriptorum & viderunt, & non cum parvo labore selectiores opiniones elegerunt, ut flores viridarii Scotici caperent, ita ut possimus clamare cum Seneca Ep. 87. *Apes debemus imitari, quæ ut vagantur, & flores ad mel faciendum idoneos carpunt.* Viribus & posse, & scripto consulere brevi loquentiæ conantur; nec tamen breviloquus tractatus est, ut confusio-

2  
nem pariat, memores tritæ sententiæ: *Sapè enim dispendium est compendiosum esse, & sic media incedunt via: nihil invenimus, aut contra Catholicam Fidem, aut dissonum contra bonos mores; sed potiùs omnia eruditione plena, solida, clara, & docta; nihilque invenimus, quod non solidè probetur; non obiectorum nodo facilè dissolvat; atque doctrinæ nostri subtilis Magistri subtilitatem planam non reddat. Opus suavissimè redolens acutiem Scoticam, attingens omnem litteraturam sapientiæ, & eruditionis, & non devians à Sanctis Legibus, neque à moribus sanis, & propter hoc judicamus dignum, quò detur prælo in utilitatem Provinciæ tyronum, necnon & aliorum.*

Nunc, ò iuventus Religionis Seraphicæ, ad vos alloquimur nobella germina horti Minorum strictioris observantiæ fertilis, ut omninò litteris vacetiscum Ovidio:

*Ferreus assiduo consumitur annulus usu,  
Interit assidua Vomer aduncus humo.  
Quid magis durum est saxo? Quid mollius  
uda?*

*Dura tamen molli saxa cavantur aqua.*  
Quibus adiungimus aliud Virgilii, Poetarum Principis.

*Absque labore nemo Musarum scandit ad  
arcem.*

Sic sentimus, salvo meliori iudicio, in hoc Conventu Sancti Ægidii Regalis Matritensis. Die 10. Februarii. Anno Domini 1692.

*Fr. Petrus de Sacedon.*

*Fr. Franciscus à Sancta Clara.*

## LICENTIA ORDINIS.

**F**R. Joannes à Sancto Dominico , Sacrae Theologiae Lector , huiusque alimae Provinciae Sancti Joseph Discalceatorum Seraphici Patris Nostri Francisci Minister Provincialis & servus , tenore praesentium , quantum ad Nos attinet, facultatem concedimus ut Liber inscriptus : *Tomus primus Cursus Philosophici Minoritarum Discalceatorum*, universam Aristotelis Logicam amplectens , per Fratres Nostros Fr. Petrum à Sancta Catharina , ac Fr. Thomam à Sancto Joseph , eiusdem Provinciae alumnos , & Sacrae Theologiae Lectores, iuxta nostri subtilissimi Doctoris Scoti mentem apprimè elaboratus , in lucem edi , & typis mandari possit , cum praesatum opus à viris doctis ipsius nostrae Provinciae , quibus examinandum commisimus , jam fuerit approbatum , & studentium utilitati maximè profuturum esse speremus. Datis in hoc Nostro Regali Sancti Aegidii Matritensi Conventu , die 20. Februarii . Anno Domini 1692.

*Fr. Joannes à Sancto Dominico , Minister Provincialis .*

De mandato Charissimi Fr. Nostri Provincialis

*Fr. Ildephonsus de Palomera .*

*Censura A. R. ac Doctissimi P. M. Fr. Marthia Navarro, & Aguilar, semper venerabilis Ordines Sanctissima Trinitatis, Redemptionis Captivorum, Dignissimi Filii, Sacra Theologia Lectoris, simulque emeritissimi Ministri, in suo litteratissimo Universitatis Complutensis Collegio eiusdem instituti.*

## A V E M A R I A.

M. P. S.

**J**USSU V. A. miratus fui, ne dicam vidi, egregium hoc opus plus dignum admiratione, quam laude. Titulus huius est: *Cursus Philosophicus Minoritarum PP. Discalceatorum*. Et benè quidem *Cursus* si liceat currere, quos videmus volare. Solùm Gigantibus attribuit Davidica vox tam celerem eursum: *Exultavit ut Gigas ad currendam viam*. Sed, ò bone Deus! unde *Minores* volantes, & *Gigantes* dumtaxat currentes? Fortasse non ineptè: *Qui abscondisti hac à Sapientibus, & Prudentibus, & revelasti ea Parvulis*. Non jam dicam *Cursum*, sed *volatum*, nisi moderamine instructus humilitatis Authorum *volatum* appellem *Cursum*.

Authores ergo non minus opus commendant SS. ac RR. PP. MM. Frater petrus à Sancta Catharina, & Frater Thomas à Sancto Iosepho illud elucidarunt, sed gloriam in titulo Religioni tribuerunt. O boni Filii *Minores Minorum*, sed inter *Majores Maximi* Matri cedentes gloriam, & vobis ipsis accipientes laborem! *Cursus Filiorum* est *Matris Cursus*? Duorum onus erit cunctæ Provinciæ decus? Sanè dicetis, quia *Gloria Matris est Filius Sapiens*. O Seraphica humilitas! Quid jam hos miror Sapientiæ rivos? Quid jam hos dissertissimos ingenii vestri fructus? Nam ut agebat

Hic.

Hieronymus : *Qui thesauros sapientia invenire desiderat , in se foveam humilitatis faciat.*

Sed invalida fuga coronæ dum merita coronant ipsa . Quid à gloria fugitis , si persequitur fugientes Gloria ? Hic bellè carmina modulata Gersonii.

*Prædicat , atque studet scriptor , largitur ,*

*Orat ,*

*Affligitur , sal dat , fontem , lucemque futuris ,*

*Ecclesiam dicat , armat , custodit , honorat.*

Hæc omnia merita Scriptorum , & hæc sanè gloria vestra.

Perlegi inquam una obediens pluries placens , & semper proficiens . Profunditas rationum suadet , subtilitas in suadendo elevat : acrimonia in oppugnando rapit , claritas in respondendo satisfacit . Nullibi vanitas , & in omnibus utilitas , ut videantur Chrysologo consuluisset dicenti : *Sive Sapientia , sive principatus , sive divitiæ ad communem utilitatem , non ad nocumentum conservorum uti oportet.*

Inveni namque veteres sententias novas , novas adeò securas , ut veteres , & utrasque clarissima luce , & non stylo ferreo pertactatas . Audi Plinium : *Res ardua vetustis novitatem dare , novis auctoritatem , obsoletis nitorem , obscuris lucem .* Hos benè dicam Sapientiæ proventus , non à vana tumescentes gloria , sed à vera exuberantes virtute . Canebat quidam.

*Quis mihi sit dignus Sapientis nomine quæris ?*

*Accipe ; cui virtus iam sapit , ille sapit.*

Immorarer laudibus , quin unquam laudes deficerent , si Authorum egrè non ferret moderamen . Non eorum sunt , quorum aures futilibus gloriolis , inanibusque præconiorum fumibus titillatur . Quare muneri iam incum-

bens commisso, non cenfor operis, sed ab opere doctus, nihil in eo vidi, quod orthodoxam fidem nostram offendat, aut bonis moribus contradicat. Unum quidem rigidè fortasse censorum, quod tale nempe opus plus antea in lucem non ediderint. Idcirco typis dignissimum est, quod omnibus profuturum sit, & ut Aurhorum eruditionem, ubertatem, atque doctrinam perhibeat. Sic existimo. Salvo, &c. Datum Compluti, in Collegio Sanctissimæ Trinitatis, Redemptionis Captivorum. Mense Martii, die 14. Anno Domini 1692.

*Fr. Mathias Navarro & Aguilar Minister.*

## NOI RIFORMATORI dello Studio di Padova.

**H**Avendo veduto per la fede di revisione, & approbatione del P. F. Antonio Leoni Inquisitore nel Libro intitolato *Cursus Philosophicus P. F. Petri à S. Catharina, & P. F. Thoma à Sancto Joseph*, non vi esser cos'alcuna contro la Santa Fede Cattolica, e parimente per attestato del Segretario nostro, niente contro Principi, e buoni costumi, concedemo licenza, che possi esser stampato, osservando gli ordini in materia di stampe, e presentando le solite copie alle pubbliche Librarie di Venetia, ed di Padova. Data dal Magistrato de' Riformatori dello Studio di Padova 12. Febbraio 1695.

( Ferigo Marcello Proc. Riform.

( Astenio Giustinian 2. Cav. Riform.

*Agostino Gadaldini Segretario.*

PRO.

## P R O L O G U S.

**M** Iraberis forsan, studiose Lector, quod coram, ac post tot Philosophiæ Cursus, quot (superno favente Numine, a quo omne datum optimum, & omne donum perfectum) Sapientissimi viri, præclara scientiarum lumina, adeò feliciter in lucem edidere, hunc nos (qui nostri ingenio tenuitatem, nec ignoramus, nec palam fateri erubescimus) nedum elaborare, verum, & prælo dare audeamus. Mirari tamen sanè defines, si rationem, qua ducti hoc elaborandum suscepimus opus, auscultare non dedignaris: non enim nos latet, studioforum sapientiam; nunquam (veluti decantatum in sacris litteris illud Sapientissimi Salomonis ferculum) charitate non exornatam, magis consilium inspicientem, quam opus considerantem (uti fecit Christus, cum pauperulam viduam, mittentem in Gazophylacium æra minuta duo vidit) facile cæterorum tenuitati ignoscere. Est ergo ratio, pro hoc qualicumque opere, voluntas, non aliquos edocere intendens, sed superiorum præcepto obtemperare desiderans; non ut alii præter nostros instruantur, sed ut nostræ Provinciæ studentes alumni aliququaliter educantur. Quorum, uti filiorum, in studiis profectura veluti vera Mater, nostra hæc Provincia in dies jugiter optans, ut animarum saluti incessanter incumbere queant (hoc enim semper fuit Seraphici Parentis nostri ex præcordiis votum, qui Divini Spiritus zelo agitato; non ut sibi soli viveret, sed aliis proficeret fuit divinitus instructus) hunc Philosophicum Cursum elaborari & in lucem edi decrevit: quo præ manibus habito, in aliis manuscribendis haud insumatur tempus: maximè cum hujus majorem partem  
jugi

jugi divinarum laudum , assiduæque religionum functionum assistentiæ ( prout monasticum decet institutum ) libari necesse sit , ita enim nos ( juxta nostræ Regulæ præscriptum ) vacare studio jubetur , ut sanctæ orationis , ac devotionis spiritus in nobis non extinguatur Ad quod , nedum , ut Minoritæ , talis Parentis filii , obligatur , sed ut Scotistæ , tanti Magistri Discipuli tenemur. Cui hæc inter alia fama carmina dicai.

*Nam sibi subtilis nomen subtilia donant ,*

*Quem vestris vilis , per nudus , chorda coronant.*

Malè certò scocizat ( ex illis quasi infert quidam subtilis alumnus ) qui studens assiduò super Scoti subtilitates , de ejus paupertate , oratione , & aliis dotibus , & virtutibus studium nullum.

Hunc esse nostri laboris scopum ( utinam vota nostra metam attingant ! ) facile quisque ex ipsa materierum serie , methodoque in ipsis servata agnoscere potest . Tripartitum ideò universum hoc tibi offerimus opus , ut ei brevi trium annorum curriculo ( ut moris in nostris scholis est juxta nostrarum constitutionum præscriptum ) dare operam valeas . Tomus prior , iam Logicam parvam ( Sumulas vulgò vocant ) quam magnam amplexatur . Secundus lib. 8. Physic. & brevem de Cælo , & Mundo Tractatum : Ac posterior denique duos de Ortu , & Interitu Libros , & tres de Anima continet , quibus coronidem Metaphysica imponit.

In omnibus his , ut veritas nudè appareat , fucatas loquendi phrasas , abstrusasque fermocinandi voces ( inania quidem verba ) pro viribus vitamus , inest enim illis ( ut Ciceronis utamur verbis ) quidam sine fūco , ullo veritatis colore. Sententias communiore , utpotè clariori , solidiorique nitentes fundamento , faciliores , nec non discurrendi modos amplectimur ; veritas namque non latebras , sed patula quærit lucem , non tenebras amat ; maximè cum animus noster



in hoc qualicumque labore alius non sit, quam nostros adiuuvare Religiosos in subtilis Doctoris Scoti subtili enucleanda Doctrina, vel pro tenuitate nostra in refellendis ipsius adversariis (modestia, quæ Scotistam talis Magistri disciplina instructum jure peculiari decet) impugnationibus, aut responsis.

Aliquibus in extricandis difficultatibus quandoque, licet non plus æquo, immoramur: etenim non sunt longa (canebat quidam) quibus nihil est, quod demere possis. Et D. August. mentionem faciens, de quodam eius amico, Nebridius nomine Epist. 23. inquit: *Valde ode- rat de questione magna responsionem brevem; & post pauca subdit; indignum deputans, qui ta- lia quæreret, cum de re tanta, quam multa dici possent, deberentque, nesciret.* Aliarum in examine aliquando, fortassis minùs æquo, detine- mur; vel quia ad Philosophum haud directè spe- rant; cujusmodi sunt quædam circa mensuram, grossitiem, & distantiam Cælorum, numerum- que Astrorùm; vel quia plus curiositati, quam Philosophiæ, seu amoris scientiæ utilitati con- ducunt; cuiusmodi sunt aliquæ circa meteorolo- gicas impressiones; quas omnes propterea non absque consilio, omittimus exagitare. Sic expe- dire autumamus, & libri ita exierunt, nisi forte (ut declamat Cicero) nos fallit communis phi- lantia.

Non nos latet, quempiam facillè videre posse, non ex proprio Marte pluries, sed ex veterum Scotistarum, Neotericorumque subtilium do- ctrina, hoc nos condidisse opus, quod vel hac ratione, quod nostrum non sit, nedum excusa- tum, verum & ducimus commendatum. Non hoc inficiamur, palam imò ingenuè fatemur, Haud tamen ob hoc nostra audax, etiam sanè obediens, à navando operam ei, fiducia cessit: nil ergo mirum, necesse potius, plura in illo in- venienda, quæ tam in Antiquorum, quam in

Recen-

Recentiorum scriptis reperientur. Quid ? Nonne necessario id accidit ex eodem fonte haurientibus ? Eundum ne nobis erat extra communes Solis, & Mundi vias, ut alias fontes, rivosve, quæreremus ? Apage.

Hæc in hac præfatione, lector ingeniose, subtexere, & præmittere libuit, non nostra defendere philistica mente curantes, sed à te corrigi, & emendari ingenuè intendentes. Quod enim veritate, fide, ac ratione probandum dixeris, hoc dumtaxat, & nos scripsisse fatemur: quod autem improbandum sincera duxeris mente, hoc & nos libenter, quasi à vero dissonum, expressè retrastamus. Vale.



## PRÆLUDIUM

## QUODDAM.

**D**uplici Vocabulo communiter hæc facultas appellari solet scilicet, *Logica, & Dialectica*: Logica dicitur à verbo græco, *logos*, quod latine idem sonat, ac sermo internus, seu ratiocinatio, & sic idem est Logica, ac facultas ratiocinandi: Dialectica verò dicitur à verbo græco *Dialegetoma*, quod Latine idem sonat ac disputatio, & sic idem est *Dialectica*, ac facultas disputandi, seu differendi; unde eadem scientia, ars, seu facultas duplici hoc nomine explicatur, quod in re idem videtur esse, & ex utroque colligitur, quod finis, & scopus Logicæ est dirigere operationes intellectus in ordine ad bene disputandum:

2 Communiter dividitur ab Authoribus hæc facultas in duos tractatus, quorum primus dicitur Dialectica, seu Logica parva, & nunc, juxta communem usum, etiam dicitur Sumulæ: Secundus vero dicitur Logica magna; ratio huius est, quia primus brevis, & facili ordine tradit regulas bene disputandi; secundus verò longo, & amplius difficili sermone magnas difficultates attingit.

3 Dividitur etiam primus tractatus in tres Libros, ad dirigendas recto ordine tres operationes intellectus; quarum prima dicitur simplex apprehensio, & est simplex cognitio rerum, nulla facta compositione unius cum alia, sive res sint incomplexæ, ut cognitio Petri, lapidis, &c. sive complexæ, ut cognitio Petri albi, lapidis viridis, &c. Secunda dicitur iudicium, & est cognitio rerum facta.

facta comparatione inter illas, unam de alia affirmando, vel negando, ut quando cognoscimus hominem, & albedinem, hanc compositionem, faciendo: *Homo est albus*. Tertia dicitur discursus, & est cognitio ex aliis antecedentibus cognitionibus deducta, ut quando ex his cognitionibus: *Omnis homo est animal: Petrus est homo*, hæc infertur: *Ergo Petrus est animal*, & dicitur discursus, quia est quasi cursus ab uno actu intellectus in alium. In primo Libro agitur de pertinentibus ad primam intellectus operationem: in secundo de pertinentibus ad secundam; & in tertio de pertinentibus ad tertiam.

4 Quia tamen in ipsa traditione regularum in ordine ad differendum se offerunt aliquæ difficultates, quæ jam communiter ad disputationem reducuntur, & quæ tyronibus solent maximam confusionem afferre, propter ignorantiam adhuc terminorum, quibus exagitari solent, ita ut quasi territi, & desperati insecutionem studiorum perhorrescant, & ab eis discedere cogantur, huic incommodo occurrere intendentes, quasi necessarium duximus hunc Sumularum tractatum in duas partes dissecare, in quarum prima tantum Dialecticas regulas, cum explicatione vocum, & terminorum, quibus communiter in disputationibus utitur, sine admittance difficultatum proponemus; in secunda verò per aliquas disputationes, quæstiones, quæ ad majorem intelligentiam ipsarum regularum conducunt, examinabimus, & pro nostro captu resolvemus.

# PARS PRIM<sup>a</sup>

## LOGICÆ PARVÆ,

seu Sumularum.

**A**Ntequam peculiariter ad tradendas Dialecticas regulas in hac prima parte Sumularum accedamus, quia omnis facultas, & precipuè Logica, est quasi catenula ex omnibus, quæ in illa tractabatur ordinata, ita ut unum ab alio aliquo modo dependeat in sua clara notitia, & cognitione, ut aliqua facilitate ad intelligentiam illorum ingredi possit, aliqua generaliter debent præsupponi.

2 Igitur scire oportet, quod argumentatio, in qua unum ex alio deducitur in ordine ad veritates in qualibet materia inquirendas, communiter syllogismus, vel enthymema. Syllogismus constat tribus propositionibus, ut patet in hoc; *Omnis homo est animal; Petrus est homo; Ergo Petrus est animal*, quarum prima dicitur propositio major; secunda propositio minor, tertia propositio consequens, seu consequentia; illa particula *ergo* dicitur illatio, seu nota illationis, seu consecutionis; etiam duæ propositiones, scilicet, major, & minor, dicuntur præmissæ, quia præmittuntur ad consequentiam, & ex illis ipsa consequentia deducitur.

3 Enthymema tantum duabus propositionibus constat, ut patet in hoc; *Omnis homo est rationalis; Ergo Petrus est rationalis*, quarum prima dicitur antecedens, secunda verò dicitur consequens; Advertendum tamen est, quod in Enthymemate semper subintelligitur altera propositio, quia est argumentatio imperfecta, & reduci debet ad perfectam, scilicet, ad syllogismum, etiam in prædicto Enthymemate subintelligitur

tur hæc propositio; *Petrus est homo* qua illi superaddita, formatur hic syllogismus; *Omnis homo est rationalis; Petrus est homo; Ergo Petrus est rationalis.*

4 Propositio est, in qua unum de alio dicitur ut patet in ista; *Petrus est homo*, in qua de Petro dicitur, seu prædicatur, quod est homo. Ex quo cognoscitur, quod propositio necessario debet habere tres voces, quarum una dicitur subiectum altera unio, seu copula, & altera prædicatum. Subiectum est illud, de quo aliquid dicitur, seu prædicatur, ut est ly *Petrus* in prædicta propositione; quia de illo dicitur, & prædicatur ly *homo*. Prædicatum est illud, quod dicitur, seu prædicatur de alio, ut est ly *homo*, quia dicitur, & prædicatur de ly *Petrus*. Unio, seu copula est, quæ unit subiectum cum prædicato, ut ly *est*, quia unit illa extrema *Petrus*, & *homo*.

5 Vbi advertendum est, quod tres prædictæ voces non semper explicitè in propositione collocantur, sed aliquando aliqua illarum implicitè continetur, ut patet in hac; *Petrus currit*; quæ explicitè duabus tantum vocibus constat, implicitè verò tribus, nam facit hunc sensum; *Petrus est currens*. Similiter advertendum est, quod aliquando propositio plusquam tribus vocibus constat, ut patet in hac; *Christus Dominus Filius Dei, & immaculata Virginis Maria est noster Redemptor*; sed in illa, & aliis similibus omnes voces ad tres supradictas reducuntur; nam, quæ ponuntur ante copulam, unum tantum integrum subiectum constituent; quæ verò post copulam, unum tantum integrum prædicatum; Ex quo manet firmum, quod solum subiectum, prædicatum, & unio, seu copula ad integritatem propositionis concurrunt.

6 Adhuc subiectum, & prædicatum sumi potest vel in actu, vel in potentia. Subiectum, & prædicatum in actu, quod etiam dicitur formale,

male, est illud, quod actualiter propositionem constituit, ut *Petrus*, & *homo*, in hac: *Petrus est homo*. Subiectum, & prædicatum in potentia, quod etiam dicitur fundamentale, est illud, quod actualiter propositionem non constituit; potest tamen illam constituere, ut sunt prædictæ voces: *Petrus*, & *homo*. seorsim sumptæ, si ve extra propositionem.

7 Etiam potest sumi subiectum, & prædicatum ut *quo*, & ut *quod*; ut *quod* est id, quod significatur per voces, quæ propositionem constituunt; ut *quo*, sunt ipsæ voces, quibus aliquid significatur; ut patet in hac propositione: *Petrus est homo*, in qua ipse Petrus in re, & ipse homo, prout significantur per illas voces: *Petrus*, & *homo*, sunt subiectum, & prædicatum ut *quod*, ipsæ autem voces, prout significant Petrum, & hominem, sunt subiectum, & prædicatum ut *quo*, & sic vocantur, quia sunt quasi instrumenta, quibus utimur ad prædicandum unum de alio.

8 Advertere autem oportet ad auferendam æquivocationem, quod aliquando voces non ponuntur in propositione pro rebus significatis per ipsas, sed pro se ipsis, & tunc ipsæ voces sunt simul subiectum, aut prædicatum ut *quod*, & ut *quo*; in ista enim propositione: *Petrus est nomen*, ly *Petrus* est subiectum ut *quo*, illo enim utimur in propositione, est etiam subiectum ut *quod*, quia ponitur pro se, & non pro re significata, non enim dicimus de vero Petro, quod sit nomen, benè tamen de illa voce *Petrus*.

## LIBER PRIMVS

### Summarum.

**P**Ræmissis generalibus notitiis supra positis, accedimus in speciali ad agendū in hoc primo libro de pertinentibus ad simplicem apprehen-



hensionem, primam operationem intellectus, quæ per sequentia capita, brevitatem, & claritatem possibili proponemus. Sit ergo.

## PRIMUM CAPITULUM.

*In quo agitur de termino, & eius  
divisionibus.*

1 **T**erminus, juxta nominis Etymologiam, idem videtur sonare, ac extremum, & sic sumitur terminus in quadam latissima acceptione pro limite, seu extremo cuiuscunque rei, & solet his verbis describi: *Terminus est extra, quod nihil est rei, & intra, quod res tota continetur*, ut exemplificari potest in aula, cujus parietes dicuntur extrema illius, quia intra illos tota aula, & extra illos nihil aulae continetur; in hac acceptione non loquimur de termino in presenti, quia est quasi generica, & conveniens omnibus terminis, sed loquimur de termino in speciali, prout ad præsens institutum spectat, & ad instrumenta logicalia deservit.

2 Terminus in hac Logica acceptione sic definitur communiter ad Scotistis, & à pluribus aliis: *Terminus est extremum propositionis*, quæ definitio patet à simili de termino in prima acceptione sumpto; nam si terminus in communi est ultimum, seu extremum alicuius rei, etiam terminus in speciali erit extremum, seu ultimum illius rei; unde terminus propositionis logicalis erit extremum illius.

3 Plures sunt divisiones termini logicalis. Primò dividitur terminus in subiectum, & prædicatum, quorum natura jam supra manet explicata. Deducitur hæc divisio ex Aristotele 1. Priorum cap. 1. dicente: *Terminum voco, in quem resolvitur propositio, ut prædicatum, & id, de quo id, vel appposito, vel separato, esse, vel non esse, prædicatur.*



4 Secundò dividitur terminus in communi; in mentalem, vocalem, & scriptum. Mentalis est extremum propositionis mentalis; vocalis extremum propositionis vocalis; & scriptus extremum propositionis scriptæ: quæ divisio sumitur ex triplici genere propositionis, hæc enim propositio: *Petrus est homo*, si tantum mente fiat, dicitur mentalis; si verò voce proferatur, dicitur vocalis; si autem scripto, dicitur scripta.

5 Terminus mentalis subdividitur primò in ultimum, & non ultimum. Non ultimus est cognitio, seu conceptus, quo vox significativa cognoscitur, quin cognoscatur eius significatum; ut cognitio, qua cognoscitur hæc vox *homo*, quin cognoscatur homo significatus per illam, & dicitur non ultimus, eò quòd intellectus in eius cognitione non quiescit, imò rem significatam per illam adhuc cognoscere appetit: Ultimus est cognitio rei significatæ per vocem, ut cognitio, qua homo significatus per prædictam vocem *homo* cognoscitur; & dicitur ultimus, eò quòd quiescit intellectus in tali cognitione, nihil deinceps desiderando. Vbi advertendum est, quòd quando cognoscitur vox non significativa, ut hæc vox *Blitiri*, cognitio illius est terminus ultimus, quia in tali voce, post cognitionem illius, nihil remanet, quod intellectus cognoscere possit appetere.

6 Subdividitur secundò terminus mentalis, tam ultimus, quàm non ultimus in formalem, & obiectivum. Formalis est ipsa cognitio, & dicitur formalis; quia est forma, qua cognoscentes denominamur; obiectivus est ipsa res cognita, & dicitur obiectivus; qua est obiectum ipsius cognitionis.

7 Subdividitur tertio terminus mentalis formalis in directum, & reflexum. Directus est cognitio rei distinctæ ab actu ipsius potentie cognoscitivæ, ut cognitio, qua cognoscitur homo, lapis,

**lapis**, &c. Reflexus est cognitio, qua cognoscitur alia cognitio eiusdem potentiae, ut cognitio, qua cognoscitur altera cognitio, qua cognoscitur homo; primus dicitur directus, eo quod illo medio, quasi via recta, tendit intellectus in obiectum; secundus vero dicitur reflexus; quia illo medio, quasi reflectitur supra se intellectus, ideoque dicitur, quod est cognitio cognitionis eiusdem potentiae; nam cognitio, qua cognoscitur cognitio alterius potentiae, non est reflexa, sed directa.

8 Tertiò dividitur terminus in communi, in significativum, & non significativum. Significativus est, qui aliquid significat, ut *homo*. Non significativus est, qui nihil significat, ut *Blitiri*. Terminus significativus multipliciter subdividitur.

9 Primò in categorematicum, & syncategorematicum. Categorematicus est, qui se solo potest esse in propositione subiectum, vel prædicatum. Dicitur categorematicus à verbo græco *Categoreo*, quod latine idem sonat, ac *absolutè prædico*, seu *significo*; huiusmodi sunt omnia nomina substantiva, ut *homo*, *albedo*, &c. Syncategorematicus est, qui se solo nequit esse integrum subiectum, vel prædicatum in propositione, & dicitur à verbo græco *syncategoreo*, quod latine idem sonat, ac *simul cum alio prædico*, seu *significo*; huiusmodi sunt hæc signa: *Omnis*, *nullus*, *aliquis*, &c. Et omnia, quæ non aliqua, sed aliqualiter significant, ut sunt hæc adverba: *velociter*, *sapienter*, &c.

10 Terminus categorematicus subdividitur in complexum, qui etiam dicitur compositus, & in incomplexum, qui etiam dicitur simplex. Complexus est, cuius partes per se sunt significativæ, ut *homo*, *albus*, *Paulus & Ioannes*. Incomplexus est, cuius partes per se non sunt significativæ, ut *homo*, *leo*, &c. Pro cuius intelligentia advertendum est, quod quando dicimus,

mus, quod partes termini complexi sunt per se significativæ, ita debet intelligi, quod eandem significationem conservent separatim, quam habebant conjunctim, ut patet in illo termino *homo albus*; unde excluduntur à ratione termini complexi hæc nomina *Dominus, Respublica, &c.* Cujus partes, licet separatæ significant, sed non idem, quod conjunctæ significabant: Advertendum etiam est, quod partes termini complexi debent habere inter se aliquam connexionem, sive per concordantiam grammaticalem, ut *homo albus*, sive per conjunctionem, ut *Paulus, & Joannes*; unde hæc nomina: *Petrus, lapis, leo*, licet simul sumantur, non sunt terminus complexus, sed plures termini incomplexi; quia nullam connexionem ex supradictis habent inter se. Similiter est advertendum, quod partes termini complexi debent significare, vel diversas res, ut in exemplis supradictis, vel diversas formalitates, ut *Deus sapiens*; unde hæc nomina: *Marcus Tullius Cicero*; non constituunt terminum complexum, eo quod eandem rem significant.

11 Hæc est communis explicatio termini complexi, tamen Mastrius 1. p. institutionis Dialect. cap. 2. aliter terminum complexum explicat, scilicet, quod est ille, qui, licet una tantum voce proferatur, generat tamen conceptum complexum, & ponit exemplum in his vocibus: *Nemo, amo semper*, quas dicit æquivalere: *Nullus homo, sum amans, omni tempore*; quod explicat per oppositum ad terminum incomplexi, nam, licet pluribus vocibus proferatur, si tamen tantum generet conceptum incomplexi, est terminus incomplexus, ut patet in illo termino: *Marcus Tullius Cicero*, ut supra dictum est; sed prior explicatio est communior inter Autores.

12 Terminus incomplexus subdividitur in copulativum, & non copulativum. Copulativus  
*Cursus Philos. Tom. 1.* B est,

est, qui plura significat, ut *homo*, qui significat plures homines. Non copulativus est, qui unum tantum significat, ut *Petrus*, qui tantum unum individuum hominis significat.

13. Terminus copulativus etiam subdividitur in collectivum, & divisivum. Collectivus est, qui significat plura, ita ut non possit predicari de quolibet illorum in particulari, ut *Civitas*, *Respublica*, *Familia*, &c. Divisivus est, qui ita significat plura, ut de quolibet possit specialiter predicari, ut *homo*, *animal*, &c.

14. Adhuc subdividitur terminus in complexus infinitum, & in infinitum. Finitus est, qui rem determinatam significat, ut *homo*, *leo*, &c. Infinitus est, qui cum plura significet, non determinat quod significat, sed quod non significat, ut *non homo*, in ista propositione: *Non homo currit*, in qua homo determinatè excluditur à cursu, non tamen determinatur cui cursus conveniat.

15. Ubi advertendum est, quod negatio dupliciter potest sumi, scilicet, negative, & infinitanter. Negative sumitur, quando prædicatum removetur à subjecto, & tunc dicitur negatio malignantis naturæ; quia omnia, quæ invenit post se, destruit, ut patet in hac propositione: *Homo non est lapis*, in qua absolute negatur de homine, quod importat prædicatum *lapis*; absque eo quod de illo aliquid determinatè, vel indeterminatè affirmetur. Infinitanter sumitur, quando tantum afficit subjectum, vel prædicatum, removendo ab illis aliquam rationem, ut in his propositionibus: *Non homo currit*: *homo non est lapis*, in quarum prima negatio removet subjectum, scilicet hominem à cursu, & in secunda removet prædicatum, scilicet lapidem, ab eo quod est homo. Advertendum etiam est, quod terminus transcendens (de quo infra) ut est *ens*, non potest fieri per negationem terminus infinitus, quia  
cū

cùm omnia significet, seu per omnia genera rerum divagetur, si ei præponatur negatio dicendo: *non ens*, absolutè negatur, & non remanet aliquid, quod significet, adhuc indeterminatè; cum omnia rationem entis participant.

16 Secundò dividitur terminus significativus in concretum, & abstractum. Concretus est, qui significat formam cum concernētia ad subiectum, vel suppositum, ut *albus*, qui significat albedinem non per se solam, sed cum concernentia ad subiectum, in quo est; & *homo*, qui significat humanitatem, non per se solam, sed cum concernentia ad supposita, in quibus est. Abstractus est, qui significat formam sine concernentia ad aliud, ut *albedo*, quæ significat albedinem sine concernentia ad subiectum, *humanitas*, quæ significat naturam humanam sine concernentia ad supposita.

17 Tertiò dividitur terminus significativus in absolutum, & relativum. Absolutus est, qui significat rem sine ordine ad aliud, ut *homo*, *lapis*, &c. Relativus est, qui significat formam, afficientem subiectum in ordine ad aliud, ut *Pater*, qui significat paternitatem afficientem subiectum in ordine ad filium. Vbi advertendum est, quod terminus relativus à pluribus appellatur connotativus, dicit aliqui terminum connotativum aliter explicent, scilicet, quod est ille, qui significat formam per modum alteri adjacentis, sive sit relativus, ut *Pater* in exemplo supraposito, sive non, ut *album*, quod significat albedinem per modum adjacentis subiecto illam habenti, & in hoc, inquit, distinguitur à termino concreto, quod concretus latius patet, quam connotativus; nam omnis terminus connotativus est concretus; non tamen omnis concretus est connotativus, quod idem est, ac dicere, quod terminus connotativus est concretum accidentale, ut *album*: v. gr. quia concretum ac-

cidente semper significat formam per modum alteri adjacentis; adjacentia enim est propria accidentis; concretum verò substantiale non est terminus connotativus ut *homo*, quia significat formam per modum per se stantis, quod est proprium substantiæ, ut opponitur accidenti.

18 Sed quidquid sit de hoc, quod potius videtur reduci ad quæstionem de nomine, quàm de re, prima explicatio videtur magis propria; quia hic sumitur terminus connotativus: prout opponitur absoluto, & certum est, quod relativum immediatè opponitur absoluto. Vbi claritatis gratia advertendum est, quod quando terminus concretus est connotativus, hoc provenit ex diverso capite, nam est concretus, ut significat formam concernentem subjectum; & est connotativus, ut significat formam ordinantem subjectum ad aliud, ut patet in hoc termino *Pater*, qui est terminus concretus, ut significat paternitatem concernentem subjectum, in quo est: & est connotativus, ut significat ipsam paternitatem ordinantem subjectum, in quo est, ad filium.

19 Quartò dividitur terminus significativus in denominativum, & denominantem. Denominativus est, qui nomen, & significationem recipit ab alio, ut *album*, qui nomen, & significationem accipit ab albedine. Denominans est, qui alteri tribuit nomen, & significationem, ut *albedo*, qui nomen, & significationem tribuit huic termino *album*. Aliqui dicunt, quod secundum Arist. illi tantum termini sunt denominativi, qui pertinet ad prædicamentum accidentis; sed hoc tantum reducitur ad quæstionem de nomine, seu ad auctoritatem, absque eo quod aliqua videatur apparere ratio; nam tam propiè videtur accipere nomen, & significationem hic terminus *homo* de prædicamento substantiæ ab humanitate, quam

quam hic terminus *album* de prædicamento accidentis ab albedine.

20 Quintò dividitur terminus significativus in communem, & singularem. Terminus communis est, qui significat rem pluribus communem, cui non repugnat multiplicari cum sui divisione, ut *homo*, qui ita significat plures homines, ut in illis cum sui divisione multiplicetur. Singularis est, qui significat unam rem omnino sin pluribus immultiplicabilem, ut *Petrus*; ex quo deducitur, quod hic terminus *Deus*, non est terminus communis, quia licet significet rem tribus convenientem, scilicet, Patri, & Filio, & Spiritui Sancto; tamen, non multiplicatur in illis, imò repugnat multiplicari; quia una, & eadem numero essentia divina omnino indivisibilis est in tribus. Vbi communiter notant Authores, quod ut aliquid sit terminus communis non est omnino necessarium, quod actualiter sit in pluribus multiplicatum, sed sufficit, quod ex natura sua, illi non repugnet multiplicatio; unde sequitur, quod isti termini; *Sol*, *Luna*, & his similes sunt termini communes, quia licet actualiter non dentur plures Soles, nec plures Lunæ; quod autem dentur, nullatenus repugnare videtur.

21 Terminus communis subdividitur in transcendentem, & non transcendentem, Transcendens est; qui ita significat rem communem, ut repatitur in omnibus cujuscunque generis, & prædicamenti; hujusmodi sunt *ens*, & ejus passionēs, quæ sunt *res*, *verum*, *bonum*, *aliquid*, *unum*, quæ omnia cum suis litteris initialibus hanc dictionem constituunt: *RVBAV*. Non transcendens est, qui significat naturam communem alicujus determinati generis, & prædicamenti, ut *homo*, *animal*, &c. qui terminus etiam dicitur categoricus, seu prædicamentalis; quia pertinet ad alia

quod prædicamentum determinatum, quod etiam dicitur categoria.

22. Adhuc subdividitur terminus communis in univocum, & æquivocum. Univocus est, qui convenit pluribus secundum idem nomen, & secundum eandem rationem significatam, ut *homo*, qui convenit Petro, & Paulo, &c. secundum nomen, & rationem significatam. *Æquivocus* est, qui convenit pluribus secundum idem nomen, non tamen secundum rationem significatam; quia non unam tantum, sed plures rationes significat, ut *canis*, qui secundum nomen convenit cani terrestri, cœlesti, & marino: non tamen secundum rationem, quia ratio significata per illud nomen est diversa in illis tribus. Prædictæ descriptiones deducuntur ex Aristot. qui in antepædicamentis cap. 1. sic univoca, & æquivoca definit; *Univoca sunt, quorum nomen est commune, & secundum nomen eadem eadem substantia ratio. Æquivoca sunt, quorum nomen est commune; ratio verò substantia nomini accommodata diversa.* Pro quibus notandum est, quod univoca, & æquivoca dupliciter considerantur, scilicet activè, & passivè; activè dicuntur in numero singulari univocum univocans, æquivocum æquivocans; passivè verò dicuntur in numero plurali univoca univocata, æquivoca æquivocata; nomen commune illa plura significans est activè univocum univocans, &c. Illa plura significata sunt passivè univoca univocata, &c. & hæc definit Arist.

23. Terminus æquivocus adhuc subdividitur in æquivocum à consilio, & in æquivocum à casu. *Æquivocus à consilio* est, qui licet significet naturam diversam in æquivocatis; habet tamen in illis aliquam proportionem, ut *sanum*, quod significat sanitatem in animali, urina, & medicina, in quibus est secundum diversam rationem; habet tamen in illis aliquam



quam proportionem, nam in animali reperitur formaliter sanitas, in urina, tamquam in signo, & in medicina, tamquam in causa. Hic terminus æquivocus appellatur etiam analogus, & activè sumptus, id est, prout est nomen analogum analogans; definitur definitione supradicta; passivè verò, id est, prout analogum analogata dicit, sic potest definiri per similitudinem ad univoca, & æquivoca, *Analogi sunt, quorum nomen est commune, & ratio substantia diversa; habet tamen in illis aliquam proportionem, prout significantur prædicto nomine.* Terminus æquivocus à casu est, qui significat naturam communem nomine, in substantia verò diversam, & sine aliqua proportionem, ut canis in exemplo supraposito.

24 Ubi adverte, quod terminus, qui respectu aliquorum dicitur æquivocus, respectu aliorum potest dici univocus; ut patet in hoc termino *canis*, qui respectu canis cœlestis, terrestris, & marini dicitur æquivocus ut supra, respectu verò plurium specierum canis terrestris dicitur univocus. Adverte etiam, quod nomen analogum absolute prolatum intelligitur significare rem cui magis propriè, & formaliter convenit, unde ortum est illud commune axioma: *analogum per se sumptum stat pro famo-  
siori significato.*

25 Terminus singularis etiam subdividitur in determinatum; & est, qui rem certam, & determinatam significat; ut *Petrus*; in demonstrativum, & est, qui pronomine demonstrativo afficitur, ut *hic homo*: in collectivum, & est, qui in numero singulari plura conjunctim significat, ut *Matritum, Toletum, &c.* In ex suppositione; & est, qui licet plura posset significare, ratione suppositionis unum tantum significat, ut *Virginis Filius*; & in vagum, & est, qui licet unam tantum rem significet, significat illam indeterminatè, & con-

fusè, ut *quidam homo*; quæ propter etiam dicitur terminus confusus.

26 Sexto dividitur terminus significativus in terminum primæ intentionis, & secundæ intentionis. Terminus primæ intentionis est, qui significat rem secundum esse, quod habet à parte rei independenter à consideratione intellectus, ut *homo*, *lapis*, &c. Terminus secundæ intentionis est, qui significat rem secundum aliquod esse, quod habet à consideratione intellectus, ut *subiectum*, *propositio*, *genus*, &c. De prima, & secunda intentione amplius in Logica magna, hæc pro præsentī instituto sufficiant.

27 Septimò dividitur terminus significativus in terminum primæ impositionis, & secundæ impositionis. Terminus primæ impositionis est, qui res ipsas à vocibus significativis distinctas significat, ut *homo*, *lapis*, &c. qui dicuntur termini primæ impositionis, quia prius inventi, & impositi sunt ad ipsas res significandas. Terminus secundæ impositionis est, qui ipsas voces significativas significat, ut *dictio*, *nomen*, *copula*, &c. qui dicuntur termini secundæ impositionis, quia positi jam illis prioribus ad res significandas, inventi, & impositi sunt isti ad ipsos terminos, seu voces significativas significandas.

28 Hucusque loquuti sumus de terminis, nulla facta comparatione inter illos, possunt tamen inter se comparari, & ut sic alii dicuntur impertinentes, alii pertinentes. Impertinentes, sunt, qui non se mutuò inferunt, nec inter se repugnant, ut *albus*, *justus*, non enim valet: *Est justus: ergo albus*: neque è contra: *Est albus; ergo justus*; non tamen repugnat, quod justus sit albus. Pertinentes, sunt, quorum unus infert alium, vel unus alteri repugnat; si unus infert alium; dicuntur pertinentes sequela, ut *homo*, *risibilis*, valet enim; *Est*  
*homo*

*homo* ; ergo est risibilis : si unus repugnat alteri , dicuntur pertinentes repugnantia , ut *homo* , *leo* , valet enim : Est *homo* ; ergo non est *leo* .

20 Deinde pertinentes sequela alii sunt convertibiles , alii inconvertibiles . Convertibiles sunt , quorum unus infert alium , & è contra ; ut *homo risibilis* , valet enim : Est *homo* : ergo est risibilis , & è contra : Est risibile ; ergo est *homo* . Non convertibiles sunt , quorum unus infert alium , non verò è contra , ut *homo* , *animal* : valet enim : Est *homo* : ergo est *animal* , non verò è contra : Est *animal* : ergo est *homo* .

30 Etiam pertinentes repugnantia alii sunt oppositi , alii non oppositi . Non oppositi sunt , quibus repugnat esse idem , non ex eo , quòd habeant inter se aliquam oppositionem ; sed quia sunt res distinctæ , ut *homo* , *lapis* . Oppositi sunt , quibus repugnat esse idem per aliquam oppositionem , quam habent inter se ; & quia quadruplex est oppositio , scilicet , contradictoria , contraria , privativa , & relativa , etiam termini oppositi sunt in quadruplici differentia . Alii dicuntur oppositi contradictoriè , & sunt , quorum unus negationem alterius dicit , ut *homo* , non *homo* : alii dicuntur oppositi contrariè , & sunt , qui significant duas qualitates ab eodem subjecto se mutuo excludentes , ut *calidum* , *frigidum* . Alii dicuntur oppositi privativè , & sunt , quorum unus dicit aliquam formam , & alter carentiam ipsius formæ in subjecto apto ad illam habendam , ut *videns* , *cæcus* : alii dicuntur oppositi relativè , & sunt , quorum unus dicit ordinem , seu habitudinem ad alium , ut *Pater* , *filius* . Ethæc sufficiant pro notitia terminorum .

## SECUNDVM CAPITVLVM.

*In quo traditur aliqua signorum notitia.*

1 **Q**uia communiter explicantur termini, & alia instrumenta logicalia per voces, quæ sunt signa rerum, quas significant; ideò communiter Authores hic aliquam signorum notitiam adducunt; igitur signum in communi sic potest definiri: *Signum est, quod propositum potentia cognoscitiva ducit ipsam potentiam in alterius rei cognitionem*, ut fumus, qui potentia cognoscitivæ propositus ducit ipsam in cognitionem ignis; aliæ definitiones signi solent ab Authoribus adduci, & præcipuè, quam tradidit D. Aug. lib. 2. de Doctrina Christi. scilicet: *Signum est, quod præter speciem, quam ingerit sensibus, aliud facit in cognitionem venire*; sed hæc definitio, ut ex se patet, solum convenit signo sensibili, & pro illo adduxit illam D. Aug. quia tamen datur aliquod signum, quod non sit sensibile, ideò supradictam definitionem asserimus loquendo de signo in communi, convenit enim tam signo sensibili, quàm non sensibili.

2 Signum ergo in communi primo dividitur in naturale, ad placitum, seu ex institutione, & ex consuetudine. Signum naturale est, quod ex natura sua habet ducere potentiam in cognitionem alterius, ut fumus, qui ex natura sua ducit potentiam in cognitionem ignis, & voces naturales, ut gemitus, & latratus canis, quæ ex natura sua ducunt potentiam in cognitionem animalis, à quo procedunt. Ad signum naturale reduunt aliqui causam, & effectum, eò quòd, cum sint formaliter relativa, sunt simul cognitione, & sic necessariò unum ducit in cognitionem alterius. Signum ad placitum est, quod ex impositione hominum ducit potentiam in cognitionem alterius, ut ramus pendens ante domum ex institutione.

tutione hominum ducit in cognitionem vini vendibilis, & voces significativæ ex institutione hominum ducunt in cognitionem rei significatæ. Signum ex consuetudine est, quod non ex natura sua, nec ex impositione hominum, sed ex quadam consuetudine ducit in cognitionem alterius, ut adventus canis, qui non repræsentat naturaliter, nec ex impositione hominum adventum Domini, ex quadam tamen consuetudine ducit potentiam in cognitionem talis adventus Domini. Aliqui intendunt reducere signum ex consuetudine ad signum naturale, eo quod consuetudo est altera natura, sed hoc reducitur ad quæstionem de nomine, de qua parum est curandum.

3 Deinde signum ad placitum dividitur in doctrinale, & artificiale. Doctrinale est illud, quod deservit ad doctrinas, & scientias comparandas, ut sunt voces, & scripturæ. Artificiale est, quod non deservit ad aliquam doctrinam comparandam, sed ad alia negotia, ut pulsatio cymbali ad audiendum sacrum, &c.

4 Secundò dividitur signum in commune, in formale, & instrumentale. Signum formale dicitur, quod non est prius cognitum, sed est ratio formalis cognoscendi aliud, ut cognitio, qua cognosco hominem, est signum formale hominis, quia non est prius cognita, sed est ratio formalis cognoscendi illum. Signum instrumentale dicitur illud, quod cognitum ducit in cognitionem alterius, ut sunt omnia signa supradicta, quæ prius cognoscuntur, & postea ducunt potentiam in cognitionem rei significatæ. Hoc signum dicitur instrumentale, quia cognitione illius utimur, tamquam instrumento ad cognitionem alterius. Aliæ divisiones signi solent adduci, quæ nullatenus pertinent ad præsens institutum, & magis confusionis, quam utilitatis præferunt.

## TERTIVM CAPITVLVM.

*In quo agitur de aliquibus affectionibus terminorum.*

1 **P**Lures sunt terminorum affectiones; quarum notitia valde necessaria est ad cognoscendas veritates propositionum; quia tales affectiones aliquando solent variare propositionis sensum, ideòque postquam de terminis in antecedentibus egimus, hic de prædictis affectionibus recto ordine venit agendum; Igitur

2 Prima affectio terminorum dicitur suppositio, & est acceptio termini pro aliquo in propositione, ut in hac: *Petrus est homo*, ly *Petrus* supponitur pro Petro significato per illum terminum, vel pro conceptu, quo cognoscitur ipse Petrus, de quo suo loco in disputationibus; nam quæstio est inter Authores, an termini vocales supponantur pro rebus, an pro conceptibus. Ubi advertendum est, quod tria necessario inveniuntur in suppositione, scilicet, id quod supponit, id quod supponitur, & id cujus loco supponitur, in hac enim propositione: *Petrus est albus* id, quod supponit est homo, qui conficit propositionem, id quod supponitur est terminus *Petrus*; & terminus *albus*, id, cujus loco supponitur, est res significata per prædictos terminos, vel conceptus mentales ipsarum rerum, juxta diversas sententias; ex quo aliqui dixerunt, non propriè loqui, dum dicitur, terminum supponere pro alio, benè tamen dum dicitur terminum pro alio supponi; quia terminus est, qui supponitur passivè; non verò, qui activè supponit; nam hoc solum competit homini propositionem conficienti.

3 Suppositio dividitur in materialem, & formalem. Materialis est quando terminus sumitur pro se ipso, & non pro re significata per illum, ut in hac propositione: *Homo est nomen*, in qua ly *homo* supponitur materialiter, quia sumitur pro ipsa voce, non verò pro re significata; ex quo sequitur, quod voces non significativæ semper supponuntur materialiter. Suppositio formalis est, quando terminus sumitur pro re significata per illum, ut in hac propositione; *homo est animal*, in qua termini supponuntur formaliter, quia non pro ipsis vocibus, sed pro rebus significatis per illas accipiuntur.

4 Suppositio formalis subdividitur in propriam, & in impropriam. Propria est, quando voces accipiuntur in suo proprio significato, ut in ista propositione: *Leo rugit*, in qua *leo* significat verum leonem. Impropria est, quando voces accipiuntur pro metaphorico, & improprio significato, ut in hac propositione: *Vicit leo de tribu Juda*, in qua terminus *leo* improprie, & metaphoricè Christum significat.

5 Suppositio formalis propria etiam dividitur in communem, & singularem. Communis dicitur quando terminus significat naturam communem, ut in hac propositione: *Homo est animal*, in qua termini supponuntur suppositione communi, quia naturas communes significant in propositione. Singularis dicitur quando terminus significat naturam singularem, ut in hac propositione: *Petrus est homo*, in qua ly *Petrus* supponitur suppositione singulari; quia in illa significat naturam singularem.

6 Adhuc dividitur suppositio formalis propria in simplicem, & personalem. Simplex est, quando terminus ita restringitur à suo prædicato, ut faciat, quod solum supponatur in propositione pro suo directo, & immediato significato, ut in hac propositione: *Animal est genus*, in qua terminus *animal* ita ab illa

illo prædicato *genus* restringitur, ut solum pro suo immediato significato, quod est id, quod significat directè, scilicet, *naturam humanam* supponatur, non verò pro mediato significato, quod est, quod significat indirectè, & de connotato, scilicet, *Petrum Joannem*, &c. Suppositio personalis, quæ etiam dicitur composita, ut opponitur suppositioni simplici, est illa, in qua terminus non restringitur ab aliquo prædicato, sed pro utroque significato, tam mediato, quam immediato, ordine debito accipitur, ut in hac propositione: *Homo est animal*, in qua ly *homo* accipitur, tam pro natura humana, quam pro individuis illius; de omnibus quippè potest animal prædicari.

7 Vbi adverte pro majori claritate, quod omnia illa prædicata, quæ conveniunt subjecto per operationem intellectus, illud restringunt, ut tantum supponatur pro immediato significato, ut sunt *species*, *genus*, &c. sive prædicta prædicata sumantur primò, sive secundò intentionaliter, id est, sive fundamentaliter, sive formaliter, illa verò prædicata, quæ conveniunt subjecto independentè à consideratione intellectus, illud taliter non restringunt, ut *risibile* respectu hominis.

8 Suppositio personalis etiam dividitur in distributivam, confusam, determinatam, & copulatam. Suppositio distributiva est quando terminus communis ita supponitur ad significandam naturam communem, ut de quolibet inferiori seorsim possit prædicari, quod de ipsa natura prædicatur, quod evenit quando hoc signo *omnis*, vel *nullus* afficitur terminus communis, ut in his propositionibus: *Omnis homo currit*; *nullus homo est lapis*; quod etiam contingit in propositione affirmativa, quando prædicatum est de essentia subjecti, vel propria passio illius, licet subjecto non præponatur aliquod signum commune, ut in his propositionibus: *Homo est animal*;



*mal: homo est visibilis, &c. & similiter in propositione negativa, quando prædicatum repugnat subjecto, ut in ista: Homo non est lapis.*

9 Adhuc suppositio distributiva subdividitur in distributivam pro singulis generum, & distributivam pro generibus singulorum. Distributiva pro singulis generum dicitur, quando terminus genericus sumitur prout significat omnia contenta sub illo, sive sint species, sive individua, ut contingit in hac propositione: *Omne animal, & sensibile*, in qua ly *animal* accipitur, non solum quatenus significat omnes species animalis, sed etiam omnia individua specierum, de omnibus enim prædicatur ratio animalis.

10 Distributiva pro generibus singulorum dicitur quando terminus genericus non sumitur, prout significat omnia individua specierum, quæ sub illo continentur, sed tantum aliqua, vel aliquod cujuslibet speciei, ut contingit in hac propositione: *Omne animal fuit in arca Noe*, in qua terminus genericus *animal*, non significat omnia individua specierum, quæ sub illo continentur; sed tantum aliquod, vel aliqua cujuslibet speciei, quæ in arca Noe continebantur.

11 Aliqui addunt aliam suppositionem distributivam, quam accommodatam vocant, & est quando terminus communis, licet ex se significet omnia contenta sub illa, tamen excipiuntur aliqua ex vi significationis propositionis, ut patet in ista: *Omnis homo in Adam peccavit*, in qua, licet *homo* significet omnes homines; tamen ex vi significationis propositionis excipitur Christus, Redemptor noster, & Beatissima Virgo MARIA, Mater ejus, quæ ab omni macula, etiam originali, fuit immunis.

12 Suppositio confusa dicitur, quando ter-  
mi-

minus accipitur, prout significat rem incertam, & indeterminatam, ut contingit in hac propositione: *Aliquis homo currit*, in qua ly *homo* accipitur, prout significat aliquod individuum humanitatis, sed non determinatè; & in ista: *Oculus requiritur ad videndum*, in qua ly *oculus* indeterminatè aliquem ex duobus oculis significat.

13 Suppositio determinata dicitur quando terminus significat rem certam, & determinatam, quod contingit, vel quando supponuntur termini singulares, ut *Petrus, Paulus, &c.* vel termini communes affecti signo demonstrativo, ut *hic homo*, vel quando terminus communis, ratione alicujus suppositionis, rem determinatam significat, ut *Virginis Filius*.

14 Denique suppositio copulata dicitur quando terminus significat plura conjunctim sumpta, ut quando supponuntur termini in numero plurali affecti signo universalis affirmativo, ut in hac propositione: *Omnes Apostoli Dei sunt duodecim*, in qua ly *Apostoli* significat omnes conjunctim, & etiam quando supponuntur termini singulares collectivi, ut *Roma, Ecclesia, Conventus*, &c. qui termini supponuntur in propositionibus pro omnibus sub illis contentis collectivè, seu copulativè non verò seorsim.

15 Secunda affectio terminorum est status, qui est acceptio termini pro tempore importato per copulam, ut in hac propositione: *Petrus legit*, in qua ly *Petrus* debet stare pro tempore præsentis, ut verificetur propositio, nam si non existit actualiter, legere, non potest: quod idem intelligendum est suo modo de propositionibus de præterito, & de futuro.

16 Tertia affectio terminorum dicitur ampliatio, & est, quando terminus, ratione alicujus adjuncti, extenditur ad majorem significationem, quàm patebat pro suo statu.

17 Quarta affectio terminorum dicitur restrictio-

strictio, & est quando terminus, ratione alicujus adjuncti, coarctatur ad minorem significationem, quàm petebat pro suo statu.

18 Ad intelligentiam prædictarum affectionum advertendum est, quòd sunt aliqua prædicata, quæ conveniunt subjectis sine dependentia à tempore, & sunt illa, quæ necessariò prædicantur de terminis communibus in propositionibus affirmativis, vel repugnanter in propositionibus negativis, & sunt alia prædicata, quæ conveniunt subjectis dependenter à tempore, & sunt illa, quæ contingenter prædicantur de termino communi; quando in propositionibus ponuntur prima prædicata, ne quid subjectum ampliari, nec restringi; quando verò ponuntur secunda prædicata, potest subjectum ampliari, vel restringi, si est terminus communis, vel particularis indeterminatus.

19 Ut autem hoc faciliùs percipiatur, adducamus aliqua exempla, ex quibus alia possunt deduci, etenim in hac propositione: *Homo est animal*, subjectum nullatenus potest restringi, neque ampliari; quia supponitur in propositione ad significandos omnes homines præsentés, præteritos, futuros, & possibiles; quia cum prædicatum non conveniat illi dependenter à tempore, semper necessariò conservat suum statum in propositione. Idem potest dici in hac propositione negativa universali; *Homo non est lapis*, & in hac de subjecto singulari determinato; *Petrus est homo*; & similiter in hac de subjecto singulari indeterminato; *Aliquis homo est animal*.

20 In hac verò propositione; *Omnis homo currit* status subjecti est pro tempore præsentis, nam accipitur pro omnibus hominibus existentibus tempore importato per copulam, eo quod prædicatum dependenter à tempore conveniat illi, & sic potest ampliari per disjunctionem, ut contingit in hac propositione: *Omnis homo*

*homo currit, vel cucurrit, vel curret*: nam in illa subjectum, non solum significat homines existentes de presenti, sed etiam præteritos, & futuros; potest etiam restringi per conjunctionem, ut contingit in hac propositione: *Omnis homo currit, & cucurrit, & curret*, in qua subjectum, quod juxta statum primæ propositionis significabat omnes homines existentes, restringitur ad significandum tantum illos, qui ita existunt, ut etiam extiterint, & extituri sunt.

21 Propositiones de subjecto singulari indeterminato similiter ampliuntur, & restringuntur ratione prædicati; sed cum hac differentia; quod quando terminus est communis, ampliatur, & restringitur ad magis, vel minus significandum; quando autem terminus est singularis indeterminatus, cum tantum unum, licet indeterminatè significet, non ad magis, vel minus significandum, sed ad majorem, vel minorem indifferentiam ampliari, vel restringi potest, ita ut ad plura, vel pauciora talis indifferentia, seu indeterminatio extendatur, vel coarctetur, ut benè intuenti patebit in hac propositione: *Aliquis homo currit*, quando per hanc ampliatur: *Aliquis homo currit, vel cucurrit, vel curret*; vel per hanc restringitur; *Aliquis homo currit, & cucurrit, & curret*.

22 Ubi advertendum est, quod subjectum singulare determinatum, licet prædicatum sit contingens, nullatenus potest ampliari, vel restringi: nam semper conservat suum significatum, licet contingat, quod propositio sit falsa, ut videre est in hac propositione: *Adamus currit*; nam illa semper per subjectum significat determinatè nostrum primum parentem, licet sit falsa, eo quod Adamus non existit pro tempore præsentis importato per copulam.

23 Aliter terminus communis restringi potest, si illi, scilicet, adjungatur terminus inferior, siue prædicatum conveniat dependenter à tempore, siue non, ut contingit in his propositionibus; *Omne animal homo currit*; *omne animal homo est vivens*, in quibus prædicatum *animal*, quod ex se omnes species animalis significat, restringitur ad significandum tantum speciem hominis, ratione illius adjuncti *homo*. Similiter contingit quando adjectivum additur substantivo, ut contingit in hac propositione; *Homo albus currit*; nam in illa subjectum *homo*, quod ex se significat omnes homines coarctatur ad significandum tantum homines albos; vel quando adjungitur subjecto casus obliquus, ut contingit in hac propositione; *equus Petri currit velociter*; nam in illa subjectum *equus*, quod ex se omnes equos significat, coarctatur ad significandum tantum equum, quem Petrus possidet.

24 Hic advertendum est, quod in argumentatione per prædictos terminos amplos, vel restrictos hæ regulæ observandæ sunt; à termino amplo ad non amplum, non valet consequentia affirmativè; benè tamen negativè, è contra verò à termino non amplo ad amplum valet consequentia affirmativè, non verò negativè; à termino restricto ad non restrictum valet consequentia affirmativè, non verò negativè; à termino non restricto ad restrictum valet consequentia negativè, non verò affirmativè; quod omne, licet aliquomodo confusum videatur, exercitio disputationis clarum apparbit, & pro nunc.

25 His exemplis aliquomodo fiet manifestum. Valet enim hæc consequentia negativè; *Non est homo potens currere*; ergo *non est homo currens*, non verò affirmativè; *Est homo potens currere*; ergo *est homo currens*. Hæc est argumentatio de amplo ad non amplum. Val-

let

let etiam hæc consequentia affirmativè ; *Est homo currens ; ergo est homo potens currere* ; non verò negativè ; *Non est homo currens ; ergo non est homo potens currere* . Hæc est argumentatio de non amplo ad amplum . Similiter valet hæc consequentia negativè ; *Non est homo ; ergo non est homo albus* ; non verò affirmativè ; *Est homo ; ergo est homo albus* ; Hæc est argumentatio à non restricto ad restrictum . Similiter valet hæc consequentia affirmativè ; *Est homo albus ; ergo est homo* ; non verò negativè ; *Non est homo albus ; ergo non est homo* . Hæc est argumentatio à restricto ad non restrictum .

26 Quinta affectio terminorum est alienatio , quæ etiam dicitur distractio , & est quædam translatio termini à propria ad impropriam significationem , ratione alicujus adjuncti , quod patet in hac propositione : *Homo pictus legit* , in qua subiectum *homo* , quod per se significat verum hominem , ratione illius adjuncti , *pictus* significat tantum improprium hominem , seu imaginem hominis .

27 Sexta affectio terminorum dicitur remotio , & est totalis distractio termini à sua significatione , ratione alicujus adjuncti , ut patet in hac propositione ; *Homo irrationalis legit* , in qua subiectum *homo* nullum hominem significat , ratione illius adjuncti *irrationalis* .

28 Septima affectio terminorum dicitur reduplicatio , & est repetitio subiecti , ut patet in hac propositione ; *Homo in quantum homo , est risibilis* .

29 Octava affectio terminorum dicitur specificatio , & est determinatio alicujus partis subiecti , propter quam prædicatum convenit subiecto , ut in hac propositione ; *Æthiops est albus secundum dentes* . Hæc affectio etiam solet dici diminutio ; quia minuit significationem subiecti , ut in hac propositione dicta , in qua ly *Æthiops* minuitur à sua significatione , & tantum  
sup.

supponitur pro dentibus; facit enim hunc sensum; *Dentes Æthiopis sunt albi.*

30 Ultima affectio terminorum dicitur appellatio, & est applicatio significationis unius ad significationem alterius, ut contingit in hac propositione: *Homo est doctus*, in qua prædicatum *doctus* appellat, seu ponit suum significatum supra significatum subjecti *homo*. Appellatio est duplex, scilicet, formalis, & materialis. Formalis dicitur, quando significatum unius applicatur ad significatum formale alterius; in hac enim propositione: *Album est disgregativum visus*, prædicatum *disgregativum* applicat suum significatum ad albedinem, quæ est formale significatum termini *album*. Materialis dicitur quando significatum unius applicatur ad significatum materiale alterius; in hac enim propositione: *Album est currens*, prædicatum *currens* applicat suum significatum ad subjectum habens albedinem, quod est significatum materiale termini *albus*.

31 Pro majori intelligentia appellationis advertere oportet, quod quando in propositione inveniuntur plures termini, si terminus appellans est talis naturæ, quod significatum illius solum alicui illorum potest convenire, semper supra illum appellat, ut contingit in hac propositione: *Homo velociter currit*, in qua *ly velociter* necessario appellat, seu ponit suum significatum supra cursum; quia velocitas est propria cursui; non verò hominis, unde evenit, quod in similibus propositionibus nunquam apparet æquivocatio in appellatione.

32 Advertere etiam oportet, quod quando terminus appellans convenit tam subjecto, quàm prædicato propositionis, tunc potest esse æquivocatio in appellatione, & sic semper est attendendum ex qua parte ponitur, ut æquivocatio auferatur; v. gr. hic terminus *magnus*, qui convenit tam *Petro*, quàm *scholastico*,

in

in hac propositione : *Petrus est magnus scholasticus*, quia ponitur ex parte prædicati, appellat, & ponit suum significatum supra prædicatum *scholasticus*, & sic facit hunc sensum : *Petrus est magnus in studio* : in hac verò propositione : *Petrus magnus est scholasticus*; quia ponitur ex parte subjecti, appellat, & ponit suum significatum supra subiectum *Petrus*; & sic facit hunc sensum : *Petrus magnus corpore est scholasticus*.

## QUARTUM CAPITULUM.

*In quo agitur de Nomine, Verbo, & Oratione.*

**A**RIST. lib. 1. Perierm. cap. 2. sic nomen definivit. *Nomen est vox significativa ad placitum sine tempore, cujus nulla pars separata est significativa, finita, & recta*. Quam definitionem admittunt omnes Philosophi, & ficeam explicant. Dicitur *vox significativa ad placitum*, in quo convenit cum Verbo, de quo postea, & differt à vocibus non significativis ut *Blitri*, &c. & à significativis naturaliter, ut gemitus animalis. Dicitur *sine tempore*, in quo differt à verbo, quod significat cum tempore. Pro cuius intelligentia advertendum est, quod aliud est *significare tempus*, aliud *connotare tempus*, & aliud *consignificare tempus*, seu *significare cum tempore*: nam *significare tempus* est significare rem, quæ est tempus, ut *hora*, *dies*, *mensis*, &c. *Connotare tempus* est aliquid significare, quod aliquo determinato tempore fieri solet, ut *cæna*, *prandium*, &c. *Consignificare tempus*, seu *significare cum tempore* est significare rem esse, vel non esse, fieri, vel non fieri in aliquo tempore, ut *curro*, quod significat, cursum fieri tempore præsentis. Vnde sequitur, quod licet nomen possit significare, & conno-



tare tempus, non tamen potest significare tempus, seu significare cum tempore. Dicitur: *Cujus nulla pars separata est significativa*, quod intelligitur modo dicto de termino incomplexo, in quo differt à termino complexo. Dicitur,  *finita*, ut excludantur à ratione nominis termini infiniti. Dicitur,  *recta*, ut excludantur casus obliqui, qui sunt omnes præter nominativum, & etiam ut excludantur termini sine categorematici, qui non dicuntur recti eo quod se solis nequeunt in propositione collocari.

2 Igitur ex hoc cognoscitur, quod tantum casus nominativi termini incomplexi habet rationem nominis logicalis; & licet aliquando casus obliqui ponantur in propositione loco nominativi, ut in hac propositione; *Petrus est genitivus*; non tamen propter hoc habet rationem nominis: sed tantum dicitur, quod ponitur loco nominis, quod idem contingit in propositionibus, quæ constant vocibus non significativis, ut *Blitri non est scindapsus*.

3 Aliquæ solent esse divisiones nominis, quæ magis ad grammaticos, quam ad dialecticos spectant, & idem dicendum est de aliquibus divisionibus verbi; sed quia hic tantum definit Arist. nomen, & verbum logicale, ideo illas omittimus.

4 Arist. 1. Pericr. cap. 3. sic verbum logicale definivit: *Verbum est vox significativa ad placitum cum tempore, cujus nulla pars separata significat, finita, & recta, & est semper nota eorum, quæ prædicantur*. Hæc definitio communiter admittitur à Philosophis, & explicatur sicut definitio nominis, à quo differt in hoc, quod verbum significat cum tempore, non verò nomen; & in hoc, quod verbum est nota eorum, quæ prædicantur, quod idem est, ac notificare veritatem, vel falsitatem; quia conjungit subiectum cum prædicato, quod non habet nomen.

Ad.

5 Advertendum tamen est circa illam particulam *finita*, quod verbum semper est finitum, & nunquam potest infinitari, sed tantum negari; quia, si verbo, seu copula præponatur negatio, reddit, propositionem purè negativam, quæ totum destruit, & nihil affirmat; ad rationem autem negationis infinitantis requiritur, quod aliquid neget determinatè, & plura indeterminatè affirmet, vel significet, ut dictum est de termino infinito.

6 Advertendum etiam est, circa illam particulam, *recta*, quòd solùm tempus præsens indicativi modi dicitur rectum in verbo; alia verò tempora dicuntur obliqua. Cujus ratio est, quia nunquam verificatur propositio in aliquo tempore facta, nisi in ordine ad tempus præsens, seu ad propositionem de præsentì, quæ etiam dicitur *propositio de inesse* v.g. hæc propositio de tempore præterito: *Petrus cucurrit* solum est vera, si aliquando fuit vera hæc de præsentì: *Petrus currit*. Similiter hæc propositio de tempore futuro: *Petrus curret* tantum est vera, si aliquando verificabitur hæc de præsentì: *Petrus currit*.

7 Propter eandem rationem solùm verbum substantivum, quod est solùm *sum, est, fui*, & solùm in tempore præsentì propriè, & rigorosè habet rationem verbi; quia omnia alia verba adjectiva reducuntur ad illud, ut patet in hac propositione, & similibus: *Petrus currit*; nam facit hunc sensum; *Petrus est currens*; & sic solum *ly est*, est verbum rectum, & est semper nota eorum, quæ prædicantur, verbum, autem *currit*, & similia sunt verba obliqua, & nunquam sunt nota eorum, quæ prædicantur: ex quo à ratione verbi Logici excluduntur.

8 Pro completa nominis, & verbi notitiâ, notandum est, quod aliqui sic nomen definiunt: *Nomen est, quod declinatur per casus*, & sic

sic volunt, quod omnes casus participant rationem nominis; verbum autem sic definiunt; *Verbum est, quod conjugatur per tempora*, & sic volunt, quod omnia verba, & omnia illorum tempora participant rationem verbi, quod totum verum est, loquendo de nomine, & verbo grammaticaliter sumptis: non verò dialecticè, seu logicè, ut accipiuntur in præsentī, quia, cū ut sic, ad constituendam propositionem ordinentur, & solum nomen in casu recto, scilicet in nominativo, & verbum in tempore recto, scilicet in tempore præsentī; & hoc solum verbum *sum, es, fui*, possunt constituere propositionem, ut patet ex dictis, illis solum convenit propria ratio nominis, & verbi dialectici, seu logicalis.

9 Arist. 1. Perierm. sic orationem definivit: *Oratio est vox significativa ad placitum, cujus aliqua pars separatim significat, ut dictio, non ut affirmatio, aut negatio*. Hæc definitio communiter admittitur à Philosophis, & sic explicatur. Dicitur *vox significativa ad placitum*, in quo convenit oratio cum nomine, & verbo. Dicitur, *cujus aliqua pars separatim significat*, in quo distinguitur à nomine, & verbo. Dicitur, *ut dictio, non ut affirmatio, aut negatio*, per quod intelligitur, quod ad rationem orationis non requiritur, quod pars illius, quæ significat separata, sit affirmatio, vel negatio; sed sufficit, quod sit dictio significativa, quod ita debet intelligi, ut significat separatim idem, quod significat coniunctim in oratione; non tamen propter hoc excluditur à ratione partis orationis affirmatio, vel negatio; nam hæc est verè propositio; *Petrus est homo, est propositio*, & tamen subiectum illius, scilicet, *Petrus est homo*, quod est pars orationis, est affirmatio. Quæ diximus de termino complexo in ratione significandi, possunt hic applicari:

10 Ex quo colligitur, quo ad rationem orationis.

tionis necessario debent concurrere plures partes aliquo nexu conjunctæ. Sed dubitari solet, an talis nexus debeat esse verbum? An verò sufficiat quælibet grammaticalis unio? Aliqui volunt, quod sit verbum; sed hoc verum, est loquendo de oratione grammaticali. Alii autem intendunt, quod sufficiat quælibet unio partium, quod verius apparet; nam definitio, ut est hæc, v. gr. *Animal rationale*, est propriè oratio, & tamen partes illius nullo verbo connectuntur.

II Dividitur oratio in perfectam, & in imperfectam. Perfecta est, quæ generat perfectum sensum in mente, ut *Petrus est rationalis*, &c. imperfecta est, quæ non generat perfectum sensum in mente, ut *si amarem*, &c. Quæ divisio videtur grammaticalis; dialectici verò dividunt orationem in enunciativam, definitivam, divisivam, & argumentativam, de quibus in sequentibus agemus.

## LIBER SECUNDUS

### *Sumularum.*

**P**ostquam in primo Libro egimus de pertinentibus ad primam intellectus operationem, in hoc secundo de pertinentibus ad secundam venit agendum. Sic ergo

### PRIMUM CAPITULUM.

#### *In quo agitur de Modo sciendi.*

**M**odus sciendi est oratio ignoti manifestativa in ordine ad scientias comparandas. Dicitur oratio, in quo convenit cum aliis orationibus, quæ non sunt modi sciendi, à quibus differt per cæteras definitionis particulas. Communiter dividitur modus sciendi in  
de-

definitionem , divisionem , & argumentationem . Argumentatio pertinet ad tertiam operationem intellectus ; ideòque de illa agitur in tertio Libro ; hìc autem de definitione , & divisione .

2 *Definitio est oratio explicans naturam rei :* Dicitur *oratio* , in quo convenit cum aliis orationibus . Dicitur *explicans naturam rei* , in quo differt ab aliis orationibus , quæ non sunt modi sciendi ; & etiam à divisione , & argumentatione ; quia divisio explicat partes rei ; argumentatio verò proprietates , vel aliqua dubia , quæ circa rem se offerunt ; nulla autem illarum explicat naturam rei sicut definitio ; differt etiam definitio , per prædicta verba , à definitione , quæ solet appellari definitio nominis , quæ tantum explicat nominis significationem , ut quando dicimus : *Dux est , qui alios ducit* ; nam hæc non est propriè definitio , & tantum pertinet ad rethoricos , & grammaticos ; non verò ad logicos , qui tantum loquuntur de definitione rerum .

3 Dividitur definitio in definitionem metaphysicam , & physicam : Metaphysica est , quæ per conceptus metaphysicos naturam rei explicat : & est duplex , scilicet , quidditativa , & descriptiva . Quidditativa est , quæ explicat naturam rei per differentiam essentialẽ illius , ut hæc : *Homo est animal rationale* . Descriptiva est , quæ explicat naturam rei per propriam passionem illius , ut hæc : *Homo est animal risibile* .

4 Definitio physica est , quæ explicat naturam rei per causas physicas illius , ideòque etiam dicitur causalis , & est duplex , essentialis scilicet , & accidentalis . Essentialis est , quæ datur per causas intrinsecas , quæ sunt de essentia compositi , ut sunt causæ materialis , & formalis , ut cum dicimus : *Homo constat corpore , & anima* . Accidentalisis est , quæ datur per causas extrinse-

cas, quæ non sunt de essentia compositi : ut sunt causæ efficiens , & finalis , ut cum dicimus : *Homo est productus à Deo, & ordinatus ad vitam æternam.*

6 Quinque conditiones requiruntur ad bonam definitionem; prima , quòd constet genere , & differentia , quod est proprium definitionis quidditivæ metaphysicæ , ut hæc : *Homo est animal rationale* : *animal* est genus , *rationale* est differentia , vel aliquo loco generis , & differentiæ , quod convenit definitioni , physicæ , essentiali , ut hæc : *Homo constat corpore, & anima* , in qua ly *corpore* ponitur loco generis , quia corpus , seu materia , est quid determinabile per formam , sicut genus est contrahibile per differentiam , ly *anima* ponitur loco differentiæ , quia anima , seu forma est quid determinans corpus , seu materiam , sicut differentia est quid contrahens , & determinans genus .

6 Secunda conditio est , quòd definitio omni suo definito , & non aliis , conveniat , quia , cum definitio debeat explicare essentiam definiti , prout distinctam à quocumque alio , hoc nullatenus posset præstare , nisi omni suo definito , & non aliis , conveniret , ut ex se patet .

7 Tertia conditio est , quod definitio convertatur cum suo definito , ita ut ab uno ad aliud valeat consequentia , tam affirmativè , quàm negativè , ut cum dicimus : *Est homo : ergo est animal rationale* , & è converso : *Est animal rationale : ergo est homo* . Similiter : *Non est homo : ergo non est animal rationale* , & è converso : *Non est animal rationale : ergo non est homo* . Hæc conditio sequitur ex præcedenti , & ex utraque sequitur , quod omnia prædicata , quæ in re conveniunt definito , conveniunt etiam definitioni , & è contra .

Quar-

8 Quarta conditio est, quòd definitio debet esse clarior suo definito; quia cum definitio debeat explicare naturam definiti, & explicatio debeat esse clarior explicato, nam quod est æquè ignotum, & confusum, nequit explicare confusum, & ignotum; hinc est, quòd definitio clarior suo definito apparere debet.

9 Quinta conditio est, quòd definitio non sit superflua, neque diminuta, nam si est superflua, potius generat confusionem, quàm claritatem, & si est diminuta, non explicat quidquid est definitum. Hæ conditiones conveniunt definitioni quidditivæ, & possunt adaptari definitioni descriptivæ, excepta prima, nam propria passio, per quam datur hæc definitio, non est essentialiter differentia, sed tantum lato modo.

10 Ut cognoscatur, quibus possit applicari definitio, sciendum est, quòd definitum, cujus essentia, seu natura per definitionem explicatur, quinque etiam debet habere conditiones. Prima est, quod sit ens reale, & sic excluduntur à ratione definiti, impossibilia, negationes, & entia rationis, quæ omnia, cum non habeant propriam, & rigorosam essentiam, nequeunt quidditivè definiri; sed tantum definitione late sumpta, seu nominis.

11 Secunda conditio est, quod definitum sit unum per se, & sic excluduntur à ratione definiti entia per accidens, ut *album*, & per aggregationem, ut *acervus lapidum*, quia licet huiusmodi entia possunt suo modo explicari, non tamen quidditiva definitione definiri, quia non sunt unum, sed plura simpliciter entia.

12 Tertia conditio est, quod definitum in plures conceptus resolvi possit, eò quod definitio quidditiva, ut dictum est, debet constare conceptu generis, vel eo quod ponitur loco generis, & conceptu differentię, vel eo quod ponitur loco differentię.

13 Quarta conditio est, quod definitum non sit singulare, sed universale; quia singulare non habet aliam essentiam ab essentia speciei, unde essentialiter tantum definitione speciei potest definiri.

14 Quinta conditio est, quod definitum non sit æquivocum, sed univocum; quia definitio debet esse alicuius essentiae determinatae, quam solum dicit univocum; æquivocum verò indeterminatè plures essentias continet; unde oritur illud commune proloquium; *Æquivoca prius sunt distinguenda, quam definienda*, Prædictæ conditiones communiter admittuntur à Philosophis, & deducuntur ex Scoto pluribus in locis, & præcipuè in 4. Distinctione 1. quæst. 2.

15 Ex prædictis facilè deducitur quomodo respondendum sit interroganti de definitione; nam si aliquis inquirat, quæ definitio est? Respondendum est, est definitio physica, vel metaphysica. Si autem inquirat, qualis est definitio? Respondendum est, est quidditativa, vel descriptiva; intrinseca, vel extrinseca; bona, vel mala; non autem est dicendum, vera, vel falsa; quia veritas, vel falsitas, proprietates sunt enuntiationis; non verò definitionis.

16 *Divisio est oratio distribuens commune per minus communia*, seu ut alii dicunt, *est oratio totum in suas partes distribuens*. Quæ definitio sic explicatur. Dicitur *oratio*, in quo convenit cum aliis orationibus, quæ divisiones non sunt. Per alias particulas differt ab aliis orationibus, quæ non sunt divisiones. Ubi advertendum est, quod illud, quod dividitur vocatur divisum, & partes, in quas dividitur dicuntur membra dividenda.

17 Pro clariori notitia advertendum est, quod divisibile, seu divisum multipliciter sumitur. Primò dicitur divisum totum quantitativum, seu integrale, & hoc dividitur in suas par-



partes quantitativas, seu integrales, quæ sunt in duplici differentia scilicet, homogeneæ, seu ejusdem rationis, & ætherogeneæ, seu diversæ rationis; quando totum dividitur in partes ejusdem rationis, ut aqua in suas partes, dicitur divisio homogenea; quando verò in partes diversæ rationis, ut homo in caput, manus, pedes, &c. dicitur divisio æthereogenea. Hæc divisio pertinet ad mathematicos.

18 Secundo dicitur divisum totum essentialē, & est duplex physicum scilicet, & metaphysicum. Physicum est, quod constat partibus physicis, in quas dividitur, ut homo in corpus, & animam, & hæc divisio dicitur physica, & pertinet ad physicos. Metaphysicum est, quod constat partibus metaphysicis, in quas dividitur, ut homo in animalitatem, & rationalitatem, & hæc divisio dicitur mataphysica, & pertinet ad metaphysicos.

19 Tertiò dicitur divisum totum logicum, & est quædam ratio, quæ à logico consideratur, ut quid commune pluribus illam participantibus, ut quando animal dividitur in rationale, & irrationale: quæ divisio dicitur logica, & pertinet ad logicos; ideòque de illa præcipuè agimus in præsentī. Ex quo cognoscitur, quod prima definitio est propria divisionis logicæ; secunda verò divisionis in communi, prout omnes supradictas sub se comprehendit.

20 Hæc ergo divisio logica dividitur in divisionem per se, & per accidens. Divisio per se dicitur quando divisum per se convenit inferioribus, ut quando animal dividitur in rationale, & irrationabile. Hæc essentialis divisio, vel est transcendentalis, vel generis in species, vel speciei in individua, ad quorum cognitionem attendenda est ratio divisi, & membrorum dividendum, ex quibus divisio sumit denominationem. Quod clarè patebit in logica in arbo-re prædicamentali.

21 Divisio logica per accidens dicitur quando divisum accidentaliter convenit membris dividendis, & est triplex; prima dicitur divisio accidentis in subjecta, ut quando dividitur album in hominem, & equum. Secunda dicitur subjecti in accidentia, ut quando dividitur homo in album, & nigrum. Tertia dicitur accidentis in accidentia, ut quando dividitur album in dulce, & amarum. Aliter dividitur divisio in divisionem univoci in univocata; æquivoci in æquivocata; & analogi in analogata, quod patet ex dictis circa hosterminos.

22 Quinque communiter assignantur conditiones ad rationem bonæ divisionis. Prima est, quod divisum participetur æqualiter à membris dividendis, quod præcipuè intelligitur de divisione univoca. Secunda, quod membra dividenda habeant inter se aliquam distinctionem, & oppositionem, seu impossibilitatem in unico conceptu. Tertia, quod divisum prædicetur de membris dividendis seorsim, vel conjunctim sumptis. Quarta, quod unum membrum dividens non prædicetur de alio. Quinta, quod membra dividenda adæquant divisum. Aliæ conditiones solent ab aliis adduci, sed certè omnes faciliè reducuntur ad prædictas.

23 Ex quibus faciliè deducitur quomodo sit arguendum circa divisionem; etenim à diviso ad omnia membra dividenda simul valet consequentia, & similiter à membris dividendis simul ad divisum, tam affirmativè, quàm negativè, à diviso ad quodlibet membrum dividens seorsim valet negativè, non verò affirmativè, è contra verò à quolibet membro dividente seorsim ad divisum valet affirmativè, non verò negativè; ab uno membro dividente ad aliud non valet affirmativè, nec negativè; quod omne faciliè potest reduci ad praxim in di-

vifione v. g. animalis, quod dividitur in rationale, & irrationale.

24 Deducitur etiam quomodo responderi debeat interroganti circa divisionem: si enim inquirat, quæ sit divisio? Respondendum est, est mathematica, physica, metaphysica, vel logica: per se, vel per accidens; si autem inquirat, qualis sit? Respondendum est, vel generis in species, vel subjecti in accidentia, univoci in univocata, &c. bona, vel mala; non autem vera, vel falsa; quia ut dictum est veritas, & falsitas non sunt proprietates divisionis, sed enunciationis, de qua infra.

## SECUNDUM CAPITULUM.

*In quo agitur de Enunciatione, & de eius divisionibus.*

**P**RO hujus capituli intelligentia notandum est, quod enunciatio etiam solet dici propositio, & aliqui prolixè contendunt, an eadem sit ratio formalis enunciationis, & propositionis? Jam verò, juxta communem usum, pro eodem usurpantur, & solum denominativè invenitur differentia, scilicet, quod dicitur enunciatio quatenus independenter, & sine respectu ad aliud aliquid affirmat, vel negat; & dicitur propositio per ordinem, & respectum ad syllogismum, qui ex propositionibus componitur. Quo notato

2 Duplex definitio enunciationis, seu propositionis solet adduci ab Authoribus deducta ex Arist. 1. Perierm. cap. 4. prima est: *Enunciatio, seu propositio est oratio verè, vel falsè significans*, Secunda est: *Enunciatio est oratio affirmans, vel negans*. Propter hoc divisi sunt Authores in assignanda essentiali definitione enunciationis; sed exactum examen circa hoc relinquatur ad disputationes.

3 Pro nunc autem dicimus, quod *propositio* est oratio enunciativa, seu iudicativa unius de alio. Hæc est communior definitio, præcipue inter Scotistas: Cujus bonitas etiam in disputationibus patebit.

4 Pro divisionibus propositionis notandum est, quod sicut in quolibet composito substantiali hæc quatuor inveniuntur, scilicet, materia, forma, quantitas, & qualitas; similiter etiam reperiuntur in propositione. Forma propositionis est copula in propositionibus categoricis, & nota illationis in hypoteticis, de quibus infra. Materia propositionis est habitudo prædicati ad subjectum in categoricis, & consequentis ad antecedens, vel è contra in hypoteticis. Hæc materia est triplex, scilicet, naturalis, & est quando prædicatum est de essentia, vel est propria passio subjecti, vel consequens respectu antecedentis; contingens, & est quando prædicatum potest affirmari, vel negari de subjecto, salva illius essentia, idem est suo modo de consequenti respectu antecedentis, & remota, & est quando prædicatum repugnat subjecto, vel consequens antecedenti. Qualitas est affectio propositionis, & hæc est duplex. Prima secundum rem, ut sunt omnia accidentia. Secunda secundum modum, ut est, quod prædicatur per modum qualitatis, licet sit de essentia subjecti, ut sunt differentię essentialis. Quantitas est extensio subjecti ad plura, vel pauciora, ut quando afficitur aliquo ex his signis; *Omnis, aliquis, &c.*

5 Primò dividitur propositio in communi, in categoricam, & hypoteticam. Categorica, quæ sic dicitur à verbo græco *categorico*, quod idem est ac latine *absolutè prædico*, dicitur illa; quæ absolutè, & sine dependentia ab alio enuntiat unum de alio, ut *homo est albus*. Hypotetica, quæ sic dicitur à verbo græco *hypotesis*, quod idem est ac latine *suppositio*, est illa,

la, quæ unum de alio enuntiat ex aliqua suppositione, ut *si Sol lucet, dies est*.

6 Propositio categorica rursus dividitur in absolutam, & modalem. Absoluta est, in qua non explicatur modus, quo prædicatum convenit subjecto, ut *homo currit*. Modalis est, quæ explicat modum, quo prædicatum convenit subjecto, ut *homo contingenter currit*.

7 Propositio, tam categorica, quam hypothetica, subdividitur in complexam, & in incomplexam. Categorica incomplexa est quælibet propositio simplex, ut *Petrus currit*. Complexa est conjunctio duarum, vel plurium propositionum simplicium, & est duplex, scilicet, copulativa, ut quando intervenit conjunctio, &, ut, *Petrus currit, & Joannes audit*, & disjunctiva, ut quando intervenit disjunctio vel, ut *Petrus currit, vel Joannes audit*, ad veritatem prioris requiritur veritas utriusque categoricæ simplicis; ad veritatem verò posterioris sufficit veritas cujuslibet simplicis. Propositio hypothetica incomplexa dicitur, quando enuntiat unum de alio ex una tantum suppositione, ut *si Sol lucet, dies est*. Complexa dicitur quando enuntiat unum de alio ex duplici suppositione, ut *si Sol lucet, & mundum illustrat, resplendent montes*. Tam propositio categorica, quam hypothetica amplius dividuntur ratione formæ, materiæ, quantitatis, & qualitatis, de quibus suo ordine loquemur.

8 Igitur propositio categorica dividitur ratione formæ in constantem verbo substantivo, ut *homo est albus*, & in constantem verbo adjectivo, ut *homo currit*; utraque dividitur juxta diversa tempora verborum.

9 Propositio categorica ratione materiæ dividitur in necessariam, contingentem, & impossibilem. Necessaria est affirmativa in materia naturali, ut *homo est animal*, & negativa in materia remota, ut *homo non est lapis*. Con-

tingens est negativa, & affirmativa in materia contingenti, ut *homo currit, homo non currit*. Impossibilis est affirmativa in materia remota, ut *homo est lapis*, & negativa in materia naturali, ut *homo non est animal*.

10 Propositio categorica dividitur in affirmativam, & negativam. Affirmativa est, quando copula nullam habet negationem, ut *homo est animal*. Negativa est, quando copula habet negationem, ut *homo non est animal*. Quælibet istarum subdividitur in veram, & falsam, vera dicitur, quæ significat rem sicuti est, ut *homo est animal: homo non est lapis*; falsa est, quæ significat rem aliter ac est, ut *homo est lapis; homo non est animal*.

11 Propositio categorica ratione quantitatis dividitur in universalem, particularem, indefinitam, & singularem. Universalis est, in qua subiectum commune signo universali afficitur, ut *omnis homo est animal*. Particularis est, in qua subiectum commune afficitur signo particulari, ut *aliquis homo est animal*. Indefinita (quæ sic dicitur, quia non determinat quantitatem) est in qua subiectum commune nullo signo afficitur, ut *homo est animal*. Pro cuius maiori intelligentia notandum est, quòd si propositio indefinita est in materia naturali, æquivaleret universali, idem enim est dicere; *Homo est animal*, ac *omnis homo est animal*; similiter dicendum est in materia remota, idem enim est dicere; *Homo non est lapis*, ac *nullus homo est lapis*; si autem propositio fiat in materia contingenti, æquivaleret particulari, idem enim est dicere: *Homo est albus*, ac *aliquis homo est albus*. Singularis est, in qua subiectum est singulare, ut *Petrus est homo; hic homo est albus*.

12 Propositio hypothetica ratione formæ dividitur in conditionalem, causalem, & rationalem. Conditionalis est, in qua nota illa-

tionis est particula *si*, ut, *si Sol lucet, dies est*. Causalis est, in qua nota illationis est particula *quia*, ut, *quia homo est rationalis, est risibilis*. Rationalis est, in qua nota illationis est particula *ergo*, ut, *Petrus currit; ergo movetur*.

13 Propositio hypothetica ratione materię etiam dividitur in necessariam, impossibilem, & contingentem. Necessaria est affirmativa in materia naturali, quando consequens est affirmativum, ut *si est homo, est rationalis*; & negativa, quando consequens est negativum; ut, *non si est homo, non est rationalis*; & affirmativa in materia remota, quando consequens est negativum, ut, *si est homo, non est lapis*; & negativa, quando consequens est affirmativum, ut *non si est homo, est lapis*. Impossibilis est affirmativa in materia naturali, quando consequens est negativum, ut, *si est homo, non est rationalis*; & negativa, quando consequens est affirmativum, ut *non si est homo, est rationalis*; & affirmativa in materia remota, quando consequens est affirmativum, ut, *si est homo, est lapis*; & negativa, quando consequens est negativum, ut *non si est homo, non est lapis*. Contingens est, tam affirmativa, quàm negativa in materia contingenti, siue consequens sit affirmativum, si negativum, ut *si est homo, est albus*: *si est homo, non est albus*: *non si est homo, est albus*; *non si est homo, non est albus*.

14 Propositio hypothetica ratione qualitatis dividitur in affirmativam, & negativam. Affirmativa est, in qua nota illationis nullam negationem habet, ut, *si est homo, est rationalis*. Negativa est, quando nota illationis negationem habet, ut, *non si est homo, est rationalis*. Utraque dividitur in veram, & falsam, modo dicto de propositione categorica.

15 Aliqua præ oculis habenda sunt, ut veritas, vel falsitas propositionis hypotheticę cognoscatur. Primum, quod, ut conditionalis sit

vera,

vera, solum requiritur bonitas consequentiæ, id est, ut unum ex alio rectè inferatur, siue suppositio sit vera, siue falsa, ut *si est homo, est rationalis; si homo non habet intellectum, non intelligit*. Secundum, quod ad veritatem rationalis, non sufficit bonitas consequentiæ, sed etiam requiritur, quod suppositio sit vera, ut *Petrus currit; ergo movetur*, erit suppositio vera, si vera sit propositio, scilicet, quod Petrus currit; si autem suppositio fuerit falsa, tota propositio erit falsa, licet consequentia sit bona. Tertium, quod ad veritatem causalis, non sufficit bonitas consequentiæ, neque, quod suppositio sit vera, sed etiam requiritur, quod id, quod supponitur, sit causa illius, quod sequitur; unde hæc propositio est vera; *Quia homo est rationalis, est risibilis*; quia rationalitas est causa risibilitatis in homine; hæc autem est falsa *Quia homo est risibilis, est rationalis*; quia licet bene inferatur consequentia, & suppositio sit vera, tamen risibilitas non est causa rationalitatis in homine.

16 Propositio hypotetica ratione quantitatis dividitur in universalem, particularem, indefinitam, & singularem, modo dicto de propositione categorica, cum hac tamen advertentia, quod quantitas propositionis hypoteticæ desumitur ex quantitate propositionis categoricæ, quæ habet rationem antecedentis; seu suppositionis in illa.

17 Ex quibus facilè deducitur quomodo respondendum sit inquirenti circa propositionem; si enim inquireat, quæ sit propositio? Respondendum est, est categorica, vel hypotetica; est affirmativa, vel negativa; si autem inquireat, qualis sit propositio? Respondendum est, est vera, vel falsa; & etiam potest responderi, est affirmativa, vel negativa; quia, licet affirmatio, & negatio sit differentię essentialis propositionis, ut suo loco dicemus; tamen prædicantur



tur de propositione per modum qualitatis, seu in quale quid: Si demum inquirat, quanta sit propositio? Respondendum est, est universalis, particularis, indefinita, vel singularis.

### TERTIUM CAPITULUM.


*In quo agitur de oppositione propositionum.*

**1** **O**ppositio propositionum, est duarum propositionum utrumque extremum eodem ordine participantium repugnantia. Quæ definitio sic explicatur. Dicitur, utrumque extremum eodem ordine participantium, per quod datur intelligi; quod ad oppositionem necessario requiritur, quod propositiones, quæ opponuntur, eisdem terminis constent, id est, quod subjectum unius sit subjectum alterius, & prædicatum unius sit prædicatum alterius; quod debet intelligi secundum rem significatam, secundum integritatem, secundum tempus, & secundum locum; & etiam, quod in terminis debet observari eadem suppositio, diminutio, ampliatio, restrictio, & appellatio, nisi hæ ratione quantitatis proveniant.

2 Quod clarius patebit his exemplis; hæ propositiones: *Canis est latrabilis; Canis non est latrabilis*, non sunt oppositæ; quia, cum terminus *Canis* sit æquivocus, non servat eandem significationem in utraque propositione. Hæ propositiones; *Petrus disputat; Petrus non disputat bene*, non sunt oppositæ; quia non servatur integritas in prædicato. Hæ propositiones: *Petrus currit; Petrus non currebat*, non sunt oppositæ; quia non servant idem tempus. Hæ propositiones; *Christus est in Sacramento sub speciebus panis, & vini; Christus non est in Cælo sub speciebus panis, & vini*, non sunt oppositæ; quia non servant eundem locum. Hæ propositiones; *Petrus est nomen; Petrus non est nomen* non sunt oppo-

oppositæ, quia non servatur eadem suppositio; in prima enim supponitur. *Petrus* materialiter pro ipsa voce; in secunda verò formaliter pro re significata. Hæ propositiones: *Aethiops est albus secundum dentes*; *Aethiops non est albus*, non sunt oppositæ; quia non servant eandem diminutionem. Hæ propositiones: *Iustus peccabat*; *iustus non peccat*, non sunt oppositæ; quia non servant ampliationem. Hæ propositiones: *Homo currit*; *homo albus non currit*, non sunt oppositæ, quia non servant restrictionem. Hæ propositiones: *Petrus est magnus scholasticus*; *Petrus magnus non est scholasticus*, non sunt oppositæ; quia non servant eandem appellationem. Idem dicendum est, quando variatur quælibet alia affectio terminorum.

3 Oppositio propositionum dividitur in contradictoriam, contrariam, subcontrariam, & subalternam. *Oppositio contradictoria est repugnantia duarum propositionum secundum qualitatem, & quantitatem*. *Oppositio contraria est repugnantia duarum propositionum universalium secundum qualitatem tantum*. *Oppositio subcontraria est repugnantia duarum propositionum particularium secundum qualitatem tantum*. *Oppositio subalternata est repugnantia duarum propositionum secundum quantitatem tantum*; ex quibus universalis dicitur subalternans, particularis verò dicitur subalternata. Exempla omnium prædictarum oppositionum in sequenti figura clarè videntur.



4 Advertendum tamen est, quòd Aristot. r. Prior. sic oppositionem definivit; *Oppositio est affirmatio, & negatio eiusdem de eodem.* Sed, ut communiter notant dialectici hîc, solum definivit oppositionem rigorosè sumptam, quæ datur per oppositionem in qualitate; & sic non comprehendit oppositionem subalternam, quæ non est propriè oppositio; cum tantum sumatur secundum quantitatem; sed jam etiam hæc oppositio subalterna communiter in rer oppositiones numeratur.

5 Aliquæ leges conveniunt prædictis oppositionibus. Primò, contradictoriis hæ leges applicantur; prima, quòd una sit universalis, & alia particularis; quia opponuntur in quantitate. Secunda, quòd una sit affirmativa, & altera negativa, quia opponuntur etiam in qualitate. Tertia, quòd una sit vera, & altera falsa, quia secundum Arist. 4. Metaph. cap. 3. *de quolibet est affirmatio, vel negatio, seu quodlibet est, vel non est.*

&

& cùm in contradictoriis una propositio affirmet convenire subjecto, quod altera negat, necessario una debet esse vera, & altera falsa, & numquam possunt esse simul veræ, nec simul falsæ.

6 Secundò, contrariis hæ leges applicantur: Prima, quòd utraque propositio sit universalis; quia non opponuntur in quantitate. Secunda, quòd una sit affirmativa, & altera negativa; quia opponuntur in qualitate. Tertia, quòd non possunt esse simul veræ, nec simul falsæ in materia naturali, vel remota; sed hoc provenit ratione materiæ, ut contingit in his propositionibus: *Omnis homo est animal, nullus homo est animal*, quarum prima necessario est vera, & secunda necessario falsa; & in his: *Omnis homo est lapis, nullus homo est lapis*, quarum prima necessario est falsa, & secunda necessario vera. Ratione autem formæ possunt esse simul falsæ; nullatenus tamen simul veræ; ut patet in his de materia contingenti: *Omnis homo est albus, nullus homo est albus*, quarum prima, si detur aliquis homo, qui non sit albus, est falsa, & secunda, si detur aliquis homo, qui sit albus, etiam est falsa; nullatenus tamen prædictæ propositiones possunt esse simul veræ; nam ex opposito sequeretur, quod daretur duplex contradictorium simul verum, quod est impossibile. Quòd patet: quia, si supradictæ propositiones contrariæ essent simul veræ, etiam subcontrariæ essent simul veræ, quia inferuntur ex contrariis, & ex vero semper sequitur verum; & cùm una ex subcontrariis, quæ est subalterna unius contrariæ sit contradictoria alterius contrariæ, jam daretur duplex contradictorium simul verum, quod est impossibile.

7 Tertiò, subcontrariis hæ leges applicantur: prima, quòd utraque sit particularis; quia non opponuntur in quantitate. Secunda, quòd una sit affirmativa, & altera negativa; quia oppo-

nun-

nuntur in qualitate. Tertia, quòd una sit vera, & altera falsa in materia naturali, & remota: sed hoc provenit ratione materiæ, ut contigit in his propositionibus: *Aliquis homo est animal; aliquis homo non est animal*, quarum prima necessariò est vera, & secunda necessariò falsa; & in his. *Aliquis homo est lapis; aliquis homo non est lapis*, quarum prima necessariò est falsa, & secunda necessariò vera; ratione autem formæ possunt esse simul veræ; nullatenus tamen simul falsæ: ut patet in his de materia contingenti: *Aliquis homo est albus; aliquis homo non est albus*, quæ, ut patet, sunt simul veræ; nullatenus tamen possunt esse simul falsæ; quia daretur duplex contradictorium simul falsum, quod est impossibile; patet hoc, quia, si propositiones subcontrariæ essent simul falsæ, earum subalternantes etiam essent falsæ; nam ut universalis sit falsa, sufficit, quòd aliqua particularis sit falsa, & cum subalternantes opponantur contradictoriè subcontrariis, si istæ sunt simul falsæ, necessariò dabitur duplex contradictorium simul falsum, quod est impossibile.

8 Quartò, subalternis hæc leges applicandæ sunt, prima, quod una sit universalis, & altera particularis; quia opponuntur in quantitate. Secunda, quòd utraque sit affirmativa, vel utraque negativa; quia non opponuntur in qualitate. Tertia, quòd si universalis est vera, etiam particularis debet esse vera; quia ex eo universalis dicitur vera, quia omnes particulares sunt veræ. Quarta, quòd si particularis est falsa, etiam universalis debet esse falsa; quia ad falsitatem universalis sufficit falsitas alicujus particularis. Quinta, quòd non possit esse particularis vera, & universalis falsa: neque universalis falsa; & particularis vera; sed hoc provenit ratione materiæ in materia naturali, vel remota; ut patet in his propositionibus: *Omnis homo est animal; aliquis homo est animal*, utraque enim est

est necessariò vera ; & in his : *Omnis homo est lapis* : *aliquis homo est lapis* ; utraque enim est necessariò falsa ; & in his : *Nullus homo est animal* ; *aliquis homo non est animal* , utraque enim est necessariò falsa , & in his : *Nullus homo est lapis* ; *aliquis homo non est lapis* , utraque enim est necessariò vera : ratione autem formæ potest particularis esse vera , & universalis falsa , ut patet in his de materia contingenti : *Omnis homo est albus* ; *aliquis homo est albus* ; & similiter , in his : *Nullus homo est albus* ; *aliquis homo non est albus* .

9 Pro majori autem claritate observandum est , quod prædictæ leges intelliguntur de oppositione propositionum , etiam secundum quantitatem ; quia sic sunt receptæ juxta communem usum dialecticorum ; absolutè autem loquendo , & præscindendo à quantitate , hæ leges tantum conveniunt propositionibus oppositis , scilicet , quod contradictoriæ non possunt esse simul veræ , nec simul falsæ ; contrariæ autem possunt esse simul falsæ ; non tamen simul veræ ; & subcontrariæ possunt esse simul veræ , non tamen simul falsæ : ad quas oppositiones necessariò requiritur , quòd una propositio sit affirmativa , & altera negativa , id est , quod præcipua copula sit , vel non sit affecta negatione ; & diximus notanter *præcipua copula* ; quia si hæc non negetur , licet altera copula negetur , propositio erit affirmativa , ut in hac propositione : *Petrus , qui non est albus , currit* , in qua non negatur præcipua copula , quæ est *currit* ; licet negetur altera , quæ est , *est* ; ideoque propositio est affirmativa ; etiam dicitur propositio negativa quando subjectum afficitur signo negativo , ut *nullus homo est lapis* .

10 Ex dictis colligitur , quod plures propositiones , præter prædictas , possunt esse oppositæ , licet careant quantitate , seu signis quantitativis , siye talibus signis afficiantur , licet non ordi-

ordine supradicto, quibus possunt convenire, leges prædictarum oppositionum, & sic, dicuntur oppositæ, non de modo, qui est habitudo unius ad alterum secundum quantitatem; sed de lege, in quibus propositionibus attendenda est lex, quæ illis convenit, ut si non possunt esse simul falsæ; &c. & juxta illam legem erit earum oppositio, v.gr. hæ propositiones: *Petrus est albus: Petrus non est albus* sunt contradiCTORIÆ de lege; quia convenit illis lex contradiCTORIARUM, scilicet, quod non possint esse simul veræ, nec simul falsæ; & hæ *omnis homo est albus: Petrus non est albus*, sunt contrariæ de lege; quia convenit illis lex contrariarum, scilicet, quod possint esse simul falsæ; non tamen simul veræ. Idem dicendum est de quibuscumque aliis propositionibus oppositis, quibus conveniat lex alicujus oppositionis.

#### QVARTVM CAPITVLVM.

*In quo agitur de equipollentia simplicium propositionum.*

1 **Æ**quipollentia est quadam æquivalentia, seu convenientia duarum propositionum oppositarum ratione alicujus negationis adjunctæ. & cum plures sint oppositiones propositionum, pro qualibet oppositione aliquæ regulæ assignantur, ut prædictæ propositiones oppositæ æquipollentes fiant.

2 Igitur propositiones contradiCTORIÆ sunt æquipollentes, si præponatur negatio alicui illarum, v.gr. si huic propositioni: *Omnis homo est albus* præponatur negatio non infinitanter, sed negativè sumpta, æquivalet huic: *Aliquis homo non est albus*, quæ est contradiCTORIA illius; similiter si huic ultimæ præponatur negatio, æquivalet primæ. Ratio huius est, quia, cum negatio negans destruat omnia, quæ invenit post

post se, si propositio est affirmativa, non solum mutat signum universale in particulare, vel particulare in universale, sed etiam negat copulam, & sic propositio redditur negativa, vel universalis, vel particularis, sicut ejus contradictoria; si autem propositio est negativa, negatio, quæ anteponitur, non solum mutat signum particulare in universale, vel universale in particulare; sed etiam affirmat copulam; quia duæ negationes affirmant, & sic propositio redditur affirmativa, & universalis, vel particularis, sicut ejus contradictoria.

3 Propositiones contrariæ fiunt æquipollentes si postponatur aliqua negatio subjecto alicujus, v.gr. si hujus propositionis subjecto: *Omnis homo est albus* postponatur negatio, æquivalet huic: *Nullus homo est albus*, & si subjecto hujus postponatur negatio, æquivalet supradictæ, quæ est illius contraria. Ratio est, quia ratione illius negationis, affirmativa redditur negativa, & negativa redditur affirmativa, eo quod duplex negatio affirmat; & cum non præponatur negatio signo, utraque remanet universalis.

4 Propositiones subalternæ fiunt æquipollentes, si negatio anteponatur, & postponatur subjecto alicujus, v.gr. si hujus propositionis subjecto: *Omnis homo est albus* anteponatur, & postponatur negatio, æquivalet huic: *Aliquis homo est albus*, & si subjecto huius anteponatur, & postponatur negatio, æquivalet supradictæ, quæ est ejus subalternæ. Ratio est, quia cum duplex negatio affirmet, si subjecto cujuslibet propositionis anteponatur, & postponatur negatio, propositio affirmativa remanet affirmativa; & propositio negativa remanet negativa; & cum negatio præponatur signo propositionis, si est universale, redditur particulare, & si est particulare, redditur universale: quod breviter hoc versiculo solet explicari:



*Præ*, contradic, *Post*, contra, *Præ*,  
postque, *Subalter*.

*Præ*, *contradic*, denotat, propositiones contradic-  
torias fieri æquipollentes præposita negatione  
subjecto alicujus. *Post*, *contra*, denotat, contra-  
rias fieri æquipollentes postposita negatione,  
subjecto alicujus. *Præ*, *postque*, *subalter*, deno-  
tat, subalternas fieri æquipollentes anteposita,  
& postposita negatione subjecto alicujus. Hoc  
etiam his versiculis solet explicari:

Non omnis, quidam non : omnis, non, quasi  
nullus:

Non nullus, quidam : Sed nullus non, valet  
omnis:

Non aliquis, nullus; non quidam non, valet  
omnis:

Non alter, neuter: neuter non, valet, utrūque.

Omnia dicta in hac quæstione inveniuntur in  
tribus primis versiculis; quia in illis declaratur,  
æquivalentia signorum ratione negationis ante-  
positæ, vel postpositæ, & si aliquid deficiat, ad  
similitudinem aliorum deduci potest.

5 Ultimus versiculus ponitur ad declarandam  
æquipollentiam propositionum oppositarum,  
quæ constant his signis, scilicet, *alter*, quod est  
particulare affirmativum; *neuter*, quod est uni-  
versale negativum, & *uterque*, quod est univer-  
sale affirmativum, igitur istæ propositiones con-  
tradictoriæ: *Neuter homo est albus*; *alter homo est  
albus*, fiunt æquipollentes præposita negatio-  
ne subjecto alicujus: istæ contrariæ: *Uterque  
homo est albus*; *neuter homo est albus*: fiunt  
æquipollentes postposita negatione alicujus sub-  
jecto: istæ verò subalternæ: *Uterque homo est  
albus*; *alter homo est albus*: fiunt æquipollentes,  
ante posita, & postposita negatione subjecto ali-  
cujus.

6 Propositiones subalternæ non fiunt æquip-  
olentes, quia si alicui præponatur negatio, æqui-  
valet suæ contradictoriæ, si postponatur, est ea-  
dem

dem cum alia subcontraria ; si anteponatur , & postponatur , æquivalet suæ substantiæ, si autem negativæ præponatur alia negatio ante negationem , quam habet , benè potest æquivalere suæ subcontrariæ affirmativæ , quia duplex negatio affirmat dicendo, v.gr. *Aliquis homo non est albus*, æquivalet huic ; *Aliquis homo est albus* ; sed hæc æquipollentia non est in usu .

7 Vt præ oculis facilius habeas , quæ propositiones sunt æquipollentes ratione negationis adjunctæ , notare debes , propositiones ex quatuor signis componi , scilicet , *omnis* universali affirmativo , *nullus* universali negativo ; *aliquis* , & *quidam* particularibus affirmativis, quæ idem valent ; etiam notare debes , has quatuor voces , *purpurea*, *amabimus*, *iliace*, *edentibus* , inventas esse ad cognoscendam æquipollentiam , & oppositionem propositionum modalium , sed etiam hic applicari possunt . Quælibet illarum habet quatuor litteras vocales , scilicet. A, E, I, V, A , denotat affirmationem omnimodam in propositione, tam in signo, quàm in copula ; X, omnimodam negationem ; E, negationem in copula, & non in signo ; I, negationem in signo, & non in copula . Prima littera cuiuslibet vocis supradictæ correspondet propositioni factæ in signo *aliquis* ; secunda littera , propositioni factæ in signo *quidam* ; tertia propositioni factæ in signo *nullus* ; quarta propositioni factæ in signo *omnis* .

8 Ex quibus facilè cognoscitur , omnes propositiones factas in qualibet voce , esse inter se æquipollentes , & omnes factas in *purpurea* , esse contrarias omnium , quæ fiunt in *iliace* & contradictorias omnium , quæ fiunt in *edentuli* , & subalternas omnium, quæ fiunt in *amabimus* Ex quo facilè deducitur quomodo omnes aliæ propositiones inter se opponantur . Quod omne clarè videtur in sequenti figura , & etiam æquipollentia , & oppositio propositionum, quæ fiunt in signis, *alter*, *neuter*, *uterque*, ablata una littera à supradictis vocibus .

ÆQUIPOLLEN- TES.			ÆQUIPOLLEN- TES.	
Pu	Non alter homo non est albus	Contra- riæ	Li	Non alter homo est albus
Re	Neuter homo non est albus		A	Neuter homo est albus
A	Uterque homo est albus		Ce	Uterq; homo non est albus
Pur	Non aliquis homo non est albus	Contra- riæ	I	Non aliquis homo est albus
Pu	Non quidam homo non est albus		Li	Non quidam homo est albus
Re	Nullus homo non est albus		A	Nullus homo est albus
A	Omnis homo est albus		Ce	Omnis homo non est albus

Subalterne

Contra

Contra

distinguitur

distinguitur

Subalterne

ÆQUIPOLLEN- TES.			ÆQUIPOLLEN- TES.	
Ma	Alter homo est albus	Subcon- trariæ	Den	Alter homo non est albus
Bi	Non neuter homo est albus		Tu	Non neuter homo non est albus
Mus	Non uterq; homo non est albus		Li	Non uterq; homo est albus
A	Aliquis homo est albus	Subcon- trariæ	E	Aliquis homo non est albus
Ma	Quidam homo est albus		Den	Quidam homo non est albus
Bi	Non nullus homo est albus		Tu	Non nullus homo non est albus
Mus	Non omnis homo non est albus		Li	Non omnis homo est albus

9 Si volueris cognoscere, quam oppositionem habeant inter se aliquæ propositiones? Vel an sint æquipollentes, in sequenti tabula faciliè invenies hoc modo: vide unam ex illis propositionibus in prima linea, & aliam in secunda; & numerus illis correspondens manifestabit tibi qualitatem illarum; v. g. si scire desideras, cujus generis sint hæ propositiones: *Aliquis homo est albus: non omnis homo non est albus*, vide unam ex illis in prima linea, & alteram in secunda, vel è contra, & invenies numerum sextum illis correspondere, & tibi demonstrabit talis numerus in tertia linea, esse æquipollentes.

## PRIMA LINEA.

Aliquis homo est albus.  
 Aliquis homo non est albus.  
 Non aliquis homo est albus.  
 Non aliquis homo non est albus.  
 Quidam homo est albus.  
 Quidam homo non est albus.  
 Non quidam homo est albus.  
 Non quidam homo nō est albus.  
 Nullus homo est albus.  
 Nullus homo non est albus.  
 Non nullus homo est albus.  
 Non nullus homo non est albus.  
 Omnis homo est albus.  
 Omnis homo non est albus.  
 Non omnis homo est albus.  
 Non omnis homo non est albus.

## TERTIA LINEA.

- 1 Eadem propositio.
- 2 Contradictoriæ propositiones.
- 3 Contrariæ propositiones.
- 4 Subcontrariæ propositiones.
- 5 Subalternæ propositiones.
- 6 Æquipollentes propositiones.

[illegible]

**SECUDA LINEA:**

**[A]liquis homo est albus.**

**Aliquis homo non est albus.**

Non aliquis homo est albus.

**Non aliquis homo non est albus.**

**Quidam homo est albus.**

Quidam homo non est albus.

**Non quidam homo est albus.**

Non quidam homo non est albus

**Nullus homo est albus.**

**Nullus homo non est albus.**

**Non nullus homo est albus**

Non nullus homo non est albus.

Omnia homo et alius

Omne homo non est albus

Omnes homines non est albus.

**Non omnis homo est AIDS.**

## QUINTUM CAPITULUM.

*In quo agitur de conversione simplicium Propositionum.*

1 **C**onversio propositionum est permutatio prædicati in subiectum, & subiecti in prædicatum, servata qualitate, v. g. hæc propositio, *Aliquis homo est animal*, convertitur in istam: *aliquod animal est homo*; nam subiectum mutatur in prædicatum, & prædicatum in subiectum, & servatur qualitas, scilicet, affirmatio, & veritas, non tamen requiritur ad conversionem, quod servetur eadem quantitas; nam universalis potest fieri particularis, ut infra patebit. Aliqui definiunt conversionem hoc modo, *Est legitima consequentia unius propositionis ex alia per solam transmutationem terminorum*: quæ definitio, ut ex se patet, coincidit cum præcedenti à nobis assignata. Ubi adverte, quod prima propositio, quæ se habet per modum antecedentis, dicitur conversa; secunda verò, quæ se habet per modum consequentis, dicitur convertens.

2 Tripliciter potest fieri propositionum conversio, scilicet, simpliciter, per accidens, & per contrapositionem. Tunc fit conversio simpliciter, quando non solum servatur affirmatio, vel negatio, veritas, vel falsitas; sed etiam quantitas, hoc modo convertitur universalis negativa, v. g. *nullus homo est lapis* sic convertitur, *nullus lapis est homo*; & particularis affirmativa, v. g. *aliquis homo est animal* sic convertitur, *aliquod animal est homo*. Tunc fit conversio per accidens, quando non servatur quantitas conversæ in convertente, benè tamen qualitas, hoc modo convertitur universalis affirmativa, v. g. *omnis homo est animal*, sic convertitur, *aliquod animal est homo*; & universalis negativa, v. g.

nul-

*nullus homo est lapis, sic convertitur, aliquis lapis non est homo.* Tunc fit conversio per contrapositionem, quando servata quantitate, & qualitate, termini finiti per negationes sunt infiniti; hoc modo convertitur universalis affirmativa, v. g. *omnis homo est animal* sic convertitur, *omne non animal est non homo*; & particularis negativa, v. g. *aliquis homo non est lapis*, sic convertitur, *aliquid non lapis non est non homo*. Hæc conversio parum utilis est, quia obscuriorem reddit propositionem.

3 Ut facilius conversio propositionum memorie commendetur; his versiculis, qui continent omnia supradicta, utuntur Sumuliste.

Simpliciter FECI convertitur, EVA per accidens.

ASTO per contra, sic fit conversio tota; Ad quorum intelligentiam notandum est, quod in illis vocibus inveniuntur quatuor tantum litteræ vocales, quæ explicant qualitatem, & quantitatem propositionum. Adnotat universalem affirmativam, E universalem negativam, I particularem affirmativam, O particularem negativam, quod etiam his versiculis solet explicari.

Afferit A, negat E, sunt universaliter ambe.

Afferit I, negat O, sunt particulariter ambo. Unde ly FECI, quod habet duas litteras vocales, scilicet E, & I, denotat, quod universalis negativa, & particularis affirmativa convertuntur simpliciter. Ly EVA, quod habet duas litteras vocales E, & A, denotat, quod universalis, tam negativa, quam affirmativa, convertitur per accidens. Ly ASTO, quod habet duas litteras vocales A, & O, denotat, quod universalis affirmativa, & particularis negativa convertuntur per contrapositionem.

4 Pro maiori claritate conversionis propositionum, aliqua observanda sunt. Primò, quod universalis affirmativa, in qua ponitur pro

prædicato tota essentia subiecti, vel differentia essentialis vel propria passio illius, convertitur etiam simpliciter, v. g. *Omnis homo est animal rationale*, sic convertitur, *Omne animal rationale est homo*. Sed hoc provenit ratione materiæ; nam absolute loquendo, vel debet converti per accidens, vel per contrapositionem.

5 Secundò observandum est, quod debet servari eadem suppositio; unde hæc propositio; *Homo est species*, non bene convertitur sic; *Species est homo*; quia in prima ly *homo* supponitur suppositione simplici; in secunda verò, suppositione personali; quod non debet intelligi de variatione suppositionis, quæ provenit ratione quantitatis.

6 Tertiò observandum est, quod non debet variari ampliatio; unde hæc propositio, *Senex fuit iuvenis*, non bene convertitur sic, *Iuvenis fuit senex*; quia in prima ly *senex* supponitur pro homine, qui est, & fuit; in secunda verò pro homine, qui solum fuit; sic autem debet converti, *Iuvenis, qui fuit, est senex*. Idem dicendum est de quolibet alia affectione terminorum.

7 Quartò observandum est, quod integrum prædicatum fiat subiectum; unde hæc propositio, *Petrus possidet librum*, non bene convertitur sic, *Liber possidet Petrum*; sic autem debet converti; *Possidens Librum est Petrus*; quia *possidens Librum* est integrum prædicatum propositionis conversæ; nam facit hunc sensum, *Petrus est possidens Librum*. Sit ergo regula generalis, quod semper servetur in convertente veritas, vel falsitas conversæ; & quod in bona consequentia convertensex conversa deducatur. De aliis propositionibus, quæ non propriè convertuntur, sed explicantur, & dicuntur exponibiles, postea agemus.



## SEXTUM CAPITULUM.

*In quo agitur de propositione modali, & eius divisionibus.*

**M**odus, generaliter loquendo, sic solet definiri: *Est adiacens rei determinationi*: & quia in propositione possunt determinari nomen, seu terminus, verbum, & tota propositio, ideo modus est in triplici differentia; alter, qui determinat significationem nominis, seu termini, ut sunt nomina adjectiva, & casus obliqui, ut in his propositionibus: *Homo doctus disputat*: *Filius Iohannis disputat*, alter qui determinat significationem verbi, ut sunt adverbia, juxta sensum grammaticorum, ut in hac propositione: *Petrus currit velociter*; & alter qui determinat totam propositionem, ut sunt quatuor sequentes, juxta communem usum dialecticorum, scilicet, *possibile*, *contingens*, *impossibile*, *necesse*; *possibile*, & *contingens*, pro eodem usurpantur, sed sigillatim loquitur de illis.

2 Ex quo sequitur, quod omnes propositiones affectæ aliquo modo in quolibet sensu ex supradictis potest dici modalis; sed propriè, & rigorosè sola propositio, quæ affectitur aliquo ex quatuor modis supradictis, appellatur à dialecticis modalis, eo quod solum prædicti modi afficiunt, seu modificant totam propositionem; qui modi adhuc possunt dupliciter in propositione collocari, scilicet, adverbialiter, ut in hac propositione: *Petrus possibiliter currit*; & nominaliter, ut in hac, *Petrum currere est possibile*: in primo sensu non induunt rationem extremi propositionis, sed tantum puræ modificationis; in secundo verò sensu semper sunt prædicatum propositionis in quocumque loco collocentur, & in hoc sensu loquuntur hic dialectici de propositione modali.

3 *Propositio ergo modalis est, qua afficitur modo determinante totam significationem propositionis categorica.* Hæc propositio est quadruplex, juxta quadruplicem modum assignatum. Alia dicitur *de possibile*, alia *de contingens*, alia *de impossibile*, & alia *de necesse*. Ubi adverte, quod propositio modalis constat modo, & dicto, ut in hac propositione: *Possibile est Petrum currere*, in qua ly *possibile* est modus, ly *Petrum currere* est dictum.

4 Dividitur propositio modalis ratione qualitatis in affirmativam, & negativam. Affirmativa est, quando præcipua copula, quæ est illa, quæ correspondet modo, non afficitur negatione; sive copula minus præcipua, quæ est illa, quæ correspondet dicto, afficiatur, vel non afficiatur negatione; unde istæ propositiones sunt affirmativæ, *Possibile est Petrum currere*, *possibile est Petrum non currere*. Negativa est, quando præcipua copula afficitur negatione, sive copula minus præcipua afficiatur, vel non afficiatur negatione; unde istæ propositiones sunt negativæ, *Non est possibile Petrum currere*, *non est possibile Petrum non currere*: Hæc divisio etiam potest dici ratione formæ, quia præcipua copula est forma propositionis. Ex quo colligitur, in quolibet modo ex prædictis posse fieri quatuor propositiones. Una in qua negetur modus, & non dictum; alia, in qua negetur dictum, & non modus; alia, in qua totum; alia, in qua nihil negetur, quas omnes hic proponemus claritatis gratia.

I Possibile.

Possibile est, Petrum currere.  
Non est possibile, Petrum currere.

Possibile est, Petrum non currere.

Non est possibile, Petrum non currere.

I Impossibile

Impossibile est, Petrum currere.

Non est impossibile, Petrum currere.

Impossibile est, Petrum non currere.

Non est impossibile, Petrum non currere.

I Contingēs

Contingens est, Petrum currere.

Non est contingens Petrum currere.

Contingens est Petrum non currere.

Non est contingens, Petrum non currere.

I Necessē.

Necessē est, Petrum currere.

Non est necessē, Petrum currere.

Necessē est, Petrum non currere.

Non est necessē, Petrum non currere.

5. Etiam dividitur propositio modalis ratione qualitatis in veram, & falsam. Tunc dicitur propositio modalis vera, quando prædicatum dicti convenit subiecto eo modo, quo denotatur in propositione, v. gr. hæc propositio est vera: *Possibile est Petrum currere*; quia cursus, qui prædicatur in dicto, possibiliter convenit Petro. Tunc propositio modalis dicitur falsa, quando prædicatum dicti non convenit subiecto eo modo, quo denotatur in propositione, v. gr. hæc propositio: *Impossibile est Petrum currere*, est falsa, quia cursus, qui prædicatur in dicto, non convenit Petro impossibiliter. Vbi advertetur, quod aliquæ propositiones modales indigent distinctione, ut eius veritas cognoscatur, quia sumi possunt in sensu composito, & in sensu diviso, v. g. hæc propositio: *Possibile est, sedentem currere*, si accipiat in sensu diviso, ita ut per illam denotetur, sedentem posse currere relicta sessione, est vera; si vero accipiat in sensu composito, ita ut per illam denotetur, sedentem posse coniungere cursum cum sessione, est falsa.

6. Propositio modalis ratione materiæ dividitur in necessariam, & impossibilem. Necessaria est, quando, quod ponitur in dicto, habet necessariam habitudinem cum modo: sive materia dicti sit necessaria, sive non; unde istæ propositiones sunt necessariae; *Possibile est Petrum currere*; licet materia dicti sit contingens: *Impossibile est, Petrum esse lapidem*; licet materia dicti sit remota. Impossibilis est quando, quod ponitur in dicto habet repugnantiam cum modo, sive materia dicti sit remota, sive non; unde istæ propositiones sunt impossibiles; *Impossibile est Petrum esse animal*; licet materia dicti sit naturalis; *Necesse est, Petrum currere*; licet materia dicti sit contingens. Non tamen datur propositio contingens modalis ratione materiæ; quia cum materia illius sit habitudo dicti ad modum, tantum potest constare materia naturali,

rali, vel remoto; quia modus, vel habet necessariam connexionem cum dicto; vel est impossibilistalis connexio; ut patebit discurrenti per omnes propositiones supra positas.

7 Propositio modalis ratione quantitatis dividitur in universalem, & particularem. Universalis est, quæ constat modo universali, ut est *necesse*, qui est universalis affirmativus, & idem valet, ac *omnis* in propositionibus absolutis; & *impossibile*, qui est universalis negativus, & idem valet, ac *nullus*. Particularis est, quæ constat modo particulari, ut est *possibile*, qui est particularis affirmativus, & idem valet, ac *aliquis*, vel *quidam*; idem dicendum est de modo *contingens*; & sicut *quidam*, vel *aliquis* sit signum particulare negativum postposita negatione, similiter *possibile*, & *contingens* fiunt modi particulares negativi postposita negatione, quod his versiculis solet explicari:

Omni Necessè valet, Impossibile Nullus,  
Possibile Quidam, Quidam non Possibile non:  
Ubi notandum est, quod sicut signa universalis, *omnis*, & *nullus* fiunt particularia, anteposita negatione, & particularia, *quidam*, & *aliquis* fiunt eodem modo universalis; sic modi universales, *necesse*, & *impossibile* fiunt particulares, & modi particulares, *possibile*, & *contingens* fiunt universales, anteposita negatione. Notandum est etiam, quod propositio modalis ratione quantitatis, si attendatur ad dictum illius, potest dividi in universalem, particularem, indefinitam, & singularem; sed hoc per accidens se habet ad quantitatem propositionis modalis; nam semper est attendendum ad modum, ita quod si modus est universalis, semper propositio est universalis; licet dictum sit particulare, ut in hac propositione, *Necessè est, Petrum currere*; & sic de aliis.


## SEPTIMUM CAPITULUM

*In quo agitur de oppositione, equipollentia, & conversione propositionum modalium.*

1 **C**irca oppositionem propositionum modalium idem dicendum est, suo modo, quod diximus de oppositione simplicium. Itaque contradictoriæ opponuntur in quantitate, & qualitate; contrariæ tantum in qualitate, & similiter subcontrariæ, subalternæ tantum in quantitate; quod clarè in sequenti figura reperies.

Subalternans


Subalternans



Subalternæ

Subalternæ

Contradictoriæ



Subalternans

Subalternans

Circa

2. Circa leges, quæ conveniunt propositionibus modalibus oppositis idem dicendum est, ac circa leges simplicium propositionum oppositarum; quia ibi, & hic eadem est ratio. Observa tamen, quod attendere debes, ut prædictæ regulæ hic applicentur (loquendo de veritate, & falsitate) ad materiam correspondentem dicto propositionis modalis.

3. Propositiones modales oppositæ fiunt æquipollentes eodem modo, quo propositiones simplices, observando regulas illius versiculi, *Præ contraria, post contra, præ postque subalter*; ex quo colligitur, quod quælibet propositio modalis habet in quolibet modo unam æquipollentem, & sic sæpè sunt quatuor propositiones modales æquipollentes, quæ juxta quatuor modos supradictos usque ad sexdecim multiplicantur, ut supra paruit.

4. Ut autem facile cognoscas, quæ propositiones ex prædictis sint æquipollentes, revoca in memoriam quatuor voces, quas proposuimus ad idem cognoscendum in propositionibus simplicibus, scilicet, *purpurea, amabimus, iliacæ, edentuli*; & sicut ibi, quælibet littera vocalis illarum, correspondebat signo propositionis, sic in præsentī correspondet modo, hoc ordine. Prima littera correspondet modo *possibile*, secunda modo *contingens*, tertia modo *impossibile*, quarta modo *necesse*. Prædictæ litteræ denotant affirmationem, vel negationem modi, & dicti, sicut ibi denotabant negationem, vel affirmationem signi, & copulæ. Ad quod explicandum inventus est hic versiculus.

*E, dictum negat, I, quæ modum, nihil A, sed V, totum.*

Ex quibus colligitur, omnes propositiones modales factas in qualibet voce ex supradictis esse inter se æquipollentes. Secundo colligitur, omnes propositiones factas in *purpurea* esse cōtradictorias illarum, quæ fiunt in *edentuli*; & omnes, quæ

quæ fiunt in *iliace*, esse contradictorias illarum, quæ fiunt in *amabimus*; & omnes, quæ fiunt in *purpurea* esse contrarias illarum, quæ fiunt in *iliace*, & omnes, quæ fiunt in *amabimus*, esse subcontrarias illarum, quæ fiunt in *edentulis*, & omnes, quæ fiunt in *amabimus* esse subalternas illarum, quæ fiunt in *purpurea*, & omnes, quæ fiunt in *edentuli* esse subalternas illarum, quæ fiunt in *iliace*. Cuius ratio est; quia propositiones, quæ fiunt in *purpurea*, sunt æquipollentes huius: *Necesse est, Petrum currere*, quæ est universalis affirmativa, & omnes, quæ fiunt in *iliace*, sunt æquipollentes huius: *Impossibile est, Petrum currere*, quæ est universalis negativa, & omnes, quæ fiunt in *amabimus*, sunt æquipollentes huius: *Possibile est, Petrum currere*; quæ est particularis affirmativa, & omnes, quæ fiunt in *edentuli*, sunt æquipollentes huius: *Possibile est, Petrum non currere*; quæ est particularis negativa: & eodem modo, quo prædictæ propositiones opponuntur, opponuntur etiam illarum æquipollentes, quod omne, licet aliquo modo confusum videatur, tamen clarè in sequenti figura videtur.





ÆQUIPOL- LENTES.		Contra- riæ .	ÆQUIPOL- LENTES.	
Pu	Non est possibi- le, Petrum non currere,		I	Non est possibi- le, Petrum cur- rere .
Pu	Non est contin- gens, Petrum non currere .		Li	Non est contin- gens, Petrum currere .
Re	Impossibile est, Petrum nō cur- rere .		A	Impossibile est, Petrum cur- rere .
A	Necesse est, Pe- trum currere .		Ce	Necesse est, Pe- trum non cur- rere .
SUBALTER- NANTES.			SUBALTER- NANTES.	

Sublatæne

Contradi-  
ctoriæ

Sublatæne

ÆQUIPOL- LENTES.		Sub con- trariæ .	ÆQUIPOL- LENTES.	
A	Possibile est, Petrum curre- re.		E	Possibile est, Pe- trium non cur- rere .
Ma	Contingens est, Petrum. curre- re .		Den	Contingens est, Petrum nō cur- rere .
Bi	Non est impos- sibile, Petrum currere .		Tu	Non est impossi- bile, Petrum non currere .
Mus	Non est neces- se, Petrum nō currere .		Li	Non est neces- se, Petrum cur- rere .
SUBALTER- NATÆ.			SUBALTER- NATÆ.	

5 Pro sequenti figura vide notam factam ante aliam similem de propositionibus simplicibus cap. 4. num. 9. quia eadem est ratio hic, & ibi.

## PRIMA LINEA.

- Possibile est, Petrum currere.  
 Possibile est, Petrum non currere.  
 Non est possibile, Petrum currere.  
 Non est possibile, Petrum non currere.  
 Contingens est, Petrum currere.  
 Contingens est, Petrum non currere.  
 Non est contingens, Petrum currere.  
 Non est contingens, Petrum non currere.  
 Impossibile est, Petrum currere.  
 Impossibile est, Petrum non currere.  
 Non est impossibile, Petrum currere.  
 Non est impossibile, Petrum non currere.  
 Necessè est, Petrum currere.  
 Necessè est, Petrum non currere.  
 Non est necessè, Petrum currere.  
 Non est necessè, Petrum non currere.

## TERTIA LINEA.

- 1 Eadem propositio.
- 2 Contradictoriæ propositiones.
- 3 Contrariæ propositiones.
- 4 Subcontrariæ propositiones.
- 5 Subalternæ propositiones.
- 6 Æquipollentes propositiones.



6 Propositiones modales secundum Aristot. lib. 1. de Prior. resolut. cap. 3. non convertuntur ratione modi, sed tantum ratione dicti. Pro quo observandæ sunt eadem leges, quæ in conversione simplicium propositionum observantur, juxta illum versiculum, *Simpliciter feci, convertitur; eva per accidens*, videantur, quæ dicta sunt cap. 5. Ab his regulis excipiuntur propositiones factæ in modo *necesse* habentes pro subjecto aliquod concretum accidentale; quia tunc modus *necesse* debet mutari in *possibile*, v.g. hæc propositio, *Necesse est, grammaticum esse hominem*, non benè convertitur sic, *Necessae est, aliquem hominem esse grammaticum*: sic autem, benè convertitur, *Possibile est, aliquem hominem esse grammaticum*, & sic in aliis similibus. Observa tamen, quod si propositiones modales sumantur adverbialiter, ut *omnis homo possibiliter currit*, &c. convertuntur sicut propositiones simplices, juxta regulas supradictas, nam dicta propositio, quæ est universalis affirmativa, sic convertitur in hanc particularem affirmativam; *Aliquod currens possibiliter est homo*; quia universalis affirmativa convertitur per accidens. Eodem modo potest exemplificari in qualibet propositione.

## OCTAVUM CAPITULUM.

*In quo agitur de propositionibus exponibilibus.*

**P**ropositio exponibilis dicitur illa, quæ propter suam obscuritatem indiget exponi, seu explicari per aliam, vel per alias propositiones, eo quod plures in se involvere solet. In triplici differentia communiter solet inveniri propositio exponibilis, nam vel dicitur exclusiva, vel exceptiva, vel reduplicativa: Quas sigillatim explicabimus.

Pro-

2 Propositio exponibilis exclusiva dicitur, quando in illa ponitur aliqua particula exclusiva, ut sunt *solum*, *tantum*; possunt poni ex parte subiecti, ut in hac propositione, *Tantum homo est animal rationale*; quæ sic exponitur: *Homo est animal rationale, & nihil aliud præter hominem est animal rationale*, & possunt poni ex parte prædicati, ut in hac propositione, *Homo essentialiter est tantum animal rationale*, quæ sic exponitur, *Essentialiter convenit homini esse animal rationale, & nihil aliud convenit illi essentialiter*.

3 Propositio exponibilis exceptiva dicitur illa, in qua ponitur particula *præter*, vel alia similis ut hæc propositio, *Omnia animalia sunt irrationalia præter hominem*, quæ sic exponitur, *Omne animal, quod non est homo, est irrationale*. Differt propositio exceptiva ab exclusiva, quia in exclusiva prædicatum dicitur de termino, cui adiungitur particula exclusiva, nam in illa propositione, *Tantum homo est animal rationale*, animal rationale prædicatur de homine, in exceptiva verò prædicatum non dicitur de termino, cui adiungitur particula exceptiva; sed potius de aliis, nam in illa propositione, *Omnia animalia sunt irrationalia præter hominem*, irrationalitas non prædicatur de homine, cui adiungitur particula *præter*, sed de aliis. Hoc tantum est iuxta modum loquendi, in re autem propositio exclusiva, & exceptiva sunt æquivalentes; idem enim est in re, *Tantum homo est animal rationale*, ac *Nihil præter hominem est animal rationale*.

4 Propositio exponibilis reduplicativa dicitur illa, in qua ponitur aliqua ex his particulis; *Quatenus*, *in quantum*, & aliz similes, ut hæc propositio, *Homo in quantum rationalis, est risibilis*, quæ sic exponitur, *Rationalitas in homine est causa risibilitatis*. Et hæc, *Æthiops secundum dentes est albus*, quæ sic exponitur,

Den-

*Dentes Æthiopis sunt albi.* Prima propositio est propriè reduplicativa, secunda verò impropiè, & solet dici specificativa. Videantur, quæ diximus de his termini. Plura alia solent adduci circa propositiones. ex ponibiles, quæ magis ad confusionem, quàm ad utilitatem deserviunt; ideòque illa omittimus, & quia usu argumentationis faciliùs intelliguntur. Solum adverte pro modo loquendi, quòd sicut prædictæ propositiones dicuntur exponibiles, quia explicantur per alias, ita illæ per quas explicantur, dicuntur expontes.

## LIBER TERTIUS

### *Sumularum.*

**E**Gimus in præcedentibus libris de pertinentibus ad primam, & secundam operationem intellectus, in hoc tertio de pertinentibus ad tertiam recto ordine venit agendum.

## PRIMUM CAPITULUM.

*In quo agitur de Argumentatione, & de ejus divisionibus.*

**2** **C**ommuniter consequentia, & argumentatio idem sonant; tamen rigorosè sumpta argumentatio non est idem, ac consequentia; quia consequentia est communior, nam valet dicere, *Est argumentatio: ergo est consequentia*; non autem è converso; Cuius ratio est, quia semper argumentatio præsefert dispositionem mediæ cum extremitatibus ad aliquid inferendum ut patet in hac, *Omnis homo est risibilis; Franciscus est homo; ergo Franciscus est risibilis*, in qua ly *homo* est medium, ita dispositum, ut ratione talis dispositionis cum extre-

tremitatibus inferatur, Franciscum esse risibilem. Quod amplius infra patebit; consequentia verò solùm requirit; quòd unum ex alio inferatur, licet non detur talis medii dispositio, ut patet in propositionibus convertentibus, quæ inferuntur ex conversis in bona consequentia, licet non detur dispositio medii; ut cum dicimus, *Omne animal est sensibile: ergo aliquod sensibile est animal.* Hoc supposito, quæ de argumentatione dixerimus, suo modo possunt consequenter applicari.

2 Igitur argumentatio, quæ est tertium, & præcipuum instrumentum sciendi, sic solet definiri, *Est oratio, in qua unum ex alio consequi denotatur.* Dicitur *oratio*, per quod convenit cum aliis orationibus, quæ non sunt argumentationes. Dicitur, *in qua unum ex alio*, &c. Per quod differt ab aliis orationibus, & etiam ab aliis instrumentis sciendi; quia manifestat ignotum per illationem, quod non faciunt definitio, & divisio.

3 Ex definitione argumentationis cognoscitur, quòd in illa necessario tria inveniuntur, id, quod sequitur; id, ex quo sequitur; & nota illationis, ut in hac, *Homo est rationalis: ergo est risibilis.* In qua id, quod sequitur, est, quòd homo est risibilis; id, ex quo sequitur est, quòd homo est rationalis; nota illationis est, *ly ergo*, & quia hæc nota illationis est triplex, scilicet, causalis, ut *quia*, conditionalis, ut *si*, & rationalis, ut *ergo*, ideò argumentatio in prima sui divisione est causalis, conditionalis, & rationalis, juxta dicta de propositione hypothetica; differt tamen argumentatio à propositione hypothetica, in eo quòd talis propositio innuit affirmationem, vel negationem consequentis de antecedenti, ideòque dicitur vera, vel falsa; quia veritas, & falsitas sunt proprietates propositionis; argumentatio verò innuit consequens inferri ex antecedenti; & sic dicitur

bo-

bona, vel mala; non autem vera, vel falsa; unde materialiter idem potest esse propositio hypotetica, & argumentatio, differunt autem per diversas rationes formales, modo dicto.

4 Quòd autem argumentatio sit bona, potest provenire ex ratione formali, & ex ratione materiali. Tunc dicitur bona ex ratione formali, quando concludit ratione formæ, id est, ratione dispositionis terminorum, ut quando dicimus: *Omne rationale est lapis; Franciscus est rationalis; ergo Franciscus est lapis*; quia, licet assumptum sit falsum; consequentia tamen est bona, seu rectè inferitur ratione bonæ dispositionis terminorum. Tunc dicitur bona ex ratione materiali, quando concludit tantum ratione materiæ in qua exercetur, ut quando dicimus: *Petrus currit; ergo movetur*, consequentia est bona tantum ratione materiæ, quia servata eadem forma, & variata materia, non concludit, nec rectè inferitur, ut si dicamus: *Petrus currit; ergo disputat*.

5 Dividitur argumentatio in communi in syllogismum, enthymema, dilema, exemplum, & inductionem. *Syllogismus est argumentatio, in qua quibusdam positis, alterum quid à positis necessario sequitur*. Sic communiter dialectici. Quæ definitio deducitur ex Aristot. 1. Prior. cap. 1. ubi sic syllogismum definit: *Est oratio in qua quibusdam positis, aliud quidam diversum ab his, quæ posita sunt, necessario accidit, eo quòd hæc sunt, quæ verba idem valent in re, ac supra posita definitio, quæ clarius appareret*. Dicitur, *Oratio*, seu *argumentatio*, per quod convenit syllogismus cum aliis argumentationibus. Dicitur, *In qua quibusdam positis*; quia ad syllogismum necessario requiritur, quòd præcedant duæ propositiones, quæ dicuntur præmissæ, & per hoc differt ab aliis argumentationibus, ut patebit ex earum definitionibus. Per cæteras particulas denotatur, conclusionem, seu



consequentiam necessario inferri ex præmissis , eo quod sint benè dispositæ in debita forma ; sed de syllogismo amplius capitibus sequentibus.

6 *Enthymema est argumentatio in qua ex una sola propositione sequitur conclusio ; ut cum dicimus, Petrus currit: ergo movetur. Hæc argumentatio tantum concludit ratione materiæ, ut patet ex supradictis. Dilemma est argumentatio bicornis, seu complexa, in qua duæ partes ita disponuntur, ut respondens nullo modo possit fugere; ut si volumus convincere insipientem, qui multum temporis in studio consumpsit, sic possumus conficere argumentum: Aut studuisti, vel non? Si studuisti; ergo rudis es. Si non studuisti; ergo negligens es. Exemplum est argumentatio in qua deducitur unum ex alio propter similitudinem, propter quod etiam dicitur, argumentatio a paritate, ut quando dicimus, Deus pepercit Magdalena; quia egit pœnitentiam; ergo parceret cuilibet, qui pœnitentiam egerit.*

7 Inductio est duplex; alia dicitur ascensus, & est argumentatio a particularibus sufficienter enumeratis ad universale; ut quando dicimus, Hic homo est rationalis; & hic homo est rationalis & sic de cæteris omnibus; ergo Omnis homo est rationalis. Altera dicitur descensus, & est argumentatio ab universali ad particularia sufficienter enumerata, ut quando dicimus, Omnis homo est rationalis; ergo hic homo est rationalis, & hic homo est rationalis, & similiter de omnibus aliis.

8 Dividitur ascensus in copulativum, disjunctivum, copulatum, & disjunctum. Copulativus est, quando progreditur a singularibus sufficienter enumeratis in propositionibus copulatis, conjunctione &, aut nec ad universale, ut quando dicimus, Hic homo est rationalis, & hic homo est rationalis, & sic de cæteris; ergo omnis homo

*homo est rationalis*. Hic ascensus fit in termino, qui supponitur distinctivè. Ascensus disjunctivus est quando progreditur a particularibus sufficienter enumeratis in propositionibus disjunctis disjunctione *vel* ad aliquod particulare, ut quando dicimus; *vel hic homo currit, vel hic homo currit*, & similiter de cæteris; ergo *aliquis homo currit*. Hic ascensus fit in termino, qui supponitur confusè. Ascensus copulatus est quando progreditur a particularibus sufficienter enumeratis, & copulatis conjunctione & in una sola propositione, ad universale, ut quando dicimus, *Hic Apostolus, & hic Apostolus*, & similiter de cæteris, *sunt duodecim*: ergo *omnes Apostoli sunt duodecim*. Hic ascensus fit in termino, qui supponitur copulativè. Ascensus disjunctus est quando progreditur à particularibus sufficienter enumeratis, & disjunctis disjunctione, *vel* in una sola propositione, ad universale, ut quando dicimus, *Hic oculus, vel hic oculus requiritur ad videndum*: ergo *oculus requiritur ad videndum*. Hic ascensus fit in termino, qui supponitur indefinitè, & etiam potest fieri in termino, qui supponitur confusè; dicendo, ergo *aliquis oculus requiritur ad videndum*.

9 Idem dicendum est de descensu, scilicet, quod dividitur in copulativum, disjunctivum, copulatum, & disjunctum, ut patet in prædictis exemplis, si modo opposito proponantur, scilicet, ab universali, vel particulari ad singularia. Alia de ascensu, & descensu solent adduci valde confusa, quæ exercitio facilius cognoscuntur, & applicantur in argumentatione.

10 Hic advertendum est primo, quod ratio argumentationis propriæ, & rigorosè solum, convenit syllogismo; quia hic solus concludit ratione formæ, seu ratione dispositionis medi cum extremitatibus; cæteris verò impropriè convenit ratio argumentationis; quia concludunt tantum ratione materiæ, & ut ratione formæ

mæ concludant, debent reduci ad syllogismum, ut discurrenti per omnes patebit; adducemus aliquod exemplum, v. gr. Hæc argumentatio : *Omnis homo currit : ergo Petrus currit*, non concludit ratione formæ, nisi propter aliam propositionem in illo implicitam, scilicet : *Petrus est homo*, qua posita pro minori fit integer syllogismus in hunc modum : *Omnis homo currit : Petrus est homo : ergo Petrus currit*, & sic concludit ratione formæ.

11 Advertendum est secundò, quod ad rationem bonæ consequentiæ quatuor lege communiter observantur. Prima, quod ex vero semper sequitur verum; ex falso verò, aliquando verum, aliquando falsum; ex ista enim propositione vera : *Franciscus est rationalis* sequitur hæc vera : ergo *Franciscus est risibilis*; ex ista falsa : *Planta est animal* sequitur hæc vera : ergo *planta est vivens*, & hæc falsa : ergo *planta est sensibilis*. Notandum tamen est, quòd quando ex falso sequitur verum, non est, quia ex falsitate unius sequatur veritas alterius in bona consequentia, sed quia consequens ratione materiæ est in se verum, ut patet in exemplo posito.

12 Secunda lex est, quod ex opposito consequentis sequitur oppositum antecedentis; non verò ex opposito antecedentis sequitur oppositum consequentis; nam benè valet : *Non est animal : ergo non est homo*; non autem valet e contra : *Non est homo : ergo non est animal*; quod debet intelligi in terminis pertinentibus sequela non convertibilibus; quia in illis terminis consequens est magis communis, quam antecedens, & ex negatione termini magis communis sequitur negatio termini minus communis; non verò è contra, ut ex se patet: in terminis verò convertibilibus ex negatione cujuscunque sequitur negatio alterius; quia sunt æqualiter communes: valet enim : *Non est rationale : ergo non est risibile*; & etià è cōtra : *non est risibile : ergo non est rationale*.

13 Tertia lex est, quod quidquid colligitur ex consequenti, colligitur ex antecedenti; non verò, quidquid colligitur ex antecedenti, colligitur ex consequenti v. g. quia ex animali colligitur sensibile, dicendo: *Est animal*: ergo *sensibile*; etiam colligitur ex homine dicendo: *Est homo*: ergo *sensibilis*; è contra verò, licet ex homine sequatur risibile, dicendo: *Est homo*; ergo *risibilis*, non ideo sequitur ex animali, dicendo: *Est animal*: ergo *risibile*, quod etiam intelligitur in terminis non convertibilibus, non verò in convertibilibus; nam in his, quod sequitur ex uno, sequitur ex alio, quidquid enim sequitur ex homine, sequitur ex risibili, & è converso; cujus eadem est ratio, ac in lege præcedenti.

14 Quarta lex est, quod ab inferiori ad superius valet consequentia affirmativè, ut *Est homo*; ergo *est animal*; non tamen negativè, ut *Non est homo*; ergo *non est animal*; è contra verò à superiori ad inferius valet consequentia negativè, ut *Non est animal*; ergo *non est homo*; non verò affirmativè, ut *Est animal*; ergo *est homo*; quod provenit ex eadem ratione, ac in legibus præcedentibus, scilicet, ex majori, vel minori communitate terminorum.

## SECUNDUM CAPITULUM.

### *In quo agitur de divisione syllogismi:*

1 **S**Yllogismus communiter dividitur ratione materiæ, & ratione formæ; ideoque primò sciendum est, quid sit materia, & quid forma syllogismi? Igitur materia syllogismi est duplex, proxima scilicet, & remota. Propositiones ex quibus componitur syllogismus, dicuntur materia proxima illius; quæ propositiones sunt tres, major, minor (quæ etiam dicuntur, præmissæ) & consequentia. Termini, ex qui-

quibus componitur hæc triplex propositio, dicuntur materia remota syllogismi, qui termini tantum sunt tres; unus dicitur *medium*, alius dicitur *major extremitas*, & alius *minor extremitas*; *medium* est terminus, qui ponitur in majori & minori propositione, non verò in consequentia; *major extremitas* est terminus, qui ponitur cum medio in majori propositione; *minor extremitas* est terminus, qui ponitur cum medio in minori propositione, & utraque extremitas ponitur in consequentia, quod totum patet in hoc syllogismo: *Omnis homo est animal: omne rationale est homo; ergo omne rationale est animal*; in quo sunt tres propositiones; quarum prima dicitur *major*; secunda, *minor*; & tertia *consequentia*, & etiam sunt tres termini, scilicet, *homo*, qui dicitur *medium*; quia ponitur in majori & minori propositione, & non in consequentia; *animal*, qui dicitur *major extremitas*, quia ponitur cum medio in majori propositione, & *rationale*, qui dicitur *minor extremitas*, quia ponitur cum medio in minori propositione, & uterque conjungitur in consequentia.

2 Forma syllogismi componitur ex figura, & modo. *Figura est dispositio medii cum extremitatibus secundum debitam subjectionem, & prædicationem. Modus est dispositio præmissarum inter se, & cum consequentia secundum quantitatem, & qualitatem*: quod patet in supraposito syllogismo, in quo *figura* consistit in eo quod terminus *homo*, qui est *medium*, taliter disponatur cum extremitatibus; ut in majori propositione sit subjectum, & in minori prædicatum, *modus* autem consistit in eo quod præmissa ita disponantur inter se, & cum consequentia secundum quantitatem, quod omnes sint universales, & secundum qualitatem, quod omnes sint affirmativæ.

3 Cognitis jam materia, & forma syllogismi, primo dividitur ratione materiæ remota in

communem , & singularem . Communis est , qui constat medio commune singularis est ; qui constat medio singulari . Secundò dividitur ratione materiæ proximæ in affirmativum , & negativum . Affirmativus est , cujus conclusio est affirmativa . Negativus autem , cujus conclusio est negativa . Tertiò dividitur ratione ; ejusdem materiæ proximæ in categoricum , & hypotheticum . Categoricus est cujus propositiones sunt categoricæ . Hypotheticus est , cujus aliqua propositio est hypothetica . Quarto ratione ejusdem materiæ proximæ dividitur in scientificum , seu demonstrativum , in probabilem , seu opinativum ( qui etiam dicitur topicus ) & in sophisticum , seu apparentem , qui etiam dicitur elenchus . Demonstrativus est , qui constat propositionibus necessariis . Probabilis est , qui constat propositionibus probabilibus . Sophisticus est , qui constat propositionibus ( saltim aliqua ) quæ cum falsæ sint , apparent veræ .

4 Cum forma syllogistica constet figura , & modo , syllogismus ratione formæ dupliciter dividitur : Igitur ratione figuræ dividitur in triplicem figuram . Prima est , in qua medium ponitur pro subiecto in maiori propositione , & pro prædicato in minori , ut cum dicimus ; *Omnis homo est animal ; Petrus est homo ; ergo Petrus est animal* , in quo terminus *homo* , qui est medium , est subiectum in maiori ; & prædicatum in minori . Secunda figura est , in qua medium ponitur pro prædicato in maiori & minori propositione , ut cum dicimus . *Omnis homo est animal ; nullus lapis est animal ; ergo nullus lapis est homo* ; in quo syllogismo terminus *animal* , qui est medium , est prædicatum in maiori , & minori propositione . Tertia figura est , in qua medium ponitur pro subiecto in maiori , & minori propositione , ut cum dicimus ; *Aliquis homo est animal ; omnis homo est rationalis ; ergo aliquod rationale est animal* ; in quo syllogismo

ter-

terminus *homo*, qui est medium, est subiectum in maiori, & minori propositione. Totum hoc, hoc versiculo continetur.

Sub, Præ, Prima: Secunda, bis, Præ, Tertia  
bis, sub.

5 Syllogismus ratione modi dividitur in tot modos, quot fieri potest dispositio præmissarum secundum quantitatem, & qualitatem, quod ut facile percipiatur, in memoriam revocari debent illi versiculi: *Afferit A, &c.* & eorum intelligentia; & sic facile colligitur, quod in qualibet figura sexdecim modis possunt disponi præmissæ secundum quantitatem, & qualitatem; nam præmissæ universales, aut sunt AA, aut EE, aut AE, aut EA, ecce quatuor modos; præmissæ particulares, aut sunt II, aut IO, aut OO, aut OI, ecce alios quatuor modos; præmissæ, quarum una est particularis, & alia universalis, aut sunt AI, aut AO, aut EI, aut EO, ecce alios quatuor modos; vel è contra, quia aut sunt IA, aut OA, aut IE, aut OE, ecce alios quatuor modos; omnes istæ dispositiones præmissarum possunt accommodari cuilibet figuræ, & cùm triplex sit figura, invenies quadraginta & octo dispositiones præmissarum, seu modos syllogisticos; ex quibus omnibus tantum decem, & novem inventi sunt à philosophis consistentes propter rationes capite sequenti assignandas, & ex illis novem primi pertinent ad primam figuram; quatuor sequentes pertinent ad secundam, sex ultimi pertinent ad tertiam; qui omnes his versiculise continentur:

Barbara, Celarent, Darii, Ferio, Baralipton,

Celantes, Dabitis, Fapesmo, Frisefomorum,

Cesare, Camestres, Festino, Barocco, Darapti,

Felapton, Disamis, Datisi, Brocardo, Ferison.

Ex his , qui pertinent ad primam figuram , quinque ultimi concludunt indirectè , quatuor verò primi , & similiter omnes , qui pertinent ad secundam , & tertiam figuram concludunt directè . Pro quo advertendum est , quod directè concludere est , quod in consequentia minor extremitas sit subjectum , & major extremitas sit prædicatum . Concludere indirectè est , quòd in consequentia major extremitas sit subjectum , & minor extremitas sit prædicatum . Deinde quatuor primi syllogismi primæ figuræ dicuntur perfecti ; quia ex se apparent necessarii , cæteri omnes dicuntur imperfecti , quia licet ex se sint necessarii : tamen non apparet eorum necessitas , nisi reducantur ad syllogismos perfectos , ut suo loco dicemus .

*Exempla quatuor modorum directè concludentium  
in prima figura .*

Bar Omnis homo est rationalis .  
ba Omne risibile est homo .  
ra . Ergo omne risibile est rationale .

Ce Nullus homo est lapis .  
la Omne rationale est homo .  
rent . Ergo nullum rationale est lapis .

Da Omne animal est vivens .  
ri Aliquod sensibile est animal .  
i . Ergo aliquod sensibile est vivens .

Fe Nullus equus est lapis .  
ri Aliquod rationale est equus ,  
o . Ergo aliquod rationale non est lapis .

*Exempla quinque modorum indirectè concludentium  
in prima figura .*

Ba Omnis homo est sensibilis .  
ra Omne risibile est homo .  
liptō . Ergo aliquod sensibile est risibile .

Ce .



Ce Nullus homo est æquus:  
 lan Omne rationale est homo.  
 tes Ergo nullus æquus est rationalis.

Da Omnis planta est vivens.  
 bi Aliqua arbor est planta.  
 tis. Ergo aliquod vivens est arbor.

Fa Omnis leo est rugibilis  
 pe Nullus lapis est leo.  
 smo Ergo aliquod rugibile non est lapis.

Fri Aliquis homo est risibilis.  
 fe Nullus lapis est homo.  
 fomorū Ergo aliquod risibile non est lapis.

*Exempla quatuor modorum directè concludentium  
 in secunda figura.*

Ce Nullus homo est lapis.  
 fa Omnis chrysolithus est lapis.  
 re. Ergo nullus chrysolithus est homo.

Ca Omnis homo est risibilis  
 me Nulla planta est risibilis:  
 ftres Ergo nulla planta est homo.

Fe Nulla arbor est rationalis.  
 sti Aliquis homo est rationalis.  
 no Ergo aliquis homo non est arbor.

Ba Omne vivens est animatum.  
 roc. Aliquis lapis est animatus.  
 co Ergo aliquis lapis non est vivens.

*Exempla sex modorum directè concludentium in  
 tertia figura.*

Da Omnis homo est risibilis.  
 rap Omnis homo est rationalis.  
 ti. Ergo aliquod rationale est risibile.

Fe Nullus lapis est vivens.

lap Omnis lapis est insensibilis:

ton Ergo aliquod insensibile non est vivens

Di Aliquod animal est rationale.

fa Omne animal est sensibile.

mis Ergo aliquod sensibile est rationale.

Da Omnis planta est vivens:

ti Aliqua planta est cupressus.

fi. Ergo aliqua cupressus est vivens.

Bro Aliquis lapis non est homo.

car Omnis lapis est insensibilis.

do Ergo aliquod insensibile non est homo.

Fe Nullus homo est lapis.

ri Aliquis homo est rationalis.

son Ergo aliquod rationale non est lapis.

6 Ex dictis non erit dissimile assignare unde syllogismi robur, & vim accipiant; igitur syllogismi perfecti fundantur in illis principiis *dicti de omni*, quod idem est, ac dicere: *Quidquid predicatur de superiori, predicatur de quolibet contento sub illo*; hoc principium est proprium syllogismorum affirmativorum, & *dicti de nullo*, quod idem est, ac dicere: *Quidquid negatur de superiori, negatur de quolibet contento sub illo*; hoc principium est proprium syllogismorum negativorum: quod omne clarè patebit discurrendo per syllogismos supra factos. Syllogismi imperfecti in re etiam accipiunt robur à prædictis principiis; sed secundum apparentiam accipiunt robur à syllogismis perfectis ad quos reducuntur.

## TERTIVM CAPITVLVM.

*In quo agitur de regulis observandis ad consistentiam Syllogismorum.*

1 **A** Liquæ regulæ solent assignari, tam in cōmuni, quàm in particulari, pro qualibet figura ad consistentiam syllogismorum. Igitur prima regula pro syllogismis in communi est, quòd medium sit distributum in aliqua præmissa; unde hic syllogismus non est bonus: *aliquod animal est rationale, omnis leo est animal, ergo omnis leo est rationalis*, ratio est; quia quando medium non est distributum, non verificatur aliquod principium ex illis, *dici de omni, & dici de nullo*.

2 Secunda regula est, quòd utraque præmissa non sit negativa; unde hic syllogismus non est bonus: *Nullus homo est arbor, platanus non est homo, ergo platanus non est arbor*, ratio est, quia minor extremitas non continetur sub medio, quod erat necessarium, ut verificaretur aliquod ex supradictis principiis.

Tertia regula est, quòd quando aliqua ex præmissis est particularis, consequentia non sit universalis, unde hic syllogismus non est bonus: *Omne animal est corpus, aliqua substantia est animal, ergo omnis substantia est corpus*. Ratio est, quia in bona consequentia non infertur universale de particulari.

4 Quarta regula est, quòd quando aliqua præmissa est negativa, consequentia non sit affirmativa; unde hic syllogismus non est bonus. *Omnis homo est animal, aliqua planta non est homo, ergo aliqua planta est animal*. Ratio est, quia effectus nequit esse perfectior sua causa, & sic propositio negativa nequit esse causa propositionis affirmativæ, quæ est perfectior illa.

5 Quinta regula est, quòd in consequentia nullatenus ponatur medium, unde hic syllogismus

E 5 non

non est bonus : *Omne animal est sensibile : omne rationale , est animal : ergo omne sensibile est animal*, quæ consequentia, licet materialiter verum contineat, non tamen sequitur ex præmissis ratione formæ. Ratio hujus regulæ est, quia in consequentia debet inferri unio, aut repugnantia extremitatum inter se propter unionem, aut repugnantiam cum medio, quod nullatenus evenire potest, quando medium ponitur in consequentia, ut ex se patet.

6 Sexta regula est, quòd in consequentia nullatenus distribuatur aliquis terminus, qui non fuit distributus in præmissis, unde hic syllogismus non est bonus : *Omne rationale est animal : omne risibile est rationale ; ergo omne animal est risibile*. Ratio est, quia variatur suppositio, quia animal, quod in majori propositione supponitur confusè, seu indefinite, in consequentia supponitur distributive.

7 Pro prima figura in particulari duæ regulæ observandæ sunt. Prima est, quòd propositio minor non sit negativa, unde hic syllogismus non est bonus : *Omne rationale est substantia, platanus non est rationalis : ergo platanus non est substantia*. Ratio est, quia minor extremitas non continetur sub medio. Si autem observes, quòd minor sit universalis negativa, consequentia, particularis, & quod indirectè concludatur, benè potes conficere syllogismum consistentem in prima figura ; ut patet in syllogismo in *sapismo*.

8 Secunda regula est, quòd propositio major non sit particularis, unde hic syllogismus non est bonus : *Aliquod animal est homo ; omnis leo est animal : ergo aliquis leo est homo*. Ratio est, quia medium manet in utraque præmissa in distributum. Si verò hæc observes, scilicet, quòd minor sit universalis negativa, & major particularis affirmativa, & concludatur indirectè, potes conficere syllogismum consistentem in prima figura, ut patet in syllogismo in *frisesomorum*.

9 Pro

9 Pro secunda figura in particulari duæ regulæ observandæ sunt. Prima est, quod minor, vel major sit negativa, unde hic syllogismus non est bonus: *Omne rationale est animal; omnis leo est animal; ergo omnis leo est rationalis*. Ratio est, quia cum medium sit prædicatum in utraque præmissa, manet indistributum, si utraque est affirmativa.

10 Secunda regula est, quod propositio major non sit particularis, unde hic syllogismus non est bonus: *Aliquis homo est animal; nullus lapis est animal; ergo nullus lapis est homo*. Ratio est, quia major extremitas distribuitur in consequentia, quæ non erat distributa in majori propositione, licet consequens materialiter sit verum.

11 Pro tertia figura in particulari duæ regulæ observandæ sunt. Prima, quod major non sit negativa, unde hic syllogismus non est bonus: *Omnis homo est substantia; aliquis homo non est arbor; ergo aliqua arbor non est substantia*. Ratio est, quia cum medium sit subjectum in utraque præmissa, si minor esset negativa, prædicatum, quod non erat distributum in majori, distribueretur in consequentia.

12 Secunda regula est, quod consequentia non sit universalis, unde hic syllogismus non est bonus: *Omnis homo est animal; omnis homo est substantia; ergo omnis substantia est animal*. Ratio est, quia cum minor debeat esse affirmativa, si consequentia esset universalis, in illa distribueretur prædicatum, quod non erat distributum in minori.

13 Ex prædictis regulis clarè deducitur, solum decem & novem modos supra enumeratos esse consistentes, quia in omnibus aliis dispositionibus præmissarum inveniuntur aliqui defectus contra prædictas regulas.

## QUARTVM CAPITVLVM.

*In quo agitur de reductione syllogismorum imperfectorum ad perfectos.*

1 **D**iximus, syllogismos imperfectos sumere robur à syllogismis perfectis, ad quos reducuntur, ut clarè appareat eorum consistentia, quod dupliciter potest contingere, scilicet, per ostensionem, & ad impossibile. Ut syllogismi reducantur per ostensionem, convertuntur, vel transmutantur præmissæ, vel saltim aliqua illarum: pro qua reductione aliquæ regulæ observandæ sunt, quibus cognitis, facilè reducuntur syllogismi imperfecti ad perfectos.

2 Igitur observandum est primò; quòd in dictionibus, in quibus fiunt syllogismi imperfecti, sequentes litteræ dispersæ reperiuntur scilicet, S.P.M.C. Ex quibus, S. denotat, quòd propositio, quæ correspondet litteræ vocali ante S. constitutæ, debet converti simpliciter. P. denotat, quòd propositio, quæ correspondet litteræ vocali ante P. constitutæ, debet converti per accidens. M. denotat, quòd præmissæ debent mutari, seu transponi, ita ut propositio major fiat minor, & minor fiat major. C. denotat, quòd syllogismus correspondens modo, in quo C. reperitur, nullatenus potest per ostensionem converti, sed tantum per impossibile; huiusmodi sunt syllogismi, qui fiunt in his dictionibus *Brocardo*, & *Barocco*. Quæ omnia his versiculis compendiosè continentur:

Simpliciter verti vult S. P. verò per accidens,

M. vult transponi, C. per impossibile duci.

1 Secundò observandum est, quòd omnes syllogismi imperfecti, incipiunt seorsim aliqua ex litteris initialibus, quibus etiam incipiunt

piunt syllogismi perfecti, ad quos reducuntur, & cum isti sint tantum quatuor, scilicet, *Barbara*, *Celarent*, *Darij*, *Ferio*, etiam litteræ initiales omnium syllogismorum sunt tantum quatuor, scilicet, B, C, D, F. B denotat, quod syllogismi, qui fiunt in aliquo modo, cujus littera initialis est B, reducuntur ad *Barbara*; C denotat, quod syllogismi, qui fiunt in aliquo modo, cujus littera initialis est C, reducuntur ad *Celarent*. D denotat, quod syllogismi, qui fiunt in aliquo modo, cujus littera initialis est D, reducuntur ad *Darij*, F denotat, quod syllogismi, qui fiunt in aliquo modo, cujus littera initialis est F, reducuntur ad *Ferio*.

4 His suppositis, facilis est reductio syllogismorum imperfectorum ad perfectos per ostensionem. Pro omnibus sit exemplum in syllogismo facto in *Camestres*: *omne animal est vivens: nullus lapis est vivens: ergo nullus lapis est animal*. In quo, quia post secundam vocalem, quæ est E, sequitur S, denotatur, quod propositio minor debet converti simpliciter hoc modo: *Nullum vivens est lapis*; & quia post tertiam vocalem, quæ etiam est E, sequitur etiam S, denotatur, quod consequentia debet etiam converti simpliciter hoc modo: *ergo nullum animal est lapis*; & quia in prædicta dictione invenitur littera M, denotatur, quod præmissæ debent mutari, seu transponi, ita ut major fiat minor, & minor fiat major; quibus observatis fit syllogismus perfectus, hoc modo: *Nullum vivens est lapis: omne animal est vivens; ergo nullum animal est lapis*: qui quidem syllogismus est in *Celarent*, cujus littera initialis est C, sicut etiam littera initialis *Camestres*. Similiter, observatis regulis correspondentibus, potest exemplificari in quolibet alio modo, quod exercitio facile comprehenditur.

5 Reductio per impossibile, nihil aliud est, quam cogere protervum negantem consequentem,

quentiam modi imperfecti ad concedenda duo contraria, vel contradictoria, ratione dispositionis syllogismi in modo perfecto. Pro quo aliqua observanda sunt.

6 Observandum est primò pro syllogismis imperfectis primæ figuræ, quòd si aliquis neget tibi consequentiam alicujus, debes assumere contradictorium ejus, & ponere illud pro majori; & majorem, quæ erat in syllogismo imperfecto, ponere pro minori, & necessario sequetur in bona consequentia in aliquo modo perfecto contrarium, vel contradictorium minoris, quam tibi concessit in modo imperfecto; & hoc vel mediatè, vel immediatè, v. g. in hoc syllogismo facto in *Baralipson*; *omnis homo est animal; omne rationale est homo; ergo aliquod animal est rationale*; si aliquis, concessa majori & minori, neget consequentiam, debes assumere contradictorium illius, scilicet, *nullum animal est rationale*, & ponere illud pro majori, & pro minori majorem syllogismi supradicti, & sic conficies hunc syllogismum perfectum in *Celarent*; *nullum animal est rationale; omnis homo est animal; ergo nullus homo est rationalis*; quæ consequentia, si per accidens convertatur hoc modo; *Aliquod rationale non est homo*, invenies contradictorium minoris concessæ in *Baralipson*, scilicet, *omne rationale est homo*; & sic negans consequentiam syllogismi imperfecti, cogitur concedere duo contradictoria, & sic deducitur ad impossibile.

7 Ab hac regula excipitur *Celantes*, & sic pro illo observandum est secundò, quòd si aliquis neget tibi consequentiam, debes assumere contradictorium ejus, & ponere illud pro minori, & pro majori minorem syllogismi facti in *Celantes*, & infertur in consequentia contradictorium majoris concessæ, saltim mediatè, v. g. si aliquis neget consequentiam hujus syllogismi; *Nullus homo est insensibilis; omne rationale est ho-*  
mo;



mo; ergo nullum insensibile est rationale, debes assumere contradictorium illius, scilicet, *aliquod insensibile est rationale*, & ponere illud pro minori, & pro majori minorem prædicti syllogismi; & sic conficies hunc syllogismum perfectum in *Darii*; *omne rationale est homo; aliquod insensibile est rationale; ergo aliquod insensibile est homo*; quæ consequentia, si convertatur simpliciter hoc modo *Aliquis homo est insensibilis*, invenies contradictorium majoris concessæ, scilicet, *nullus homo est insensibilis*, & sic protervus cogitur concedere duo contradictoria.

8 Pro syllogismis imperfectis secundæ figure observandum est tertio, quod si quis neget consequentiam, debes assumere contradictorium illius, & ponere illud pro minori servata eadem majori syllogismi imperfecti, & sic inferitur oppositum minoris concessæ; v. g. si aliquis neget tibi consequentiam hujus syllogismi imperfecti in *Cesare*; *nullus homo est insensibilis, omnis lapis esse insensibilis*, ergo *nullus lapis est homo*, debes assumere contradictorium illius, scilicet, *aliquis lapis est homo*, & ponere illud pro minori, & servata majori syllogismi imperfecti, conficies syllogismum in *Ferio* hoc modo: *Nullus homo est insensibilis: aliquis lapis est homo: ergo aliquis lapis non est insensibilis*: quæ consequentia est contradictorium supradictæ minoris jam concessæ, & sic negans cogitur concedere duplex contradictorium.

9 Pro syllogismis imperfectis tertiæ figuræ observandum est quarto, quod si aliquis neget tibi consequentiam, debes assumere contradictorium illius, & ponere illud pro majori, servata minori syllogismi imperfecti; & sic inferitur oppositum majoris jam concessæ, v. g. si aliquis neget consequentiam hujus syllogismi imperfecti in *Darapti*, *omnis homo est animal, omnis homo est rationalis*, ergo *aliquod rationale est animal*, debes assumere contradictorium illius, sci-

scilicet, *nullum rationale est animal*, & ponere illud pro majori, & servata minori syllogismi imperfecti, conficies syllogismum perfectum, in *celarent*, hoc modo, *Nullum rationale est animal, omnis homo est rationalis, ergo nullus homo est animal*, quæ consequentia est contraria illius majoris jam concessæ, & sic cogitur negans concedere duo contraria. Totum hoc continetur in sequentibus versiculis.

Prima majorem mutat, perditque minorem;

*Celantes* majorem perdit, mutatque minorem;

Servat majorem, perditque secunda minorem;

Tertia majorem perdit, servatque minorem.

10. Ut facilè cognoscas, qui syllogismi ex imperfectis reducantur ad quemlibet ex quatuor perfectis, tres sequentes voces in promptu debes habere: *Nesciebatis*, *Odiebant*, *Latare romanis*, in quibus tot litteras vocales invenies, quot sunt syllogismi imperfecti, qui ad perfectos reducuntur. Prima vox, scilicet, *Nesciebatis*, continet quinque litteras vocales suo ordine correspondentes quinque modis imperfectis in directè concludentibus in prima figura, scilicet, prima littera vocalis, quæ est E, correspondet *Baralipon*, secunda, quæ est I, correspondet *Celantes*, & sic de cæteris. Secunda vox, scilicet, *Odiebant*, habet quatuor litteras vocales correspondentes suo ordine quatuor modis imperfectis secundæ figuræ, scilicet, prima, quæ est O, correspondet *Cesare*, & sic de cæteris. Tertia vox, scilicet, *Latare romanis*, habet sex litteras vocales correspondentes suo ordine sex modis imperfectis tertiæ figuræ, scilicet, prima, quæ est E, correspondet *Darapti*, & sic de cæteris. Omnes syllogismi, qui sunt in modis imperfectis, quibus juxta hunc ordi-

ordinem , correspondet littera A , reducuntur ad *Barbara* ; quia habet conclusionem universalem affirmativam , quæ per A , denotatur , & omnes , qui fiunt in modis imperfectis , quibus correspondet littera E , reducuntur ad *Celarent* ; quia habet conclusionem universalem negativam , quæ per E denotatur ; & omnes , qui fiunt in modis imperfectis , quibus correspondet littera I , reducuntur ad *Darii* , quia habet conclusionem particularem affirmativam , quæ per I , denotatur ; & omnes , qui fiunt in modis imperfectis , quibus correspondet littera O , reducuntur ad *Ferio* , quia habet conclusionem particularem negativam , quæ per O denotatur .

## Q U I N T U M C A P I T U L U M .

*In quo agitur de aliquibus divisionibus  
syllogismi .*

1 **D**iximus cap. 2. syllogismum dividi ratione materiæ remotæ in communem , & singularem , & hucusque loquuti sumus de syllogismo communi , nunc autem aliqua restat notitia de syllogismo singulari , qui appellatur expositivus ; quia illo usus est Aristot. ad exponendos syllogismos de medio communi , & quia tam clarè apparet ejus veritas , quod non indigeat alio manifestetur .

2 Igitur syllogismus singularis , seu expositivus potest confici in qualibet extriplici supra dicta figura , tam affirmativè , quàm negativè ; in prima figura conficiuntur hi syllogismi *Leopoldus est Imperator : tu es Leopoldus ; ergo tu es Imperator : Ludovicus non est Imperator ; Tu es Ludovicus ; ergo tu non es Imperator ;* In secunda figura potest confici hic syllogismus negativus ; *Carolus non est victus in pralio ; Imperator Turcarum est victus in pralio ; ergo Imperator Turcarum non est Carolus ;* syl-  
lo.

syllogismus affirmativus nequit confici in hac figura, quia ut dictum est cap. de regulis syllogismorum, in illa aliqua præmissa debet esse negativa, & consequenter conclusio. In tertia figura possunt fieri hi syllogismi. *Carolus est Catholicus; Carolus est Rex Hispania; ergo Rex Hispania est Catholicus; Carolus noluit regnare; Carolus est Imperator, ergo Imperator noluit regnare.*

2 Syllogismi expositorii non accipiunt robur ab illis principiis; *Dici de omni, & dici de nullo;* quia hæc sunt propria syllogismorum de medio communi; expositorii autem sunt de medio singulari; accipiunt tamen robur ab his principiis; *Quæ sunt eadem uni tertio, sunt eadem inter se;* quod non debet intelligi præcisè de identitate reali stricta, sed de qualibet convenientia, ut patet in syllogismis supra positis; &, *quæ repugnant uni tertio, repugnant inter se;* totalis notitia primi principii traditur communiter à Theologis in materia de Trinitate.

3 Diximus etiam, quod syllogismus dividitur in categoricum, & hypotheticum, quod hypotheticus est, qui constat aliqua propositione hypothetica; nunc restat scire, quod talis syllogismus non accipit robur ab aliquo ex supradictis principiis, sed solum habet vim ex concessis, v. gr. *Si sol lucet, dies est; sed Sol lucet; ergo dies est,* hic Syllogismus solum habet vim, & efficaciam ex suppositione, quod concedatur conditio, & propositio minor. Aliæ divisiones syllogismi solent adduci, ut in obliquum & rectum, in absolutum & modalem, sumpta denominatione à casu recto, vel obliquo, à propositione absoluta, vel modali ex quibus componitur, circa quos, quia parvi momenti sunt, nihil se offert advertendum. præcipua divisio syllogismi ratione materiæ est illa, quam etiam loco citato proposuimus, scilicet in demonstrativum, topicum, & sophisticum, circa quos plura se offerunt, quæ non par-

parvam difficultatem præferunt, ideòque commodius de illis alio loco tractatur, ne difficultatibus tyronum intellectus confundantur.

## SEXTUM CAPITULUM.

*In quo agitur de Arte inveniendi medium.*

1 **A**Rs inveniendi medium ad legitimè probandas propositiones, tam obscurè solet ab aliquibus proponi, quòd magis ad confusionem intellectus, quàm ad doctrinam deferuiat; ut autem claritate possibili illam proponamus, adducendum est in memoriam, quòd diximus de terminis pertinentibus repugnàtia, vel sequela, convertibilibus, vel non convertibilibus; ex convertibilibus uterque se habet tanquam antecedens, vel consequens respectu alterius; quia ad invicem se inferunt, ut patet in his: *Homo, & rationale*, nam valet: *Est homo: ergo rationalis*, & è converso; ex non convertibilibus, magis communis se habet tanquam consequens, & minus communis tanquam antecedens, & sic non se inferunt ad invicem, sed tantùm valet consequentia à minus communi ad magis commune; ut patet in his: *homo, & animal*; nam valet: *est homo: ergo est animal*: non verò è converso. Hoc supposito, has regulas observabis, & medium invenies.

2 Prima regula; ad probandam propositionem universalem affirmativam assume medium; quod sit antecedens prædicati, & consequens subjecti, v. gr. ad probandam hanc propositionem: *Omnis homo est animal*, assume *rationale*, quod est antecedens animalis, & consequens hominis, & sic probabis prædictam propositionem, conficiendo hunc syllogismum in *Barbara*; *omne rationale est animal; omnis homo est rationalis, ergo omnis homo est animal*.

3 Secunda regula : ad probandam propositionem particularem affirmativam , assume medium , quod sit antecedens subjecti , & prædicati , v. gr. ad probandam hanc propositionem : *Aliquod animal est rationale* , assume *hominem* , qui est antecedens animalis , & rationalis , & sic probabis prædictam propositionem , conficiendo hunc syllogismum in *Darii* , *omnis homo est rationalis ; aliquod animal est homo ; ergo aliquod animal est rationale* . Hoc intelligitur in prima figura ; in tertia autem assume medium , quod sit antecedens ad subjectum , & prædicatum ; ad probandam hanc propositionem : *Aliquis homo est vivens* , assume *sensibile* , & sic conficies syllogismum in *Darisi* ; *omne sensibile est vivens ; aliquod sensibile est homo ; ergo aliquis homo est vivens* . Hæc regula tenet , eo quod *sensibile* ratione signi *aliquod* , sit antecedens ad hominem licet in se sit consequens .

4 Tertia regula : ad probandam universalem negativam assume medium , quod sit consequens subjecti , & repugnans prædicato , v. gr. ad probandam hanc propositionem : *Nullus homo est lapis* , assume *animal* , quod est consequens hominis , & repugnans lapidi , & sic probabis prædicant propositionem , conficiendo hunc syllogismum in *Celarent* ; *nullum animal est lapis ; omnis homo est animal ; ergo nullus homo est lapis* : vel è contra , assume medium repugnans subjecto , & consequens prædicari , & sic ad probandam prædictam propositionem , assume *insensibile* , & conficies hunc syllogismum in *Celantes* , *nullum insensibile est homo , omnis lapis est insensibilis , ergo nullus homo est lapis* , vel assume medium , quod sit antecedens alicujus , & alteri repugnans , & sic ad probandam prædictam propositionem , assume *rationalis* , & sic conficies syllogismum in *Cesare* , *nullus lapis est rationalis , sed omnis homo est rationalis , ergo nullus homo est lapis* .

§ Quarta regula; ad probandam particularem negativam, assume medium modo dicto de universali negativa, & conficies syllogismos secundum diversos modos, & figuras, v. g. ad probandam hanc propositionem; *Aliquod animal non est homo*, assume *brutum*, quod est antecedens animalis, & repugnans homini, & sic probabis prædictam propositionem conficiendo hunc syllogismum in *ferio*; *nullum brutum est homo; aliquod animal est brutum; ergo aliquod animal non est homo*. Alia exempla, & alias quamplures regulas omittimus, & ad auferendam confusionem, & quia quisque attentè discurrendo per omnes syllogismos, omnia, quæ hic deficere possunt, poterit invenire, & quia ars inveniendi medium melius exercitio arguendi, quam fatigatione intellectus, circa hoc peculiariter discurrendo, addiscenda est. Et hæc sufficiant pro regulis necessariis ad conficiendos syllogismos, ad quod tractatus sumularum ordinatur.



# PARS SECUNDA

## LOGICÆ PARVÆ,

feu Sumularum.

**P**ostquam in prima parte, absque ulla mixtione quæstionum, regulas ad dirigendas operationes intellectus in ordine ad benè disputandum proposuimus, nunc in hac secunda parte difficultates, quæ in ipsa traditione regularum se communiter offerunt, ad maiorem ipsarum regularum intelligentiam, examinabimus, & per modum disputationis proponemus; quia jam tyrones sufficienter instructi in confectiōne syllogismorum, commodè ad disputandum & arguendum accedere possunt, quod exercitium valdè utile esse innuit Hugo Victor. lib. 1. erudit. c. 12. his verbis; *Neceſſe eſt falli, qui obiecta scientia disputandi, de rerum natura perquireret.*

### Proponitur modus arguendi.

**1** **A**ntequam ad disputationis exercitium accedamus, proponere oportet, quomodo ipsa disputatio, seu argumentatio exercenda sit, igitur tres communiter inveniuntur persone in argumentatione, seu disputatione. Prima dicitur Patronus, seu Præses; secunda sustentans, seu defendens, tertia arguens, seu impugnans; nunc intendimus cuiuscumque munera, & quid quilibet agere debeat in disputatione, declarare, & quia tractatus noster præcipuè in instruendis fratribus huiusalmæ Provinciæ gloriosissimi Patriarchæ Joseph, innititur, prout in exercitio à maioribus nostris accepimus, præsens assumptum declarabimus.

**2** Igitur accedentibus fratribus ad locum destinata.



stinatum pro disputatione, & flexis genibus ante aliquam imaginem, quia omne datum optimum, & omne donum perfectum desursum est, descendens à Patre luminum, invocatur auxilium Spiritus Sancti, Beatissimæ Virginis MARIÆ, Seraphici Patris N. Francisci, gloriosissimi Patriarchæ Joseph, & cujuslibet alterius Sancti pro libito, & devotione Præsidis (cui competit versus; & orationes, aliis, qui adstant respondentibus, recitare) postea, accepta à Prælato benedictione, ascendit in cathedram Præsides, seditque suo loco sustentans.

3 His, tanquam præviis ad disputationem suppositis, munus Præsidis est, defendentem, juvare, si in responsione deficiat, corrigere, si erret; illuminare, si ignoret, & si quando, vel propter inopiam vocum, vel aliam similem causam, in defendentis responsionibus aliqua confusio; vel obscuritas apparere videatur, debet Præsides pro viribus ipsam claritate, & brevitate possibili effugare, similiter, si defendens interrogatus fuerit de aliquo, vel circa aliquod, quod quidem ipsius facultatem transgrediatur, statim Præsides debet responsum præbere, ostendens, hoc defendentis statum transilire.

4 Munus sustentantis, seu descendentis est, statum quæstionis præcipuè disputandæ in hunc modum proponere, accepto à Præside signo, surgit, postulat veniam à Prælato, à Præside, & à circumstantibus ordine debito, iterum sedet, & sic incipit; *Quæstio princeps disputanda inquirat, utrum, &c. Affirmativam, vel negativam partem teneo; quam sic intendo probare*; tunc probat suam sententiam; una, vel pluribus rationibus, semper à prolixitate fugiendo; & si quando in conclusione, quam intendit probare, aliqua apparet æquivocatio, tenetur ante probationem illam auferre, dicendo; *Antequam ad probandam meam conclusionem accedam, quia videtur, in æquivoco laborare, suppono, seu præmitto*

*mitto hoc, vel hoc, &c.* Postquam verò conclusionem probaverit, surgit, & dicit; *Quidquid dixit & inter disputandum dixerò, Sancta Romana Ecclesia, nec non vestra censura humiliter, & libenter subiicio; & statim sedens locum, & tempus tribuit arguenti.*

5 Deinde inter disputandum munus ipsius sustentantis est, audito integro arguentis syllogismo, seu enthymemate, &c. illum fideliter reperere, dicens; *Adversus conclusionem, in qua defendo, &c. sic argumentatum, vel sapientissimus Pater, vel charissimus Condiscipulus, &c.* juxta statum arguentis, & tunc repetit argumentum, deinde repetit primam propositionem quam concedit, vel negat, vel distinguit, juxta qualitatem illius, dicens: *Concedo, vel nego, vel distinguo maiorem; vel antecedens, similiter repetit aliam, & aliam propositionem, & similiter responderet; advertere tamen debet, quod nunquam dicat; nego, vel concedo consequens, sed: nego, vel concedo consequentiam; neque dicat: distinguo consequentiam, sed, distinguo consequens; quia licet consequens possit esse ambiguum in se, tamen consequentia numquam est ambigua; nam, vel sequitur, vel non sequitur ex præmissis propositio consequens; & sic consequentia semper est bona, vel mala.*

6 Si autem aliquando argumentum sumatur ab auctoritate, dicat: *admitto, vel explisco auctoritatem*, si autem sumatur ab exemplo, seu à paritate, dicat: *Nego paritatem*, vel aliter respondeat juxta sensum paritatis; & si arguens assumpserit aliquid non conducens ad probandam aliquam propositionem, dicat sustentans: *Transseat maior, vel minor, &c.* modestius autem dicat: *Omitto maiorem, vel minorem, &c.* Si verè arguens aliquid supponat tanquam certum in aliqua propositione, quod quidem falsum sit, dicat sustentans: *Nego suppositum majoris, vel minoris, &c.* nisi fortè aliis verbis respon-

respondere possit, quod melius erit, quia communiter non bene recipitur ab arguente quod taliter sibi respondeatur; si aliquando interrogatus fuerit sustentans, dicat. *Inquirit, seu interrogata me sapientissimus Pater, vel charissimus Condiscipulus, &c. ad quod respondeo sic, &c.* His tantum forte necessarium fuerit aliquam responsionem, seu distinctionem explicare, quando arguens ita petierit, ne in æquivoco argumentum procedat; finito argumento, brevitate possibili; illud, si necessarium fuerit, resumat sustentans, & similiter ea, quæ ad ipsum respondit, & sic concludat, data ultima solutione.

7 Denique, munus arguentis, seu impugnantis est, contra conclusionem, quæ defenditur argumentare, hunc ordinem observando; postquâ sustentans suam conclusionem proposuerit, & probaverit, surgat arguens, & sicut sustentans, potulet à Præfato, Præsidente, & circumstantibus veniam, & ultimo loco à sustentante, sedeat, & dicat; *Adversus conclusionem, in qua asseris, &c. sic argumentor;* & omissis inutilibus ambagibus, proponat unum, vel duplex medium, quo finito, dicat; *Hæc facillima sunt difficilioribus, pro tui ingenij acumine facies satis,* vel alia similia verba, & in silentio attendat quid, & quomodo sibi respondeatur, & si respondens negat aliquam propositionem, tenetur illam probare, dicens; *Probo majorem, vel minorem, &c.* si verò sustentans propositionem distinguat, prosequatur arguens dicens; *Contra sic argumentor;* & si aliquando dubitet de aliquo, petat à sustentante explicationem; & posita in forma sufficienter sua difficultate, nullatenus inutilibus verbis contendat, sed materialiter, brevitate possibili, suam difficultatem explicet; cæveat autem semper inter arguendum à varietate, seu mutatione mediorum, semper enim unicum medium; seu unicum argumentum prosequi debet. Hæc omnia, & alia huc spectantia, magis continuo exercitio patebunt.

## D I S P. I.

*De pertinentibus ad terminum.*

**T**Am molesta, quam inutilis quæstio proponitur ab aliquibus in initio huius tractatus, à quo, scilicet, exordium sumere debeat? An à termino, an ab alio instrumento logicali? A qua jam communiter abstinere Authores, tanquam à re parvi momenti, & à termino initium huius tractatus accipientes, tam ordinem naturæ, quam doctrinæ sequuntur; ordo enim naturæ postulat, ut à partibus ad totum deveniatur, & terminus est pars propositionis; ordo verò doctrinæ postulat, ut à notioribus ad minus nota progrediatur, & terminus notior est omnibus de quibus in præsentia agitur, nam, ut fert commune proloquium; *Propositiones cognoscimus, in quantum terminos cognoscimus*; igitur nos communio rem methodum sequentes, etiam à termino exordium tractatus sumimus, abstinere etiam ab hac proluxa quæstione; quod etiam generaliter videtur intendere Philosophus in qualibet doctrina; dum primo *Phyfic. cap. 1. dixit; In omni disciplina, cujus sunt principia, & elementa, ab eorum elucidatione est inchoanda cognitio*; termini autem sunt quasi principia, & elementa propositionum, & propositiones quasi principia, & elementa syllogismi. Nunc autem sit

## Q U Æ S T I O I.

*An terminus rectè definiatur?*

**I** Circa definitionem termini potest dubitari, an rectè naturam termini explicet? Et respondetur affirmativè. Probatur; quia illa est bona, & essentialis definitio, quæ per genus,  
&c

& differentiam, vel per aliquam locum generis, & differentiam, explicat naturam definiti, sed definitio termini, scilicet, *extremum propositionis*, sic explicat naturam illius: ergo est bona, & essentialis. Probatur minor; quia ly *extremum* ponitur loco generis, in quo convenit terminus cum aliis extremis, quæ termini logicales non sunt, v. gr. parietes aulae; ly *propositionis* ponitur loco differentiam, per quod differt terminus à supradictis extremis; quæ extrema propositionis non sunt: ergo prædicta definitio per genus, & differentiam, seu per aliquam locum generis, & differentiam explicat naturam termini; & consequenter est bona, & essentialis definitio. Quod etiam illi convenientiam conditiones bonæ definitionis, patebit in argumentis.

2. Argues primò; bona definitio debet esse clarior suo definito; sed prædicta definitio non est clarior suo definito: ergo non est bona. Probatur minor; quia illa particula *propositionis* posita loco differentiam, est nobis ignota, cum adhuc notitiam propositionis non habeamus; ergo prædicta definitio non est clarior suo definito. Ad hoc argumentum (quod etiam procedit contra quamlibet aliam definitionem termini, ex pluribus, quæ ab authoribus assignantur; nam semper definitur terminus in ordine ad propositionem) respondetur negando minorem, cuius probationis distinguitur antecedens, illa particula *propositionis* est nobis ignota, id est, non est nota clarè, & distinctè, est verum; non est nota obscurè, & confusè, est falsum; unde negatur consequentia; sufficit enim quælibet notitia propositionis, licet obscura, & confusa, ut definitio termini sit clarior suo definito; quia, per illam sufficienter cognoscitur terminus dialecticus, ut distinctus à quolibet alio, quod rationem propositionis non participat; quod hoc exemplo potest declarari; ad hoc, ut hæc sit

bona definitio albi: *album est disgregativum visus*; non requiritur clara, & distincta notitia potentiae visivæ, sed sufficit quælibet notitia, licet confusa; & utriusque ratio est, quia tam *ly propositionis*, quam *ly visus* ponuntur in obliquo in prædictis definitionibus, & solum requiritur clara notitia illius, quod ponitur in recto, quod invenies in definitione cujuslibet relativi, cujusmodi est terminus.

3 Argues secundo: bona definitio sic debet competere suo definito, & cum illo converti, ut non conveniat aliis ab illo: sed prædicta definitio conveniat aliis à suo definito: ergo non est bona. Probat. min. nam in hac propositione, *Animal rationale est definitio*, *ly animal rationale* est extremum propositionis: sed non est terminus, sed definitio; ergo definitio termini convenit aliis à suo definito. Resp. negando min. & distinguendo majorem probationis: *ly animal rationale* est extremum propositionis formaliter, ut definitio est, nego mai. accidentaliter, seu, denominativè, concedo mai. Similiter distinguo min. *ly animal rationale* non est terminus denominativè, nego min. formaliter ut definitio est, concedo min. & nego consequentiam. Etenim dupliciter potest considerari definitio, scilicet, vel secundum suam rationem formalem, vel quatenus potest denominari subjectum in propositione, in primo sensu non est terminus, sed tantum in secundo sensu, quod convenit illi accidentaliter; nam extra propositionem conservat rationem formalem definitionis, & tamen non habet rationem termini, quam semper secum ferre debebat, si essentialiter illi conveniret. Idem dicendum est de aliis instrumentalibus logicis.

## Q U Æ S T I O II.

*An extra propositionem detur formaliter terminus ?*

**T**ITULUS quæstionis idem est, ac inquirere, an actualiter componere propositionem sit ratio formalis termini? Pro cuius resolutione notandum est, quòd aliud est loqui de termino compositionis, & aliud loqui de termino resolutionis, de quo videtur loqui Aristoteli dum dicit, quod terminus est, in quem resolvitur propositio, nam ibi loquitur Aristoteli de resolutione mentali propositionis prioristica, quæ consistit in hoc, quod antequam constitutur propositio, examinentur partes, ex quibus componenda est, an sint aptæ ad esse subjectum, & prædicatum in tali propositione ordinando unam ad aliam. In utroque sensu terminus est relativus, ita ut prædicatum dicat ordinem ad subjectum, & subjectum ad prædicatum, ut patet ex eorum definitionibus traditis in initio primæ partis, n. 4. Hoc in præposito.

2 Dicimus ad quæstionem; ratio formalis termini compositionis consistit in actualiter terminare, seu componere propositionem, & ratio formalis termini resolutionis est actualiter terminare resolutionem. Hæc conclusio, quoad primam partem est communis inter Scotistas; quoad secundam verò, videtur eandem habere rationem. Probatur: quia de ratione relativi est actualiter referri ( ut amplius alibi patebit ) sed terminus, tam compositionis, quàm resolutionis est formaliter relativus, ergo de ratione formali termini est actualiter referri: sed terminus compositionis solum quando actualiter componit propositionem, actualiter refertur, & similiter terminus resolutionis solum quando actualiter terminat resolutionem, actualiter

refertur: ergo ratio formalis termini compositionis consistit in actualiter componere propositionem, & ratio formalis termini resolutionis consistit in actualiter terminare resolutionem propositionis.

3 Ex quo colligitur resolutio tituli questionis; nam ex dictis patet, quod extra propositionem, vel extra resolutionem illius, non datur in aliquo ratio formalis termini; unde voces, v. gr. *Homo Petrus*, &c. extra propositionem tantum possunt dici termini materialiter, seu fundamentaliter; quia sunt materia, seu fundamentum ad resolutionem, & compositionem propositionis.

4 Ubi adverte, quod terminus actualis resolutionis potest dici terminus fundamentalis, seu materialis proximè respectu termini compositionis; voces autem ante resolutionem dicuntur materia remota respectu termini compositionis. Adverte etiam, quod nostra definitio convenit, tam termino compositionis, quam resolutionis, quia idem terminus est, licet in diverso statu, ut ex se patet.

5 Argues tamen: verba in definitione non dicunt actum, sed aptitudinem: ergo de ratione termini, quomodocumque sumatur, non est actualiter terminare, sed posse terminare. Resp. distinguendo antecedens, verba in definitione non dicunt actum, sed aptitudinem, si definitum sit absolutum, admitto; si definitum sit relativum, ut est terminus, nego antecedens, & consequentiam. Aliter respondent alii; sed hæc resolutio sufficiat pro nunc, & fortè alibi ad simile aliter respondebimus.



## Q U Æ S T I O III.

*Qualis sit divisio termini in subjectum, & prædicatum?*

1 **D**iximus, terminum dividi in subjectum, & prædicatum, nunc dubitatur, qualis sit ista divisio? Resp. esse generis in species. Prob. quia illa est divisio generis in species, quæ datur per differentias formales, & essentielles; hujusmodi est prædicta divisio: ergo est divisio generis in species. Prob. min. quia ratio extremi propositionis convenit subjecto, & prædicato, secundum diversas rationes formales terminandi propositionem inter se essentialiter oppositas; ergo prædicta divisio datur per differentias formales, & essentielles. Prob. antec. quia ita convenit essentialiter subjecto taliter terminare propositionem, ut nequeat terminare ut prædicatum; & similiter ita convenit essentialiter prædicato taliter terminare propositionem, ut nequeat terminare ut subjectum; ergo ratio extremi propositionis convenit subjecto, & prædicato secundum diversas rationes formales, & essentielles; & consequenter prædicta divisio est generis in species.

2 Argues contra, esse subjectum, vel prædicatum accidentaliter convenit termino; sed quod convenit accidentaliter nequit esse differentia essentialis, & specifica; ergo divisio termini in subjectum, & prædicatum non est generis in species. Prob. min. quia huic termino *homo*, v.g. accidentaliter convenit esse subjectum, vel prædicatum; jam enim convenit illi unum, jam aliud, ut patet in his propositionibus; *Homo est animal*; *Petrus est homo*; nam in prima est subjectum, & in secunda prædicatum ergo esse subjectum, vel prædicatum accidentaliter convenit termino. Resp. negando mai

Cujus prob' distinguo antec. Huic termino *homo* convenit accidentaliter esse subjectum, vel prædicatum, si sumatur materialiter, seu fundamentaliter; seu extra propositionem, concedo ant. Si sumatur formaliter, & actualiter in propositione, nego antec. & consequentiam. Etenim accidentale est huic termino *homo* materialiter sumpto, quod ponatur in propositione ut subjectum, vel ut prædicatum; at verò, ut actualiter componit propositionem, convenit illi essentialiter taliter, vel taliter terminare. Quod patet in supradictis propositionibus, in quibus ita est subjectum, ut nullatenus, perseverante propositione, possit esse prædicatum, & ita est prædicatum, ut nullatenus, perseverante propositione, possit esse subjectum: quod ex se patet, & hoc exemplo facilius percipi potest; nam coloratum essentialiter dividitur in album, & nigrum, & nihilominus accidentaliter convenit homini esse album, vel nigrum; quia homo tantum materialiter est coloratus.

3 Hic potest dubitari, an prædicta divisio sit adæquata? Resp. affirmativè; quia præter subjectum, & prædicatum, nihil aliud datur, quod sit extremum propositionis: ergo prædicta divisio est adæquata. Pro aliquibus argumentis debes observare, quod ut alibi dictum est, quando in propositione sunt plures voces, solum constituunt unum integrum subjectum, & prædicatum, & quod semper in propositione inveniuntur tres voces, implicite, vel explicite, & etiam quod subjectum, & prædicatum ex sua natura semper debent collocari in initio, & fine propositionis, licet propter modum loquendi aliquando varietur locus.

## QUÆSTIO IV.

*Virum voces non significantivæ habeant rationem formalem termini?*

1 **V**Oces significantivæ dicuntur illæ, quæ impositæ sunt ab hominibus ad aliquid significandum, ut *homo*: *Petrus*, &c. & de his nullum est dubium: nam omnes fatentur, rationem formalem termini participare. Voces non significantivæ dicuntur illæ, quæ non sunt impositæ ab hominibus ad aliquid significandum, ut *Blitri*, *Scindapsus*; & de his procedit quæstio.

2 Dicimus ergo: voces non significantivæ habent rationem termini, eo modo, quo ratio termini potest vocibus convenire, ut dicemus quæstione sexta. Probat: quia illud formaliter habet rationem termini, quod est subjectum, vel prædicatum in propositione: sic se habent voces non significantivæ, ut patet in hac, & similibus propositionibus *Blitri est vox*, in qua *ly Blitri* est vox non significantiva, & est subjectum: ergo voces non significantivæ habent rationem formalem termini.

3 Argues 1. Voces non significantivæ supponuntur materialiter in propositione: ergo tantum sunt materialiter termini. Respond. concedendo antecedens, & negando consequentiam. Etenim benè compatitur, quòd aliquid materialiter supponatur in propositione, & quòd sit formaliter terminus; nam de ratione formali termini solum est, quòd terminet actualiter propositionem sub ratione formali subjecti, vel prædicati; ad quod, quasi per accedens se habet, quòd supponatur formaliter, vel materialiter, in prædicta enim propositione: *Blitri est ex vox*, licet *ly Blitri* materialiter supponatur; habet tamen rationem formalem.

subjecti, quæ consistit in hoc, quòd aliquid de illo dicatur, nam de *ly Blitri* dicitur, quòd sit vox; & consequenter habet rationem formalem termini.

4 Replicabis: quando termini supponuntur materialiter in propositione, propositio est materialis: sed propositio materialis constat terminis materialibus; non verò formalibus: ergo cum voces non significativæ semper materialiter supponantur, semper constituent propositionem materialelem; & consequenter erunt tantum termini materialiter. Resp. negando mai. quia ad rationem formalem propositionis per accidens se habet, quòd termini illius materialiter, vel formaliter supponantur, nam solum requiritur, affirmatio, vel negatio, veritas, vel falsitas, quòd semper invenitur in propositione, sive termini materialiter, sive formaliter supponantur, & consequenter semper erit propositio formalis, & termini illius formaliter termini.

5 Argues 2. Propositio est oratio: sed oratio componitur ex vocibus significativis; nam oratio aliquid significat: ergo propositio debet componi ex vocibus significativis; & consequenter voces non significativæ nequeunt habere rationem formalem termini. Resp. distinguendo min. Oratio componitur ex vocibus significativis, ita ut omnes sint necessario significativæ, nego; ita ut aliqua vox sit significativa; concedo. Quòd clarè deducitur ex definitione orationis, scilicet, *est vox significativa ad placitum, cuius aliqua pars separata significat*, & sic sufficit, quòd aliqua pars orationis sit significativa, ut tota oratio significativa dicatur; & in propositionibus, quæ constant vocibus non significativis, aliqua vox datur, scilicet, verbum, quæ sit significativa, quòd etiam patet in homine, qui absolute dicitur animatus, eò quòd saltem aliqua pars illius sit anima. Similiter distinguendum est consequens; & neganda est sequela.

6 Dices

6 Dices contra: ideo anima denominat totum hominem animatum; quia est pars illius; ergo licet copula sit significativa, nequit denominare propositionem orationem significativam. Patet consequentia; quia copula non est pars propositionis, sed unio partium; ergo. Resp. neg. consequentiam, & distinguendo antecedens probationis; copula non est pars propositionis, ut propositio formaliter est, admitto, ut oratio est, nego; sufficit enim, quod copula sit pars propositionis, ut oratio est, ut possit denominare propositionem orationem significativam.

7 Aliter potest responderi ad argumentum, scilicet, quod non solum copula est vox significativa, sed etiam aliqua pars propositionis, scilicet, prædicatum, nam cum dicimus; *Blitri est vox*, ly *vox*, quod habet rationem prædicari, est vox significativa, & sic tota propositio erit significativa, cum aliqua illius præcipua pars significativa sit. Vel aliter, quod (ut aliqui volunt) quando Arist. dicit, quod oratio est vox significativa, loquitur de oratione doctrinali, qualis non est, quæ componitur ex vocibus non significativis, sed ex hoc solum sequitur; quod voces non significativæ non sint termini propositionis doctrinalis; non verò, quod non sint termini propositionis ut sic, quod sufficit ad nostrum intentum.

## Q U Æ S T I O V.

*Utrum copula habeat rationem formalem termini?*

1 **D**icimus, copula in ratione formali copulæ non est formaliter terminus. Conclusio est communis inter Scotistas, & ex dictis facile probatur; quia de ratione formali termini est, quod sit extremum propositionis; sed copula, in ratione formali copulæ,

non est extremum propositionis; sed potius medium, seu unio extremorum: ergo copula in ratione formali copulæ non est terminus.

2 Argues contra: propositio componitur ex subiecto, prædicato, & copula; ergo simul subiectum, & prædicatum habent rationem formalem termini, ita & copula: Resp. neg. consequentiam: quia non omne, quod componit propositionem habet rationem formalem termini, sed solum quod est extremum illius, quod nullatenus copulæ, in ratione formali copulæ potest convenire.

3 Replicabis: resolutio propositionis est consideratio partium ex quibus debet componi propositio: sed non minus debet considerari copula, quam subiectum, & prædicatum; ergo copula, ut copula, pertinet ad resolutionem propositionis: sed terminus est, in quem resolvitur propositio: ergo copula habet rationem formalem termini. Resp. primò, neg. min. quia, potius requiritur oppositum ad resolutionem, scilicet, quod non consideretur copula, quia resolutio est examinatio partium seorsim, & copula secundum suam rationem formalem dicit rationem unionis, quæ immediatè opponitur considerationi partium seorsim; quod patet in simili de resolutione physica, quæ tantum respicit partes separatas; non verò unionem.

4 Sed quia hæc solutio potest impugnari, ex eo quod in resolutione non solum considerantur subiectum, & prædicatum, ut sunt materialiter nomina, v. gr. *homo*, & *Petrus*, sed ut sunt unibiles per copulam, necessario pertinet ad resolutionem examinatio copulæ, sicut pertinet examinatio subiecti, & prædicati; idè aliter respondetur ad argumentum ex nostris principiis, concesso primo syllogismo, distinguendo min. subsumptam; terminus est in quem resolvitur propositio, id est, omne, quod examinatur in resolutione, neg. id est,

est, quod examinatur in resolutione tamquam extremum illius, seu tamquam subiectum, & prædicatum, concedo; quod clarè denotat Arist. in ipsa definitione termini, unde neg. consequentiam.

5 Notanter diximus, quod copula in ratione formali copulæ non habet rationem formalem termini; nam si consideretur secundum diversas rationes, & potest habere in eadem propositione rationem copulæ, & termini. Pro quo recolenda sunt, quæ diximus de terminis primæ, & secundæ impositionis; ex quibus facile probatur hæc resolutio; nam in ista propositione: *Copula est verbum*, *ly est*, quatenus per primam impositionem significat unionem subiecti cum prædicato, habet rationem formalem copulæ, & quatenus per secundam impositionem denominatur copula, habet rationem formalem subiecti, ut patet: ergo copula secundum diversas rationes potest in eadem propositione habere simul rationem copulæ, & termini: contra quod nihil videtur posse objici, quod facile non solvatur ex dictis.

6 Aliquæ termini definitiones, quæ solent ab aliquibus adduci, scilicet, quod *terminus est vox significativa ad placitum, ex qua simplex conficitur propositio*. *Terminus est signum punibile in propositione*, & aliæ similes, communiter non admittuntur ab Scotistis propter dicta in hac, & præcedenti quæstione; nam prædictæ definitiones non conveniunt suo definito convertibiliter, quia excludunt voces non significativas à ratione termini, & includunt in ratione termini rationem formalem copulæ, quorum neutrum ab Scotistis admittitur, ut patet ex dictis. Sed quia hoc videtur reduci ad quæstionem de nomine, de qua non multum est curandum, circa hoc immorari non licet: sufficiat, quod nostra explicatio videtur conformior verbis Aristot. &

134 *Pars secunda Sumularum*  
significationi hujus vocis *terminus*, quæ extremum videtur sonare.

## Q U Æ S T I O VI.

### *De cateris terminorum divisionibus*

1 **C**irca divisiones terminorum aliqua possunt dubitari; primum est, qualis sit divisio termini in mentalem, vocalem, & scriptum? Sed resp. quod est divisio analogi in analogata. Sic communiter Scotistæ. Probatur, quia illa est divisio analogi in analogata, in qua nomen divisi est commune membris dividendis, & ratio significata per nomen propriè invenitur in uno ex membris dividendis; in aliis verò impropiè, & per ordinem ad illud, cui propriè convenit: sed nomen *terminus* est commune mentali, vocali, & scripto, & ratio significata per illud propriè invenitur in termino mentali; impropiè verò in vocali, & scripto, & per ordinem ad mentalem; ergo prædicta divisio est analogi in analogata.

2 Minor, in qua est difficultas, probatur quia terminis utimur ad aliquid affirmandum, vel negandum; ergo ubi propriè, & verè fuerit affirmatio, vel negatio, ibi erit propriè, & verè terminus, & ubi impropiè fuerit affirmatio, vel negatio, ibi erit impropiè terminus; sed affirmatio, vel negatio est propriè in intellectu; impropiè verò in voce, & scriptura; ergo ratio termini propriè est in intellectu, impropiè verò in voce, & scriptura. Probatur min. quia actus intellectus ex natura sua habent affirmare, vel negare; voces verò, & scripturæ tantum per extrinsecam denominationem, & ex libito hominum, quatenus ab illis ponuntur ut signa ad placitum ad manifestandum, quod latet in mente, & sic possunt transmutari, de una in aliam significationem, prout homines voluerint;



rint; ergo affirmatio, vel negatio propriè in intellectu reperitur; impropriè verò in voce, & scriptura, & consequenter divisio termini in vocalem, mentalem, & scriptum, est analogi in analogata.

3 Argues contra nostram probationem, in qua assumpsimus pro medio, quòd ratio termini propriè convenit mentali, impropriè verò vocali, & scripto: terminus est extremum propositionis: sed ratio propositionis non est in mente, sed in vocibus: ergo ratio termini non convenit propriè termino mentali, sed vocali. Probatur minor; quia propositio est oratio: sed oratio, cùm sit vox significativa, non est propriè in mente, sed in voce: ergo ratio propositionis non est propriè in mente, sed in vocibus, & consequenter ratio termini propriè convenit vocali, non verò mentali. Respond. neg. min. ad cujus probationem dicimus, quòd quando Arist. dixit, quòd oratio est vox, non fuit ex eo quòd judicaverit rationem formalem orationis propriè vocibus convenire, impropriè verò conceptibus; sed quia ad instruendos tyrones necessarium est, ut vocibus nostros conceptus explicemus, ideòque communiter instrumenta logicalia per rationem vocis definiuntur sed vocibus tantùm impropriè convenit ratio instrumenti logicalis, id est, quatenus sunt signa ad manifestandum instrumenta logicalia, quæ propriè sunt in conceptibus, ut supra dictum est.

4 Ubi advertendum est, quòd hic loquimur de termino sumpto ut *quo*; nam si terminus sumatur ut *quod*, idem est terminus mentalis, quam vocalis, & scriptus; nam idem est, quod mente concipitur, & vocatur conceptus objectivus, ac quod significatur per voces, & scripturas, quæ ponuntur ut signa ad manifestandum id ipsum, quòd concipitur mente, in quo nullum est dubium.

5 Secundò potest dubitari, qualis sit divisio termini in categorematicum, & syncategorematicum? Ad quod suppositis dictis circa hos terminos lib. 1. cap. 1. num. 9. quòd nomina adiectiva non solùm, si substantivè sumantur, ut in hac propositione: *Deus, & creatura sunt omnia*, sunt termini categorematici; sed etiam si sumantur adjectivè, ut in hac propositione: *Petrus est albus*; quia ad rationem termini categorematici sufficit, quòd aliquid possit esse per se integrum prædicatum, & deinde, quia aliqua nomina adiectiva per se aliquid significant, ut *doctus*, quod per se, & in recto significat doctrinam; unde solum nomina adjectiva, quæ adiectivè sumpta, neque significant aliquid per se independentè ab alio, neque possunt esse integrum prædicatum in propositione, ut *omnis, nullus*, &c. & similiter adverbia habent rationem termini syncategorematici. Hoc supposito.

6 Respondetur ad dubium, quòd prædicta divisio est analogi in analogata; quod patet, quia ratio termini propriè, & per se convenit termino categorematico, cum per se possit esse subjectum, vel prædicatum in propositione; impropriè verò, & per ordinem ad terminum categorematicum, convenit syncategorematico, cum non possit per se esse subjectum, & prædicatum in propositione, nisi per accidens ratione categorematici, cui adiungitur: ergo prædicta divisio est analogi in analogata.

7 Tertiò potest dubitari, quales sint aliæ divisiones terminorum? Resp. quod nihil peculiare se offert circa cæteras divisiones terminorum, & omnes videntur esse subjecti in accidentia, quod patebit discurrenti per omnes illas; nam per accidens se habet ad rationem formalem termini, seu subjecti, &  
præ.

prædicari, quod altera, vel altera denominatione ex omnibus, quæ in prædictis divisionibus inveniuntur, nominetur; nulla enim variat rationem formalem subjecti, vel prædicati: sed quando membra dividuntur accidentaliter conveniunt diviso, diviso dicitur subjecti in accidentia: ergo omnes prædictæ divisiones sunt subjecti in accidentia.

## D I S P. II.

*De signo, & significatione.*

**P**Ræterea, quæ diximus de signo 1. p. lib. 1. cap. 2. plura adducit Scotus, tam de ipso signo, quàm de significatione, pluribus in locis, & præcipuè in 1. dist. 27. quæst. 36. vers. Ad secundum, sub litt. H. & in 4. distinct. 1. quæst. 2. §. De secundo principali, à litt. D. usque ad litt. H. ex quibus aliqua, quæ communiter dubitari solent, in presenti proponemus.

## Q U Æ S T I O I.

*An quo consistat ratio signi:*

**1** **P**RO intelligentia quæstionis notandum est, signum dupliciter posse sumi, scilicet, materialiter, & in esse rei, & formaliter, seu in esse signi, & cum signum, vel sit naturale, vel ad placitum, de utroque, & in utroque sensu procedit quæstio. Hoc notato.

**2** Dicimus primò: signum naturale materialiter, & in esse rei constituitur per connexionem, quam habet ex natura rei, & independentem ab institutione hominum, cum re, quam significat; signum verò ad placitum materialiter, & in esse rei constituitur per connexionem, quam habet ex institutione hominum, cum re,

ad

ad quam significandam instituitur. Hæc conclusio nullam videtur habere controversiam, & ex ipsis terminis patet, nam signum naturale ex se est aptum ad significandum: signum verò ad placitum, non ex se, sed ex libera hominum impositione.

3 Dicimus secundo: signum naturale in esse signi formaliter constituitur per aptitudinem, quam habet independenter ab institutione hominum ad deducendam potentiam in cognitionem rei significatæ; signum verò ad placitum constituitur in esse signi formaliter per aptitudinem, quam habet, supposita institutione hominum, ad deducendam potentiam in cognitionem rei significatæ. Hæc conclusio etiam est communis, & ex se patet, sicut antecedens. Ex qua deducitur, signum formaliter ut tale, duplicem terminum respicere, scilicet, rem, quam aptum est repræsentare, & potentiam, cui rem repræsentare debet, quod patet, quia impossibile est, signum aliquid repræsentare, nisi alicui potentia cognoscitivæ repræsentet, & etiam est impossibile, ipsum signum potentia cognoscitivæ repræsentare, quin aliquid ei repræsentet; ergo signum in ratione formali signi duplicem terminum respicit, scilicet rem, & potentiam.

4 Dicimus tertio, signum in ratione formali signi respicit rem, quam significat, & potentiam, cui significat, seu repræsentat, per unicum tantum respectum. Hæc conclusio est etiam communis inter Scotistas, & probatur; quia non sunt multiplicandæ entitates, quando necessitas non urget; sed nulla est necessitas multiplicandi in signo prædictos respectus; ergo per unicum respectum respicit signum rem significatam, & potentiam. Hoc clarius patebit ex solutione sequentis argumenti.

5 Argues contra; in sententia Scotistarum multiplicatis terminis, multiplicantur relationes

nes in eodem fundamento: ergo signum dicit duplicem respectum, seu relationem ad rem significatam, & potentiam. Respond. omissis alijs solutionibus, disting. antec. Si termini sint adæquati, & totales, conc. si termini sint inadæquati, & partiales, neg. antec. & consequ. etenim res, quæ per signum significatur, & potentia, cui repræsentatur, habent simul rationem unius termini adæquati, & totalis respectu signi; nam impossibile est, ut supra diximus, quod signum terminetur ad unum, scilicet, ad rem significatam, quin simul terminetur ad aliud, scilicet ad potentiam, cui res repræsentatur.

6 Ex dictis sequitur, quod ratio signi in signo naturali est realis, & independens à consideratione intellectus; in signo verò ad placitum est quid proveniens à denominatione extrinseca desumpta ab actu liberi arbitrii hominum imponentium illud ad significandum; quod aliqui volunt esse ens rationis, quod verum est, si intelligant de ente rationis fundamentaliter sumpto, non verò formaliter, ut suo loco dicemus.

7 Sequitur etiam quod ad rationem signi non requiritur necessario, quod actualiter rem potentia cognoscitivæ repræsentet; sed sufficit, quod aptum sit rem potentia cognoscitivæ non impeditæ repræsentare, & sic fumus v. g. est signum, licet actualiter non ducat potentiam in cognitionem ignis; eò quod aptum est ignem repræsentare, quod communiter admittitur.

## QUÆSTIO II.

*An voces significant res, An conceptus rerum?*

**P**RO intelligentia quæstionis notandum est primò, quod vox, ut ad præsens attinet: *Est sonus ab ore animalis prolatus cum intentione aliquod significandi*; quæ definitio deducitur ex Aristot. lib. 4. de histor. animalium cap. 9. & cum voces in hoc sensu sint signa ad placitum, idem est inquirere; an voces significant res, an conceptus rerum? Ac inquirere, an voces sint signa rerum, an verò conceptus:

2 Notandum est secundo, quod signum, ut tenet quidam doctissimus Sotista, vel potest dici materiale, vel personale. Tunc dicitur signum materiale, quando tantummodo aliquid repræsentat, seu significat, & non usurpatur pro eo quod significat, seu repræsentat; ideòque ab aliquibus appellatur purè repræsentativum. Personale dicitur, quod significat, seu repræsentat aliquid, pro quo usurpatur, ideòque ab aliquibus dicitur suppositivum, exemplum primi est fumus respectu ignis; exemplum secundi est Nuncius Apostolicus respectu Summi Pontificis. His notatis

3 Dicimus primò: voces absolutè loquendo sunt simul signa rerum, & conceptuum. Hæc conclusio videtur clara ex ipso usu vocum, nam audita voce, certificatur audiens de conceptu loquentis, simulque apprehendit res per voces significatas.

4 Quod sint signa rerum probatur; quia vox est signum illius, in cujus cognitionem ducit illam audientem, & intelligentem: sed vox ducit in cognitionem rerum illam audientem, & intelligentem; nam audita aliqua voce signi-

gnificativa, v. g. ista; *homo*, statim pervenit audiens in cognitionem naturæ humanæ, quam significat; ergo voces sunt signa rerum. Quod autem etiam sint signa conceptuum, etiam probatur; quia quod gerit vices conceptuum, necessario est signum ipsorum conceptuum; sed voces gerunt vices conceptuum; etenim institutione sunt voces, ut commercium habere possimus ad invicem; nam si ipsos conceptus sine vocibus, aut aliis signis manifestare possemus, ipsis vocibus, aut signis non uteremur; sed solis mentis conceptibus colloqueremur sicut Angeli; ergo voces sunt signa conceptuum.

5 Dicimus secundò, voces, si sumantur ut signum materiale, seu pure repræsentativum (quod propriè, & rigorosè est signum) significant immediatè ipsas res, non verò conceptus. Probatur, quia significare res ut signum materiale, seu pure repræsentativum, est ipsas res notas facere statim, ac percipitur tale signum; sed voces statim, ac audiuntur, & percipiuntur, res ipsas notas faciunt immediatè, non autem conceptus, nisi secundariò, & per accidens: ergo si voces sumantur ut signum materiale, significant immediatè res; non verò conceptus. Probatur minor. quia audita, & percepta hac voce *ignis* v. gr. statim excitatur in mente species illius elementi quòd summè calidum est, non autem primariò, & per se excitatur species conceptus, quem habet proferens talem vocem de ipso elemento ignis, quod ex se patet, ergo audita voce, res significata per illam prius sit cognita, quam conceptus ipsius rei, ac per consequens, &c.

6 Argues contra; istæ voces *intellectio*, *cognitio*, & aliæ similes significant immediatè ipsum conceptum formalem, ergo aliquæ voces significant immediate conceptus; non verò res. Respond. disting. antecedens; prædictæ voces significant conceptum formalem, ut  
con-

conceptus formalis est, nego; ut est conceptus objectivus respectu alterius conceptus formalis, concedo, sed in hoc sensu idem est conceptus, ac res; nam conceptus objectivi se habent ut res significatæ, seu sunt ipsæ res significatæ per voces. Et similiter distinguendum est consequens.

7 Dicimus tertio; voces, si sumantur ut signum personale, seu suppositivum, quod non est tam proprie, & rigorosè signum, significant immediatè, & primariò conceptus mentis, secundario verò, & mediatè ipsas res. Probatur, nam repræsentare aliquid ut signum personale, seu suppositivum, est illud repræsentare tenens ejus locum, non verò ex primario fine ducere in cognitionem ejus: sed voces, ut comparantur ad conceptus, ex primaria sui institutione; dispositæ sunt ad obtinendum locum ipsorum conceptuum, & ut præstent id, quod præstarent conceptus, si manifestari possent sine vocibus: ergo voces sumptæ ut signum personale, seu suppositivum, significant primariò conceptus, res autem secundario, & mediatè. Minor videtur certa; nam ideo loquens utitur vocibus, quia non potest manifestare, quod habet in mente per ipsos conceptus immediatè, & sic necessitatur ad ponendum aliquod signum, quod teneat locum ipsorum conceptuum.

8 Cùm hac distinctione facilè respondetur ad quælibet argumenta, & conciliantur aliquæ oppositæ sententiæ. Pro maiori autem claritate semper observandum est, quòd ratio signi materialis est propria ratio signi, quia ex se primariò ordinatur ad ducendam potentiam in cognitionem rei, quam repræsentat; ratio verò signi personalis non est propria, & rigorosa ratio signi, cùm ex se primariò non ordinetur ad ducendam potentiam in cognitionem rei, quam repræsentat, sed ad obtinendum locum.



illius, quod repræsentat, & ad faciendum id, quod repræsentatum facturum erat, quod loquendo de vocibus clarè insinuat Scotus citatus in 1. dist. 27. quæst. 3. ubi dicit, quòd voces ponuntur loco conceptus, ut unum signum loco alterius, & sic aliquomodo unum signum est signum alterius, licet non propriè, & rigorosè Videatur Scotus loco citato, ex quo clarè deducitur, licet non ipsis verbis, totum quod in hac quæstione diximus.

9 Ex quo facilè deducitur resolutio alterius quæstionis, scilicet, an voces supponantur pro conceptibus? An vero pro rebus? Nam dicimus, quod secundum proprietatem sermonis voces supponuntur pro conceptibus; nam suppositio est propriè subrogatio, seu substitutio unius loco alterius ad faciendum id, quod illud aliud debebat facere, & ut dictum est, voces ponuntur ad faciendum id, quod conceptus facere debebant, id est ad manifestandas res, quas manifestarent ipsi conceptus, si possent; ut faciunt Angeli, qui non indigent vocibus. Quod dictum est de vocibus, dicendum est suo modo de scripturis, & aliis signis, quibus res possunt significari, & conceptus manifestari.

### D I S P. I I I.

#### *De modo sciendi.*

**E**Gimus de modo sciendi lib. 2. capit. 1. & præter ibi dicta, aliqua possunt dubitari, tam de ipso modo sciendi in communi, quàm in particulari, quæ quia breviter tractanda sunt, hac unica quæstione resolvemus.

## QUÆSTIO UNICA.

*In qua proponuntur aliqua dubia circa  
modum sciendi.*

1. **D**ubitabis primò; an rectè, & adæquatè dividatur modus sciendi in definitionem, divisionem, & argumentationem? Resp: affirmativè. Probatur; quia de qualibet re tria possunt dubitari, scilicet, natura, seu essentia, partes, & proprietates ejus; sed hac manifestantur per prædicta membra dividendia modi sciendi: ergo prædicta divisio est bona, & adæquata. Probatur minor. quia dubitanti de natura, seu essentia, v. gr. hominis; respondetur per definitionem ejus, scilicet, *animal rationale*; dubitanti de partibus, seu speciebus, v. gr. animalis, respondetur per divisionem, scilicet, *animal aliud est rationale, & aliud irrationale*; & dubitanti de aliqua proprietate v. gr. an risibilitas sit proprietas hominis? Respondetur per argumentationem, hoc modo; *Illud est proprietas alicujus, quod convenit omni soli illi, & semper; sed risibilitas convenit omni homini soli illi, & semper*: ergo risibilitas est proprietas hominis: ergo omnia, quæ possunt dubitari de aliqua re, manifestantur per tria prædicta membra dividendia modum sciendi, & consequenter prædicta divisio est bona, & adæquata.

2. Dubitabis secundò, qualis sit prædicta divisio? Respond. esse generis in species. Probatur, quia illa est divisio generis in species, in qua ratio divisi univocè reperitur in membris dividendis, & hæc differunt inter se per differentias intrinsecas, & essentielles: sed ratio manifestandi ignotum convenit univocè definitioni, divisioni, & argumentationi, & hæc differunt inter se per diversum modum intrinsecum, &

cf.

essentialē manifestandi ignotum, ut patet ex propriis definitionibus; ergo prædicta divisio est generis in specie.

3 Arguunt contra aliqui tenentes, talem divisionem esse analogi in analogata; tunc divisio est analogi in analogata, quando ratio communis propriè invenitur in uno ex membris dividendibus; impropriè verò in aliis, & per ordinem ad illud; sed ratio modi sciendi propriè invenitur in argumentatione; impropriè verò, & per ordinem ad illam in definitione; & divisione; ergo prædicta divisio est analogi in analogata. Probatur min. quia modus sciendi manifestat ignotum in ordine ad scientias comparandas; sed hoc propriè convenit argumentationi; quia scientiæ per argumentationem acquiruntur; definitioni autem solùm impropriè, & in ordine ad argumentationem; quia definitio est medium in argumentatione, & similiter divisio, quia aufert æquivocationem, ut rectè procedat argumentatio; ergo ratio modi sciendi propriè convenit argumentationi; impropriè verò, & per ordinem ad illam definitioni, & divisioni, & consequenter divisio est analogi in analogata.

4 Ad hoc argumentum, quod magni faciunt tenentes oppositum nostræ resolutioni, facile resp. neg. min. cujus probationis etiam neg. min. Etenim ratio manifestandi ignotum in ordine ad scientias comparandas, tam propriè convenit definitioni, & divisioni, sicut argumentationi; licet diverso modo. Pro cuius intelligentia advertendum est, quod in scientia aliqua supponuntur, & aliqua inquiruntur; supponuntur enim tam essentialia, quàm partes alicujus, & hujus proprietates inquiruntur; sed omnium horum cognitio pertinet propriè ad scientias comparandas, v.g. in scientia, quæ agit de homine tamquam de objecto, debet præsupponi, quid sit homo, quod cognoscitur per divisionem animalis, & quid sit homo, quod cognoscitur per defi-

nitionem illius, quæ cognitiones necessariò conducunt ad scientias comparandas; quibus suppositis, inquiruntur, & demonstrantur in scientia proprietates hominis; sed independenter ab hac inquisitione, seu demonstratione, manifestant ignotum definitio, & divisio per prædictas antecedentes cognitiones; quod patet ex eo quòd licet definitio sit medium in demonstratione, & divisio supponatur ad illam, ne in æquivoco procedat; tamen per argumentationem non cognoscitur, neque demonstratur, quod cognoscitur per definitionem, & divisionem.

5 Dubitabis tertio: an definitio rectè definitur? Resp. affirmativè, quia rectè explicat naturam definiti, nam quælibet definitio est oratio explicans naturam rei, ut hæc v. g. *Animal rationale* rectè explicat naturam hominis: ergo definitio rectè definitur.

6 Argues contra: nihil definitur per se ipsum rectè: sed definitio definitur per definitionem: ergo definitur per se ipsam, & consequenter non rectè definitur. Probatur mai. quia definitio debet esse clarior suo definito: sed nihil potest esse clarior se ipso; ergo nihil definitur rectè per se ipsum: Respond. disting. maj. nihil definitur rectè per se ipsum, secundum eandem rationem, concedo; secundum diversas rationes, nego; similiter disting. min. definitio definitur per definitionem, secundum eandem rationem, nego; secundum diversas rationes, concedo; eodem modo distinguendum est consequens, & probatio majoris. Etenim definitio, vel sumitur ut *quo*, vel ut *quod*, si sumatur ut *quo*, est ratio declarandi se ipsam, sumptam ut *quod*, & etiam est clarior se ipsa: si autem sumatur ut *quod*, est definibilis, & declarabilis per se ipsam sumptam ut *quo*, & similiter est obscurior se ipsa; quod non est inconveniens, cum hæc illi conveniant secundum diversas rationes.

## DISP. IV.

*De pertinentibus ad enunciationem.*

**A**liqua se offerunt disputanda, tam circa essentiam enunciationis, quàm circa divisiones illius, quæ per sequentes quæstiones examinabimus. Sit ergo

## QUÆSTIO I.

*Quomodo enuntiatio rectè definiatur?*

**1** **D**icimus primò: enuntiatio non benè definitur sic: *Est oratio affirmativa, vel negativa*. Hæc conclusio est contra plures Scotistas, sed stat pro illa major pars Scotistarum. Probatur, quia definitio alicujus rationis communis debet præscindere à suis speciebus, ut definitio animalis in communi præscindit à rationali, & irrationali: sed prædicta definitio non abstrahit à suis speciebus, scilicet; ab enuntiatione affirmativa, & negativa: ergo non est bona definitio.

**2** Aliqui respondent, prædictam definitionem non explicare unum conceptum propositionis in communi præscindentem ab affirmativa, & negativa, sed duos conceptus hac voce *enuntiatio* confusè significatos, scilicet, *affirmare*, & *negare*, & consequenter non esse unum, sed duplicem definitionem. Sed contra reddit nostra ratio, nam ut rectè definiatur aliquod genus (ut fatentur esse enunciationem respectu affirmativæ, & negativæ, qui ita respondent) non debet defini per conceptus specierum nam animal, quod est genus respectu hominis, & bruti, non rectè definitur per conceptus illorum, dicendo: *Animal est homo, vel brutum*: ergo prædicta definitio non explicat naturam

G 2 enun-

enunciationis, & consequenter non est bona.

3 Respondent, quòd hoc est verum, quando est perceptibilis conceptus rei in communi, ut præscindit ab inferioribus, ut contingit in animali respectu hominis, & bruti, at verò in enunciatione non est perceptibilis talis conceptus præscindens ab affirmativa, & negativa. Sed contra est: quia benè possumus habere conceptum enunciationis ut sic præscindentem ab affirmativa, & negativa; nam audito hoc nomine *enunciatio*, benè formamus conceptum orationis judicativæ, præscindendo ab hoc, quòd sit affirmativa, vel negativa: ergo perceptibilis est talis conceptus.

+ Dicimus secundò: Enunciatio non benè definitur hoc modo: *Est oratio verè, vel falsè significans*. Hæc conclusio communiter recipitur ab Scotistis, & potest probari simili ratione, ac præcedens; nam eadem videtur esse ratio, cum enunciationes vera, & falsa sint inferiores respectu enunciationis ut sic. Neque obstat, si dicas, prædictas definitiones traditas fuisse ab Arist. nā dicimus intentū Arist. non fuisse quidditativè, & essentialiter per illas enunciationem definire; sed tantum denotare, omnem enunciationem esse affirmativam, seu negativam, veram, vel falsam.

5 Dicitur tertio: *Propositio, seu enuntiatio est ratio indicativa unius de alio*. Hæc definitio tanquam rectè explicans naturam enunciationis in communi, admittitur à majori parte Scotistarum, & à pluribus aliis, & probatur ejus bonitas: quia hæc definitio explicat conceptum communem enunciationis, ut præscindit ab affirmativa, & negativa: ergo hæc definitio rectè explicat naturam enunciationis ut sic, & consequenter est bona. Si autem inquires, quid sit, quòd dicit enunciatio, ut præscindit ab affirmativa, & negativa? Resp. esse illud, in quo peculiariter conveniunt judicium affirmativum, & negativum magis inter se, quam cum aliis

aliis actibus intellectus, quod ut inquit quidam doctissimus Scotista, magis quisque poterit propria experientia discernere, quam verbis exprimere aliter.

6 Arguit primò quidam subtilis Scotista: quod est proprium unius, prout distinguitur ab alio, nequit esse aliquid eis commune: sed enunciare unum de alio est proprium propositionis affirmativæ, ut distinguitur à negativa: ergo enunciare unum de alio non est quid commune affirmativæ, & negativæ: Probatur minor, quia propositio affirmativa distinguitur à negativa, in quantum affirmat unum de alio; sed affirmare unum de alio, idem est, ac enunciare unum de alio: ergo enunciare unum de alio est proprium propositionis affirmativæ, ut distinguitur à negativa. Prob. min. quia impossibile est intelligere, propositionem secundum aliquam rationem unum de alio enunciare, & quòd secundum eandem rationem unum de alio non affirmet; ergo unum de alio enunciare est unum de alio affirmare.

7 Respondetur neg. min. & minorem probationis, & similiter antecedens probationis secundæ minoris; nam ut supra dictum est, bene potest intelligi ratio enunciandi, quin intelligatur ratio affirmandi; nam se habent tanquam superius, & inferius.

8 Arguit secundò in confirmationem præcedentis argumenti: propositio negativa ut talis non enunciat unum de alio; ergo sola affirmativa enunciat. Probatur antecedens; nam si propositioni affirmativæ, in qua unum de alio enunciatur, præponatur negatio, jam non enunciat, imo removel à subjecto, quòd de illo in affirmativa enunciabatur, ergo propositio negativa non enunciat unum de alio, sed sola affirmativa, & consequenter enunciare non est quid commune propositioni affirmativæ, & negativæ. Resp. neg. antec. & disting. antec. pro-

bationis : propositio negativa non enunciat unum de alio, positivè, concedo; negativè, nego, & neg conseq.

9 Arguit contra: enunciare negativè, idem est, ac non enuntiare; ergo si propositio negativa enunciat negativè, non enunciat; ergo non est propriè enuntiatio, imò est negatio enunciationis, sicut negatio entis non est propriè ens: sed enunciationi, & non enunciationi nihil datur commune, sicut neque enti, & non enti; ergo propositioni affirmativæ, & negativæ nihil datur commune.

10 Respondetur negando antecedens, quod ut facilè intelligas, & totum argumentum solvas, notare debes, quòd propositio potest sumi dupliciter, scilicet, formaliter, & objectivè. Formaliter, dicit actum judicativum intellectus, & in hoc sensu semper dicit actum positivum in ipso intellectus, siue sit affirmativa, siue negativa, & sic affirmativa, & negativa conveniunt in ratione actus positivi judicativi intellectus, & differunt in hoc quod una judicat affirmando, altera verò negando, & sic quando dicimus, quod propositio negativa enunciat negativè, non intelligitur, ita quod sit negatio actus positivi, sed ista; quòd sit actus positivus negans. Objectivè autem dicit objectum, seu materiam, circa quam fit propositio: & tunc sumitur oppositio propositionis ex oppositione ipsius materiæ, & si est circa eandem materiam, tunc non potest dari conceptus communis affirmativæ, & negativæ, objectivè sumptis, ut patet in his propositionibus; *Homo est animal: homo non est animal*; quia in tali casu est affirmatio, & negatio ejusdem de eodem; sed ex hoc nihil contra nos; nam loquimur de propositione formaliter sumpta.



## Q U Æ S T I O I I.

*Quales sint divisiones propositionis?*

1 **P**lures sunt propositionis divisiones, ut dictum est lib. 2. cap. 2. Nunc autem potest dubitari, quales sint prædictæ divisiones? Pro quibus, dicimus primò; divisio propositionis in categoricam, & hypotheticam est generis in species. Circa hanc conclusionem sunt divisi Scottistæ, sed plures sunt, qui eam tenent. Probat, quia ratio enunciationis convenit propriè categoricæ, & hypotheticæ, & differunt essentialiter per diversos modos enunciandi; nam categorica enunciat absolute, & sine dependentia; hypothetica verò dependenter, & ex suppositione, ergo talis divisio est generis in species.

2 Arguunt contra: propositioni hypotheticæ non convenit propriè enunciare: ergo talis divisio non est generis in species. Patet consequentia, quia propositio hypothetica nequit esse species propositionis in communi, nam species, quæ dividunt genus, debent propriè participare rationem illius. Antecedens probatur, quia propositio hypothetica non prædicat unam propositionem de alia, sed tantum eas coniungit, quod est, quædam umbra propriæ enunciationis; ergo non est propriè enuntiatio. Et potest confirmari; quid hypothetica non continet diversam veritatem, vel falsitatem ab illa, quæ continent categoricæ ex quibus constat: ergo non est enuntiatio essentialiter diversa à categorica.

3 Resp. neg. antec. ad probationem dicimus, quod de ratione propositionis: ut sic est esse enunciativam, hoc est, assertivam alicujus complexi; potest autem aliquid asserti, non tantum per prædicationem unius de alio, sed etiam per

copulationem plurium propositionum, quæ copulatio diversum iudicium postulat à iudiciis ipsarum propositionum, quas copulat, & talis modus enunciandi convenit essentialiter propositioni hypotheticæ, ut distinctæ à categorica. Ex quo respondetur ad confirmationem; neg. antec. nam sicut postulat diversum iudicium hypothetica à categoricis, ita secum fert diversam veritatem, aut falsitatem; ut patet in hac: *Si Petrus esset equus, non esset intelligens*, quæ est vera, licet categoricæ, ex quibus componitur sint falsæ.

4 Dicimus 2. Divisio propositionis in complexam, & in incomplexam, est generis in species. Hæc conclusio potest probari ratione, qua respondetur ad argumentum antecedentis. Divisio autem complexæ in copulativam, & disjunctivam; etiam potest dici generis in species, quia essentialiter diverso modo enunciat. Neque videtur, quid contra hoc possit obici, quod alicuius sit momenti.

5 Dicimus tertio: divisio propositionis categoricæ in absolutam, & modalem, est subiecti in accidentia. Probatur, quia propositio modalis potest reduci ad absolutam, ut cum dicimus. *Possibile est Petrum currere*, idem est, ac dicere: *Hac propositio, Petrus currit, est possibilis*: sed prima est modalis, & secunda absoluta: ergo per accidens se habet ad rationem propositionis, quod sit absoluta, vel modalis. Potest etiam dici, quod est divisio generis in species, nam absoluta essentialiter solum petit habere aliquem terminum pro subiecto, & pro prædicato; modalis verò essentialiter petit habere pro subiecto aliquam integram propositionem, & pro prædicato aliquem modum; sed subiectum, & prædicatum sunt de essentia propositionis; ergo diversa ratio subiecti, & prædicati variat rationem propositionis, ac per consequens talis divisio est generis in species. Utrūq; videtur probabile.

Di-

6 Dicimus quartò: divisio propositionis categoricæ in constantem verbo substantivo, & verbo adjectivo, est analogi in analogata. Probarur, quia ratio copulæ, quæ est forma propositionis, propriè convenit verbo substantivo, impropriè verò, & per ordinem ad illud verbo adjectivo: ergo talis divisio est analogi in analogata. Idem dices de divisione propositionis, secundum diversa tempora verborum, quia solum tempus præsens est propriè copula, cætera verò tempore tantum: per reductionem ad illud, ut diximus loquendo de verbo.

7 Dicimus quintò: divisio propositionis categoricæ in necessariam, contingentem, & impossibilem, licet sit univoci in univocata, non tamen est generis in species; quod patet, quia ratio propositionis propriè convenit cuilibet ex prædictis, & licet differant per differentias intrinsecas; tamen tales differentie sunt materiales, nam desumuntur à materia: sed ad rationem divisionis generis in species requiritur, quòd membra diuidentia differant per differentias formales: ergo talis divisio, licet sit univoci in univocata, non tamen est generis in species. Reducitur ergo hæc divisio ad divisionem subjecti in accidentia; nam accidentale videtur propositioni formaliter sumptæ, quod fiat in hac, vel in illa materia.

8 Dicimus sexto: divisio propositionis categoricæ in affirmativam, & negativam est generis in species. Probatur, quia hæc divisio desumitur ex forma, quæ essentialiter diversa est in propositione affirmativa, & negativa; in affirmativa enim caret negatione, quàm habet in negativa: ergo prædicta divisio est generis in species essentialiter diversa.

9 Dicimus septimò: divisio propositionis categoricæ in veram, & falsam, vel est accidentalis, vel generica per proprias passionem. Hæc

conclusio dependet ex alibi dicendis circa modum, quo veritas, & falsitas propositioni conveniunt, quod hic valdè longum, & molestum esset recensere.

10 Dicimus octavo: divisio propositionis categoricæ in universalem, particularem, indefinitam, & singularem, est subiecti in accidentia; quia prædictæ propositiones solum differunt per maiorem, vel minorem quantitatem; sed ut fert commune proloquium: *Magis, & minus non variant speciem*, & deinde quantitas est accidens cujuscumque, in quo invenitur: ergo talis divisio est subiecti in accidentia.

11 Dicimus nonò: divisiones propositionis hypotheticæ eodem modo se habent, ac propositionis categoricæ; unde ex dictis facilè deducitur à simili, quale sint tales divisiones, ideòque de illis nihil peculiare restat dicendum. Contra omnia supradicta nihil videtur posse obijci, quod facilè non solvatur ex eorum intelligentia.

12 Aliæ divisiones propositionis solent adduci, scilicet, in propositionem de *in esse*, & modalem: sed hæc divisio eadem est, ac divisio propositionis in absolutum, & modalem, nam propositio de *in esse* nihil aliud est, nisi quòd denotetur in illa prædicatum absolutè *in esse* subiecto, quod est proprium propositionis absolutæ, ut distinguitur à modali. Alia est divisio in propositionem de primo, de secundo, & tertio adjacente. Propositio de primo adjacente dicitur, quæ unica tantum voce exprimitur, ut cùm dicimus: *Curro*. De secundo adjacente dicitur, quando exprimitur duplici voce, scilicet, subiecto, & verbo, ut *ego curro*. De tertio adjacente dicitur, quando totum exprimitur in propositione: *ut ego sum currens*. Sed hæc divisio non est de re, sed tantum de modo significandi, penes implicitum, & explicitum, quod  
non

non variat rationem propositionis, imò omnes in re sunt æquivalentes. Aliter solent prædictæ propositiones explicari, sed hoc reducitur ad quæstionem de nomine.

### Q U Æ S T I O III.

*In qua resolvuntur aliqua de oppositione,  
& conversione simplicium  
propositionum.*

1 **C**IRCA oppositionem simplicium propositionum plura possunt dubitari, sed omnia faciliè solvuntur, si ad leges cujuslibet oppositionis attendatur, & simul observetur, quod debent habere propositiones oppositæ eadem affectiones sine aliqua variatione, præter suppositionem, quæ provenit illis ratione quantitatis, nam hæc benè potest variari, imò in aliquibus oppositionibus necessario variari debet. Nunc autem potest peculiariter dubitari, circa illam legem contradictoriarum, scilicet, quòd non possint esse simul veræ, nec simul falsæ, an scilicet, sit bona? Ad quod respondetur affirmativè, quia hoc non videtur habere aliquid in contrarium, si ad supradicta attendatur.

2 Argues tamen contra: hæ propositiones: *Omnis homo in quantum homo est albus; aliquis homo in quantum homo non est albus*, sunt contradictoriæ; sed tamen sunt simul falsæ, quia falsum est dicere, quòd habere, vel non habere albedinem, conveniat homini in quantum homo est; nam in quantum homo est solum, convenit illi esse animal rationale: ergo prædicta lex non est bona. Pro responsione notandum est cum Scoto in 1. dist. 5. quæst. 1. §. Ad argumenta, vers. Ad ultimum, sub litt. L. quòd contradictoria sunt in duplici differentia; alia sunt immediata, ut quando aliquid prædicatur immediatè de subjecto sine aliqua reduplica-

tione, ut cum dicimus: *Petrus est albus*: *Petrus non est albus*, & in his semper tenet prædicta regula. Alia sunt mediata, ut quando prædicatur aliquid de subiecto ratione alicujus mediæ, seu reduplicationis denotantis causam, qua prædicatum convenit subiecto, ut patet in exemplo argumenti; & in his, si tale medium est ratio, qua prædicatum convenit, vel non convenit subiecto, etiam tenet prædicta regula, ut patet in his propositionibus: *Homo in quantum homo est animal rationale*: *homo in quantum homo non est animal rationale*, quarum prima necessario est vera, secunda vero necessario falsa. Si autem tale medium non est ratio, qua prædicatum convenit, vel non convenit subiecto, non teneret prædicta regula, ut patet in propositionibus argumenti. Hoc supposito.

3 Respondetur ad argumentum disting. mai. prædictæ propositiones sunt contradictoriæ, immediate, neg. mediate, subdisting. ita ut medium sit ratio, qua prædicatum convenit, vel non convenit subiecto, nego, ita ut medium non sit talis ratio, concedo, & concessa minori, neg. conseq. Ratio prædictorum est; quia prædictæ propositiones, absolute loquendo, non sunt proprie contradictoriæ, licet contradictorie appareant, imò sunt contrariæ de lege, quia sunt simul falsæ, quod in materia contingenti est lex contrariarum. Inquit tamen Scotus cit. quod prædictæ propositiones sunt contradictoriæ, præposita negatione ipsi medio, seu reduplicationi, ut si dicamus: *Homo in quantum homo est albus*, quæ est falsa, & *Homo non in quantum homo est albus*, quæ est vera.

4 Circa conversionem simplicium propositionum potest dubitari, an regulæ, quæ continentur in illis versiculis: *Simpliciter feci*, &c. sint bonæ, & consistentes? Pro responsione nota, quod conversio dupliciter potest sumi, scilicet, late, & stricte. Late sumitur, quatenus in terminis

minis transpositis valet consequentia à conversa ad convertentem. Strictè sumitur (ut eam sumpsit Scotus 1. Prior. cap. 12.) quatenus convertens participat de veritate conversæ, quantum est participabile in terminis transpositis. Hoc supposito

5 Dicimus primò; si conversio sumatur latè, omnes regulæ contentæ in prædictis versiculis sunt veræ, & constantes. Hæc conclusio, licet in terminis non ponatur, in re ab omnibus dialecticis admittitur. Et patet, quia, juxta prædictas regulas, in omnibus conversionibus valet consequentia à conversa ad convertentem; sed conversio latè sumpta, solum hoc exposcit; ergo in hoc sensu tenent omnes prædictæ leges.

6 Ubi adverte, quòd excipitur à regula generali consequentia facta in *Baralipton*, quæ est particularis affirmativa, & juxta regulam generalem debebat converti simpliciter, & tamen quando syllogismus factus in *Baralipton* reducitur ostensivè ad *Barbara*, talis consequentia reducitur, seu convertitur per accidens quæ conversio tantum est in nomine, & in apparentia, quia transmutantur termini; non tamen in re, cum non valeat consequentia à conversa ad convertentem, non enim valet ab hac propositione; *Aliquod animal est album*, quæ potest esse consequentia in *Baralipton*, ad hanc: *Omne album est animal*; quæ est, in quam debet converti, ut syllogismus reducatur ostensivè ad *Barbara*.

7 Dicimus secundò; si conversio sumatur strictè, illa regula, quæ denotat universalem negativam posse converti per accidens, non tenet. Hæc conclusio in terminis est Scoti in 1. dist. 21. §. Ad primum, Vers. Sed cum probatur, litt. C. ubi dicit; *Unde universalis negativa non convertitur in particularem negativam in terminis transpositis, licet inferat eam.*

8 Probatur conclusio ratione ; quia ad conversionem strictè sumptam requiritur, quòd convertens participet de veritate conversæ, quantū est participabile transmutatis terminis ; sed hoc non contingit, si universalis negativa convertatur per accidens ; ergo nequit converti per accidens stricta conversione. Minor patet hoc exemplo quia si hæc propositio universalis negativa ; *Nullus homo est lapis*, convertatur per accidens in hanc particularem negativam ; *Aliquis lapis non est homo*, hæc convertens non participat de veritate illius conversæ, quantum est participabile, transmutatis terminis, quia hæc universalis negativa ; *Nullus lapis est homo*, in quam convertitur supradicta simpliciter, magis participat de veritate conversæ, quam prædicta particularis negativa ; ergo conversione stricta non benè convertitur universalis negativa per accidens. Probatur antecedens ; quia in universali negativa conversa removetur à subjecto quidquid continetur sub prædicato, scilicet, omnis lapis ab homine, & eodem modo removetur in universali negativa ; in quam convertitur simpliciter, non verò in particulari negativa, in quam convertitur per accidens, nam in illa solum removetur à subjecto aliquid contentum sub prædicato conversæ, ut patet in exemplo posito : ergo particularis negativa, in quam convertitur per accidens, non participat de veritate conversæ, quantum est participabile, transmutatis terminis, siquidem universalis negativa, in quam convertitur simpliciter, magis participat de veritate talis conversæ ; ergo universalis negativa, conversione stricta, non benè convertitur per accidens, sed simpliciter ; & consequenter non tenet prædicta regula conversionis in hoc sensu.

9 Argues contra ; universalis affirmativa benè convertitur per accidens conversione stricta ; ergo etiam universalis negativa . Resp. neg. con-



conseq. & paritatem. Disparitas stat in hoc, quod, si universalis negativa convertitur per accidens, non servatur in convertente tanta veritas conversæ, quanta potest servari transmutatis terminis, benè tamen, si simpliciter convertatur, ut patet ex dictis; at verò, si universalis affirmativa convertatur per accidens, servatur in convertente tota veritas conversæ, quæ potest servari, transmutatis terminis, non verò si convertatur simpliciter, imò in tali casu convertens est falsa, quod ostenditur hoc exemplo, si hæc propositio: *Omnis homo est albus* per accidens convertatur in hanc; *Aliquod album est homo*, convertens aliquid participat de veritate conversæ; si autem convertatur simpliciter in hanc; *Omne album est homo*, convertens est falsa, & consequenter nihil participat de veritate conversæ, & sic propositio particularis affirmativa in quam convertitur per accidens universalis affirmativa, paticipat de veritate conversæ, quantum est participabile, transmutatis terminis, quod non contingit, si universalis negativa per accidens convertatur, & sic benè convertitur per accidens universalis affirmativa, non tamen universalis negativa.

10 Ubi advertendum est, quòd propositio universalis affirmativa, in qua ponitur pro prædicato tota essentia, vel differentia essentialis, vel propria passio subiecti, non benè convertitur per accidens conversione stricta, propter eandem rationem, ac dictum est de universali negativa, quod convenit illi tantum ratione materiæ, negativæ verò convenit ratione formæ, quod clarè parebit per ipsas propositiones discurrenti.

## Q U Æ S T I O IV.

*Quales sint divisiones propositionis modalis?*

1 **D**icimus primo, divisio propositionis modalis per quatuor modos, *possibile*, *contingens*, *impossibile*, *neceffe*, est generis in species. Probat, quia ratio communis propositionis modalis convenit uniuocè omnibus propositionibus, quæ sunt in prædictis modis, & prædictæ propositiones inter se differunt essentialiter per prædictos modos; sed hoc est ratio diuisionis generis in species: ergo prædicta diuisio est generis in species. Ubi adverte, quòd propositiones de modo *possibile*, & de modo *contingens*, non constituunt diversas species, nam ut suo loco diximus, *possibile*, & *contingens*, pro eodem usurpantur.

2 Dicimus secundò: quales sint diuisiones propositionis modalis, tam ratione formæ, quàm ratione materiæ, quantitatis, & qualitatis, deducendum est ex dictis quæst. 2. hujus disputationis, videantur ibi dicta, nam semel dictum, non est necessarium repetere. Circa alia, quæ pertinent ad propositionem modalem, nihil se offert dubitandum, quod alicujus sit momenti.

## D I S P U T. V.

*De pertinentibus ad argumentationem.*

**P**ura, quæ pertinent ad argumentationem, seu syllogismum, ut actus intellectus est, non sunt propria præsentis instituti, idèò commodius aliis locis tractantur, in præsentia autem aliqua possunt dubitari, quæ breviter per sequentes quæstiones resolvemus. Sit ergo.

QUÆ.

## Q U Æ S T I O I

*Quales sint divisiones argumentationis?*

1 **D**icimus primò; divisio argumentationis in syllogismum, enthimema, dilemma exemplum, & inductionem, est analogi in analogata. Probatur; quia tunc divisio est analogi in analogata, quando ratio communis propriè convenit alicui ex membris dividendibus, cæteris verò impropriè, & per ordinem ad illud, sed, ut suo loco diximus, ratio argumentationis propriè, solum convenit syllogismo, quia concludit ratione formæ; cæteris verò impropriè, & per ordinem ad syllogismum; nam tantum concludunt ratione materiæ, & ut ratione formæ concludant, ad syllogismum reducuntur, ut patet in exemplo ibi posito in enthimemate, ad cuius instar potest exemplificari in aliis argumentationibus; ergo talis divisio est analogi in analogata.

2 Dicimus secundo: ex dictis circa divisiones propositionis facilè deducitur, quales sint divisiones argumentationis, seu syllogismi; nam desumuntur, vel ex parte materiæ, vel ex parte quantitatis, vel qualitatis, vel ex parte formæ, videantur ibi dicta, & hic applicentur. Ex quibus sequitur, quòd divisio syllogismi in novemdecim modos ratione formæ correspondentis materiæ proximæ, similiter divisio in triplicem figuram ratione formæ correspondentis materiæ remotæ, sunt divisiones generis in species, nam membra dividendia differunt inter se essentialiter, cum ratione formæ differant. Solum autem solet esse difficultas, an prædictæ divisiones sint adæquatæ? Cujus resolutio dependet ex resolutione alterius difficultatis, scilicet, an detur quarta figura syllogistica? Nam si talis figura detur, necessariò assignandi sunt

sunt aliqui modi ad ipsam pertinentes, distincti à supra numeratis pro triplici assignata figura, & sic nulla ex prædictis divisionibus erit adæquata. Si autem non detur quarta figura, non debent multiplicari modi syllogistici, & sic utraque divisio erit adæquata. Examinanda ergo est prædicta difficultas. Pro qua sit.

## Q U Æ S T I O II.

*An detur quarta figura syllogistica?*

1 **D**icimus: Triplex tantum datur figura syllogistica. Conclusio est communis inter sectatores Aristi, qui tantum triplicem assignavit figuram, est tamen contra Galenum, qui quartam figuram assignavit, & contra paucos ipsum sequentes. Ex qua conclusione deducitur, quòd divisiones supradictæ sunt adæquatæ. Probatur igitur conclusio ratione: quia figura syllogistica est dispositio medii cum extremitatibus secundum subjectionem, & prædicationem; sed tantum tripliciter potest medium sic disponi cum extremitatibus, scilicet, vel ita ut sit subjectum in majori propositione, & prædicatum in minori; vel ita ut in utraque sit prædicatum, vel ita ut in utraque sit subjectum; quorum exempla attulimus suo loco; ergo tantum datur triplex figura syllogistica. Minor patebit ex solutione sequentis argumenti.

2 Arguunt contra oppositum tenentes; figura syllogistica, consistit in dispositione medii cum extremitatibus, secundum subjectionem, & prædicationem: sed alio modo, præter assignatos, potest medium cum extremitatibus disponi, secundum subjectionem, & prædicationem, videlicet, ita ut medium sit prædicatum in majori, & subiectum in minori; ergo datur quarta figura. Minor patet in hoc syllogismo; *Omne visibile est homo; omnis homo est rationalis:*  
ergo

ergo *omne rationale est visibile*, in quo *ly homo*: quod est medium, est prædicatum in maiori, & subiectum in minori; ergo alio modo ab assignatis potest disponi medium cum extremitatibus, secundum subjectionem, & prædicationem; ac per consequens datur quarta figura.

3 Respondetur disting. min. alio modo potest disponi medium, ita ut sit prædicatum in maiori, & subiectum in minori, ad conficiendum syllogismum concludentem ratione materiæ, admitto: ad concludendum ratione formæ quod requiritur ad constituendam diversam figuram syllogisticam: nego & similiter distinguendum est consequens; nam solum ratione materiæ dabitur quarta figura, quæ improprie figura syllogistica dicitur, cum figura pertineat ad formam syllogisticam, non verò ad materiam.

4 Quod autem syllogismus factus cum tali dispositione, ut est, qui ponitur in argumento, solum concludat ratione materiæ, non autem ratione formæ, probatur in hoc syllogismo, *Omne rationale est homo: omnis homo est animal; ergo omne animal est rationale*, salvatur eadem dispositio, ac in syllogismo posito in argumento, nam medium est prædicatum in maiori, & subiectum in minori, & solum variatur materia: sed talis syllogismus non bene concludit, nam consequentia non sequitur: sed est falsa; ergo syllogismus cum tali dispositione mediæ confectus non concludit ratione formæ; sed tantum ratione materiæ, & consequenter non constituit figuram distinctam à tribus assignatis.

5 Argues contra: prædictus syllogismus si concludat indirectè bene concludit etiam ratione formæ; nam si dicamus: ergo *omne rationale est animal*, bene sequitur consequentia: ergo constituit aliam figuram. Respond. negando consequentiam, nam in tali casu prædictus syllogismus idem est, ac syllogismus factus in *Barbara*

*bara*, directè concludens, & solum est in illo transmutatio præmissarum, quod non sufficit ad constituendam diversam figuram à prima, quod etiam contingit in *Cesare*, & *Camestres*, in quibus transmutantur præmissæ, & tamen sunt eiusdem figuræ, scilicet, secundæ.

6 Argues contra; ergo prædicta transmutatio præmissarum ad minus constituit diversum modum in prima figura, sicut constituit in *Cesare*, & *Camestres*; & consequenter modi primæ figuræ non sunt sufficienter numerati. Resp. neg. consequentiam, & paritatem; quia in prædicto syllogismo, & in *Barbara* omnes propositiones sunt universales affirmativæ; in *Cesare* autem, & *Camestres*, una præmissarum est universalis affirmativa, & altera universalis negativa, quarum transmutatio sufficit ad variandum modum; nam modus est dispositio præmissarum secundum quantitatem, & qualitatem. Aliter potest responderi, quod *Cesare*, & *Camestres* non constituunt diversos modos, ex eo præcisè, quod præmissæ transmutentur; sed etiam ex eo quod talis transmutatio infert diversam consequentiam quod non contingit in *Barbara*, & in syllogismo supradicto, si indirectè concludat: & certum est, quod sola diversitas consequentiæ sufficit ad variandos modos in eadem figura, ut patet in *Darii*, & *Dabit*.

7 Ubi adverte, quod facile quælibet argumenta solves, si attentè observes, quod cum ratio prædicationis sit nobilior ratione subjectionis, illa extremitas, quæ prædicatur de medio erit major, & propositio, in qua prædicatur, erit propositio maior; & illa extremitas de qua prædicatur medium; erit minor; & propositio illi correspondens, erit propositio minor (licet propositiones transmutentur ex indebita collocatione) quod est proprium primæ figuræ, Quando autem in utraque præmissa subiicitur,  
seu

seu prædicatur medium, semper erit major extremitas, quæ prædicatur in consequentia, & propositio, in qua est, propositio major; & minor extremitas, quæ subjicitur in conclusione, & propositio, in qua est, propositio minor, quod est proprium secundæ, & tertiæ figuræ; quæ, ut communiter tenent Philosophi, semper directè, & nunquam indirectè concludunt.

8 Contra hoc ultimum potest argui hoc modo: syllogismus factus in *Darapti*, qui est modus tertiæ figuræ, potest concludere directè, & indirectè: ergo falsum est dicere, quod in tertia figura semper concluditur directè. Antecedens patet: nam ex his præmissis: *Omnis homo est animal; omnis homo est rationalis*, potest inferri directè hæc consequentia: ergo *aliquod rationale est animal*: & hæc indirectè: ergo *aliquod animal est rationale*: ergo in *Darapti* potest concludi directè, & indirectè; & consequenter in tertia figura indirectè potest concludi. Resp. neg. antecedens; ad probationem dicimus, quod utraque consequentia directè concludit: prima, juxta prædictam dispositionem præmissarum; secunda, per transmutationem præmissarum, sic formando syllogismum: *Omnis homo est rationalis; omnis homo est animal*; ergo *aliquod animal est rationale*; quæ quidem transmutatio præmissarum nullatenus variat concludendi modum. Plura alia circa dialecticum institutum possent in controversiam adduci, sed quæ dicta sunt, & à nobis adducta sunt communiora, & ex resolutione illarum, aliarum resolutio deduci potest, ideòque pro nunc dicta sufficiant, utinam cedant in laudem, & gloriam omnipotentis Dei.

## PRÆLUDIUM.

**A**ccedimus jam ad logicæ magnæ difficultates examinandas, in quibus Arist. methodum, & ordinem observabimus, ad mixtis tamen aliquibus, non parum ad illarum intelligentiam conducentibus; & jam his temporibus hic communiter agitari solitis. Sed antequam ad ipsam formaliter logicam perveniamus, aliqua, per modum proœmii, præmittere necessarium duximus, ut in qualibet scientia, seu facultate, omnes communiter necessarium ducunt, licet fateantur, quòd ad metaphysicam, tanquam ad generalem scientiam, quæ circa omnium rerum naturam, versatur, proœmiales cujuscumque scientiæ disputationes spectent; quippe in investiganda natura, & quæ ad ipsam attinet, scientiæ, cujus sunt, occupantur. Ut autem clariori possibili forma procedamus, tam in his proœmialibus disputationibus, quam in omnibus aliis totius nostri philosophici cursus, per quæstiones (quas, si necessarium fuerit, in sectiones dividemus) difficultates, quæ disserendæ se offerunt, indicabimus. Sit ergo

## D I S P. I.

*Proœmialis de Ente rationis.*

**L**icet hæc disputatio ab omnibus jam in logica præfigatur, eo quod multum conducat ad intelligentiam eorum, quæ in ipsa logica tractantur; non tamen ab omnibus in initio ipsius logicæ præfigitur, sed nobis commodius hic videtur debere proponi; quia in sequenti disputatione inquiritur, an objectum logicæ sit ens rationis? Quòd difficulter resolvi posset, non



non præmissa ipsius entis rationis aliquali notitia. Pro illa ergo sit

## Q U Æ S T I O I.

*An detur, & quid sit ens rationis.*

**P**RO intelligentia quæstionis notandum est, quod ens rationis, ut nomen sonat, est æquivocum plura diversæ rationis confuse significans, ideòque multipliciter usurpatur. Primo enim dicitur ens rationis efficienter, in quo sensu omnes actus intellectus entia rationis nuncupantur, omnes enim effectivè ab intellectu procedunt. Secundò dicitur ens rationis subjectivè; in quo sensu omnes formæ, quæ inherent intellectui, tanquam subjecto, nuncupantur entia rationis. Tertiò dicitur ens rationis obiectivè; in quo sensu omnia, quæ cognoscuntur ab intellectu, tanquam objecta illius, entia rationis vocantur: quod adhuc dupliciter potest evenire. Primò, quando cognoscit intellectus illa; quæ à parte rei existunt, vel existere possunt. Secundò, quando cognoscit illa, quibus repugnata alia existentia, & aliud esse, præter illud, quod accipiunt ab ipsa cognitione; in hac ultima acceptione procedit quæstio, & tota disputatio; nam in aliis acceptionibus omnia sunt propriè entia realia, & denominativè tantum entia rationis. Hoc notato

2 Pro primò, quod inquirit quæstio, dicimus primò: ens rationis in sensu explicato datur, vel potest dari. Hæc conclusio est jam communiter recepta, licet aliqui ex antiquis ipsam negaverint; tenent eam Angelicus, & subtilis Magistri pluribus in locis, quæ valdè molestum esset recensere. Probatur tamen hac unica ratione: quia plura cogitantur à nostro intellectu, quæ nullum esse verum habent, neque habere possunt à parte rei, ut quando concipiuntur privationes, & nega-

negationes ad modum entis positivi; cum tamen in se nullam entitatem positivam habeant; & quando concipiuntur denominationes extrinsecæ ut quid intrinsecum in re denominata, cum tamen nihil intrinsecum in tali re denominata ponant: sed hæc omnia sunt entia rationis in sensu dicto, quod & postea amplius patebit; ergo in sensu explicato datur, vel potest dari ens rationis.

3 Aliqua obijciunt oppositum tenentes. Primo enim sic arguunt; si daretur ens rationis, esset quid intelligibile; sed ens rationis in supradicto sensu non est quid intelligibile; ergo non datur. Prob. minor; quia intelligibilitas est propria passio entis realis; ergo nequit enti rationis convenire. Aliter prob. min. quia omne, quod est intelligibile, habet esse priusquam actu intelligatur; sed ens rationis non habet esse priusquam actu intelligatur; ergo non est quid intelligibile; ac per consequens non datur, tale ens rationis.

4 Resp. disting. maj. Si daretur ens rationis, esset quid intelligibile, intelligibilitate motiva, & intrinseca, neg. intelligibilitate terminativa, & extrinseca, conc. Similiter disting. min. ens rationis non est quid intelligibile, intelligibilitate motiva, & intrinseca, conc. intelligibilitate terminativa, & extrinseca, neg. Ad probationem minoris respondetur disting. antecedens; intelligibilitas motiva, & intrinseca est propria passio entis realis, conc. intelligibilitas terminativa, & extrinseca, neg. & similiter distinguendum est consequens. Hæc responsio est communis, & deducitur ex pluribus Scotistis, præcipuè Mastro, Meron, & Merinero, ex quibus etiam deducitur, si attentè legantur, totum, quod resistat in hac quæstione, & similiter in quæstione de passionibus entis rationis.

5 Ut autem prædicta solutio clarè percipiatur,

tur, observandum est, quod duplex datur intelligibilitas, alia intrinseca, & alia extrinseca. Intrinseca identificatur cum ipso ente, & fundatur in prædicatis formalibus illius, ratione cujus potest movere intellectum ad sui cognitionem; quæ intelligibilitas est propria, passio entis realis, quia solum ens reale potest movere intellectum ad sui cognitionem, siquidem est objectum adæquatum illius, & non potest convenire enti rationis; quia cum in se veram entitatem non habeat, nequit intrinsecæ includere, & secum identificare talem intelligibilitatem, & sic nec movere intellectum ad sui cognitionem; movet autem illum per speciem illius entis realis, ad instar cujus ab intellectu fabricatur, intelligibilitas extrinseca nullatenus identificatur cum ente, neque fundatur in prædicatis essentialibus illius, sed provenit à forma extrinseca, id est ab intellectu, quatenus potest percipere ens, & ens potest esse terminus actus illius, quæ intelligibilitas nihil intrinsecum ponit in re, sicut neque ponit ipsa actualis intellectio ipsi correspondens, sed tantum denominationem extrinsecam; quæ intelligibilitas solet appellari non repugnantia logica, & non est passio præcisè entis realis, sed est quid commune enti reali, & rationis; nam utrumque potest terminare actum intellectus. Ex qu.

6 Respondetur ad aliam probationem minoris præcedentis argumenti, distinguendo maius quidquid est intelligibile, debet esse priusquam actu intelligatur, si est intelligibile intelligibilitate intrinseca, & motiva, conc. si est intelligibile intelligibilitate tantum extrinseca, & terminativa, neg. nam ad hoc nullatenus requiritur, quod præcedat aliquod esse formale, neq; essentialis, neque existentis; sed sufficit, quod præcedat illa non repugnantia logica, quæ nullum esse dicit, neque essentialis, neque existentis.

7 Arguunt secundò : solum quod est possibile est intelligibile; sed ens rationis non est possibile; ergo neque intelligibile, & consequenter ens rationis ex omni parte repugnat. Probatur minor, quia quod est possibile, dicit ordinem ad veram existentiam: sed ens rationis non dicit talem ordinem: ergo non est possibile. Facile resp. ex dictis ad argumentum præcedens, quia aptum hoc est verum loquendo de intelligibilitate motiva, & intrinseca; non autem de intelligibilitate terminativa; & extrinseca. Et deinde verum est loquendo de possibilitate strictè sumpta, quæ solet appellari possibilitas physica in ordine ad veram, & realem existentiam; non autem loquendo de possibilitate late sumpta, & quæ tantum dicit non repugnantiam logicam, in ordine ad existentiam, vel realem, vel rationis. Ex quo facile respondetur in forma. Ubi adverte, quòd absolutè loquendo non dicitur propriè, ens rationis est possibile, sed melius dicitur; possibile est intellectum ens rationis efficere; sed hoc reducitur ad quæstionem de nomine, de qua non est multum curandum, nisi quando fortè in ipsis vocibus aliqua appareat æquivocatio.

8 Arguunt tertio; si daretur ens rationis, sequeretur, posse dari genus sine speciebus, & essentiam sine passionibus: sed hoc videtur impossibile: nego non datur ens rationis, Probatur sequela, quia si totum esse entis rationis consistit in entitate obiectiva ab intellectu considerata, bene poterit intellectus considerare gradum genericum sine specifico, & essentiam sine passione, sicut hoc ipsum potest facere in entibus realibus: ergo si daretur ens rationis, posset dari genus sine speciebus, & essentia sine passione. Respondetur primo, concedendo sequelam, quia hoc nullum est inconueniens; nam sicut in entibus realibus prædicata  
supra

superiora possunt cognosci sine inferioribus, & essentia sine passione, ita in entibus rationis unum ex his potest esse sine alio, quia cum accipiant esse per cognitionem, solum quod sit cognitum habebit esse. Secundo respondetur aliis terminis distinguendo sequelam; daretur genus sine speciebus, & essentia sine passione, secundum esse intentionale, concedo; secundum esse reale, nego. Cum autem ens rationis solum habeat esse intentionale, nullum est inconveniens, quod detur genus sine speciebus, & essentia sine passione.

9 Argues contra; gradus genericus non distinguitur realiter ab specifico, neque essentia à passione; sed ex dictis videtur sequi dari in entibus rationis distinctio realis inter illa, quippe unum potest esse sine alio, quod est evidens signum distinctionis realis; ergo propter hoc inconveniens non est admittendum ens rationis. Potest responderi, concedendo talem distinctionem inter supradicta in entibus rationis, quod nullum videtur inconveniens, cum totum suum esse consistat in esse cognito, quod idem videtur contingere in entibus realibus, quando essentia cognoscitur sine passione, & gradus genericus sine specifico, nam tunc secundum esse cognitum realiter distinguuntur, sicut realiter separantur. Maxima autem argumenti solum debet intelligi de entibus realibus independenter à consideratione intellectus existentibus, vel possibilibus, cuius generis non sunt entia rationis.

10 Secundo respondetur negando minorem. Cuius ratio est, inquit Maffrius, quia, licet possit cognosci gradus genericus sine specifico, & essentia sine passione, quod dicitur cognoscere præcisivè; non tamen unum de alio negando, quod dicitur cognoscere negativè; quod erat necessarium ad distinctionem realem.

11 Arguunt quartò; iuxta vulgare axioma

philosophorum, nihil est in intellectu, quin prius fuerit in sensu : sed ens rationis nequit esse in sensu; ergo nequit esse in intellectu. Respondetur distinguendo maiorem; nihil est in intellectu, quin prius non fuerit in sensu, per se, vel per aliud; concedo; per se præcisè, nego. Et disting. minorem : ens rationis nequit esse in sensu per se, concedo; per aliud, nego, & nego, consequentiam. Etenim ens rationis est in sensu & in intellectu per speciem entis realis, ad cuius instar fabricatur. Vel aliis terminis potest responderi, quod prædictum axioma solum intelligitur de obiecto motivo; non verò determinativo, ut est ens rationis.

12 Arguunt quinto: omne, quod est, præter Deum, necessario habet causam productivam sui; sed nulla potest dari causa productiva entis rationis; ergo non datur ens rationis. Probatur minor; quia si daretur aliqua causa entis rationis, esset intellectus, sed nequit intellectus esse talis causa, ergo nulla datur. Probatur minor; nam si intellectus esset causa entis rationis, vel per influxum realem, vel per influxum rationis; sed non per influxum realem, quia terminus talis influxus debet esse realis, neque per influxum rationis; quia causa realis, ut est intellectus debet habere influxum realem, ergo nullatenus intellectus potest esse causa entis rationis.

13 Resp. neg. minor. assumpti, & minorem probationis, & ad probationem istius dicimus, quòd intellectus per verum influxum realem est causa entis rationis, & quando dicunt, quòd terminus influxus realis debet esse realis, verum est loquendo de termino primario, non autem de termino secundario. Etenim actus realis intellectus habet duplicem terminum, unum primum, & alterum secundarium. Primarius est ipsa intellectio, quæ producitur per veram actionem, quæ actio à subtili Doctore appellat.

pellatur dictio, de qua in libris de anima.  
 Terminus secundarius est objectum talis intellectionis quod si non habet, nec potest habere aliud esse præter illud, quod habet objectivè in ipso intellectu, est, & appellatur ens.

14 Pro secundo, quod inquit quæstio, dicimus secundò: ens rationis sic communiter definitur: *Est, quod solum habet esse objectivè in intellectu*, seu, ut inquit Scotus quæst. 3. quodlibetica, §. De primo, Verf. *Ens ego: Ens rationis est, quod præcisè habet esse intellectu considerante*. Coincidit hæc definitio cum alia, quæ solet ab aliquibus adduci, scilicet: *Ens rationis est illud esse, quod cogitatur ut ens, cum tamen in se entitatem non habet*. Nulla enim indiget explanatione prædicta definitio; nam ex ipsis terminis patet ejus intelligentia. Aliæ definitiones, quæ ab aliquibus adducuntur, scilicet, *quod ens rationis est, quando intellectus fingit per modum entis, quod non est ens: Ens rationis est cognoscere rem aliter ac est*; tantum sunt definitiones causales, quia dantur per causam entis rationis.

15 Argues primò: ex dictis in sumulis loquendo de definito, scilicet, quod ens rationis nequit definiri; ergo inconsequenter loquimur dum ens rationis definimus. Respondetur facile, quod quando diximus, quod ens rationis nequit definiri, locuti sumus de definitione rigorosè quidditativa, quod verum est, cum ens rationis non habeat propriè, & rigorosè quidditatem; in præsentem autem definimus ens rationis non definitione purè quidditativa, sed definitione impropria, quæ tantum est quasi explicatio hujus nominis *ens rationis*; unde non loquimur inconsequenter.

16 Arg. 2. Supradicta definitio convenit aliis à suo definito: ergo non est bona. Probatur antecedens, quia convenit esse cognito cujuscunque rei, quod à subtili Doctore pluries vocatur.

tur esse diminutum, ut est v. g. esse cognitum lapidis in nostro intellectu, & esse cognitum omnium creaturarum in intellectu divino, quæ habent esse objectivè in intellectu, & non sunt entia rationis: ergo prædicta definitio convenit aliis à suo definito. Respondetur, negando antecedens, & probationem ejus, quia, licet ens diminutum habeat esse objectivè in intellectu, habet etiam, vel potest habere esse à parte rei, vel extra intellectum, & sic non convenit illi prædicta definitio, nam per illa denotatur, quòd ens rationis tantum habet esse objectivè in intellectu, ita ut neque habeat, neque possit habere esse à parte rei, seu extra intellectum.

17 Ex alio capite impugnat Poncius nostram definitionem, scilicet, quòd non convenit omni suo definito, quod probat; quia, inquit, datur aliquod ens rationis, quod non habet esse objectivè in intellectu: ergo prædicta definitio non convenit omni suo definito. Probat antecedens; quia relatio similitudinis inter duo entia rationis est ens rationis; sed talis relatio non habet esse objectivè in intellectu: ergo datur aliquod ens rationis, quod non habet esse objectivè in intellectu.

18 Omissis aliquibus solutionibus, quæ argumentum nullatenus enervare videntur, notandum est pro solutione, quòd duplex ratio similitudinis potest attendi inter duo entia rationis, una intrinseca, & alia extrinseca. Intrinseca est, quæ fundatur in ipsis prædicatis entis rationis, & hæc nullatenus resultat expositione duorum entium rationis, nam cum in se veram entitatem non habeant, sed tantum fictam ab intellectu, non potest aliquid ab eis resultare independentem ab ipso intellectu, sed tantum præbent fundamentum, ut intellectus concipiat inter illa esse relationem, nam sicut concipit, illa esse entia, cum tamen revera entia non sint, ita potest



potest concipere, inter illa esse relationem, cum tamen inter illa nulla relatio sit; & tunc talis relatio sic considerata est ens rationis, & habet esse obiectivè in intellectu. Relatio extrinseca est illa, quæ provenit à relatione similitudinis, quæ datur inter duos actus intellectus duo entia rationis fabricantes, quæ relatio est realis, & intrinseca ex parte actuum intellectus, & extrinseca ex parte entium rationis, quæ non habet esse obiectivè in intellectu. Unde

19 Respondetur in forma ad argumentum negando antecedens, & distinguendo maiorem probationis; relatio similitudinis inter duo entia rationis est ens rationis, loquendo de relatione intrinseca, concedo, loquendo de relatione extrinseca, nego. Similiter disting. min. relatio intrinseca non habet esse obiectivè in intellectu, nego; relatio extrinseca, concedo, & neg. conseq. Unde manet firma nostra definitio, Quæ responsio deducitur ex Mastro in metaph. disp. 2. quæst. 9. num. 244. & amplius patebit ex dicendis quæst. sequenti, nam eadem videtur esse ratio.

## Q U Æ S T I O II.

*Utrum ens rationis habeat proprias affectiones.*

1 CUM immediatè ad essentiam alicuius eius passionem, seu proprietates sequantur, postquam de essentia entis rationis egimus, immediatè de illius proprietatibus agimus; pro quibus notandum est, quod non inquirimus, an ens rationis habeat aliquas proprietates, quæ ab illo verè, & realiter fluant, quia supponitur, tanquam certum, prædictas proprietates non habere, nam sicut non est propriè ens, ita nequit habere veras proprietates, quæ ab illo verè fluant; inquirimus autem, an quemadmo-

dum ens rationis dicitur ens per similitudinem, & analogiam ad ens reale, ita habeat proprietates per analogiam ad proprietates entis realis, ut possint concipi ad modum illarum. Quo notato

2. Dicimus; ens rationis habet proprietates, seu affectiones in sensu explicato. Hæc conclusio; licet in terminis non ab omnibus exagitetur, ab omnibus tamen, tanquam certa, supponitur. Probatur tamen; quia ens rationis habet suo modo essentiam per analogiam ad ens reale; sed nulla datur essentia, quæ non habeat suo modo proprietates, & affectiones, ergo ens rationis habet suo modo proprietates, seu affectiones.

3. Argues 1. Proprietas cuiuscunque essentia distinguitur ex natura rei ab essentia, fuit ab illa, & est minus illa, sed nulla proprietas cogitari potest, quæ distinguatur ex natura rei ab essentia entis rationis, neque fluat ab illa, cum ad hoc necessario requiratur vera existentia, neque, quæ sit minus ente rationis, nam, quod est minus ente rationis, nihil est, ergo ens rationis nullas habet proprietates. Respondetur, quod argumentum benè probat, ens rationis non habere proprietates eodem modo, quo illas habet ens reale, quod etiam nos asserimus, ut dictum est in notabili, non tamen probat, ens rationis non habere proprietates per analogiam ad ens reale, quod est nostra conclusio, potest enim intellectus considerare, ens rationis habere proprietates distinctas formaliter ex natura rei ab essentia, & ab ea dimanare, & esse minus illa, ad modum, quo propriè eas habet ens reale, ad cuius instar fabricatur, neque ex eo, quod proprietas sit minus essentia enti rationis, sequitur, quod sit purum nihil, nam sicut in entibus realibus dantur gradus in essendo, nam accidens est minus substantia, & passio est minus essentia, & tamen accidens, & passio non sunt.

sunt nihil; simili modo dicendum est de ente rationis, & proprietatibus illius, cum concipiatur ad modum entis realis.

4 Arg. 2. Si darentur proprietates entis rationis, containerentur sub illo, & de illis essentialiter prædicaretur: sed hoc repugnat essentialiter, respectu suarum proprietatum; nam non valet: *Risibilis est animal rationale*, valeret autem: *Proprietas entis rationis est ens rationis*: ergo non dantur tales proprietates. Respondetur negando maiorem, quia solum continetur proprie sub aliquo superiori; quod participat rationem ejus in quid, non tamen, quod tantum dicitur tale in quale, quod contingit in proprietatibus entis realis, & ad similitudinem illarum in proprietatibus entis rationis. Intelligentia huius solutionis dependet ex pluribus dicendis de transcendentia entis realis, quæ enti rationis suo modo applicari debent, sed de hoc, ut in suo loco agitur in metaphysica.

5 Ut autem circa intelligentiam huius quæstionis non laboretur in æquivoco, advertendum est, & hæc advertentia deducitur ex Mastro pluribus in locis, quod sicut essentia entis rationis dependet à consideratione intellectus, ita etiam proprietates illius dependent ab intellectus consideratione; nam sicut ibi non est vera essentia, ita neque veræ proprietates, & sicut apprehendimus, ibi esse veram essentiam, ita apprehendimus ab illa emanare veras proprietates, & si non apprehendatur, nullæ ibi proprietates erunt; quod fateri debent omnes, qui communiter respondent ad tertium argumentum quæstionis antecedentis, concedendo posse dari essentiam entis rationis sine proprietate, seu passione, quod non esset verum, si non dependeret proprietas entis rationis à consideratione intellectus distincta à consideratione à qua dependet essentia ipsius entis rationis; quod debet intelligi de proprietatibus intrinsecis

entis rationis; non verò de extrinsecis, ut dictum est quæstione antecedenti ad argumentum Poncii de relatione similitudinis inter duo entia rationis, & amplius patebit in argumento sequenti.

6 Arg. contra; ens rationis independenter ab aliqua consideratione intellectus distincta ab illa, per quam fit, est aliquid rationis, est verum ens rationis, est unum ens rationis; ergo independenter ab aliqua consideratione intellectus distincta ab illa, per quam fit, habet has proprietates, scilicet, esse aliquid, esse verum, esse unum. Respondetur, quòd proprietates entis rationis dupliciter possunt considerari. Primò, prout conveniunt illi secundum illam entitatem fictam ad modum entis realis, & istæ vocantur proprietates intrinsecæ, & necessariò conveniunt enti rationis per aliquem actum intellectus considerantem illas habere ad modum, quo illas habet ens reale, ad cuius instar fabricatur, & in hoc sensu loquimur in præsentia; nam cum ens rationis non habeat veram essentiam, sed fictam, nequit veras, sed fictas habere proprietates, ut si ego conciperem, v.gr. Angelum, ut puerum, conciperem ens rationis, quoad essentiam; & tamen non propter hoc Angelus haberet proprietatem risibilitatis; sed necessariò, ut illam haberet, ad modum, quo tunc haberet essentiam pueri, intervenire alius actus intellectus considerans ab illa essentia dimanare risibilitatem.

7 Secundò possunt considerari proprietates entis rationis, prout conveniunt illi entitati fictæ, reduplicativè ut fictæ, ut esse aliquid fictum, esse verum ens rationis, &c. quæ non conveniunt illi intrinsecè, neque dimanant ab illo, quia ab entitate ficta nihil potest dimanare, conveniunt autem illi extrinsecè, sumpta denominatione ab actu intellectus ipsum fabricante, ut in simili diximus quæstione antecedenti loquen-

loquendo de intelligibilitate; nam ex eo, verum est dicere, quod aliquid est verum ens rationis, aliquid rationis, &c. quia datur aliquis actus intellectus conficiens ens rationis, qui sit verus, & unus actus intellectus, quæ quidem passiones sunt reales, licet extrinsecæ; si autem, ut quid intrinsecum in ente rationis considerentur, fabricatur aliud ens rationis, ut generaliter dicemus quæstione sequenti, loquendo de denominationibus extrinsecis; cum qua distinctione facillè respondetur ad argumentum in forma, nam de proprietatibus entis rationis in hoc secundo sensu non loquimur in præsentia.

### Q U Æ S T I O III.

*Utrum denominationes extrinsecæ sint  
entia rationis?*

1 **P**Ro intelligentia quæstionis supponitur tanquam certum, dari denominationes extrinsecas, & sunt, quæ proveniunt alicui ab aliqua forma, non existente in illo intrinsecè, sed in alio, v.g. aliquod obiectum denominatur cognitum, seu visum, &c. non à cognitione, seu visione intrinsecè in illo existente, sed existente in intellectu, seu potentia visiva, & ad tale obiectum terminata; per quod differunt denominationes extrinsecæ à denominationibus intrinsecis, quæ proveniunt à formis intrinsecè existentibus in rebus denominatis, ut quando paries, v. gr. dicitur albus ab albedine in illo intrinsecè existente.

2 Mastrius in Logica disp. 3. quæst. 2. plures adducit sententias, citando Authores pro illis circa præsentem difficultatem; ex quibus aliqui asserunt, omnes denominationes extrinsecas esse entia rationis. Alii verò, solas denominationes extrinsecas provenientes ab actibus intellectus esse entia rationis. Alii autem, denomi-

nationes extrinsecas non esse entia rationis; resultare tamen ex illis relationem rationis. Sed quid tenendum sit, per sequentes conclusiones ostendemus.

3 Dicimus primò: denominationes extrinsecæ provenientes à formis realibus non sunt entia rationis. Hæc conclusio est contra Authores primæ, & secundæ sententiæ, & deducitur ex Scoto pluribus in locis, nam in 1. dist. 2. qu. 7. §. Sed hic restat, Vers. contra, litt. GG. inquit: *Quidquid intellectus causat sine actione objecti circa objectum præcisè, hoc est virtute propria intellectus, & hoc loquenda de objecto, ut habet esse cognitum in intellectu præcisè, & de intellectu, ut considerans est; illud est præcisè relatio rationis;* ex quibus verbis clarè inferitur, quòd non eo præcisè, quòd objectum cognoscatur ab intellectu, causatur ens rationis, sed potius objectum supponitur cognitum virtute ipsius, & virtute intellectus; ex utroque enim causa cognitionis integratur, & postea intellectus sine concursu objecti operans circa objectum ut cognitum, & apprehendens per alium actum illam denominationem extrinsecam cogniti, ut quid intrinsecum in objecto, causat in illo, ut cognito, relationem rationis, & sic illa denominatio cogniti, juxta mentem Scoti, ex se non est ens rationis. Potest etiam videri Scotus in 1. dist. 30. q. 2. §. Respondeo. Vers. Absolutè, litt. H. & in 3. dist. 8. §. Ad argumenta, Vers. Ad aliud etiam, litt. H. & in 4. dist. 1. q. 2. §. Hic primò videndum, Vers. Neque est terriò, lit. B.

4 Deinde probatur conclusio ratione: quia ens rationis est, quòd tantum habet esse objectivè in intellectu: sed denominationes extrinsecæ provenientes à formis realibus sunt à parte rei independentè à consideratione intellectus: ergo non sunt entia rationis. Probatur minor; quia paries, v. gr. dicitur visus à forma existente in potentia visiva; & Deus, ut inquit Scotus,

tus, denominatur creator, non per aliquam formam intrinsecam, sed per relationem existentem in creatura, & hoc nullo considerante intellectu: ergo prædictæ denominationes dantur à parte rei independenter à consideratione intellectus; quod etiam debet intelligi de denominationibus provenientius ab actibus intellectus, quia non minus sunt formæ reales, quam aliæ, à quibus proveniunt tales extrinsecæ denominationes, & solum possunt dici entia rationis, quatenus proveniunt à terminatione actus rationis, in quo sensu loquitur aliquando Scotus.

5. Argum. contra: quando res cognoscitur aliter ac est, tunc denominatio cogniti non habet aliud esse, nisi esse objectivè in intellectu: sed hæc est ratio entis rationis: ergo aliqua denominatio extrinseca est ens rationis. Respondetur distinguendo majorem, talis denominatio non habet aliud esse, nisi esse objectivè in intellectu, si sumatur pro terminatione passiva, quam dicit res cognita respectu actus intellectus cognoscentis, nego; quia ut sic, sive res cognoscatur eo modo, quo est, sive aliter ac est, est vera terminatio realis, quæ non cognoscitur per ipsum actum, ex quo resultat; si sumatur pro objecto ficto per cognitionem rei aliter ac est, concedo, quod sit ens rationis, sed tamen tale esse fictum non est ipsa denominatio cogniti, sed potius est res, quæ terminat cognitionem, & denominatur cognita per ipsam extrinsecam denominationem. Unde concessa min. neg. consequentiam.

6. Dicimus secundò: non sequitur necessariò; neque resultat ex denominationibus extrinsecis aliqua relatio, quæ sit ens rationis. Hæc conclusio est contra tertiam sententiam, & probatur generaliter; quia, vel talis relatio resultat in rebus ante operationem intellectus, vel per operationem intellectus? Si ante operationem intellectus? Talis relatio erit realis, siquidem  
nihil

nihil independens ab intellectu est ens rationis. Si per operationem intellectus? Jam ad minus in denominationibus provenientius à formis; quæ non sunt actus intellectus, non dabitur talis relatio.

7 Probatur specialiter de denominationibus ab actibus intellectus provenientius, nam vel talis relatio fit per actum intellectus directum, quo primo cognoscitur objectum in suo esse reali, vel per alium actum reflexum, quo cognoscitur objectum, ut iam primo cognitum? Non primum, quia ex vi illius actus solum remanet in objecto denominatio cogniti. Si autem dicatur secundum, hoc verum est, sed nihil contra nos, quia idem est, quod nos dicemus conclusionem sequenti, scilicet, quod denominatio extrinseca, licet in se non sit ens rationis, neque ad ipsam necessario sequatur, ramen ut consideratur in re denominata, ut quid intrinsecum tunc fit ens rationis.

8 Arg. 1. Posito actu intellectus circa aliquod objectum, necessario resultat in objecto denominatio cogniti; sed hæc denominatio ab aliqua forma denominante provenire debet; ergo ponenda est talis forma; sed nequit esse realis, cum nihil reale ponatur in objecto denominato; ergo est forma rationis, & consequenter denominatio extrinseca secum fert aliquod ens rationis. Respondetur concessio toto primo syllogismo, negando minorem subsumptam; nam cum tales denominationes sint reales, & extrinsecæ, proveniunt à formis realibus non existentibus intrinsecè in re denominata; sed in alio subiecto, scilicet, à cognitione existente in intellectu verè, & realiter.

9 Arg. 2. Nihil potest transire de contradictorio in contradictorium sine aliqua forma de novo adveniente; sed objectum transit de non cognito ad cognitum; ergo per aliquam formam de novo advenientem; sed talis forma  
ne.



nequit esse realis, cum nihil reale recipiat objectum ab actu intellectus: ergo erit forma rationis, & consequenter denominationem extrinsecam committatur ens rationis. Respondetur distinguendo majorem; nihil potest transire de contradictorio in contradictorium sine aliqua forma in ipso recepta intrinsecè, vel ad ipsum extrinsecè terminata, concedo; sine aliqua forma in ipso necessariò intrinsecè recepta, nego, & concessa minori, & consequentia, negatur minor subsumpta, eo modo, quo dictum est in argumenro præcedenti; transit ergo objectum de non cognito ad cognitum, non per aliquam formam intrinsecè in ipso receptam; sed per intellectiōem receptam in subiecto extrinsecò, scilicet in intellectu, & ad ipsum objectum terminatam.

10 Dicimus tertio: denominationes extrinsecæ, si considerentur ut quid intrinsecum in re denominata, sunt entia rationis. Hæc conclusio est communis inter Scotistas, & plures alios, & ex dictis in tota quæstione manet sufficienter probata; nam in tali casu fingitur aliquod esse intrinsecum in re denominata, quod cum verè, & realiter non habeat, necessariò solum habet esse objectivè in intellectu. Neque contra hoc aliquid videtur posse objici, quod alicuius sit momenti, & ex dictis faciliè non solvatur.

#### Q U Æ S T I O IV.

*Quomodo ens rationis dividatur?*

1 **D**icimus primò: ens rationis primo dividitur in habens fundamentum in re, & non habens fundamentum in re. Ens rationis habens fundamentum in re; est illud, ad quod fabricandum aliqua occasio desumitur ex ipsis rebus. Ens rationis non habens fundamentum  
in

in re, est illud, ad quod fabricandum nulla occasio desumitur ex ipsis rebus, sed solum pro libito fabricatur, ut quando concipimus Hircocervum, &c. & tale ens rationis dicitur purum figmentum, seu chymara.

2 Potest autem dubitari, quodnam sit fundamentum, à quo desumitur occasio ad fabricandum ens rationis cum fundamento in re? Ad quod dubium benè respondet Mastrius, tale fundamentum non esse imperfectionem nostri intellectus; nam aliàs, omnia entia rationis haberent fundamentum, cum entia rationis chymærica, quæ ut dictum est, nullum habent fundamentum, pendent ab actibus chymericis nostri intellectus, qui certè aliquam in se includunt imperfectionem. Et similiter, inquit Mastrius, tale fundamentum non est ens reale, ad cuius instar fabricatur ens rationis; nam etiam sequeretur, nullum dari ens rationis sine fundamento; nam ens rationis chymæricum fabricat intellectus ad modum entis realis, quod prius cognovit. Resolvit igitur Mastrius, tale fundamentum esse specialem quandam occasionem, ac motivum urgens, & necessitans intellectum, ad fabricanda entia rationis, & illa tali, vel tali modo fingenda, ita ut non merè gratis, sed ex ipsis rerum proprietatibus occasione desumpta, efficiat entia rationis; v. gr. quando intellectus apprehendit tenebras, ut formam positivam, non apprehendit illas, ut quamlibet formam, sed ut nigredinem, propter aliquam similitudinem, quam habent tenebræ cum ipsa nigredine, & non cum aliis formis.

3 Celebris est divisio entis rationis cum fundamento in re in negationem, privationem, & relationem. Pro cuius intelligentia, & ne in æquivoco laboremus, advertendum est, quod privatio, & negatio secundum se non sunt entia rationis, licet, rigorosè loquendo, non sint entia realia; sed tamen cum addito, scilicet,

entia realia privativa, vel negativa, quod licet sit improprius modus loquendi, cum potius sint negationes, & privationes entis realis, & consequenter purum nihil; tamen jam communiter recipitur talis modus loquendi, propter indigentiam vocum, & ne contentio fiat de nomine; sunt tamen negatio, & privatio fundamentum entis rationis, quia concipiuntur ab intellectu, ut quid positivum. Tota autem controversia est, an prædicta divisio sit adæquata.

3 Circa quam Merinerus cap. de universalib. disp. 3. quæst. 3. tenet, prædictam divisionem esse adæquatam, quam sequuntur aliqui Scotistæ. Mastrius autem disp. 3. de ente rationis, q. 7. tenet; prædictam divisionem non esse adæquatam; pro quo citat plures alios, & sequuntur eum etiam plures Scotistæ. & novissimè Meron. disp. de ente rationis cap. 2. quæst. 1. sed facillè possunt in concordiam revocari, si attentè consideretur fundamentum entis rationis, quod per sequentes conclusiones declarabimus.

4 Sed prius notandum est, quod noster intellectus in duplici statu potest considerari, scilicet, vel secundum se, & ex natura potentie sine aliquo impedimento, & pro hoc statu cum impedimento, & dependentia à sensibus. In primo sensu, objectum nostri intellectus est ens reale in tota sua latitudine; in secundo verò sensu est ens sensibile, seu materiale, de quo latè in libris de anima. Advertendum est etiam, quòd cum intellectus, in quocumque statu sit, nequeat se extendere ultra sphaeram sui objecti, hinc est, quòd quando intendit cognoscere aliquid, quod sphaeram sui objecti transcendit tunc necessario cognoscit illud ad modum sui objecti, & consequenter conficit ens rationis; cum illud, quod sic concipit, eo modo, quo concipitur, tantum habeat esse objectivè in intellectu; quòd si benè observeretur, facillè cognoscetur concordia prædictarum sententiarum:

5. Dicimus ergo primò; prædicta divisio respectu intellectus secundum se, & ex natura potentie est adæquata. Hæc conclusio coincidit cum prima sententia, & probatur, quia intellectus secundum se habet pro obiectio ens reale in tota sua latitudine, sive sit materiale, sive spirituale; ergo ex natura sua potest cognoscere omne ens eo modo, quo est in se; ergo solum potest efficere ens rationis apprehendendo, quod non est ens reale positivum, ac si esset ens reale; sed tantum privationes, & negationes, & illa, quæ non referuntur, non dicunt rationem entis realis positivi; ergo solum apprehendendo prædicta, potest intellectus secundum se fabricare ens rationis. Patet consequentia, quia ex eo intellectus facit ens rationis; quia cum non possit excedere sphaeram sui obiecti, necessariò, quando vult, seu intendit cognoscere, quod non participat rationem sui obiecti, ad modum illius illud aliud apprehendit.

6. Argues contra; denominationes extrinsecæ numerantur absolutè inter entia rationis, si apprehendantur ut quid positivum in re denominata; sed nec sunt privationes, aut negationes, neque relationes rationis; ergo prædicta divisio, absolutè loquendo, non est adæquata, quippe datur aliquod ens rationis distinctum à numeratis. Respondetur negando minorem, quatenus dicit, quod denominationes extrinsecæ apprehensæ; ut quid positivum non sunt relationes rationis; nam quando illas apprehendimus, ut quid intrinsecum in re denominata, non solum apprehendimus illas, ut formas afficientes subjectum denominatum, sed etiam, ut ipsum subiectum referentes ad subiectum in quo sunt formæ reales, à quibus proveniunt tales denominationes extrinsecæ, v. gr. quando apprehendimus denominationem extrinsecam visi in pariete, apprehendimus illam, ut formam positivam intrinsecè, inhærentem

parieti, & illum referens ad potentiam visivam, in qua est visio, quæ est forma positiva, à qua provenit talis denominatio.

7 Aliqui arguunt, intendentes probare, quòd prædicta divisio non est bona, eo quòd ens rationis relativum non distinguitur à negativo, vel privativo: ens rationis relativum fundatur in carentia relationis, nam concipimus relationem, ubi non est relatio: ergo non distinguitur à privativo, vel negativo, quod fundatur in carentia entis. Respondetur negando consequentiam; quia licet antequam fabricetur relatio rationis, præsupponatur carentia relationis; tamen ipsa relatio relationis non concipitur, ut forma positiva absoluta, sed ut forma unum ad aliud referens; quod sufficit ad hoc ut sit ens rationis diversum pro formali ab illo, quod fundatur in privatione, & negatione præcisè, licet ex parte fundamenti, seu materialiter aliquam habeant similitudinem.

8 Alii ex alio capite intendunt probare prædictam divisionem non esse bonam, scilicet, quia omne ens rationis est relativum, ad quod probandum, adducunt primò plures auctoritates Scoti, quæ videntur denotare, ens rationis esse quid relativum. Sed facillè respondetur, quòd Scotus nunquam negavit, posse dari alia entia rationis, præter relativum, & sic argumentum solum procedit ab autoritate negativa, quæ nullam vim habet. Vel aliter respondetur, quod quando Scotus dicit, ens rationis esse relationem rationis, solum loquitur de ente rationis, quod est secunda intentio, seu quod in secunda intentione fundatur, quod verum est, sed non contra nos, ut ex se patet.

9 Secundò adducunt hanc rationem: ens rationis fabricatur ad modum entis realis: ergo fabricatur in ordine ad ens reale, & consequenter est relativum. Respondetur distinguendo pri-

primum consequens; fabricatur in ordine ad ens reale, tanquam ad terminum, ad quem refertur, nego; fabricatur in ordine ad ens reale, hoc est, ad similitudinem entis realis, concedo, & nego ultimam consequentiam. Licet ergo concipiamus tenebras, v.g. ad similitudinem nigredinis, hoc non sit ita, quod tenebræ referantur ad nigredinem, tanquam ad terminum, sed ita ut concipiantur ad imitationem nigredinis, quod non fieret, si non conciperentur ut forma absoluta, uti est ipsa nigredo.

10 Dicimus secundò: prædicta divisio, respectu intellectus nostri pro hoc statu, non est adæquata, Hæc conclusio coincidit cum secunda sententia. Probatur, quia objectum intellectus nostri, pro hoc statu, est ens sensibile, seu materiale: ergo nequit intellectus, pro hoc statu, concipere aliquid, nisi ad modum entis sensibilis, seu materialis: ergo quando intendit concipere, quod non est materiale, necessario concipit illud ut materiale, v. g. quando intendit concipere Angelum, qui est spiritualis, necessario concipit eum, ut puerum, v. g. qui est materialis: ergo tunc efficit ens rationis: sed tale ens rationis non est aliquod ex assignatis in divisione: ergo si sumatur intellectus pro hoc statu, respectu illius prædicta divisio non est adæquata.

11 Neque obstat, quod respondet Merineus, scilicet, quod tale ens rationis non habet fundamentum in re. Nam contra est, quia ut supra diximus, fundamentum entis rationis est motivum urgens intellectum, ut concipiat rem tali, vel tali modo: sed hoc motivum reperitur in tali ente rationis, sicut in privativo, & negativo: ergo habet fundamentum in re. Probatur minor, quia motivum urgens intellectum, ut concipiat privationem, & negationem, ut quid reale positivum, est, quod cum objectum intellectus absolute sit ens reale, nequit

quit concipere, quod non est ens, nisi ad modum entis realis: sed obiectum intellectus, pro hoc statu est ens materiale; ergo habet motivum intellectus, ut pro hoc statu concipiat, quod non est materiale, ad modum entis materialis. Cum quo faciliè respondetur ad quælibet argumenta, quæ contra hanc conclusionem obiiciantur.

22 Igitur, ens rationis respectu intellectus pro hoc statu, potest dividi per analogiam ad ens reale, in decem prædicamenta, quod patet; v. gr. in exemplo supra posito Angeli concepti ad modum pueri; nam ibi concipiuntur substantia materialis, quantitas, qualitas, & relationes in his fundatæ, tam intrinsecus, quam extrinsecus advenientes, ut patebit discurrenti per omnia prædicamenta, de quibus suo loco: sed in Angelo nihil horum est materiale: ergo cum omnia concipiantur in Angelo ab intellectu nostro pro hoc statu, ut materialia, sequitur evidenter, ens rationis, respectu intellectus nostri pro hoc statu, posse dividi per analogiam ad ens reale in decem prædicamenta.

## QUÆSTIO V.

*Utrum solus intellectus sit causa effectiva entis rationis?*

1 **P**RO intelligentia quæstionis supponitur tanquam certum, quod ens rationis, sicut non est verè ens, ita non habet verè, & propriè causas sui esse; sed sicut suum esse est analogum, seu metaphoricum, ita analogicè, seu metaphoricè ad causas veras, & reales, habet causas suo modo, scilicet, efficientem circa quam est præsens difficultas, formalem, & materialem; quia in illo apprehenditur aliquam formam inesse alicui materiæ, & finalem, quia

quia, licet ex se ens rationis non ordinetur ad aliquem finem; tamen efficiens, quando conficitur ens rationis, aliquem finem habet, qui licet non dicatur finis operis, dicitur tamen finis operantis: nam omne agens cognoscitivum propter finem operatur. Hoc solet reduci ab aliquibus ad magnam, & prolixam controversiam, quæ parum utilis est; si autem quis aliquid, circa illam desideret, consulat Maffrium disp. 3. de ente rationis q. 3.

2. Pro quaesito autem quaestionis notandum est; ens rationis dupliciter posse sumi, scilicet, pro eo quod solum habet esse objective in intellectu, & in hoc sensu certum est, solum intellectum posse ens rationis fabricare. Secundo sumitur pro ente æquivalente enti, quod fit ab intellectu, & in hoc sensu procedit præsens difficultas; unde titulus quaestionis sic debet intelligi, an sicut datur aliquod ens, quod solum habeat esse objective in intellectu; ita possit dari aliquod ens, quod solum habeat esse objective in alia potentia distincta ab intellectu?

3. Circa quam plures sunt sententiæ. Prima asserit, omnes potentias sensitivas, tam intrinsecas, quam extrinsecas, posse efficere ens rationis. Secunda tenet, ens rationis posse fieri à phantasia, seu imaginativa. Tertia tenet, ens rationis posse fieri à voluntate. Quarta denique asserit, solum intellectum esse causam effectivam entis rationis. Authores pro his sententiis possunt videri apud Maffrium disput. 3. de ente rationis quaest. 4. Certum enim est, quod tam Scotistæ, quam Thomistæ, & Jesuitæ, sunt divisi per prædictas sententias; nos autem per sequentes conclusiones, quid videtur tenendum brevitate possibili proponemus.

4. Dicimus primò: nulla potentia materialis, sive interna, sive externa, potest efficere ens rationis. Probatur conclusio, omissis pluribus probationibus valdè confusis, quæ ab auctore.



thoribus solent adduci, & quæ cum hac unica ratione coincidere videntur; ens rationis debet tale esse obiectivum habere in potentia ipsum fabricante, ut nullum aliud esse possit habere: sed per potentias materiales, tam intrinsecas: quàm extrinsecas, non potest aliquid tale esse obiectivum recipere, cui repugnet aliud esse habere; ergo nulla potentia materialis potest ens rationis fabricare. Probatur minor; quia obiectum harum potentiarum est quid sensibile materiale: sed nullum sensibile materiale potest excogitari, quod repugnet habere esse extra potentiam, nam licet fabricetur Hircocervus, v.gr. in hoc, quod in eo apparet sensibile; nulla prorsus est repugnantia; licet alias sit repugnantia in hoc, quod coniungantur prædicata essentialia Hirci, & Cervi, quod non obstat: nam talia prædicata sunt extra sphaeram potentiarum materialium; ergo nulla potentia materialis potest ens rationis fabricare, siquidem nullum ens potest tale esse obiectivum in illis habere, ita ut repugnet illi aliud esse habere à parte rei.

5 Arguunt contra aliquibus experienciis, tam pro sensibus externis, quam internis, quia visus percipit in iride colores, quæ revera in illo non sunt, & similiter, infirmus percipit amaritudinē in potu, vel cibo, quæ in illis nō est. Deinde, imaginativa potest repræsentare, ut coniuncta aliqua, quæ coniuncta non sunt, ut quando repræsentat Hircocervum; sed hæc omnia habent esse obiectiva in prædictis potentiis: ergo prædictæ potentie possunt efficere ens rationis. Facile respondetur ad prædictas instantias (& similiter ad alias, quæ solent adduci) ad primam, quod potentia visiva percipit in Iride, quod illi per species obicitur antecederet ad actum visionis, quod non habet præcisè esse obiectivè in tali potentia; sed etiam habet illud esse à parte rei, licet non secundum esse reale, saltem se-

secundum esse repræsentabile, seu, (ut alii dicunt) percipit colores, quæ in Iride verè, & realiter sunt, vel percipit veram lucem taliter atemperatam, quod emittat potentia visiva tales species, quæ moveant intellectum ad judicandum esse veros colores; unde numquam fallitur sensus, quia apprehendit obiectum, ut repræsentatur à speciebus, id est, apprehendit apparentiam colorum, quæ ibi erat ante actum visionis; in quo nulla est fictio, seu falsitas.

6 Ad secundam respondetur, quod licet in cibo, vel potu non sit amaritudo, est tamen in aliquo humore, quem habet infirmus propter suam dispositionem, & alterationem qualitatum, & hanc percipit infirmus: quia humor, in quo est, miscetur cum potu, & cibo, & sic omne coniunctum fit amarum. Ad tertiam respondetur, quod Hircocervus, secundum totum, quod dicit accidentale, quod est obiectum imaginativæ, nullatenus repugnat esse à parte rei, ideoque non habet tantum esse obiectivè in imaginativa, cum possit habere esse extra imaginativam.

7 Dicimus 2. Voluntas nequit efficere ens rationis. Pro hac conclusione sunt divisi Scotistæ, propter aliquas auctoritates Scoti. Sed probatur breviter, quia si voluntas efficeret ens rationis, faceret suum obiectum, sicut facit intellectus, quando efficit ens rationis; sed voluntas nequit facere suum obiectum: ergo nequit facere ens rationis. Probatur minor, quia obiectum voluntatis est ens cognitum; nam, iuxta commune proloquium: *Nihil volitum, quin præcognitum*; ergo obiectum voluntatis necessario præsupponitur ad actum illius, & consequenter nequit illud efficere.

8 Arguunt contra, oppositum tenentes, ex Scoto, qui pluribus in locis asserit, voluntatem esse potentiam collativam, & sic posse compara-

rare suum objectum ad aliud, & in eo causare relationem rationis: ergo secundum Scotum voluntas potest efficere ens rationis. Respon. neg. consequentiam, & ad antecedens dicimus, quòd Scotus semper loquitur in sensu fundamentalì; non verò in sensu formali, hoc est, intendit Scotus, quòd voluntas comparando suum objectum ad aliud, præstat fundamentum, ut intellectus concipiat denominationem extrinsecam, quæ remanet in objecto, in quantum terminat talem actum voluntatis, tanquam quid intrinsecum tali objecto, & sic faciat relationem rationis. Vel loquitur Scotus de relatione rationis, quatenus dicit relationem in anima, non verò extra animam.

9 Arg. 2. Voluntas Luciferi appetivit æqualitatem cum Deo: sed talis æqualitas est impossibile; ergo tunc finxit hoc impossibile ut possibile, & consequenter fecit ens rationis. Resp. quod antequam Lucifer appeteret æqualitatem cum Deo, apprehendit talem æqualitatem impossibilem, ut possibilem, & sic ad actum voluntatis supposebatur ens rationis factum per actum intellectus, quod universim respondendum est ad quodlibet argumentum, quod contra nostram conclusionem objiciatur; nam semper debet tenere illud principium: *Nihil volitum, quin præcognitum*, & sic quodlibet bonum, sive verum, sive apparens, præsupponitur cognitum ab intellectu, antequam illud prosequatur voluntas. Circa solutionem hujus argumenti potest videri Scotus in 2. dist. 6. q. 1. per totam.

10 Dicimus tertio: Solus intellectus potest efficere ens rationis. Hæc conclusio colligitur ex præcedentibus, nam supposito, quod datur ens rationis, & quod à nulla alia potentia fabricatur; evidenter sequitur à sufficienti partium enumeratione, solùm ab intellectu fabricari.

## Q U Æ S T I O VI.

*Per quam intellectus operationem fiat ens  
rationis.*

**I** Pro intelligentia quæstionis notandum est, intellectum habere tres operationes, scilicet, simplicem apprehensionem, iudicium, & discursum; unde oritur præsens controversia, an scilicet per omnes illas possit intellectus ens rationis fabricare? Circa quam divisi sunt Authores, & inter Scotistas major pars tenet, intellectum per simplicem assignatam operationem posse ens rationis fabricare; sed Merinerus, quem aliqui Scotistæ sequuntur, tenet disp. 3. de ente rationis q. 5. intellectum per solam simplicem apprehensionem ens rationis posse fabricare.

**2** Dicimus ergo cum illo; intellectus solum per simplicem apprehensionem ens rationis efficere valet. Probatur, quia simplex apprehensio semper præcedit iudicium; & si iudicium est falsum, præcedit simplex apprehensio attingens rem aliter ac est, sed ens rationis fit cognoscendo rem aliter ac est: ergo ante iudicium affirmans, rem esse aliter ac est, præsupponitur ens rationis factum per simplicem apprehensionem: sed quod præsupponitur factum, nequit iterum fieri: ergo simplex apprehensio, & non iudicium facit ens rationis. Eadem ratio est pro discursu, nam discursus supponit iudicium, & simplicem apprehensionem. Hoc in solutione argumentorum amplius patebit,

**3** Arguunt contra oppositum tenentes: per iudicium remanent in objectis relationes rationis subjecti, prædicati, & propositionis, & per discursum remanent relationes rationis, majoris, & minoris, propositionis, consequentiæ, & syllogismi: sed istæ relationes, sunt entia ratio-

tionis: ergo ens rationis potest fieri per iudicium, & discursum. Respondetur distinguendo maiorem: remanent in objecto prædictæ relationes fundamentaliter, concedo; formaliter, nego, & similiter distinguenda est minor, & consequentia. Etenim per actum iudicii, & discursus, solum remanent in objectis denominationes extrinsecæ subjecti, prædicati, &c. quæ non sunt formaliter relationes rationis, sed tantum fundamentaliter, & quatenus præbent fundamentum, ut intellectus illas concipiat, ut quid intrinsecum in re denominata, dicens ordinem ad actus intellectus, à quibus proveniunt, quod fit per alium actum intellectus, scilicet, per simplicem apprehensionem.

4 Replicant 1. Postquam negatio, v. gr. cognoscitur per simplicem apprehensionem, ut quid positivum, potest fieri hoc iudicium: *negatio est quid positivum*: sed per tale iudicium fit ens rationis, quia nullum esse habet, præter esse objectivum in ipso actu intellectus: ergo ens rationis potest fieri per iudicium. Respondetur primo negando maiorem: quia, cum intellectus habeat iudicium oppositum, scilicet: *negatio non est quid positivum*, nequit simul habere iudicium supradictum, nam duplex contradictorium non potest simul esse in intellectu. Sed quia hæc responsio aliquas potest pati instantias.

5 Respondetur 2. adhuc admissa maiori, negando minorem; quia tale ens rationis, iam supponitur factum per simplicem apprehensionem. Deinde, inquiri, vel hoc iudicium est circa idem ens rationis, quod supponitur factum à simplici apprehensione, vel circa aliud? Hoc secundum non potest dici, quia nequit esse iudicium, nisi circa obiectum cognitum per simplicem apprehensionem: ergo debet dici primum: sed ut sic iam ens rationis præsupponitur factum per simplicem apprehen-

sionem : ergo nullatenus fieri potest per iudicium .

6 Replicant 2. Esse entis rationis consistit in cognosci : sed diverso modo cognoscitur per iudicium , ac per simplicem apprehensionem : ergo diversum esse accipit per iudicium , ac per simplicem apprehensionem . Resp. neg. consequentiam , quia licet diverso modo cognoscatur ens rationis per iudicium , ac per simplicem apprehensionem ; non inde sequitur , quod per iudicium fiat ens rationis ; sed tantum , quod ens rationis factum per simplicem apprehensionem , alio modo cognoscatur ; quod non est fabricare ens rationis : nam quod semel factum est , nequit iterum fieri ; sed tantum est tribuere enti rationis facto per simplicem apprehensionem , denominationem extrinsecam cogniti per iudicium quæ denominatio non est ens rationis , nisi consideretur per aliam simplicem apprehensionem , ut quid intrinsecum in ente rationis sic denominato ; sed tunc fit aliud ens rationis .

7 Aliter probatur nostra conclusio contra aliquos , qui nobiscum tenent , ens rationis non posse fieri per voluntatem , & ex alia parte opponuntur nostræ conclusioni ; non minus præsupponitur ens rationis factum per simplicem apprehensionem ad actum iudicii , ac supponitur factum per intellectum ante actum voluntatis ; sed ex eo quod supponatur factum per intellectum ad actum voluntatis , voluntas nequit illud efficere ; ergo ex eo quod supponatur factum per simplicem apprehensionem ad actum iudicii , iudicium nequit illud efficere .

8 Aliqui tenentes , ens rationis solum fieri per iudicium , sic contra nostram conclusionem arguunt ; ens rationis fit per actum falsum ; sed solum in iudicio invenitur falsitas ; ergo ens rationis solum potest fieri per iudicium .

Pro-

Probatur maior, quia, qui tacit ens rationis, intelligit rem aliter ac est: sed qui intelligit rem aliter ac est, fallitur: ergo ens rationis fit per actum falsum, Resp. i. neg. mai. quia nullatenus requiritur falsitas ad conficiendum ens rationis, sed sufficit, quod obiectum habeat tantum esse, obiectivè in intellectu, quod contingere potest in actu simplicis apprehensionis. Ad probationem respondetur distinguendo minorem: qui intelligit rem aliter ac est, fallitur, si affirmet esse, quod non est, concedo; si non affirmet, sed tantum cognoscat rem aliter ac est, cognitione simplici, nego; quod contingit quando fit ens rationis per simplicem apprehensionem.

9 Secundo potest responderi dist. mai. ens rationis fit per actum falsum, sumpta falsitate, strictè, & rigorosè, nego; sumpta falsitate pro qualibet non conformatione cum obiecto, concedo. Similiter distinguo minorem; falsitas strictè sumpta solum invenitur in actibus iudicii, concedo; falsitas latè sumpta, prout dicit quemlibet non conformationem cum obiecto, nego; hæc enim etiam invenitur in simplici apprehensione, quando apprehendit rem aliter ac est: Unde nego consequentiam. Idem respondetur ad illud, *qui intelligit rem aliter ac est fallitur.*

10 Dubitabis; per quam simplicem apprehensionem fiat ens rationis? Pro responsione nota, quod simplex apprehensio, sicut quilibet alius actus intellectus, potest esse directæ, vel reflexæ. Tunc est directæ, quando tendit in obiectum, quod non præsupponitur cognitum, tunc dicitur reflexæ, quando tendit in obiectum, quod jam præsupponitur cognitum. Deinde simplex apprehensio potest esse absoluta, vel comparativa. Tunc dicitur absoluta, quando apprehendit unum obiectum sine ordine ad aliud; tunc dicitur comparativa, quando apprehendit unum obiectum cum ordine ad aliud. Hoc notato.

11 Respondetur 1. ad dubium, quod aliqua entia rationis sunt per simplicem apprehensionem directam, ut sunt omnia, quæ habent pro fundamento negationem, & privationem, & denominationes extrinsecas non provenientes ab actibus intellectus, quod patet, quia in his non præsupponitur alius actus intellectus, quod erat necessarium ad cognitionem reflexam, Alia vero entia rationis, quæ habent pro fundamento denominationes extrinsecas provenientes ab actibus intellectus, fiunt per simplicem apprehensionem reflexam; quod patet, quia hæc supponunt obiectum cognitum per alium actum antecedentem, & super tale obiectum, reduplicativè, ut cognitum, fabricantur.

12 Argues contra; actus intellectus, quo fit ens rationis, quomodocumque sumatur, semper supponit alium actum intellectus, quo cognoscitur ens reale, ad cuius instar fabricatur: ergo omne ens rationis, fit per actum reflexum. Respond. neg. consequentiam, quia non qui liber actus intellectus, qui supponit alium, dicitur reflexus; sed qui ita illum supponit, ut supra ipsum vel supra obiectum cognitum per illum, reflectatur, quod non contingit, quando præsupponit actum, quo cognoscitur ens reale, ad cuius instar ens reale fabricatur, nam tunc actus effectivus entis rationis, non cognoscit actum primum cognoscitivum entis realis, neque ipsum ens reale cognitum, reduplicativè ut cognitum, quod erat necessarium, ut esset actus reflexus.

13 Resp. 2. ad dubium, quod omnia entia rationis, quæ sunt relativa, fiunt per simplicem apprehensionem comparativam, quod patet, quia in his semper apprehendit intellectus unum in ordine ad aliud, ut quando concipit aliquam denominationem extrinsecam, ut quid intrinsecum in subiecto, & illud ordinans ad potentiam, seu subiectum in quo est forma, à qua provenit talis denominatio. Entia vero rationis,



nis, quæ non sunt relativa, sunt per simplicem apprehensionem absolutam, quod patet, quia non concipiuntur in ordine ad aliud, ut quando concipitur negatio, ut quid positivum, concipitur absolute, & sine ordine ad aliud. Contra hoc videtur militare ratio adducta quæst. 4. huius disputationis num. 9. sed ibi manet sufficienter soluta.

## QUÆSTIO VII.

*Verum intellectus Divinus cognoscat, & efficiat ens rationis?*

**I** Hæc difficultas est maxima controversia in hac disputatione; circa quam sunt varii modi dicendi, alii enim dicunt, Deum cognoscere entia rationis, non solum indirectè, sed etiam directè, & consequenter illa efficere. Alii autem per oppositum asserunt, Deum nulatenus cognoscere, neque efficere entia rationis. Alii denique affirmant, Deum cognoscere entia rationis indirectè, non vero directè, & consequenter illa non efficere. Hic modus dicendi est communior, tam inter Scotistas, quam inter alios, licet Mastrius disp. 3. de ente rationis quæst. 5. iudicet probabile, Deum directè cognoscere entia rationis, & consequenter illa efficere, & sic utramque partem problematice defendit. Apud illum, & apud Merinerum q. 6. de ente rationis possunt videri plures Authores pro prædictis modis dicendi.

3 Dicimus primò: Intellectus Divinus cognoscit entia rationis indirectè, hoc est, ut facta, vel factibilia ab intellectu creato. Probatur, nam Deus comprehendit cogitationes nostras: ergo cognoscit objecta illarum, sed entia rationis plura sunt, vel possunt esse objecta nostrarum cogitationum: ergo Deus cognoscit entia rationis, ut facta, vel factibilia à nostro intellectu.

3 Confirmatur: quia nulla est imperfectio in cognitione prædicato modo entia rationis cognoscente: ergo non est cur negetur talis cognitio intellectui Divino. Probatur antecedens; nam si daretur aliqua imperfectio in cognitione eo esset, quia repræsentaret rem aliter ac est, sed talis cognitio non repræsentaret rem aliter ac est: ergo nulla esset imperfectio in tali cognitione: probatur minor, quia talis cognitio repræsentaret ens rationis, ut actu habens, vel potens habere esse obiectivè in intellectu creato; sed hoc est repræsentare rem eo modo, quo est; quia hoc est verum ex parte ipsius entis rationis: ergo talis cognitio non repræsentaret rem aliter ac est. Hæc ratio fundatur à simili in eo quòd aliud est mentiri, & aliud mendacium ut mendacium cognoscere; nam mentiri est imperfectio, quia non conformatur intellectus cum obiecto; at verò mendacium cognoscere, ut mendacium, non est imperfectio, quia conformatur intellectus cum obiecto, sic similiter facere ens rationis est imperfectio, quia cognoscitur res aliter ac est: cognoscere autem ens rationis, ut ens rationis, non est imperfectio; quia est cognoscere rem eo modo, quo est.

4 Arguunt contra; Si Deus cognosceret entia rationis facta, vel factibilia ab intellectu creato, cognosceret rem aliter ac est; sed hoc est imperfectio: ergo nequit Deus cognoscere, hoc modo entia rationis. Probatur sequela, quia tunc cognosceret Deus obiectum intellectus creati eo modo, quo est obiectum illius: sed est obiectum illius aliter ac est in se à parte rei: ergo cognosceret Deus rem aliter ac est in se. Respondetur distinguendo sequelam: cognosceret Deus, rem esse à parte rei aliter ac est, nego, cognosceret Deus, rem esse cognitam, vel cognoscibilem ab intellectu creato aliter ac est à parte rei, concedo; sed in hoc nulla est imperfectio, quia nihil aliud est quàm cognoscere, i-  
tel-

Intellectum creatum cognoscere, vel posse cognoscere rem aliter ac est in se à parte rei, quod absque dubio, verum est.

5 Dicimus secundò: nullatenus potest intellectus Divinus ens rationis fabricare. Hæc conclusio est communis inter Scotistas, & licet Mastrius, ut dictum est, problematicè eam defendat, inquit tamen, quòd hæc pars magis consonat communimodo loquendi de ente rationis. Neque est contra Scotum, quia licet aliquibus in locis videatur oppositum tenere, ut postea videbimus; tamen aliis in locis etiam videtur nostram conclusionem tenere, nam in 1. dist. 8. q. 4. §. *Ista tamen positio, vers. Præterea*, inquit: *Igitur intellectus Divinus causabit aliquam intentionem in essentia, ut relationem rationis, ut existens est, quod est absurdum*. Unde bene notavit Mastrius citatus, quòd Scotum, circa hanc rem, omninò certum non habemus. Probatur autem conclusio hac ratione: ad faciendum ens rationis, necessariò requiritur, quòd res cognoscatur aliter ac est: sed hoc est imperfectio, à Deo penitus releganda: ergo nullatenus est Deo concedenda efficientia entis rationis. Hæc ratio valdè premit adversarios, ideòque variè conantur eam solvere.

6 Respondent 1. quòd cognoscere rem aliter ac est, non est imperfectio, si etiam cognoscatur eo modo, quo est, & Deus, ita cognoscit rem aliter ac est, ut etiam illam cognoscat eo modo, quo est. Sed contra primò, quia perfectio, vel imperfectio cognitionis. desumitur ex conformitate, vel non conformitate cognitionis cum objecto: ergo quælibet cognitio, quæ non conformatur cum objecto, est imperfecta: sed quòd Deus cognoscat rem eo modo quo est, non aufert, quòd non conformetur cum objecto, quando cognoscit rem aliter ac est: ergo quòd Deus cognoscat rem eo modo, quo est, non aufert imperfectionem à cognitione, quando cognoscit

rem aliter ac est, & consequenter hoc tantum est tribuere Deo cognitionem perfectam, qua cognoscit rem ut est in se, & imperfectam, qua cognoscit rem aliter ac est in se, quod absurdum videtur.

7 Contra. secundò: quia intellectus creatus potest habere, & de facto habet hoc iudicium divisivum: *Negatio non est quid positivum*, quo cognoscit rem eo modo, quo est in se: sed hoc non aufert, quòd cognitio, qua cognoscit negationem ut quid positivum, quod est cognoscere rem aliter ac est, & facere ens rationis, sit imperfecta, eo quòd non conformetur cum objecto: ergo quòd Deus cognoscat rem eo modo, quo est, non aufert, quod sit imperfectio cognoscere rem aliter ac est.

8 Respondent 2. quod cognoscere rem aliter ac est, quando talis cognitio est simplex apprehensio, nullam dicit imperfectionem, bene tamen, quando talis cognitio est iudicium, quia solum in iudicio reperitur falsitas. Sed contra est: quia ex eo iudicium est imperfectum in ratione cognitionis, quia non conformatur cum objecto ut est in se: sed simplex apprehensio, quando cognoscit rem aliter ac est, non conformatur cum objecto: ergo est imperfecta in ratione cognitionis. Quæ non conformatio simplicis apprehensionis cum objecto, dicitur falsitas lato modo sumpta, ut dictum est quæst. antec. n. 9. Unde solemus dicere, aliquem falsam apprehensionem habere.

9 Respondent 3. quòd cognoscere rem aliter ac est, tunc solum est imperfectio, quando res tantum petit cognosci, ut est in se, non tamen, quando res petit cognosci aliter ac est; primum contingit in entitatibus verum esse reale habentibus; secundum verò, in illis, quæ nullam entitatem realem habent; nam hæc petunt cognosci ad modum entis realis positivi, seu aliter ac sunt in se, ut sunt negatio, privatio,

tio, & denominationes extrinsecæ.

10 Sed contra primò; quia penitus falsum est, quòd detur aliquid, quod exigat cognosci aliter ac est; licet enim concedatur, quod ex parte rerum detur aliquod fundamentum, ut intellectus imperfectè cognoscens, eas cognoscat aliter ac sunt, nullatenus tamen potest concedi, eas ex se esse cognoscibiles aliter ac sunt, quod patet, quia cognoscibilitas intrinseca rerum nihil aliud est, quam ipsa entitas illarum, secundum se; ergo sola illa cognitio attingit cognoscibilitatem intrinsecam rerum, quæ repræsentat entitatem illarum secundum se; sed cognitio repræsentans res aliter ac sunt in se, non repræsentat illarum entitatem secundum se: ergo ex eo est, quia nihil datur, quod ex se petat cognosci aliter ac est in se.

11. Contra secundò; quia privationes, & negationes, v. g. cum in se nullam habeant entitatem, sed potius sint remotiones entitatis, non habent intrinsecam intelligibilitatem; ergo intelligibilitas illarum est extrinseca; sed possunt cognosci per oppositum entis, faciendo hoc iudicium divisivum; *Negatio non est quid positivum*; seu; *Privatio non est quid positivum*; ergo ab extrinseco sunt cognoscibiles eo modo, quo sunt in se; sed, juxta prædictam responsionem est imperfectio cognoscere rem aliter ac est in se, quando est cognoscibilis eo modo quo est in se; ergo cognoscere privationes, & negationes, v. g. ut quid positivum, quod est cognoscere illas aliter ac sunt in se, est imperfectio; ergo nequit Deus sic illas cognoscere; & consequenter nequit facere ens rationis. Alio modo sunt cognoscibiles aliter ac sunt in se; sed hoc etiam provenit illis ab intelligibilitate extrinseca, scilicet, ex imperfecto modo, quo intellectus illas potest cognoscere, & sic fiunt entia rationis, ut dictum est quæst. 1. huius disputationis, qui modus cognoscendi nullatenus potest Deo concedi.

12. Arguunt 1. Deus cognoscit entia rationis, ut dictum est conclusione antecedenti: ergo efficit entia rationis; siquidem esse entis rationis consistit in cognosci. Respondetur distinguendo antecedens: Deus cognoscit entia rationis, indirectè, id est, cum ordine ad intellectum creatum illa efficientem, concedo; directè, vel sine ordine ad intellectum creatum, nego; unde nego consequentiam. Similiter distinguendum est, quod ens rationis consistit in cognosci; est enim verum directè, falsum autem indirectè.

13 Ex duplici capite replicant contrarii; nam aliqui intendunt, ens rationis fabricari ab intellectu Divino; licet tantum indirectè cognoscatur, quod sic probant; quando Deus cognoscit ens rationis factum ab intellectu creato, tale ens rationis habet esse objectivè in intellectu divino: ergo per talem cognitionem fabricatur ab intellectu Divino. Respondetur distinguendo antecedens: habet esse objectivè in intellectu Divino, hoc est, idem esse, quod habet objectivè in intellectu creato, concedo; aliud esse, nego. Unde nego consequentiam; quia nullatenus fit ab intellectu Divino, quod jam supponitur factum ab intellectu creato, & sic solum remanet in illo nova denominatio extrinseca cogniti, proveniens à cognitione Divina.

14 Contra replicant: Deus cognoscit ab æterno ens rationis factibile à creatura, licet nunquam ab illa fiat: ergo tale ens rationis, antequam habeat esse objectivè in intellectu creato, habet esse objectivè in intellectu Divino: ergo fit ab intellectu Divino, siquidem, fit à potentia, à qua primo cognoscitur. Respondetur distinguendo primum consequens: tale ens rationis habet esse objectivè in intellectu Divino, antequam habeat esse objectivè in intellectu creato, secundum se, directè, & independentè ab ipso intellectu creato potente illud efficere.

ficere, nego; indirectè, seu ut quid factibile ab intellectu creato, concedo, & nego ultimam consequentiam. Quod ut capias.

15 Nota, verum esse, ens rationis cognosci ab æterno à Deo, & habere esse objectivè in intellectu Divino, sed tamen non propter hoc habet esse primariò effectivè ab intellectu Divino; quia licet tunc nullus sit intellectus creatus, in quo primariò effectivè sit actualiter ens rationis; tamen tunc est intellectus creatus possibilis, in quo primariò effectivè possibiliter habet esse tale ens rationis, quod tum etiam tantum est possibile; unde, sicut quando ens rationis de facto datur existens in intellectu creato; præsupponitur jam factum ab ipso intellectu creato ante cognitionem Divinam terminatam ad illud, ut existens, ita in statu possibilitatis ab æterno, ens rationis præsupponitur factum possibiliter, id est, factibile ab intellectu creato ante cognitionem Divinam terminatam ad illud ut factibile; & sic cognitio Divina semper respicit ens rationis indirectè, & in ordine ad intellectum creatum.

16. Ex alio capite alii intendunt probare, ens rationis fieri ab intellectu Divino, scilicet, quia non solum indirectè, sed etiam directè Deus cognoscit ens rationis, & sic replicant ad responsionem argumenti: quia etiam si intellectus creatus repugnaret, cognosceret Deus entia rationis: sed tunc cognosceret illa directè: ergo Deus efficeret illa. Respondetur negando majorem, quia, si repugnaret intellectus creatus, repugnaret etiam ens rationis; nam certum est, quod repugnante aliqua causa, simul repugnat effectus illius, unde tunc non esset aliquod ens rationis neque actualiter, neque possibiliter, quod à Deo cognosceretur, & sic nihil mirum, quod tunc ens rationis non cognosceretur à Deo.

17 Sed replicant: in illo casu cognosceret Deus  
ens

ens rationis esse impossibile: sed tunc illud ens rationis esset objectivè in intellectu Divino: ergo tunc fieret ens rationis ab intellectu Divino. Respondetur distinguendo minorem; sed tunc illud ens rationis esset objectivè in intellectu Divino, ita ut obiiceretur intellectui Divino ens rationis, nego: quia in illo casu non daretur ens rationis cognoscibile, ut dictum est; ita ut obiiceretur intellectui Divino impossibilitas entis rationis, concedo; vel subdistinguo, ita ut obiiceretur intellectui Divino impossibilitas entis rationis absolutè, & directè, nego; indirectè, & in ordine ad impossibilitatem intellectus creati, concedo; quia ens rationis neque ex se est formaliter, & intrinsecè possibile, neque impossibile; sed solum ab alio, & extrinsecè, hoc est, ab intellectu possibili, vel impossibili ad illud fabricandum. Plura diximus similia in tota disputatione; unde negatur consequentia.

18 Adhuc replicant: per cognitionem, qua Deus cognoscit chimeram, ut impossibilem, v. g. quando habet hanc cognitionem: *Hircocervus est impossibilis*, tunc Hircocervus habet esse objectivè in intellectu Divino; ergo cum à parte rei nullum esse habeat, neque habere possit, jam habet tantum esse objectivè in intellectu Divino, quod est esse ens rationis. Respondetur distinguendo antecedens; Hircocervus est objectivè in intellectu Divino, ita ut obiiciatur intellectui Divino aliquid, quod non est à parte rei ex parte ipsius Hircocervi, nego; ita ut nihil obiiciatur, præter id, quod est à parte rei ex parte ipsius Hircocervi, concedo, & nego consequentiam; tunc enim tantum esset objectivè in intellectu Divino impossibilitas ipsius Hircocervi, quæ impossibilitas sic se habet à parte rei; & sic jam non haberet tantum esse objectivè in intellectu, quod erat necessarium, ut esset ens rationis.

19 Adhuc replicant; in hoc complexo; *Hir-*



*coercervus est impossibilis*, duo debent considerari, scilicet, negatio, seu impossibilitas Hircocervi & ipse Hircocervus; primum, habet esse à parte rei, quia à parte rei est negatio, seu impossibilitas Hircocervi; secundum, scilicet, *Hircocervus* non habet esse à parte rei: ergo quando intellectus Divinus cognoscit hoc complexum: *Hircocervus est impossibilis*, hæc duo cognoscit, scilicet, impossibilitatem Hircocervi, ex vi cuius non facit ens rationis; & ipsum Hircocervum, ex vi cuius facit ens rationis. Respondetur negando consequentiam; nam per illum actum, quo Deus cognoscit hoc complexum: *Hircocervus est impossibilis*, solum attingit impossibilitatem Hircocervi, non autem ipsum Hircocervum, quod fundatur in eo, quod actus iudicii, seu propositio, ut suo loco dicemus est una simplex qualitas, cujus adæquatum objectum non sunt termini illi incomplexi, scilicet, subjectum, & prædicatum, sed copula eos coniungens; termini verò illi attinguntur per actus simplicis apprehensionis præcedentes actum iudicii, illique cœxistentes, eum advenit; cum ergo extrema illa non attingantur ex vi actus iudicii, sequitur evidenter, per iudicium, quo dicitur *Hircocervus est impossibilis*, non fieri ens rationis, quia per talem actum, præcisè attingitur repugnantia Hircocervi, non autem ipse Hircocervus.

20. Adhuc replicant; impossibile est, quòd detur actus iudicii, quin præcedat, seu cœxistat actus simplicis apprehensionis cognoscens extrema ipsius iudicii: ergo licet Deus per illum actum iudicii, quo cognoscit hoc complexum: *Hircocervus est impossibilis*, non cognoscat extrema illius, necessario debent cognosci per simplicem apprehensionem: ergo licet intellectus Divinus non faciat ens rationis ex vi illius iudicii, quo cognoscit prædictum complexum, faciet tamen ens rationis ex vi illius simplicis apprehensionis.

apprehensionis, qua cognoscit Hircocervum, qui est extremum illius iudicii.

22 Respondetur primò negando ultimam consequentiam; hoc autem dependet ex intelligentia simplicis apprehensionis, & iudicii in Deo; etenim tantum datur in intellectu Divino unicus actus, qui terminatur ad objecta eo modo, quo sunt cognoscibilia, sive hoc fiat ad modum simplicis apprehensionis, sive ad modum iudicii; utroque enim modo cognoscit Deus impossibilitatem Hircocervi, & nihil aliud ex parte illius, cum nihil aliud sit cognoscibile ex parte illius intrinsecè, ut patet ex supradictis; & si aliter potest cognosci, hoc provenit ab extrinseco, id est ab intellectu, qui imperfectè cognoscens, potest rem aliter ac est repræsentare; Deus enim tam per modum simplicis apprehensionis, quam per modum iudicii, ex cognitione ipsarum rerum ut sunt in se, & prædicamentorum essentialium illarum, cognoscit inter se repugnare, vel non repugnare, absque eo quod ex parte objectorum correspondeat intellectui Divino aliquid, quod non est à parte rei: unde, licet actus Dei vocetur iudicium, sive simplex apprehensio semper idem cognoscit, hoc est in nostro casu semper cognoscit impossibilitatem Hircocervi, & sic nullatenus fabricat ens rationis.

23 Resp. 2. quod licet in Deo præcedat actus terminatus ad Hircocervum per modum simplicis apprehensionis, hoc evenit, eo quod est sic factus, vel factibilis ab intellectu creato: tunc enim licet hoc complexum; *Hircocervus est impossibilis*, cognosceret Deus directè, & in se, tamen extremum illius, scilicet, Hircocervum, solum cognosceret indirectè, & in ordine ad intellectum creatum, in quo sensu iam sæpè dictum est, nullum fabricare ens rationis. Unde, si alias repugnaret intellectus, creatus, repugnaret etiã quod Deus cognosceret Hircocervum, ita ut ad ipsum terminaretur actus Divinus, sed solum  
ita

ita ut terminaretur ad ejus impossibilitatem. Etenim universim loquendo, impossibilitas Hircocervi cognoscitur à Deo ex ipsa cognitione prædicatorum essentialium Hirci & cervi, sive hoc fiat per modum simplicis apprehensionis, sive per modum iudicii; unde illud complexum: *Hircocervus est impossibilis*, ut est obiectum intellectus Divini, nihil aliud ponit præter quod prædicata Hirci & cervi inter se repugnant, quod certè sic se habet à parte rei.

23 Arguunt 2. Ideò intellectus creatus cognoscit privationem, & negationem ut ens positivum, quia cum eius obiectum sit ens reale positivum, non potest aliquid intelligere; nisi sub ratione sui obiecti: sed etiam ens reale positivum est obiectum intellectus Divini; ergo nequit intelligere privationem, & negationem, nisi sub ratione talis obiecti; ergo sicut intellectus creatus sic illas cognoscendo efficit ens rationis, ita etiam intellectus Divinus illud efficit.

24 Respondetur negando causalem maioris; quia non ideò præcisè, quod ens est obiectum intellectus creati, concipit negationem & privationem ut quid positivum, nam alias, nunquam posset privationem, & negationem ut sunt in se cognoscere, quod est falsum: nam per hoc iudicium divisivum: *Negatio, & privatio non sunt quid positivum*, cognoscit illas ut sunt in se; quia tunc cognoscit intellectus, eas non esse entia, sed potius remotione entis, licet hoc fiat per formam oppositam extrinsecè cōnotatam, ut supradictum est. Ratio autem completa, quate intellectus creatus cognoscit illas ut entia positiva est, quia nititur illas cognoscere per simplicem apprehensionem, & cū ut sic per formā oppositam non sint intelligibiles, præstat illis aliam intelligibilitatem extrinsecam proveniente ab actu imperfectè cognoscente, & sic repræsentat illas aliter ac sunt in se, & efficit ens rationis: cum autem Deo tribuenda sit cognitio sine aliqua

qua imperfectione, solum potest concedi, intellectum Divinum cognoscere privationem, & negationem per iudicium divisivum, & per ordinem ad formam oppositam; quia sic ex parte rei sunt intelligibiles, non tamen ut quid positivum, quia sic solum sunt intelligibiles ex imperfecto modo cognoscendi.

25 Sed replicant: cognoscere res omnibus modis, quibus cognoscibiles sunt, dicit perfectionem in cognitione: sed privatio, & negatio non tantum sunt cognoscibiles ut sunt in se; sed etiam aliter ac sunt in se ergo est perfectio cognitionis Divinæ sic illas cognoscere. Resp. dist. mai. cognoscere res omnibus modis quibus cognoscibiles sunt ex parte rei, dicit perfectionem in cognitione, concedo; quibus cognoscibiles sunt ex parte intellectus imperfectè concipientis, nego; distinguo etiam minorem: sed privatio, & negatio sunt cognoscibiles aliter ac sunt in se, ex parte rei, nego, ex parte intellectus imperfectè concipientis, concedo, & nego consequentiam.

26 Arguunt 3. Aliquibus authoritatibus Scoti: nam in 1. distinct. 30. quæst. 2. §. *Contra istam opinionem. Vers. Præterea*, litt. B. dicit; *Divinus intellectus comparans se ad primum extremum, ut creativum ad creabile, & ad aliud extremum, ut creans ad creatum, videtur in essentia sua quasi producere duas relationes rationis ad distincta extrema. Et dist. 35. §. Potest dici. Vers. Hoc potest poni*, litt. H. dicit; *Hoc potest poni sic. Deus in primo instanti intelligit essentiam subtractione merè absoluta; in secundo instanti producit lapidem in esse intelligibili; in tertio instanti forrè intellectus Divinus potest comparare suam intellectionem ad quodcumque intelligibile, ad quod nos possumus comparare, & tunc comparando se ad lapidem potest causare in se relationem rationis; & in quarto instanti potest quasi reflecti super istam relationem causatam in tertio instanti; & tunc il-*

*La relatio rationis cognita erit; ergo secundum Scotum intellectus Divinus potest efficere entia rationis.*

27 Potest responderi primò, quod loquitur Scotus dubitativè, non autem assertivè, ut denotant illa verba: *videtur, fortè*. Secundo potest responderi, quod loquitur de relatione rationis latè sumpta, scilicet, pro denominatione extrinseca, quam recipit obiectum ex terminatione actus rationis; non vero loquitur de relatione rationis strictè sumpta, scilicet, pro illa, quæ tantum habet esse obiectivè in intellectu, quod erat necessarium, ut faceret ens rationis, ut in præsentī sumitur; quod autem in hoc sensu loquatur Scotus sic ostenditur; nam relationes illæ rationis, de quibus in primo loco affirmat, esse productas per actum Divini intellectus comparantem Divinum esse ut creativum ad creabile, & ut creans ad creatum, non habent esse obiectivè in actu isto comparativo Divini intellectus; cum obiecta talis actus tantum, sint Divinum esse ut creativum, seu creans, quod est, quod comparatur; & esse creabile; seu creatum, quod est cum quo comparatur. Deinde, in secundo loco affirmat, quod illa relatio rationis, quæ causatur in tertio instanti, potest cognosci a Divino intellectu in quarto instanti, & sic supponit Scotus non esse cognitam pro tertio instanti; & consequenter pro illo instanti non habere esse obiectivè in intellectu, quod erat necessarium ut esset ens rationis, ut sumitur in præsentī. Neque in quarto instanti, in quo cognoscit illam relationem facit ens rationis, quia non cognoscit illam ut quid intrinsecum in rebus comparatis; sed tantum cognoscit, quod illa extrema sunt termini sui actus comparativi, quod in re ita se habet.

## Q U Æ S T I O VIII.

*An secunda intentionis sint entia  
rationis?*

1 **P**RO intelligentia quæstionis notandum est, quod intentio, ut in præsentì sumitur, nihil aliud est, quam tendentia alicujus potentia in suum objectum, & præcipuè potentia intellectivæ; unde intentio dividitur in formalem, & obiectivam. Formalis est ipse actus intellectus tendens in objectum. Obiectiva est, ipsum objectum, in quod tendit. Tam obiectiva, quam formalis potest esse prima, vel secunda. Prima intentio formalis est actus intellectus tendens in objectum, secundum esse, quod habet a parte rei, seu independentè a consideratione intellectus. Prima intentio obiectiva, est res sic concepta: ut quando cognoscimus lapidem, v. g. hæc cognitio est prima intentio formalis, lapis cognitus est prima intentio obiectiva. Secunda intentio formalis est cognitio, qua cognoscuntur denominationes extrinsecæ remanentes in obiectis cognitis per primam intentionem formalem, ut sunt denominationes subiecti, prædicati, propositionis, &c. Secunda intentio obiectiva est quælibet ex prædictis denominationibus ut sic cognita. Hoc notato.

2 Dicimus: Prima, & secunda intentio formalis sunt entia realia; quod patet, quia sunt actus intellectus, & omnes actus intellectus sunt entia realia. Prima intentio obiectiva non est ens rationis, quando cognoscitur res ut est in se; ut quando cognoscimus lapidem secundum suum esse, lapis cognitus non est ens rationis; & quando cognoscimus per judicium divisivum, negationem non esse aliquid positivum, negatio ut sic cognita non est ens rationis; si vero res cognosca-

gnoscat<sup>r</sup> aliter ac est in se, tunc prima intentio obiectiva est ens rationis, ut quando cognoscimus negationem ut quid positivum. Secunda intentio obiectiva est ens rationis, si concipiat<sup>r</sup> denominatio extrinseca subiecti, prædicati, &c. ut quid intrinsecum in re denominata, quando vero per iudicium divisivum cognoscitur, non esse quid intrinsecum in re denominata, non est ens rationis. Hec conclusio patet ex ipsius terminis, nisi fortè aliter explicentur primæ & secundæ intentiones, quod reducitur ad questionem de nomine, & in tali casu melius erit convenire cum aliis, quàm in re parvi momenti contendere vocibus.

3 Advertendum tamen est, quòd aliquando contingit, secundas intentiones obiectivas, materialiter sumptas denominari ab aliis secundis intentionibus, & tunc tales secundæ intentiones denominatæ, secundum quid dicuntur primæ, scilicet, comparatione illarum, à quibus denominantur, & sic non est necessarium multiplicare in nomine numerum intentionum; quod contingit in hac denominatione, v. gr. *Species est universalis*, ubi secunda intentio speciei se habet tanquam prima, respectu secundæ intentionis universalis.

## D I S P. II.

*Proœmialis de Natura Logica.*

**P**ostquam entis rationis naturam, & alia ad ipsum pertinentia declaravimus, facilius erit naturam Logicæ declarare, & alia pertinentia ad ipsam, quod præstare intendimus in hac disputatione. Sit ergo

QUÆ

## Q U Æ S T I O I.

*An, Quid, & Quotuplex sit Logica?*

1 **P**Ro intelligentia quæstionis notandum est, juxta Aristot. 1. Rhetoric. cap. 1. logicam, vel esse naturalem, vel artificialem. Logica naturalis est, naturale lumen intellectus, quo quisque, etiam rusticus rudior, potest ratiocinare, seu aliquos discursus elicere. Logica artificialis est, multitudo præceptorum, & regularum, quibus instruitur Logica naturalis ad rectè, & sine errore procedendum in ratiocinatione, seu quibus regulatur ad bonè, & ordinatè discurrendum.

2 Dicimus primò: datur in rerum natura utraque Logica. Hæc conclusio est tam communis, ut fere à nullo negetur. Probatur prima pars: (licet ex se constet, & qui eam negaret, se intellectum habere negaret.) Logica naturalis est ipsemet intellectus potens propria virtute, & sine regulis aliquomodo discurrere, seu differere: sed nullus negare potest, dari intellectum in rerum natura, qui sic valeat discurrere, nam nemo est, qui nesciat colligere sine aliqua regula, quòd Petrus moveatur ex eo quòd ambulet, & alia similia: ergo datur Logica naturalis in rerum natura.

3 Probatur secunda pars: quia habitus requiruntur ad facilitandum intellectum in cognitione rerum: sed disputare, seu differere est difficilis modus cognoscendi res: ergo debet dari in intellectu habitus ad auferendam hanc difficultatem: sed hic habitus est Logica artificialis. ergo datur in rerum natura talis Logica. Confirmatur; nam experientia videmus, multos, qui difficile, & cum errore discurrebant, postquam instructi sunt præceptis, facile, & sine errore discurrere: sed hæc præcepta sunt Logica  
arti-



artificialis: ergo ad rectè, & sine errore discurrendum datur Logica artificialis.

4 Argues contra: operationes, seu potentię sensitivæ nullis regulis, seu præceptis indigent ad percipienda sua objecta: ergo neque intellectus; & consequenter non datur Logica artificialis. Respondetur negando paritatem; quia sensus, seu potentiæ sensitivæ facilè in suorum objectorum cognitionē perveniunt; quia eorum modus cognoscendi est facilis, certus, & determinatus; at verò intellectus, cum magna difficultate naturas rerum speculatur, nam in hoc proccedit modo difficili, scilicet, ex notis ignota indagando, quod sine magno labore, magnaquę disciplina nequit facilè præstari.

5 Dicimus secundo pro secundo, quòd inquirat quæstio: Logica naturalis est naturalis facultas intellectiva, seu naturalis habilitas discurrendi. Logica artificialis est, quæ tradit præcepta, seu regulas ad rectè, & sine errore disputandum. Hæ descriptiones Logicæ, tam naturalis, quàm artificialis ab omnibus philosophis admittuntur; licet aliis verbis illis æquivalentibus ab antiquis tradantur, & sic in re tam clara ex ipsis terminis, nullatenus convenit amplius immorari.

6 Dicimus tertio pro tertio, quòd inquirat quæstio: Logica artificialis dividitur in docentem, & utentem: quæ divisio ab omnibus admittitur, & traditur à subtili Doctore quæst. 1. Universalium, §. *Dicendum*; & Præceptore Angelico 4. metaphysic. lect. 4. & sub aliis terminis traditur à Græcis; nam Logicam docentem vocant à rebus avulsam, & Logicam utentem in rebus concretam. Logica docens est, quæ tradit regulas ad conficiendos modos sciendi. Logica verò utens est exercitium conficiendi modos sciendi, juxta regulas traditas à Logica docente.

7. Tam Logica docens, quàm utens potest dici

dicti actualis, vel habitualis. Logica docens actualis est actualiter tradere regulas & modos sciendi conficiendos; ut quando dicimus, v. gr. *Syllogismus debet constare tribus propositionibus, taliter dispositis*. Logica utens actualis est actualiter uti in exercitio prædictis regulis; ut quando, v. gr. actualiter conficimus hunc syllogismum; *Omnis homo est animal: Petrus est homo: ergo Petrus est animal*. Logica docens habitualis, est quædam facultas, quæ inest intellectui in actu primo, ipsum facilitans ad tradendas, seu contemplandas prædictas regulas. Logica utens habitualis, est quædam facultas, quæ inest intellectui in actu primo, ipsum facilitans ad usum ipsarum regularum. Desumpta est hæc divisio Logicæ ex similitudine artium; nam in artibus, v. gr. in musica, duo possunt considerari, scilicet, doctrina, & regulæ, quibus instruitur artifex, & dicitur musica docens; & exercitium talis doctrinæ, seu regularum, ut quando actualiter pulsat citharam, & dicitur musica utens.

8 Hic solet dubitari, an hæc divisio Logicæ docentis, & utentis sit secundum omnes partes Logicæ? Hoc est, an logica sit docens, & utens, tam in parte demonstrativa, quam in parte topica, & sophistica? Respondetur primò, quod logica, secundum omnes suas partes, est docens: quod patet, quia non solum docet conficere demonstrationem, sed etiam syllogismum probabilem, & sophisticum: ergo secundum omnes suas partes logica est docens. Hoc communiter admittitur ab omnibus, & solum est difficultas, an sicut logica est docens secundum omnes suas partes, ita secundum omnes suas partes sit utens? Communior sententia tenet, Logicam esse utentem secundum omnes suas partes, quam tenet Scotus quæst. 1. & 2. Elenc. contra aliquos (citatos à Maffrio, & Merinero hic) asserentes, logicam non esse utentem in

par-

parte demonstrativa, sed solum in parte topica, & sophistica.

9 Respondetur: ergo secundò ad dubium, juxta sententiam communem; Logica non solum secundum partem topicam, & sophisticam, sed etiam secundum partem demonstrativam, dicitur utens. Probatur: nam ex eo Logica dicitur docens secundum omnes suas partes, quia, non solum docet, quomodo conficiendi sint syllogismi topici, & sophistici, sed etiam docet, quomodo construendi sunt syllogismi demonstrativi: sed omnibus regulis Logicæ docentis utimur ad conficiendos syllogismos, tam topicos, & sophisticos, quàm demonstrativos, tam in materia ipsius Logicæ, quàm in materia aliarum scientiarum; nam tam Logica, quàm alia scientia habet conclusiones probabiles, & scientificas, & in Logica, & qualibet alia scientia possunt confici syllogismi sophistici, seu apparentes, ut passim evenit: ergo Logica dicitur utens, tam in parte topica, & sophistica, quàm in parte demonstrativa.

10 Arguunt contra Authores oppositæ sententiæ: Si Logica haberet usum partis demonstrativæ, vel esset in materia necessaria aliarum scientiarum, vel in materia necessaria propria: sed nequit talem usum habere in aliqua ex prædictis materiis: ergo in nulla materia datur usus Logicæ, respectu partis demonstrativæ. Probatur prima pars minoris: quia in materia necessaria Physicæ, v. gr. ipsa Physica utitur Logica ad suas demonstrationes eliciendas: ergo tunc non datur Logica utens. Probatur secunda pars minoris: quia usus Logicæ debet esse distinctus ab ipsa doctrina, ita ut Logica per ipsum usum non doceat formaliter: sed demonstrationes, quæ fiunt in ipsa materia necessaria Logicæ, non distinguuntur ab ipsa doctrina Logicali: ergo non datur Logica utens in parte demonstrativa in ipsa materia necessaria Logicæ.

11 Respondetur negando minorem, & ad primam probationem dicimus, quod in materia necessaria aliarum scientiarum, quando conficitur aliqua demonstratio, concurrit habitus scientificus talis materię elicitive, & habitus Logicę directive. Sic respondet Merinerus disp. procemial. Logicę quęst. 2. sect. 1. Aliter respondet Mastrius quęst. procem. Logicę. Art. 2. quod in materia necessaria aliarum scientiarum, quando conficitur aliqua demonstratio, concurrit elicitive habitus scientificus cujuscunque scientię, in qua fit demonstratio, quoad substantiam actus pro materiali sumpti; habitus verò Logicę concurrit etiam elicitive quoad modum ipsius actus, id est, quoad dispositionem, & formam syllogisticam, quę in tali materia exercetur. De hoc alibi.

12 Ad secundam probationem minoris, respondetur, verum esse, usum Logicę debere esse distinctum à doctrina Logicali; falsum autem; usum in materia necessaria Logicę non distingui ab ipsa doctrina Logicali; nam doctrina Logicalis, per quam formaliter docemur, nec consistit in constructione demonstrationis, seu in actuali usu, & exercitio; sed in assensu causato per ipsam demonstrationem. Sic respondet Merinerus ubi supra. Aliter respondet Mastrius citatus, negando, quod quando fit aliqua demonstratio in materia necessaria Logicę, usus non distinguatur à doctrina Logicali; quia Logica ut utens est habitus operativus conficiens demonstrationem, per quem non docemur formaliter, sed præcisè operamur. Sed ex dicendis quęstionibus sequentibus potest deduci, quę solutiones ex prædictis tenendę sint, & fortè alia solutio poterit deduci.

## Q U Æ S T I O II.

*Utrum Logica docens, & utens distinguantur ?*

1 **P**RO intelligentia quæstionis notandum est, quod habitus logicæ utens diversimodè solet explicari ; nam aliqui dicunt , quod Logica debet sumi in ablativo , ita ut quilibet habitus cuiuslibet scientiæ , & etiam ipsius Logicæ docentis , quando ad suas conclusiones demonstrandas utitur propriis regulis, dicatur Logica utens , seu habitus utens Logica . Alii autem dicunt , & est communior modus dicendi ; quod habitus Logicæ utens dicitur Logica utens , sumpta Logica in nominativo , ita ut sit habitus Logicæ utens regulis ipsius Logicæ , tam in materia propria , quàm in materia aliarum scientiarum .

2 Notandum est etiam , quod si Logica utens sumatur in primo sensu , certum est ; quod Logica utens , quando usus est in aliis materiis , seu scientiis , distinguitur realiter à Logica docente ; quod patet , quia quælibet alia scientia realiter distinguitur à Logica docente , sed in prædicto sensu quælibet alia scientia dicitur Logica utens ; ergo in tali sensu Logica utens distinguitur à Logica docente . Quando autem usus Logicæ est in ipsa materia Logicæ , in prædicto sensu Logica utens non distinguitur realiter à Logica docente , quod patet , quia tunc ipsa Logica docens utitur propriis regulis ad eliciendas suas conclusiones , & consequenter dicitur Logica utens , sumpta Logica in ablativo . Unde difficultas solum est , an , præter habitum Logicæ docentis , qui tradit regulas ad conficiendos modos sciendi in qualibet materia , detur alius habitus Logicæ , qui prædictas regulas applicet in quacumque materia , & realiter ab habi-

tu Logicæ docentis distinguatur? Quæ difficultas etiam solet examinari circa actus Logicæ docentis, & utentis.

3 Circa actus Logicæ docentis, & utentis communiter tenent omnes Philosophi contra Martinium, prædictos actus realiter distingui, quod sic probant; quia actus Logicæ docentis est actualis consideratio, & traditio regularum in ordine ad conficiendum modum sciendi; actus verò Logicæ utentis est actualis constructio ipsius modi sciendi, juxta prædictas regulas; sed certum est, hos actus realiter distingui, siquidem unus potest esse sine alio, quod est maximum signum distinctionis realis; ergo actus Logicæ docentis, & utentis realiter distinguuntur.

4 Fundamentum autem Martinii, consistit in hoc, quòd Logicus eodem dictamine, quo cognoscit, quomodo sit conficiendus syllogismus generaliter, ipsum particulariter conficit; ergo non indiget alio dictamine particulari, quo hoc in particulari cognoscat: ergo idem est actus Logicæ docentis, & utentis. Ad quod communiter respondetur negando ultimam consequentiam: nam ex argumento solum sequitur, non requiri duplicem actum Logicæ docentis, unum, quo in generali cognoscat Logicus, quomodo sit fabricandus modus sciendi in generali; & alium, quo cognoscat, quomodo sit fabricandus modus sciendi in particulari, quod verum est; nullatenus tamen sequitur, non dari alium actum, qui sit Logicæ utentis, quo actualiter fabricetur modus sciendi, distinctum ab illo dictamine generali; quia, ut patet, potest dari tale dictamen, absque eo quòd actualiter construatur modus sciendi, quod evidenter denotat distinctionem realem inter prædictum dictamen quod est actus Logicæ docentis, & confectionem modi sciendi quæ est actus Logicæ utentis.

5 Circa habitus Logicæ docentis, & utentis  
ali-

aliqui tenent, esse habitus realiter distinctos  
Sic Mastrius quæst. proœm. Logicæ articul. 1.  
ubi citat alios authores pro hac sententia. Alii  
autem affirmant, prædictos habitus nullatenus  
diversis muneribus tantum nomina docentis, &  
realiter distingui, sed esse unicum habitum; ex  
utentis participantem; nam dicitur Logica do-  
cens; quatenus tradit regulas ad modos sciendi  
conficiendos, & faciliat intellectum ad prædi-  
ctas regulas tradendas, & considerandas, &  
dicitur Logica utens, quatenus utitur prædictis  
regulis in aliqua materia, & faciliat intellectum  
ad conficiendos prædictos modos sciendi. Sic  
Merinerus disput. proœm. Logicæ quæst. 2. sect.  
2. Pontius disp. 2. quæst. 6. Ubi citat plures Au-  
thores pro hac sententia, quam tenent etiam  
quamplures Scotistæ in manuscriptis, & videtur  
esse Scoti quæst. 1. universalium, ubi distinguit  
Logicam docentem, & utentem ex diversa tan-  
tum consideratione, estque communis inter  
Thomistas, & Jesuitas.

6 Pro hac secunda sententiâ dicimus: habi-  
tus Logicæ docentis, & utentis non distinguun-  
tur realiter. Probatur; quia ubi nulla urget ne-  
cessitas, non sunt multiplicandæ entitates: sed  
nulla urget necessitas multiplicandi habitus lo-  
gicæ docentis; & utentis; ergo non sunt ponen-  
di duo habitus realiter distincti. Probatur mi-  
nor: quia si esset aliqua necessitas, maximè ut  
per habitum logicæ utentis, distinctum ab ha-  
bitu logicæ docentis, vinceretur aliqua difficul-  
tas; habitus enim acquisiti ad vincendas difficul-  
tates ponuntur: sed posito habitu logicæ docen-  
tis in intellectu, nulla remanet difficultas vin-  
cenda per habitum logicæ utentis: ergo nulla  
est necessitas multiplicandi prædictos habitus.

7 Minor, in qua potest esse difficultas, sic  
ostenditur; omnis difficultas vincenda per habi-  
tum, & ex triplici capite potest provenire, sci-  
licet, vel ex ignorantia, præceptorum, vel ex

in dispositione potentie exequentis precepta, vel ex defectu materie: sed qui habet habitum Logice docentis, nullam habet ex predictis difficultatibus; nam in primis, non habet ignorantiam preceptorum, supponitur enim ea cognoscere per habitum Logice docentis: deinde, non habet indispositionem potentie, nam in Logica eadem est potentia exequens; ac dirigens, & sic intellectus, qui non est indispositus ad dirigendum, non erit indispositus ad exequendum; denique, neque habet defectum materie, siquidem materia Logice docentis, & utentis, non est diversa; quia Logica docens versatur circa instrumenta Logicalia, tradendo regulas ad ipsa conficienda, & Logica utens respicit eadem instrumenta, ut exequenda; ergo qui habet habitum Logice docentis, nullam habet difficultatem vincendam per habitum Logice utentis, & consequenter nulla est necessitas ponendi habitum Logice utentis, distinctum ab habitu Logice docentis.

8 Confirmatur; quia habitus Logice utentis est, qui inclinat ad conficiendum modum sciendi; sed habitus Logice docentis eodem modo inclinat ad conficiendum modum sciendi; ergo habitus Logice docentis, & utentis nullatenus realiter distinguuntur. Probatur minor: quia impossibile videtur eum, qui cognoscit, quomodo modus sciendi sit conficiendus, non faciliter ad ipsum conficiendum; ergo habitus Logice docentis, per quem hoc cognoscitur, faciliat, seu inclinat ad conficiendum modum sciendi, & consequenter non distinguitur realiter ab habitu Logice utentis.

9 Arguunt 1. in aliis artibus, v; gr. in arte pingendi dantur duo habitus, alter docens precepta illius artis, & alter utens, seu juvans potentiam ad illa precepta exequenda; ergo similiter dicendum est in Logica. Respondetur negando consequentiam; & paritatem. Ratio est,

quia



quia in arte pictoria, v. gr. datur duplex potentia, altera, quæ cognoscit regulas requisitas ad pingendum, & altera, quæ prædictas regulas ponit in exercitio, & sic in hac duplici potentia duplex habitus est ponendus; quia in qualibet est diversa difficultas, at verò in Logica hoc non contingit, quia eadem est potentia, quæ cognoscit, quomodo construendus sit modus sciendi, & quæ ipsum in exercitio construit, nec habet aliquam difficultatem in confectione modi sciendi, quando cognoscit, quomodo debeat fieri, & si quando aliqua remanet difficultas, hæc provenit ex defectu materiæ, si modus sciendi construatur in materia distincta ab ipsa Logica, quæ difficultas non ab habitu Logicæ, sed ab habitu correspondente prædictæ materiæ, auferri debet. Ubi generaliter observandum est, quod non ex eo præcisè, quod doctrina, & executio alicuius artis sit in diversa potentia, ponuntur duo habitus, alter docens, & alter utens sed ex eo, quod in qualibet potentia est diversa difficultas; si autem posito habitu docente artis in potentia, non remaneret difficultas in executione, non poneretur habitus utens in potentia executive distinctus ab habitu docente; similiter, non ex eo, quod potentia, in qua ponitur Logica, sit unica, scilicet intellectu, ponitur unicus habitus, qui sit, docens, & utens, sed ex eo, quod posito habitu docente, nulla remanet difficultas in executione, præter illam, quæ potest provenire ratione materiæ extraneæ, ad quam difficultatem vincendam ponatur alius habitus Logicæ, qui dicatur utens, si autem talis difficultas remaneret, poneretur habitus distinctus, licet esset unica potentia.

10 Arguunt 2. & hoc argumentum est Achilles oppositæ sententiæ; habitus Logicæ docentis potest intendi realiter, non intenso habitu Logicæ utens; ergo sunt habitus realiter distincti. Consequentia tenet, quia, quod in-

tenditur est ipsa entitas Physica habitus; ergo si prædicti habitus essent idem realiter, non posset unus intendi, quin alius intenderetur. Antecedens probatur; quia habitus intenditur per suos actus; sed possunt dari actus Logicæ docentis sine actibus Logicæ utentis; ergo per repetitionem illorum actuum, intenditur habitus Logicæ docentis, non intensio habitu Logicæ utentis. Respondetur negando antecedens, & consequentiam probationis, verum enim est, quod quilibet habitus intenditur per suos actus, & quod potest dari actus Logicæ docentis sine actu Logicæ utentis, ex quo tantum probatur, quod tales actus realiter distinguuntur, non tamen quod non intendatur habitus Logicæ, tam ut docentis, quam ut utentis, per repetitionem prædictorum actuum Logicæ ut docentis, quia, cum intensio habitus nihil aliud sit, quam intensio facilitatis; per repetitionem prædictorum actuum, sicut facilitatur intellectus ad cognoscendos modos sciendi, facilitatur etiam ad illos conficiendos, ut supra dictum est, & ita actus Logicæ ut docentis, etiam sunt actus Logicæ ut utentis, in quantum ad intendendum habitum, tam ut docentem, quam ut utentem, licet producantur ab habitu Logicæ ut docente.

II Arg. contra; Potest aliquis cognoscere, quomodo syllogismus, v.g. in aliquo modo sit conficiendus, & simul habere difficultatem ad illum conficiendum: ergo neque per actus Logicæ docentis, neque per habitum ipsius Logicæ docentis facilitatur intellectus ad conficiendum syllogismum; & consequenter ponendus est habitus Logicæ utentis realiter distinctus ab illo, per quem ponatur facilitas ad conficiendum syllogismum. Antecedens non aliunde probant, quam experientia tyronum, qui optimè regulas Logicæ docentis sciunt, & habent maximam difficultatem in conficiendo syllogismum. Resp. neg. antec. & illius probationem; nulla enim expe-

experientia hoc demonstrat in tyronibus; si autem illi aliquando, postquam cognoscunt, quomodo sit conficiendus syllogismus, sentiunt difficultatem in eo conficiendo, hoc provenit, vel ex defectu cognitionis materiæ, in qua volunt syllogismum conficere, vel ex eo quod non perfectè cognoscant, quomodo syllogismus sit conficiendus: quamvis enim benè sciant regulas memoriter, secundum quas confici debet syllogismus; sæpè tamen contingit, ut non benè illas intelligant, & sic sentiunt difficultatem in ipso syllogismo conficiendo, quæ difficultas non auferitur per habitum Logicæ utentis distinctum ab habitu Logicæ docentis, sed per habitum, qui generatur ex cognitione materiæ, in qua intendunt conficere syllogismum, vel ex majori cognitione regularum, quod pertinet ad Logicam docentem.

12 Arg. 3. per oppositum ad argumentum præcedens: per actus Logicæ utentis non augetur habitus Logicæ docentis; ergo non sunt idem habitus. Probatur antecedens: quia ex eo quod aliquis frequenter conficiat syllogismum in *Barbara*, non magis facilitatur ad cognoscendum, quomodo debeat fieri, quàm si non tam frequenter ipsum conficeret: ergo per actus Logicæ utentis non augetur habitus Logicæ docentis. Deinde per repetitionem talis actus acquiritur facilitas conficiendi syllogismum in *Barbara*: ergo intenditur habitus Logicæ utentis, non intensio habitus Logicæ docentis; & consequenter ex omni capite realiter distinguuntur prædicti habitus. Respondent aliqui negando consequentiam, quia licet verum sit, quod per actus Logicæ utentis circa materias extraneas, non augetur habitus Logicæ docentis; non ex hoc sequitur, quod habitus Logicæ docentis, & utentis realiter distinguantur; sed solum sequitur, quod habitus non augeatur per actus elicitos ab illo in externa materia, quod verum est; nam habitus

solum intenditur ex frequenti exercitio actus in propria materia.

13 Alii autem respondent negando etiam consequentiam, quia habitus solum intenditur per actus elicitos ab ipso, non vero per actus regulatos ab illo, & elicitos ab alio habitu; unde non intenditur habitus Logicæ docentis per actus Logicæ utentis, qui fiunt in aliena materia, quia licet tales actus dirigantur a Logica, non tamen ab ipsa eliciuntur: sed ab illa scientia, in cuius materia fiunt. Sic communiter respondent Scotistæ; quæ autem ex his responsionibus sit tenenda, constabit ex quæstione sequenti.

14 Quando autem dicunt, quod ex repetitione prædictorum actuum intenditur habitus Logicæ utentis, nam acquiritur facilitas conficiendi syllogismum; respondetur, hoc esse verum materialiter, non vero formaliter in linea Logicæ, unde negatur, quod ex hoc inferatur distinctio inter habitus Logicæ docentis, & utentis. Etenim, verum est, quod ex repetitione confectionis syllogismi in aliqua materia, v. g. in Physica, acquirit intellectus facilitatem conficiendi syllogismum in prædicta materia, quam facilitatem antea non habebat, solum propter defectum cognitionis materiae, non autem propter defectum alicuius habitus Logicalis; unde facultas, quæ acquiritur non est habitus Logicalis, sed habitus illius scientiæ, in cuius materia syllogismus exercetur, defectu cuius habitus, experiebatur intellectus difficultatem in conficiendo syllogismo in illius materia; quod ex eo patet, quia si aliquis sine confectione alicuius syllogismi in materia Physicæ, haberet sufficientem notitiam ipsius materiae physicæ, & similiter notitiam regularum Logicæ, sine aliqua difficultate conficeret syllogismos in Physica.

15 Arguunt contra: potest contingere, quod ali-

aliquis conficiat unum syllogisum in *Barbara* in una materia, & alios syllogismos in aliis materiis, & sic faciliteretur ad conficiendum syllogisum in *Barbara*; sed hæc facilitas non proveniret ab aliquo habitu materiali, quia per prædictos syllogismos, cum fiant in diversis materiis, non acquiritur habitus alicuius materiæ: ergo per aliquem habitum Logicæ, qui dicatur Logica utens, distinctus ab habitu Logicæ docentis, quia jam præsupponitur. Respondetur (quidquid alii dicant) distinguendo maiorem; acquireret facilitatem eandem, quam acquireret si conficeret omnes prædictos syllogismos in unica materia, nego; acquireret aliquam facilitatem in qualibet materia, eo modo, quo potest acquiri per unicum actum, concedo. Similiter distinguo minorem; hæc facilitas non proveniret ab aliquo habitu, qui acquireretur ex omnibus prædictis materiis, concedo; non acquireretur ab aliquo habitu, qui aliquo modo acquireretur in qualibet materia per unicum actum illi correspondentem, nego; & nego consequentiam. Ubi observa, quod si aliquando experietur, aliquem habere aliquam facilitatem in conficiendi syllogismis in aliqua materia, cuius habitum non habet, ex eo quod illos confecit in alia materia, cuius habitum habet, hæc non est formaliter facilitas, quæ proveniat illi ab aliquo habitu Logicæ, vel alterius materiæ; sed quædam expeditio, seu agilitas ad intelligendam aliquam materiam ex eo quod alias materias intellexit; quam expeditionem nō habet, qui adhuc nullā intellexit materiam; certum enim est, quod exercitium intellectus circa unam materiam, reddit ipsum expeditum ad intelligentiam alterius materiæ.

16 Arguunt 4. Actus Logicæ docentis, & utentis sunt diversæ rationis; ergo debent provenire a diversis habitibus, patet consequentia, nam habitus specificantur ab actibus; ergo ex actibus diversæ rationis benè inferantur ha-

bitus diversæ rationis . Respondetur distinguendo antecedens , actus Logicæ docentis , & utentis sunt diversæ rationis , & alias non sunt subordinati , nego ; & alias sunt subordinati , concedo , & nego consequentiam ; cuius probationis distinguo antecedens : habitus specificantur ab actibus , non subordinatis , concedo ; ab actibus subordinatis , nego . Etenim actus specie distincti possunt provenire ab unico habitu , quando sunt subordinati , & respiciunt idem obiectum formale , ut contingit in actibus Logicæ docentis , & utentis , nam actus Logicæ utentis semper supponit actum Logicæ docentis , & respiciunt idem obiectum formale . Vel secundo respondetur , quod actus diversæ rationis , quorum unus provenit ab habitu elicitive , & alter regulative , possunt ab eodemmet habitu provenire , quod contingit in præsentī , nam actus Logicæ docentis elicitive , actus vero Logicæ utentis , directive , seu regulative provenit ab habitu Logicali .

17 Arguunt 5. Logica docens , & utens se habent , respectu operationum intellectus , sicut Philosophia moralis , & Prudentia , respectu operationum voluntatis ; nam sicut Logica docens dat præcepta in communi ad dirigendas operationes intellectus , & Logica utens applicat tales regulas cuilibet materiæ in particulari , conficiendo in illa syllogismum ; ita Philosophia moralis dat regulas in communi ad dirigendas operationes voluntatis , & Prudentia applicat tales regulas cuilibet materiæ in particulari , ut hic , & nunc voluntas rectè operetur : sed habitus Philosophiæ moralis , & Prudentiæ realiter distinguuntur ; ergo similiter habitus Logicæ docentis , & utentis .

18 Resp. neg. conf. & paritat. quia licet Philosophia moralis , & Prudentia convenient cum Logica docente , & utente , ut dicitur in argum. differunt tamen in hoc , quod posito habitu  
Lo

Logicæ docentis, & notitia materiæ, in qua conficiendus est syllogismus, nulla remanet difficultas ad illum in tali materia conficiendum, unde nullus alius habitus requiritur; at verò posito habitu Philosophiæ moralis inclinante, & tradente regulas ab bene operandum, & cognita materia, circa quam exercenda est operatio, adhuc remanet difficultas ad hic, & nunc bene operandum, ad quam vincendam ponitur habitus Prudentiæ distinctus ab habitu Philosophiæ moralis; quod patet hoc exemplo; virtus moralis liberalitatis, v. g. faciliat voluntatem ad dandam eleemosynam, & tamen remanet difficultas, cui & quomodo elargienda sit; nam potest conferri non indigenti, & cum dispendio bonorum, & cum præiudicio familiæ, & in tali casu eleemosynam tribuens non diceretur liberalis, sed prodigus; ad quas difficultates vincendas, propter habitum liberalitatis, requiritur habitus Prudentiæ, qui dicat, quomodo hic, & nunc, & cui sit eleemosyna elargienda.

### Q U Æ S T I O III.

*Quomodo concurrat Logica ad actus aliarum scientiarum?*

**H**Æc quæstio solum habet locum in sententia tenente, habitus acquisitos efficienter concurrere ad suos actus; non autem in sententia negante talem concursum; utramque sententiam, ut probabilem proponit Scotus in 1. dist. 17. q. 2. per totam. Quæ difficultas examinatur in materiæ de habitibus in Theologia: ex suppositione autem sententiæ concedentis, concursum activum habitibus, respectu suorum actuum inquirimus, an habitus logicæ concurrat activè, seu elicitive ad actus aliarum scientiarum, qui sunt juxta regulas ipsius logicæ: an vero solum concurrat regulative, seu directive?

Circa

2 Circa quam difficultatem communior sententia, tam inter Thomistas, & Jesuitas, quam inter Scotistas, præcipuè inter illos, qui tenent, habitus Logicæ docentis, & utentis non distingui realiter, tenet, Logicam solum directivè, seu regulativè concurrere ad actus aliarum scientiarum, licet aliqui, præcipuè, qui asserunt, habitum Logicæ docentis distingui ab habitu Logicæ utentis, teneant, Logicam, etiam efficienter concurrere ad actus aliarum scientiarum. Aliqui autem Scotistæ, qui tenent, habitus Logicæ docentis, & utentis non distingui realiter, tenent etiam, Logicam concurrere elicitive ad actus aliarum scientiarum, & tamen ad argumentum tertium quæstionis antecedentis, ut respondeat, recurrunt ad distinctionem actus elicitivi, & regulati, & ut hoc cum sua sententia conferant, dicunt, activitatem, seu efficientiam Logicæ circa actus aliarum scientiarum nihil aliud esse, quam dirigere, seu regulare tales actus, quod ut ex se patet, est impropria acceptio terminorum, nam ut sic, nullus est, qui neget, Logicam concurrere efficienter ad prædictos actus, & sic penitus cessarent controversiæ. In legitimo autem sensu.

3 Dicimus; Logica solum directivè, seu regulativè concurrat ad actus aliarum scientiarum, non verò elicitive, seu effectivè. Probat, quia nullus habitus concurrat efficienter, nisi ad actus proprios similes illis, a quibus generatus fuit, vel potuit generari; sed actus aliarum scientiarum non sunt actus proprii Logicæ, neque ab illis fuit generata Logica, nec potuit generari; ergo Logica non concurrat efficienter ad illos. Probat minor, quia proprius actus Logicæ est actualis consideratio suarum regularum; sed actus aliarum scientiarum facti juxta regulas Logicæ, non sunt consideratio actualis regularum, licet illam præsup-



supponant; ergo non sunt proprii actus Logicae.

4 Respondent, hoc solum probare, prædictos actus non esse logicae, ut docentis, non tamen probare, non esse Logicae, ut utentis, & sic, licet logica, ut docens, non concurrat ad prædictos actus effectivè, concurrat tamen, ut utens. Sed contra est: quia non negamus, prædictos actus esse logicae ut utentis; affirmamus tamen, ad actus Logicae ut utentis non concurrere elicitive Logicam, & in hoc est tota controversia, quod ex eo probatur, quia actus Logicae, ut utentis nihil aliud est, quam exercitium regularum Logicae docentis: sed potest dari tale exercitium, absque eo quod Logica concurrat elicitive ad illud; ergo non est ponendus talis concursus Logicae. Probatur minor a simili de aliis artibus; quia ars solum directivè concurrat ad opus artefactum; ergo similiter Logica solum directivè concurrat ad syllogismum, quod est artefactum. Probatur antecedens, quia ars domifactoria, v. g. non producit, seu non concurrat efficienter ad fabricandam domum ad extra physicè, sed solum dirigit artificem, ut domum ædificet; ergo ars solum directivè concurrat ad artefactum, & consequenter Logica solum directivè, & non elicitive concurrat ad syllogismum, seu ad exercitium suarum regularum.

5 Respondent negando paritatem; nam aliae artes non concurrunt efficienter, sed tantum regulativè, quia sunt in diversa potentia, Logica autem est in eadem potentia executiva, scilicet in intellectu. Sed contra est; quia, ex eo quod Logica sit in eadem potentia, quae est executiva suarum regularum in quacumque materia, nullatenus sequitur, quod concurrat elicitive ad actus aliarum scientiarum; ergo non tenet solutio. Probatur antecedens; nam intellectus directus a Logica, majorem facilitatem

ha-

habet ad exequendum syllogismum, quam potentia externæ artificis directæ ab arte ad exequenda artefacta: ergo si tales potentia efficiunt suos actus sine concursu activo artis, etiam intellectus sine concursu activo logicæ, efficiet syllogismos in materia aliarum scientiarum.

6 Quod potest confirmari à simili de Prudentia, quia sicut se habet Prudentia in acquisitione virtutum, ita se habet Logica in acquisitione aliarum scientiarum: sed Prudentia se habet purè regulativè in actibus elicitis aliarum virtutum: ergo Logica se habet purè regulativè in actibus elicitis aliarum scientiarum. Consequentia videtur tenere à paritate, minor est communior consensus; major autem ex copatet, quia sicut Prudentia docet debite operari in materia virtutum moralium, ita Logica docet debite operari in materia aliarum scientiarum.

7 Arguunt 1. habitus concurrit ad suos actus efficienter; nam tribuitur potentia, ut illam adjuvet, & faciliat: sed in actibus aliarum scientiarum reperitur artificium logicum, quod est actus logicæ: ergo logica concurrit efficienter ad prædictos actus. Respondetur distinguendo majorem; habitus concurrit efficienter ad suos actus in propria materia, concedo; in aliena materia, nego. Et concessa minori, nego consequentiam. Quando autem dicitur, quod habitus adjuvat, & faciliat potentiam, est verum, sed de habitu Logicæ hoc modo debet intelligi, quod circa propriam materiam faciliat, & adjuvat potentiam in genere causæ efficientis; quia simul cum potentia elicit suos actus, at vero circa alias materias faciliat, & adjuvat potentiam purè directivè, seu regulativè; efficienter autem potentia, & habitus illius materiæ eliciunt actum; quia cum forma syllogistica sit modus talis actus, efficientia talis modi pertinet ad potentiam, & habitum quæ

quæ producunt actum quoad substantiam.

8 Arguunt 2. habitus supernaturales concurrunt cum potentia in genere causæ efficientis ad actus supernaturales ; ergo Logica concurrir efficienter simul cum potentia ad actus logicè dispositos . Respondetur distinguendo consequens : est enim verum in propria materia , & in hoc tenet paritas ; nam habitus supernaturales solum concurrunt efficienter ad actus supernaturales in materia propria , habitus enim supernaturalis fidei , ver. gr. solum concurrir ad actus supernaturales fidei , & non ad actus aliarum virtutum ; falsum , autem est consequens in extranea materia , & illud constat disparitas inter habitus supernaturales , & habitum logicæ , quod illi tantum concurrunt ad actus propriæ materiæ , habitus verò logicæ etiam ad actus aliarum scientiarum , licet tantum regulativè.

9 Arguunt 3. Logica dicitur scientia communis . sed hoc non haberet , nisi efficienter concurreret ad actus aliarum scientiarum : ergo concurrir efficienter ad illos . Respondetur negando minorem ; nam ad hoc , ut logica dicatur scientia communis , sufficit , quod concurrat directivè , seu regulativè ad actus aliarum scientiarum ; sicut sufficit , quod Prudentia regulativè tantum concurrat ad actus aliarum virtutum moralium , ut dicatur virtus communis.

10 Ex dictis colligitur primò , quod responsio tradita à Merinero ad argumentum positum 1. quæst. hujus disp. num. 10. contra illud , quod diximus , scilicet , quod Logica etiam dicitur utens in parte demonstrativa , tenenda est . Igitur in materia necessaria aliarum scientiarum concurrir Logica directivè , seu regulativa , & aliæ scientiæ elicitivè ; at verò in materia necessaria propria concurrir elicitivè , & regulativè ; ex quo non sequitur , quod usus actualis non distinguatur ab actuali doctrina ,

nam

nam, ut bene advertit Merinerus, non docemur formaliter per usum regularum, sed per assensum conclusionis, qui quidem valde diversus est ab usu.

11 Exemplo res fiet manifesta, nam quando conficimus hanc demonstrationem, v. gr. in materia necessaria Logicæ; *Syllogismus constans propositionibus evidentibus; generat scientiam: sed demonstratio est syllogismus constans propositionibus evidentibus; ergo demonstratio generat scientiam*, non docemur formaliter per ipsam demonstrationem, quæ est usus regularum Logicæ, sed per assensum conclusionis; demonstratio autem tantum est medium, ut scientificè conclusioni assentiamur; quod autem propositiones talis demonstrationis, etiam sint actus docentes, sed doctrina logicalis, per accidens se habet, & non est de ratione formali usus, quod patet, & quia quælibet propositio seorsim, absque eo quod disponeretur in forma talis usus, esset docens, & sic ratio docendi non est ipsa ratio usus, & quia usus formaliter potest dari, absque eo quod constet propositionibus docentibus logicalibus, ut patet in hac demonstratione; *Omnis homo esse animal rationale; Petrus est homo; ergo Petrus est animal rationale*. Unde resolvitur, quod in quacumque materia usus Logicæ semper habet diversam rationem ab ipsa doctrina Logicali.

12 Colligitur secundò, quod etiam tenenda est secunda responsio ad 3. argum. quæ est. antecedentis, adducta num. 13. in qua dicitur; quod habitus Logicalis solum intenditur per actus ab ipso elicitos; non verò per actus ab ipso tantum directos, seu regulatos.

## QUÆSTIO IV.

*Utrum Logica sit Scientia?*

1 **P**ro intelligentia quæstionis notandum, est primo, cum Scoto in 3. dist. 24. §. Ad quæstionem igitur, litt. D. quod scientia dupliciter potest sumi. Primò, pro quacunque cognitione vera, seu notitia cum firma adhesionem; in quo sensu videtur sumpsisse Aristot. scientiam 6. Et hic, dum dixit, quod habitibus intellectualibus dicit aliquis determinatè verum, & assentit uni parti, sicut aliquis assentiret conclusioni demonstratæ, licet hoc non fiat ex causis eiusdem, seu cum evidentia necessaria, ut advertit ipse Scotus. Secundò, potest sumi scientia pro cognitione habente quatuor sequentes conditiones. Prima, quod sit certa, & absque ulla dubitatione. Secunda, quod sit de objecto necessario. Tertia, quod sit causata per præmissas evidentes, quod ut advertit Scotus citatus, sub litt. H. ita debet intelligi, quod præmissæ sint evidentes illi intellectui, qui habet scientiam. Quarta, quod tales præmissæ applicentur per demonstrationem, in quo sensu sumpsit scientiam Arist. dum 1. Post. dixit; *Tunc scire opinamur unumquodque simpliciter, & non sophistico modo; qui est secundum accidens, cum causam arbitramur cognoscere, & quia illius est causa.* Et in hoc sensu sumitur scientia in præsentī, quando inquirimus; utrum Logica sit scientia?

2 Secundò notandum est, quod scientia, vel est actualis, vel habitualis, & utraque, distributione accommodata sic definitur; *Scientia est actus, vel habitus certus, & evidens, rei necessaria, per demonstrationem acquisitus.* Quæ definitio includit quatuor supradictas conditiones, & deducitur ex Arist. citato, & ab omnibus

bus Philosophis admittitur, & sic explicatur. Dicitur *actus*, vel *habitus*, quod ponitur loco generis, in quo convenit scientia cum aliis cognitionibus. Cæteræ particulæ ponuntur loco differentiæ: nam dicitur, *certus*, in quo differt scientia ab opinione, quæ non est certa, sed formidolosa. Dicitur *evidens*, in quo differt à fide, quæ licet sit certa, non est evidens, sed obscura. Dicitur, *rei necessarie*, in quo differt à Prudentia, & arte, quæ non circa necessaria, sed circa contingentia versantur. Dicitur, *per demonstrationem acquisitus*, in quo differt ab habitu, & actu primorum principiorum, qui non habentur per demonstrationem. Unde patet bonitas prædictæ definitionis. His notatis.

3 Circa præsentem difficultatem plures sunt sententiæ. Prima asserit, logicam, neque ut docentem, neque ut utentem esse scientiam, Secunda per oppositum tenet, logicam esse scientiam, tam ut docentem, quam ut utentem. Tertia asserit, logicam ut docentem esse scientiam; non verò ut utentem. Hæc est communior sententia inter recentiores; pro qua communiter citatur subtilis Doctor qu. 1. Universalium, & Angelicus Præceptor 4. Metaph. lect. 4. Pro his sententiis possunt videri plures Authores citati à recentioribus, & ex nostris, à Merinero disp. procm. logicæ quæst. 3. Præter has sententias, quamplures Scotistæ tenent, logicam esse scientiam; non tamen duplicativè, ut docentem. Quod potius est explicatio tertiæ sententiæ, quam nova sententia. Quid autem sit tenendum in hac varietate, per sequentes conclusiones proponemus.

4 Dicimus primò: Logica docens est scientia secundum omnes suas partes, si non sumitur reduplicativè ut docens. Probatur: quia scientia propriè sumpta, est cognitio certa, & evidens rei necessariæ, per demonstrationem causata: sed in logica dantur plures cognitiones

cer,

certæ, & evidentes rei necessariæ, per demonstrationem causatæ; ergo logica est scientia: Probatur minor, quoad omnes partes logicæ; nam in parte analytica habetur hæc notitia certa, & evidens, acquisita per demonstrationem; *Omnis syllogismus factus in Barbara: concludit necessario*, conficiendo hanc demonstrationem; *Omnis syllogismus constans tribus propositionibus, taliter inter se dispositis, concludit necessario*; sed *omnis syllogismus factus in Barbara constat tribus propositionibus taliter dispositis*; ergo *omnis syllogismus factus in barbara concludit necessario*. Deinde in parte topica habetur hæc cognitio certa, & evidens, rei necessariæ: *Syllogismus topicus generat opinionem*, per hanc demonstrationem, *Omnis syllogismus procedens ex probabilibus generat opinionem*; sed *syllogismus topicus procedit ex probabilibus*; ergo *generat opinionem*. Denique in parte sophistica habetur hæc notitia certa, & evidens, rei necessariæ: *Syllogismus sophisticus non concludit necessario ex vi formæ*, per hanc demonstrationem, *Nullus syllogismus in quo sunt quatuor termini, vel mala dispositio præmissarum, concludit ex vi formæ*. Sed huiusmodi est *syllogismus sophisticus*; ergo *syllogismus sophisticus non concludit ex vi formæ*; ergo in omnibus partibus logicæ dantur veritates per demonstrationem, acquisitæ; & consequenter logica secundum omnes suas partes est scientia.

5 Arguunt 1. Modus sciendi non est scientia; Sed Logica est modus sciendi; ergo logica non est scientia. Minor probatur ex Arist. 2. Metaphis. text. 15. Ubi dicit; *Absurdum est querere scientiam, & modum sciendi*, ubi per modum sciendi intelligit logicam. Respondetur distinguendo maiorem; modus sciendi objectivus non est scientia, concedo; modus sciendi directivus, nego. Distinguo etiam minorem; logica est modus sciendi directivus, concedo; & in hoc sensu appellat Arist. logicam, modum sciendi;

Logi-

Logica est modus sciendi obiectivus, nego, qui modus sciendi obiectivus potius est obiectum Logicæ, & nego consequentiam; quando autem Aristot. dicit, quod absurdum est querere scientiam, & modum sciendi, sic debet intelligi, quod absurdum est querere Logicam, quæ est modus sciendi directivus, & simul alias scientias; quia Logica semper debet præsupponi ad alias scientias, tanquam ianua ad illas acquirendas.

6. Arguunt 2. Scientia debet versari circa materiam determinatam; sed Logica non versatur circa materiam determinatam, quippè divagatur per materias omnium scientiarum; ergo Logica non est scientia. Respondetur distinguendo minorem; Logica non versatur circa materiam determinatam, remotam, concedo; proximam nego, & nego consequentiam. Sufficit ad scientiam, quod versetur circa materiam determinatam proximam, quod habet logica; nam agit de obiecto determinato, scilicet, syllogismo, vel modo sciendi, ut suo loco dicemus; licet alias se extendat ad plures alias materias remotas, ut sunt materie scientiarum, ad quas se extendit Logica, quod est peculiare illius, eo quod sit modus sciendi directivus.

7. Arguunt 3. Logicæ non conveniunt conditiones scientiæ; ergo non est scientia. Probatur antecedens, quia Logica non est de obiecto necessario; nam syllogismus non est necessarius, sed contingens. Deinde, Logica non acquiritur per demonstrationem; quod probatur; quia Logica docet conficere demonstrationem; ergo ante Logicam non præsupponitur demonstratio per quam acquiratur; ergo non acquiritur per demonstrationem; ergo Logicæ non conveniunt conditiones requiritæ ad scientiam.

8. Respondetur negando antecedens, & ad pri-



primam probationem respondetur illam distinguendo; Logica non agit de objecto necessario, quoad existentiam, concedo; quoad essentiam, seu quoad veritatem, & connexionem prædicatorum, nego; syllogismus enim, seu modus sciendi, qui ponitur pro objecto Logicæ, est contingens quoad existentiam, quod etiam contingit in omnibus objectis creatis cuiuscunque scientiæ; at verò quoad essentiam, seu connexionem prædicatorum, & illorum veritatem, tam necessarius est, quàm quodlibet aliud objectum cuiuscunque scientiæ; nam tam necessaria est hæc propositio, *Syllogismus demonstrativus generat scientiam*, quàm hæc, *Animal rationale est risibile*, quod etiam in aliis ad syllogismum pertinentibus, exemplificari potest; quod sufficit ad rationem objecti scientiæ, aliàs nulla daretur scientia, præter illam, quæ haberet Deum pro objecto; nam omnia, præter Deum, sunt quoad existentiam contingenta.

9 Ad secundam probationem antecedentis respondetur illam distinguendo; Logica non acquiritur per demonstrationem, perfectè artificialem, concedo; non acquiritur per demonstrationem naturalem; vel per demonstrationem imperfectè artificialem, nego. Ad probationem distinguo antecedens; Logica docet conficere demonstrationem, perfectè artificialem, concedo; demonstrationem naturalem, seu demonstrationem imperfectè artificialem, nego. Similiter distinguo primum consequens; ante Logicam non præsupponitur demonstratio, perfectè artificialis, concedo; naturalis, seu imperfectè artificialis, nego. Eodem modo potest distinguere secundum consequens; unde neganda est ultima consequentia.

10 Ut autem hæc solutio benè percipiatur, observandum est, quod demonstratio perfectè artificialis est illa, quæ non solum est iuxta re-

gulas Logicæ docentis, sed etiam necessariò præsupponit claram notitiam prædictarum regularum, ita ut illam conficiens, non solum cognoscat id, quod deducitur per illam demonstrationem, aliter se habere non posse; sed etiam illud possit reducere ad suas causas, & ostendere rationes, quibus aliter se habere non potest, quod quidem certum est, non posse fieri sine Logica artificiali; nam ipsa Logica docet, quomodo, & quibus regulis hæc demonstratio & tribuit rationes, seu causas, quibus id quod per demonstrationem deducitur, aliter se habere non potest, & sic talis demonstratio æquit præsupponi ad Logicam, imò potiùs necessariò præsupponit Logicam.

11 Demonstratio autem naturalis est illa, quæ licet, sit conformis regulis Logicæ docentis (aliàs non concluderet necessariò) tamen non præsupponit in conficiente illam, prædictas regulas, sed tantum præsupponit lumen naturale, quod *Logica naturalis* appellatur, & licet per illam cognoscatur, rem aliter se habere non posse; tamen non cognoscitur hoc evenire per causas demonstrationis, scilicet, eo quod demonstratio, taliter, vel taliter, iuxta tales, vel tales regulas, est disposita; unde hæc demonstratio non necessariò præsupponit Logicam artificialem, sed potiùs potest ad illam præsupponi. Demonstratio non perfectè artificialis solum addit supra demonstrationem naturalem, aliquam cognitionem alicujus regulæ Logicæ docentis, & sic præsupponit aliquam partem Logicæ artificialis, & ad alias partes præsupponitur.

12 Igitur, ut aliquid sit, & dicatur scientia propriè, & rigorosè, non necessariò requiritur, quod acquiratur per demonstrationem perfectè artificialem, sed sufficit, quod acquiratur per demonstrationem quomodocumque sumatur; nam quælibet demonstratio, ostendit, id quod  
per

per illam deducitur, aliter se habere non posse propter causam adductam in ipsa demonstratione, quod sufficit ad rationem scientiæ: nam propriè scire, est rem per causam cognoscere; ad quod non requiritur, quod demonstrationem conficiens, perfectè cognoscat causas, seu regulas, quibus perfectè demonstratio confici debet; hoc enim ostendere ad perfectam logicam artificialem spectat; ex quibus facillè ostenditur, quomodo logica sit scientia; nam primæ veritates illius acquiratæ fuerunt per demonstrationem purè naturalem, & postea aliæ veritates per demonstrationem imperfectè artificialem, eo quod veritates prius cognitæ, aliquomodo conducebant, & juvabant artificialiter ad cognitionem aliarum; unde logica secundum omnes suas partes est propriè scientia; nam semper logica artificialis perfecta præsupponebat demonstrationem, vel purè naturalem, vel aliquomodo artificialem.

13 Dicimus secundo: Logica docens reduplicativè ut logica docens est scientia. Hæc conclusio, licet in terminis non proponatur ab omnibus, tamen in re coincidit cum præcedenti, & probatur eadem ratione; nam omnes conclusiones, quæ deducuntur in logica per demonstrationem sunt actus logicæ docentis, ut logica docens est; nam omnes sunt regulæ in ordine ad rectè conficiendos modos sciendi, ut patet in illis, quæ proponuntur in antecedenti conclusione, & potest per similitudinem exemplificari in omnibus aliis: ergo logica, reduplicativè ut logica docens, est scientia. Hoc amplius patebit ex dicendis.

14 Argues contra: habitus, cuius actus non sunt scientifici, non est scientia: sed actus logicæ docentis, ut logica docens est, non sunt scientifici: ergo logica docens, ut logica docens est, non est scientia. Probatur minor: quia hic actus, v.g. *Syllogismus debet constare tribus propo-*

sitionibus, est logicæ docentis, ut logica docens est: sed non est actus scientificus, quippè non est deductus per demonstrationem: ergo actus logicæ docentis, ut logica docens est, non sunt scientifici. Respondetur negando minorem. Ad probationem dicimus, quod prædictus actus (& omnes alii logicæ docentis similiter sumpti) est actus logicæ docentis, ut logica docens est, tantum materialiter, non vero formaliter, & similiter dicimus, quod est actus scientificus materialiter, non vero formaliter; ex quo nullatenus sequitur, quod logica docens, ut logica docens est, non sit scientia.

15 Urautem hoc benè intelligatur, ex quo conclusionis intelligentia dependet, observandum est, quod actus logicæ docentis propriè, & formaliter non sunt tales quoadusque per demonstrationem illorum doctrina cognoscatur; quia non propriè, & formaliter docemur, nisi præbendo assensum actui, ita ut firmiter teneamus aliter se habere non posse ex principiis, ex quibus hoc ita cognosci potest, quod necessario debet fieri per demonstrationem ostendentem, per suas causas, & principia, rem ita se habere; quando autem talis actus nobis proponitur absolutè, & secundum se, & non deductus per demonstrationem, ut ponitur in argumento, dicitur actus docens materialiter, eo quod est materia actus, qui potest per demonstrationem deduci, & esse formaliter docens, quod facit ipsa logica docens, ut logica docens est; nam, non solum nobis proponit prædictum actum, sed etiam causas, & principia, quibus per demonstrationem deducitur, & nos illi assentimur indubitanter, ut quando conficitur hæc demonstratio: *Syllogismus est oratio in qua quibusdam positis, alterum quid a positis necessario sequitur: sed ad hoc necessario supponuntur dua præmissa ad conclusionem; ergo syllogismus necessario debet constare tribus propositionibus.*

16 Dicimus tertio: Logica docens, reduplicativè ut docens, non est scientia. Hæc conclusio est ferè communis inter recentiores Scotistas, & ut supra diximus, est quasi explicatio tertiæ sententiæ. Probatur breviter, quia ex Arist. 1. Priorum, omnis reduplicatio arguit universalitatem; hæc enim est bona consequentia; *Homo in quantum albus est disgregativus visus; ergo omne album est disgregativum visus*; cuius ratio est, quia cum reduplicatio donotet causam inhærentiæ prædicati in subiecto, ubicumque reperiatur talis ratio, quæ reduplicatur, erit causa talis inhærentiæ; ergo si Logica reduplicativè ut docens est scientia, erit bona hæc consequentia: *Logica, reduplicativè ut docens, est scientia*; ergo *omne docense est scientia*; sed hæc consequentia est falsa, qua datur aliquid docens, quod non sit scientia, ut sunt plures artes; ergo Logica, reduplicativè ut docens, non est scientia.

17 Argues contra; Hæc conclusio opponitur conclusioni præcedenti; ergo non est admittenda. Probatur antecedens; quia similiter ponitur reduplicatio in una, ac in alia. Resp. neg. ant. & ad probationem dicimus, quòd diversa est reduplicatio; nam in conclusione antecedentis reduplicatur totum hoc. *Logica docens*, ex qua reduplicatione sequitur hæc tantum consequentia; *Logica, docens, reduplicativè ut Logica docens, est scientia*; ergo *omnis Logica docens est scientia*; quæ vera est; in hac verò conclusione tantum reduplicatur *docens*, ex qua reduplicatione sequitur consequentia falsa apposita in conclusione, & sic, licet concedatur, Logicam docentem, reduplicativè ut Logicam docentem, esse scientiam; nullatenus tamen est concedendum, logicum docentem, reduplicativè ut docentem, scientiam esse.

18 Dicimus quartò; Logica docens, reduplicativè ut Logica docens, est ars liberalis. Hæc conclusio in re admittitur à pluribus Scotistis.

& eam tenet Franc. Alph. disp. procem. Logicae sect. 5. Probat, quia secundum Arist. 6. Ethic. cap. 4. *Ars est habitus cum vera ratione operativus*, seu est habitus cum vera ratione dirigens ad operationem in artificiosam, medio aliquo dictamine vero & determinato; sed Logica docens, in quantum Logica docens, dirigit intellectum cum vera ratione ad conficiendos artificiosè modos sciendi; ergo Logica docens, in quantum Logica docens, est ars. Deinde Philosophus videtur tenere hanc conclusionem, dum 1. Rhetoricè innuit, quòd nec rhetorica, nec dialectica quatenus tradunt praecepta, sunt scientiæ; sed artes.

19 Arg. 1. Ars, & scientia distinguuntur; sed Logica docens, in quantum Logica docens, est scientia; ergo non est ars. Resp. dist. mai. ars, & scientia, quæ non est scientia docens, distinguuntur, concedo; ars, & scientia docens, seu operis directiva, distinguuntur, subdistinguo; distinguuntur tanquam superius, & inferius, concedo; aliter, nego. Similiter distinguo minorem; Logica docens, in quantum Logica docens, est scientia operis directiva, concedo; aliter nego, & nego consequentiam. Etenim ratio artis præcisè consistit in hoc, quòd sit habitus determinatus ad eliciendum iudicium verum in ordine ad operationem artificiosam, quòd autem hoc iudicium verum deducatur per demonstrationem, vel alio modo, per accidens se habet ad rationem artis; itaque ars formaliter solum dictat modum conficiendi rem determinatè, & cum habitus docens sit ex se determinatus ad eliciendum iudicium regulativum alicuius operis, hinc est, quòd scientia docens, quæcumque illa sit, includit in suo conceptu formali rationem artis, tanquam quid superius.

20 Argues 2. Quando aliquod divisum dividitur per membra dividendia, tanquam per rationes oppositas, implicat, dari aliquod mem-

membrum dividens, quod simul contineat prædictas rationes oppositas; sed habitus intellectualis, secundum Philosophum, dividitur in scientiam, & artem; tanquam per rationes oppositas: ergo implicat, quod idem habitus sit simul scientia, & ars. Respondetur primò distinguendo minorem, habitus intellectualis dividitur in scientiam, & artem mechanicam, quæ est propriè ars, & est habitus cum ratione factivus ad extra, concedo, in scientiam, & artem liberalem, quæ solum per similitudinem ad artem mechanicam dicitur ars, & est habitus cum ratione operativus, sive ad extra, sive ad intra, nego. Similiter distinguo consequens; implicat, quod idem habitus sit simul scientia, & ars mechanica, concedo; simul scientia, & ars liberalis, nego.

21. Respondetur secundò distinguendo etiam minorem; habitus intellectualis dividitur in scientiam purè contemplativam, & artem, concedo; in scientiam non purè contemplativam, sed simul docentem, & directivam, & artem, nego; distinguo etiam consequens; idem habitus nequit esse simul scientia purè contemplativa, & ars, concedo, nequit esse simul scientia non purè contemplativa, sed simul docens, & directiva, subdistinguo, secundum eandem rationem formalem, concedo, secundum diversas rationes formales, nego. Etenim, idem habitus, ut dicit ordinem ad iudicium verum, & determinatum, in ordine ad operationem artificiosam, dicitur ars, ut autem ordinatur ad hoc, ut tale iudicium acquiratur per demonstrationem, dicitur scientia, quæ rationes se habent tanquam superius, & inferius, nam valet: *Est scientia docens, & regulativa*: ergo *est ars*. Non tamen valet è contra: *Est ars*: ergo *est scientia docens, & regulativa*. Vnde scientia purè contemplativa nullatenus potest dici ars, quia secundum nullam

rationem formalem ejus dirigit ad operationem.

22 Dicimus quintò : Logica docens , reduplicativè ut docens , non est ars . Hæc conclusio deducitur à simili ex tertia conclusione . Probatur eadem ratione : quia , ut ibi dictum est , omnis reduplicatio arguit universalitatem : sed datur aliquid docens , quod non sit ars : ergo Logica , secundum rationem præcisam docentis , non est ars . Prob. min. quia ars debet esse vera , certa , & determinata : sed dantur plures actus docentes , qui non sunt determinatè veri , & certi , sed tantum probabiliter , seu opinativè : ergo datur aliquid docens , quod non sit ars . Minor patet ex Aristot. 6. Ethic. Ubi excludit à ratione artis opinionem , seu conjecturam . Hæc conclusio non opponitur antecedenti ; quia est diversa reduplicatio , ut dictum est de conclusione tertia , respectu secundæ .

23 Dicimus sextò : Logica utens , in quantum Logica utens , non est scientia . Probatur de Logica actuali : quia actus scientificus est assensus conclusionis demonstratæ per causas : sed actus Logicæ utentis , ut Logicæ utentis , non est assensus conclusionis demonstratæ : sed potius est actualis constructio demonstrationis : ergo actus Logicæ utentis , ut Logicæ utentis , non est scientificus . Unde probatur etiam conclusio de Logica habituali ut utente ; quia nullus habitus dicitur scientificus , nisi quatenus inclinatus ad actum scientificum : sed Logica habitualis , ut Logica utens est , solum inclinatur ad perfectionem demonstrationis , seu alterius modi sciendi , quæ non sunt actus scientifici , ut dictum est : ergo Logica habitualis , ut Logica utens est , non est scientia . Hoc intelligitur formaliter , quia efficienter Logica utens potest dici scientia eo quod ipsa demonstratio est causativa , seu generativa scientiæ .

24 Dicimus septimò : Logica utens , reduplicativè



plicativè ut Logica utens, potest dici ars, quod patet; quia Logica utens, ut Logica utens, determinatè inclinatur ad confectiorem modi sciendi, qui dicitur, & est opus artefactum; ergo Logica utens, ut Logica utens, dicitur ars. Ubi adverte, quod si reduplicatio fiat solum secundum rationem utentis, non potest Logica utens dici ars, quod patet ex conclusione quinta.

26. Pro complemento quæstionis, & ut aliqua solvas argumenta, adverte, quod habitus Logicæ, absolutè loquendo, est habitus scientificus; quando autem dicimus, quod secundum aliquam rationem non est scientificus, non ita intelligendum est, quod aliquomodo negetur illi ratio scientiæ; sed ita quod ratio scientiæ, quam in se habet, non conveniat illi propter illam rationem, quod hoc exemplo facillè percipies; de homine, v. gr. affirmamus absolutè, quod est risibilis, possumus tamen dicere, *Homo, quatenus animal, non est risibilis*; per quod non negamus de homine risibilitatem; sed tantum affirmamus, risibilitatem, quam habet homo, non convenire illi ratione animalitatis, quod verum est, quia illi convenit ratione rationalitatis.

## Q U Æ S T I O V.

*Utrum Logica sit scientia practica, vel speculativa?*

**Q**uia resolutio hujus quæstionis dependet ex cognitione scientiæ practicæ, & speculativæ; & harum cognitio ex cognitione praxis, & speculationis, idè in illa erunt duæ sectiones, in quarum prima, prædictarum notitiam adducemus, & in secunda, quid sit tenendum investigabimus.

## S E C T I O I.

*Quid sint praxis, & speculatio declaratur.*

2 **S**upponitur tanquam certum apud omnes, quod speculatio sumit denominationem à verbo græco *Scopeo*, quod idem est, ac Latine *considero*, seu *contempler*; dicitur etiam speculatio, cognitio Theorica; sumpta denominatione à verbo græco *Thoreo*, quod idem est, ac Latine *Speculor*; ex quo omnes conveniunt, quod speculatio est cognitio, seu contemplatio essentiae, causae, vel proprietatis alicujus rei, similis illi contemplationi, seu cognitioni, quam habet, qui ex aliquo eminenti loco inferiora respicit. Praxis verò sumit denominationem à verb. græc. *Pratto*, quod idem est, ac Latine *facio*, *ago*, seu *operor*: unde praxis idem est, ac *factio*, *actio*, seu *operatio*, quæ licet idem videantur significare, si tamen in rigorosa significatione sumantur, diversimodè se habent; nam operatio latius patet, quam actio, & factio; nam illa comprehendit, non modo operationes externas cujuscumque potentiae, sed etiam internas voluntis, & intellectus; actio autem significat operationes externas, & internas, circa quas versatur electio Prudentiae; factio denique significat tantum operationes externas transeuntes in externam materiam, circa quas versatur ars mechanica. Hinc oritur difficultas in assignanda operatione, cui propriè convenient ratio praxis.

3 Dicimus ergo; Secutus quæst. 4. Prologi, §. Dico igitur, litt. A. sic praxim definit; *Est actus alterius potentia, quam intellectus, naturaliter posterior intellectiōne natus elici conformiter rationi recta, ad hoc ut sit actus rectus*; quæ definitio, ut optima, admittitur ab omnibus

Seco.

Scotistis, & ferè ab omnibus Thomistis contra Jesuitas communiter. Probatur tamen ejus bonitas, & in primis, quod sit actus alterius potentia, quam intellectus ex Scoto citato; nam juxta commune axioma, intellectus extensione fit practicus: sed hoc esset falsum, si praxis non esset actus alterius potentia, quam intellectus; nam stando præcisè in actibus intellectus, nulla est extensio intellectus; quia non tendit extra se, nisi ut actus ejus respicit actum alterius potentia; ergo praxis est actus alterius potentia, quam intellectus. Confirmatur, quia ideo voluntas dicitur practica sine extensione ad opera aliarum potentiarum, quia actus ejus verè, & propriè sunt praxis: ergo ex eo dicitur, quod intellectus extensione fit practicus: quia actus ejus non sunt praxis, & consequenter praxis est actus alterius potentia, quam intellectus.

4 Communiter Jesuitæ, & præcipuè Hurt. disp. 2. quæst. 2. & alii, ab ipso citati, dicunt, nulla auctoritate probari, praxim debere esse actum alterius potentia, quam intellectus seu quod idem est, intellectum extensione fieri practicum. Sed cum id expressè teneat Scotus, citatus, & etiam D. Thom. q. 14. de Veritate, dicens. *Intellectus practicus idem est, quod operativus; unde sola extensio ad opus facit aliquem intellectum esse practicum.* Deinde, idem videtur tenere Arist. lib. 3. de Anima cap. 10. ubi docet, intellectum practicum esse principium agendi, quod non debet intelligi, ita ut sit principium agendi actione intellectiva; nam hoc etiam habet intellectus speculativus: ergo ita ut sit principium agendi actione, quæ intellectiva nō est; sed actio, quæ non est intellectiva, est actus alterius potentia, quàm intellectus; ergo secundum Arist. praxis est actus alterius potentia, quam intellectus. Non ergo debet dici, quod nulla auctoritate probatur, quod tenent Arist. D. Thomas, &

Scotus, quorum auctoritate nulla major in rebus Scholasticis invenitur.

5 Quod praxis sit naturaliter posterior intellectione probat Scotus, ex eo quod actus non habentes ordinem ad intellectum, ut sunt negativi, aut actus sensitivi, qui naturaliter præcedunt intellectiōnem, & similiter actus appetitus potentiæ sensitivæ, quatenus præcedunt actus intellectus, non sunt praxis; quia hoc modo sunt communes nobis, & brutis; ergo idè est, quia praxis debet esse posterior intellectiōne.

6 Ex his duabus conditionibus praxis, scilicet, quod sit actus alterius potentiæ, quam intellectus, & quod sit posterior intellectiōne, infert Scotus, quod praxis, ad quam extenditur habitus practicus, non est, nisi actus elicited; vel imperatus à voluntate; quod patet; nam nullus alius actus ab actu voluntatis elicited, vel imperato, est actus alterius potentiæ, quam intellectus, & posterior intellectiōne: nam quicumque alius actus potest esse prior, sicut patet discurrendo per omnes actus aliarum potentiarum: ergo solum est praxis actus elicited, vel imperatus à voluntate.

7 Contra hoc arguit ipse Scotus, quia videtur sequi, quod aliqua intellectiō sit praxis, quod est contra primam conditionem. Probatur, quia aliqua intellectiō potest esse actus imperatus à voluntate: ergo aliqua intellectiō potest esse praxis, Respondet ipse Scotus negando sequelam, & ad probationem negando consequentiam; quia, licet verum sit, quod praxis debet esse actus elicited, vel imperatus à voluntate; non tamen ex hoc sequitur; quod omnis actus imperatus à voluntate sit praxis; sed solum sequitur, quod sit praxis, vel practicus; unde intellectiō imperata à voluntate potest denominari, quasi accidentaliter, à praxi, ad quam extensibilis est, non

tamen est terminus talis extensionis, quod requiritur ad rationem praxis: certum enim est, quod intellectus nullatenus, extenditur ad suos actus, licet à voluntate imperentur; nam extensio solum est ad materiam alienam, sive extraneam, nulla tamen intellectio est extranea ipsi intellectui.

8 Dubitabis tamen, quare actus aliarum potentiarum; quando imperantur à voluntate, sunt praxis, non vero actus intellectus; Respondetur, quod ex eo est, quod actus aliarum potentiarum ex se habent esse actus alterius potentie, quam intellectus, & quando imperantur à voluntate, sunt posteriores intellectione, & conformes rationi rectæ; actus autem intellectus numquam possunt esse actus alterius potentie, quam intellectus, quod ut dictum est, necessario requiritur ad rationem praxis. Quod amplius potest confirmari, quia praxis, & speculatio sunt oppositæ: sed quilibet actus intellectus per se est speculatio: ergo nullo modo potest esse praxis. Probatur consequentia; quia, quando aliquid alicui convenit per se, ejus oppositum, neque per se, neque per accidens, potest illi convenire: sed cuilibet actui intellectus convenit per se speculatio; ergo praxis, neque per se, neque per accidens, potest illi convenire.

9 Arguunt contra; omnis actus, ad quem inclinatur Prudentia, est praxis; sed Prudentia, inclinatur ad studendum tali tempore, vel tali modo: ergo actus intellectus taliter studendi est praxis. Confirmatur, quia cognitio imperata à voluntate potest esse bona, & meritoria: sed omnis actus meritorius est praxis: ergo aliqua cognitio potest esse praxis. Ad argumentum respondetur distinguendo majorem; omnis actus, ad quem inclinatur Prudentia, est praxis, si ad illum inclinatur immediate, concedo; si inclinatur mediate, subdistinguo, si aliàs talis actus

non est speculatio, concedo; si est speculatio, nego. Etenim, Prudentia immediatè inclinatur ad actum voluntatis, qui potest alios actus imperare, & cum actus voluntatis si praxis, sufficit ad hoc, ut Prudentia dicatur habitus practicus, siue actus imperatus à tali actu voluntatis sit praxis, ut sunt omnes actus aliarum potentiarum ab intellectu, quando à voluntate imperantur, siue sit speculatio, ut est actus intellectus, quomodocumque sumatur. Similiter respondetur ad confirmationem, quod tunc solum actus meritorius est praxis, quando ex alio capite non speculatio; sufficit autem, ad hoc, ut actus intellectus dicatur meritorius, quod cadat sub imperio voluntatis, in qua propriè, & primariò est meritum; non autem sufficit ad hoc, ut dicatur praxis, nisi extendendo nomen praxis ad quamlibet operationem, ut advertit Scotus supra citatus.

10. Adhuc arguunt contra: actus intellectus potest dirigi per alium actum ipsius intellectus, ut fiat rectus, ergo actus intellectus potest esse praxis: Probatur consequentia: quia actus intellectus dirigens actum voluntatis, est practicus; ergo similiter actus intellectus dirigens alium actum intellectus, erit practicus, & consequenter actus directus erit praxis. Respondetur distinguendo antecedens; actus intellectus potest dirigi per alium actum intellectus, ut fiat rectus rectitudine, quæ sit opus, nego; rectitudine, quæ sit veritas, concedo. Etenim, licet intellectus, seu cognitio dirigat aliam cognitionem, cum tamen illa cognitio semper sit veritas, numquam potest esse praxis, nam Philosophus 2. Metaph. tex. 2. distinxit rationem veritatis, quæ est propria speculationis, à ratione operis, quæ est propria praxis; dum dixit; *Speculativa etenim finis veritas; practica autem opus*. Unde nego consequentiam, & consequentiam probationis; quia solum actus intel-

le.

lectus dicitur practicus, quando dirigit praxim; non tamen quando dirigit speculationem, qualis est quilibet actus intellectus.

11 Arg. contra; Actus intellectus, qui dirigit alium actum intellectus, ut rectè fiat; non sistit in mera contemplatione sui obiecti, sed ulterius procedit ad illum rectè conficiendum; ergo talis actus, qui alium dirigit, est practicus, & consequenter actus directus est praxis. Respondetur distinguendo antecedens: procedit ad illum actum rectè conficiendum, ut rectè sciamus, concedo; ut rectè operemur, nego. Etenim, licet unus actus intellectus alium dirigat, semper dirigitur rectè sciamus, & rectè veritatem demonstremus; non autem ut rectè operemur, prout operatio dicit aliquid distinctum à ratione veritatis, quæ est propria speculationis: quòd clarè innuit commentator Arist. explicans supradictum textum his verbis; *Per speculationem scimus, ut sciamus; per praxiorem vero sumus scientes, ut operemur; quia practica finis opus*. Unde, nego utramque consequentiam.

12 Quòd praxis sit actus natus elici conformiter rationi rectæ, probatur ab ipso Scoto; ex Philosopho 6. Ethic. ubi dicit, quòd electio recta necessariò requirit rationem rectam, quod, inquit Scotus, non tantum verum est de electione strictè sumpta; sed pari ratione; de qualibet volitione recta; quia ipsa etiam requirit rationem rectam, cui conformiter eliciatur; sed quælibet volitio recta est praxis: ergo praxis debet esse conformis rationi rectæ.

12 Dices; actus pravus voluntatis est per se praxis; sed non est natus conformari rationi rectæ; ergo male ponitur prædicta particula in definitione praxis. Respondetur, quòd hic solum definivit Scotus praxim rectam, ut clarè denotant ipsius verba; nam dicit, *Ad hoc ut sit actus rectus*. Neque ex hoc sequitur, quòd Scotus processerit diminutè, praxim rectam definiens,

finiendo; nam, ut benè notavit Merinerus, cum rectum sit index sui obliqui, ex definitione praxis rectæ, facile colligitur definitio praxis obliquæ, quæ non est conformis, sed difformis rationi rectæ. Unde negatur consequentia.

14 Alii respondent, quòd per illa verba. *Natus elici conformiter rationi rectæ*, non debet intelligi ratio recta moralis, sed ratio recta artificialis, ut patet in artibus mechanicis, quarum operationes dicuntur praxes rectæ: eo quòd sint conformes regulis ipsius artis; licet non sint rectæ moraliter. Unde praxis bona potest dividi in bonam moraliter, & bonam artificialiter, & in malam moraliter, & malam artificialiter, & contingere potest, quod praxis mala moraliter sit bona artificialiter, & è contra, quod praxis mala artificialiter sit bona moraliter. Ex hoc autem non sequitur, quòd supradicta definitio conveniat praxi in communi, nam ut ex se patet, tantum convenit praxi rectæ in quocumque sensu sumatur rectitudo, licet in alio sensu sit praxis obliqua. Unde praxis in communi sic potest definiri; *Est actus alterius potentia, quam intellectus, naturaliter posterior intellectiōe, & ab ipsa intellectiōe regulatus*; & hoc, siue conformetur, siue non rationi regulanti.

15 Ex duabus ultimis conditionibus praxis infert Scotus, quòd actus imperatus à voluntate non est primo praxis, sed quasi per accidens, quia, nec primo est posterior intellectiōe, nec primo natus elici conformiter rationi rectæ, sed hoc habet ab actu imperante voluntatis cui primo, & per se convenit ratio praxis. Quod sic ostenditur, quia quandocumque aliquid est primo tale conjunctum cum alio posteriori, si potest separari ab illo, adhuc esset tale; si igitur actus voluntatis potest separari ab actu alterius potentia, separatus ab illo posteriori, ille est praxis; separatur autem circa quodcumque ob-  
obje-



objectum, circa quod potest esse actus voluntatis, & circa quod non potest esse actus inferioris potentiae, cujusmodi sunt omnia immaterialia: ergo circa omne tale est actus voluntatis, & iste solus est praxis; hæc Scotus: sed actus aliarum potentiarum non sunt huiusmodi, nam non sunt naturaliter posteriores intellectiōe, neonati elici conformiter rationi rectæ, nisi prout imperantur à voluntate, quando enim à voluntate non imperantur, jam sunt priores; jam posteriores intellectiōe: ergo solus actus voluntatis est primo, & per se praxis, actus verò aliarum potentiarum solum secundariò, & quasi per accidens.

16 Infert etiam Scotus, quod scientia practica consistit in duplici relatione prioritatis, & conformitatis ad praxim: quæ duplex relatio non est actualis, sed aptitudinalis, quod probat; quia si talis duplex relatio deberet esse actualis, nulla scientia esset necessariò practica, sed aliquando esset practica, scilicet, quando actualiter extenderetur ad praxim, & aliquando speculativa, scilicet, quando actualiter non extenderetur: sed hoc non est dicendum; quia scientia practica semper est practica: ergo talis duplex relatio non debet esse actualis, sed sufficit aptitudinalis. Unde sequitur, quod scientia speculativa consistit in negatione prædictæ duplicis relationis ad praxim; sed advertit Scotus, quod divisio scientiæ in practicam, & speculativam per prædictas relationes, & negationes earum, non est divisio per differentias essentielles sed per proprias passiones consequentes differentias nobis ignotas, quod patet, quia scientia est quid absolutum: sed neque relatio, neque negatio potest esse de essentia absoluti: ergo prædicta divisio per prædictas relationes, & negationes illarum, non datur per differentias essentielles.

17 Hic potest dubitari, à quo principio scientia dicatur practica? Respondetur, quod lo-

quen-

quando de principio intrinseco, constituitur per duplicem relationem supradictam, seu per differentiam nobis ignotam, ad quam sequitur. Loquendo autem de principio extrinseco, à quo habet talem duplicem relationem, respondetur cum Scoto quæst. 4. citata, litt. G. quod scientia non dicitur practica ex fine, in quantum finis est, sed in quantum est objectum. Probatur, quia finis non movet potentiam, nisi ut amatur: sed scientia est practica, sive finis ametur, sive non: ergo scientia non dicitur practica à fine, ut finis. Probatur minor; quia multi possunt habere notitiam practica huius propositionum: *Vivendum est rectè; proximus est diligendus*, & simul, neque rectè vivere, neque proximum diligere: ergo sive finis ametur, sive non, scientia est practica, & consequenter ratio practici, non sumitur à fine, ut finis est. Quod autem sumatur ab objecto, ex eo probat Scotus, quod ab objecto, & potentia paritur notitia: sed notitia non habet esse practica à potentia; aliàs omnes scientiæ essent practicae, cum proveniant ab eadem potentia: ergo hoc habet ab objecto.

18 Advertit tamen Scotus, Vers. Ad tertium dico, sub litt. O, quod non requiritur ad rationem practici, quod expressè, & formaliter dicet de rectitudine praxis; sed tantum virtualiter, seu, quod idem est, sufficit, quod versetur circa objectum, quod etiam, si non sit formaliter rectitudo praxis; contineat tamen virtualiter talem rectitudinem, v. gr. ut scientia dicatur practica, sufficit, quod versetur circa Deum, qui est summum bonum; licet hæc veritas formaliter non sit directiva praxis, per hoc præcisè, quod contineat virtualiter hanc veritatem: *Deus est summè diligendus*, cuius notitia est formaliter directiva praxis.

19 Adverte tamen pro complemento sectionis, & ad auferendam æquivocationem, quod  
quan-

quando communiter dicitur, quod objectum scientiæ practicæ est quid operabile; non ita est intelligendum, ut necessario fieri debeat actionibus practicè cognoscentis; sed sufficit; quod tale objectum sit res, circa quam possit elici praxis; nam hoc est sufficiens, ut sit objectum virtualiter continens dictamen practicum, quod patet in medicina, cujus objectum est corpus humanum sanabile, quod non fabricatur à medico, sed tantum circa illud potest exercere aliquas operationes, quæ sint praxis, & tamen medicina est scientia practica. His prælibatis de praxi, & speculatione, de scientia practica, & speculativa in communi, sit

## S E C T I O II.

*In qua resolvitur quæstio:*

20 **C**irca præsentem difficultatem sunt plures sententiæ Prima asserit Logicam, neque esse practicam, neque speculativam, sed tantum instrumentum indifferens, & commune, tam scientiis practicis, quàm speculativis. Secunda tenet, Logicam esse simpliciter scientiam practicam. Tertia affirmat, esse partim practicam, & partim speculativam. Quarta denique asserit, esse absolute scientiam speculativam. Pro hac quarta sententia, quam tenent omnes Scotistæ, & communiter Thomistæ, stat Scotus quæst. 4. Prologicit. §. *Dico igitur*, lit. A. & D. Thomas 1.2. quæst. 27 artic. 3. ad 3. & 2.2. q. 51. art. 2. in solutione ad 3. Pro aliis sententiis citantur plures Authores à recentioribus. Nos autem per sequentes conclusiones, quid videtur tenendum proponemus.

21 Dicimus primò: Logica debet esse practica; vel speculativa. Hæc conclusio est contra primam sententiam. Probatur; quia Logica debet esse directiva, vel non directiva praxis: sed  
si est

si est directiva praxis, est practica, & si non est directiva, est speculativa: ergo Logica debet esse practica, vel speculativa.

22 Arguunt contra: scientia, cujus finis abstrahit à practico, & speculativo, non est practica, neque speculativa: sed finis Logicæ est dirigere intellectum, ne erret circa cognitionem entis in aliis scientiis, prout abstrahunt à practico, & speculativo; ergo Logica, neque est practica, neque speculativa. Respondetur distinguendo majorem; si loquatur de fine intrinseco, admitto; si loquatur de fine extrinseco, nego. Similiter distinguo minorem: finis Logicæ est, qui assignatur in illa, si loquatur de fine extrinseco, concedo; si loquatur de fine intrinseco, nego, & nego consequentiam. Etenim finis intrinsecus Logicæ est ipsum suum objectum, seu dirigere operationes intellectus, ne errent circa illud, quod facit Logica modo speculabili, quod sufficit, ut dicatur scientia speculativa; finis autem extrinsecus Logicæ, est dirigere operationes intellectus, ut errent circa objecta aliarum scientiarum, quod facit abstrahendo ab his, quod scientiæ respiciant sua objecta practice, vel speculative, quod non obstat, ad hoc, ut Logica sit scientia speculativa; nam scientia dicitur talis, vel talis à suo intrinseco fine, vel objecto.

23 Dicimus secundò; Logica non est simul practica, & speculativa. Hæc conclusio est contra tertiam sententiam. Probatur, quia quando aliquod commune dividitur per differentias essentielles, vel per proprias passiones ipsas differentias consequentes, implicat, quod utraque differentia, vel utraque propria passio in aliquo inferiori reperiatur; sed scientia in communi dividitur in practicam, & speculativam per proprias passiones, modo supra dicto; ergo implicat, quod detur aliqua scientia, quæ simul sit practica, & speculativa. Probatur major à simili, quia

quia ex eo quod animal dividatur in hominem, & brutum per differentias essentielles, implicat, quod aliquod inferius sit simul homo, & brutum: ergo propter eandem rationem implicat, quod aliqua scientia sit simul practica, & speculativa.

24 Respondent, hoc tantum probare, quod nulla scientia potest esse simul practica, & speculativa formaliter; non tamen, quod non potest esse speculativa formaliter, & practica virtualiter. Sed contra est; quia, quidquid probat, scientiam aliquam esse practicam virtualiter, probat etiam, esse practicam formaliter: sed nequit esse simul practica, & speculativa formaliter: ergo nequit esse speculativa formaliter, & practica virtualiter. Probatur major; quia, ad hoc, ut aliqua scientia sit virtualiter practica; necessarium est, quod habeat virtutem, seu aptitudinem regulandi praxim: sed per talem virtutem, seu aptitudinem constituitur scientia practica formaliter, ut dictum est eum Scoto sect. antecedenti num. 16. & 18. ergo quidquid probat scientiam esse practicam virtualiter, probat etiam esse practicam formaliter. Deinde ex eo quod animal dividatur in rationale, & irrationale, nullum inferius potest esse simul rationale formaliter, & irrationale virtualiter: ergo ex eo quod scientia dividatur in practicam, & speculativam, nulla scientia inferior potest simul esse speculativa formaliter, & practica virtualiter.

25 Arguunt 1. Logica est janua ad omnes scientias acquirendas: sed scientiæ, aliæ sunt practicæ, aliæ speculativæ: ergo Logica est simul practica, & speculativa. Respondetur negando consequentiam: quia, ut dictum est n. 22, quod Logica sit janua ad alias scientias acquirendas, est finis extrinsecus illius, à quo non sumit rationem practici; vel speculativi; sed à suo fine, seu objecto intrinseco; Logica autem semper esset janua ad omnes scientias acquirendas

das eodem modo, quo nunc est, scilicet, regulando intellectum: licet omnes scientiæ essent practicæ, vel omnes speculativæ.

26 Arguunt 2. Eadem potentia, scilicet, intellectus, est simul practica, & speculativa: ergo idem habitus Logicæ potest simul esse practicus, & speculativus. Respondetur negando consequentiam; quia ratio practici, & speculativi accidentaliter conveniunt intellectui, quippe conveniunt illi ab actibus, vel habitibus in ipso accidentaliter existentibus; at verò ipsa ratio practici, & ratio speculativi conveniunt actibus, & habitibus essentialiter; unde, licet unus; & idem intellectus possit simul utramque rationem habere; non tamen unus, & eadem actus, vel habitus scientificus: sicut idem intellectus potest simul habere plures habitus, tam scientificos, quàm opinativos; & tamen unicus habitus, vel actus nequit simul esse plures scientiæ: nec scientia, & opinio simul. Cujus ratio est; quia objectum Logicæ, sicut cujuslibet alterius habitus, & actus, est aliquod ens determinatum secundum aliquam determinatam rationem; objectum verò intellectus est omne ens secundum omnes suas rationes, tam practicas, quàm speculativas.

27 Dicimus tertio: Logica est purè speculativa secundum omnes suas partes; non autem practica. Hæc conclusio est juxta quartam sententiam, & contra secundam. Probatur, quia scientia speculativa est, quæ non dirigit praxim: sed Logica secundum omnes suas partes non dirigit praxim: ergo Logica secundum omnes suas partes est speculativa, & consequenter non est practica. Probatur minor; quia Logica secundum omnes suas partes dirigit operationes intellectus: sed operationes intellectus non sunt praxis, ut dictum est: ergo Logica secundum omnes suas partes non dirigit praxim. Confirmatur primò, quia Logica procedit ex principiis

ciplis speculativis, ut sunt: *Dici de omni: dici de nullo*, &c. sed habitus procedens ex principiis speculativis est speculativus: ergo Logica est scientia speculativa. Secundo, quia scientia, in qua quæritur scire propter scire, est speculativa, ut patet ex illo Arist. *Speculativa etenim finis veritas*, &c. sed Logica quærit scire propter scire, nam est habitus ex se ordinatus, ut intellectus rectè, & sine errore procedat: ergo Logica est speculativa.

28 Arguunt 1. ex Arist. 6. Metaph. cap. 1: ubi divisit scientiam speculativam in Physicam, Metaphysicam, & Mathematicam, & nullam facit mentionem de Logica: ergo Logica non est scientia speculativa. Respondetur negando consequentiam, quia ibi Arist. solum divisit scientiam speculativam realem, prout distinguitur a fermocinali, & rationali, ideoque non fecit mentionem de Logica, quæ est scientia rationalis, & fermocinalis. Tamen 3. Metaph. text. 2. appellat Logicam scientiam speculativam, his verbis: *Dialectici solum per scrutationem ex probabilibus faciunt, quorum Theorica est de omnibus*.

29 Arguunt 2. Scientia, quæ dirigit ad opus, seu procedit modo operabili, est practica: sed Logica dirigit ad opus, & procedit modo operabili, nam dirigit operationes intellectus, tradendo modos, & præcepta ad conficiendos syllogismos: ergo Logica est scientia practica. Respondetur distinguendo majorem; si tale opus est praxis, concedo; si non est praxis, ut non sunt operationes intellectus, nego. Solum enim sequitur, quod Logica, propter modum procedendi, similitudinariè sit practica, seu extendendo nomen praxis ad quamlibet operationem non autem quod propriè sit practica, cum solum dirigat operationes intellectus, quæ tantum sunt praxes extendendo nomen, quod expressè tenet Scotus 6. Metaph. quæst. 1. his verbis

Logi.

*Logica potest dici practica extendendo nomen; quia autem actus, quem dirigit, non est nisi speculatio, ideo Logica non est practica.*

30 Arguunt 3. Scientia speculativa debet sistere in contemplatione sui objecti, seu debet esse propter se: sed Logica non est propter se, sed propter alias scientias: ergo Logica non est speculativa. Respondetur distinguendo majorem; scientia speculativa principalis, seu purè contemplativa, est propter se, concedo; scientia speculativa ministralis, non purè contemplativa, sed etiam regulativa, est propter se, nego; & concessa minori, distinguo consequens; Logica non est scientia speculativa, principalis, & purè contemplativa, concedo; ministralis, non purè contemplativa, sed etiam regulativa, nego. Deinde habitus speculativus dicitur esse propter se, quia est propter operationem intellectus, & practicus dicitur esse propter aliud; quia est propter operationem alterius potentie ab intellectu; & sic etiam Logica potest dici propter se.

31 Arguunt 4. Scientia speculativa est nobilior scientiis practicis; sed Logica non est nobilior scientiis practicis; cum nobilitas scientie desumatur ex nobilitate objecti, & Logica habeat pro objecto secundam intentionem, quæ est imperfectissimum objectum; ergo Logica non est scientia speculativa. Respondetur primo, sicut ad præcedens argumentum, quod major est vera de scientia speculativa principali; non autem de ministrali, ut est Logica. Secundo respondetur, quod scientia speculativa est nobilior scientiis practicis ex modo attingendi objectum; & in hoc sensu etiam Logica potest dici nobilior scientiis practicis, at verò ex ratione objecti non potest scientia speculativa dici nobilior scientiis practicis; nam potest scientia practica habere nobilius objectum, quam speculativa.



32 Arguunt 5. Circa praxim potest dari scientia speculativa : ergo circa speculationem potest dari scientia practicata, & consequenter logica potest esse practica, licet respiciat speculationem. Antecedens patet, quia scientia de anima est speculativa, & respicit operationes voluntatis, quæ sunt praxis. Respondetur distinguendo antecedens; circa praxim, ut praxis est formaliter, potest dari scientia speculativa, Inego; circa praxim, quatenus possunt cognosci speculativæ veritates illius, concedo; quod contingit in scientia de anima respectu operationum voluntatis. Similiter distinguo consequens circa speculationem potest dari scientia practica, ut speculatio formaliter est, nego; quatenus aliqua scientia dirigit praxim exercendam circa speculationem, concedo. Ubi advertendum est, quod in tali casu, scientia non respiceret per se, & immediatè speculationem, sed tantum mediatè; immediatè autem respiceret praxim exercendam circa speculationem, v. g. quando habitus Prudentiæ dirigit actum voluntatis imperantem speculationem, tunc actus voluntatis, qui est praxis, immediatè respicitur a Prudentia, speculatio autem mediatè, & quasi per accidens. Unde negatur ultima consequentia, quia logica semper respicit speculationem, ut speculatio est.

## Q U Æ S T I O . VI.

### *Quodnam sit obiectum Logica.*

**U**T commodius hæc quæstio resolvatur, necessarium est aliqua de objecto incommuni præmittere, & omissis pluribus (quæ satis confusè ab aliquibus solent adduci) quæ clariora, & communiora sunt, in præsentì proponemus, & sic præsentem quæstionem in duas sectiones dividemus, in quarum prima, rationem

nem obiecti in communi declaravimus, & in  
secunda quæstione resolvemus. Sit ergo

## S E C T I O I.

*In qua agitur de obiecto in communi.*

2 **P**RO intelligentia huius sectionis notandum est, quod hæc nomina, *obiectum*, *subiectum*, & *materia* pro eodem usurpantur, pro illo, scilicet, quod proponitur cognoscendum in aliqua scientia. & dicitur obiectum, quatenus obicitur scientiæ cognoscendum; dicitur subiectum; quia de illo demonstrantur passionnes in scientia, quarum est subiectum, & causa; & dicitur materia, quatenus demonstrationes, quæ fiunt a scientia, circa ipsum versantur, vel in materia illius conficiuntur. Hoc notato.

3 Dicimus primò: obiectum cuiuscunque scientiæ est duplex, materiale, scilicet, & formale. Obiectum formale est illud, quod per se primò respicitur a scientia, & omnia alia quæ in scientia tractantur, ratione illius respiciuntur: quod etiam dicitur obiectum attributionis; quia omnia, quæ in scientia tractantur, ad ipsum ordinantur, & reducuntur. Obiectum materiale est illud, quod attingitur a scientia ratione obiecti formalis. Quorum exempla adducit Scotus in 2. dist. 24. *Vers. Ad Aliud*, lit. E. in colore, qui est obiectum formale visus, eo quod primo, & per se respicitur a potentia visiva, & in albedine, quæ est obiectum materiale visus, eo quod non primo, & per se attingitur a potentia visiva, sed secundariò, & ratione coloris. Ubi etiam obiectum formale dicitur ab Scoto, quod est adæquatum potentiæ, ut ipse color, respectu potentiæ visivæ, obiectum vero materiale, quod non est adæquatum potentiæ, ut ipsa albedo, respectu ipsius potentiæ visivæ.

4 Dicimus secundò : obiectum materiale aliud est per se, & aliud per accidens. Obiectum materiale per se est illud, quod verè, & propriè secundum suam rationem attingitur à scientia, licet non gratia sui, sed gratia obiecti formalis, ut albedo, quæ per se attingitur à potentia visiva, non gratia sui, sed gratia coloris, ut benè notavit Lichetus super Scotum citatum. Vbi adverte, ad auferendam æquivocationem, quod obiectum materiale, per se etiam potest dici obiectum formale parziale, seu inadæquatum. Obiectum materiale per accidens est illud, quod non attingitur à scientia secundum suam rationem; sed quia habet aliquam connexionem accidentalem cum eo, quod attingitur secundum suam rationem; ut paries qui non attingitur à potentia visiva secundum suam rationem, sed quia habet connexionem accidentalem cum albedine, quæ ut dictum est, secundum suam rationem attingitur à prædicta potentia. Adhuc obiectum materiale per se, seu formale parziale, & inadæquatum aliud est principalius, & aliud minus principale. Principalius est, quod inter materialia, seu formalia inadæquata, cætera excedit, ut albedo, respectu potentix visivæ; quia excedit alios colores. Minus principale est quodlibet aliud ex cæteris obiectis materialibus, seu formalibus inadæquatis, ut sunt cæteri colores, respectu prædictæ potentix visivæ.

5 Dicimus tertio: obiectum formale, aliud est *ut quo*, aliud *ut quod*. Obiectum formale *ut quo*; quod etiam dicitur, *ratio formalis sub qua*, est illa ratio, propter quam aliqua materia pertinet ad aliquam determinatam scientiam. Obiectum formale *quod*, est totum aggregatum ex prædicta ratione formali, & tali materia, quod pater in obiecto potentix visivæ; nam ratio formalis *sub qua*, seu obiectum formale *quo* est color, obiectum verò

formale quod est totum aggregatum ex colore, & pariete v.g. quod dicitur coloratum.

6 Vbi advertendum est, pro maiori claritate, quod de eadem materia possunt dari plures scientiæ, v. gr. de homine potest sciri per Metaphysicam, quod sit unum, verum, bonum, &c. per Physicam, quod sit quid mobile, per Medicinam, quod sit quid curabile, unde cum scientiæ distinguantur per obiecta, ad illarum distinctionem non est attendenda materia obiecti, cum sit una in illis; sed ratio formalis *sub qua*, à qualibet scientia respicitur talis materia, ut patet in supradictis; nam Metaphysica respicit hominem sub ratione entis; Physica sub ratione corporis naturalis, & Medicina sub ratione curabilitatis, quæ sunt rationes diversæ diversificantes prædictas scientias.

7 Dicimus quarto; obiectum formale adæquatum, seu attributionis, sic definitur ab Scoto quæst. 3. Prologi, & 2. Lateralis, §. *De secundo dico*, litt. B. *Ratio primi subiecti est continere in se primo virtualiter omnes veritates illius habitus, cuius est subiectum.* Ex qua definitione orta est inter Scotistas non levis difficultas in explicando, quid intelligatur per illa verba; *Continere in se primo virtualiter*, &c. an scilicet obiectum, seu subiectum debeat continere omnes veritates sui habitus in genere causæ efficientis; an verò in genere causæ finalis.

8 Circa quam difficultatem, aliqui Scotistæ in manuscriptis tenent, hoc debere intelligi de continentia in genere causæ finalis, sed maior pars Scotistarum, cum Maffrio in Logica, disp. 12. artic. 4. & Poncio disp. 2. quæst. 2. & Merinero disp. procm. quæst. 4. tenet, hoc debere intelligi de continentia in genere causæ efficientis; cum quibus.

9 Dicimus quinto in ordine: prædicta verba Scoti debent intelligi de continentia in genere causæ efficientis, quod videtur magis conforme

me ipsius verbis Scoti, nam inquit: *Obiectum continet propositiones immediatas; quia subiectum istarum continet predicatum, & ita evidentiam totius propositionis, propositiones autem immediata continent conclusiones; sed hæc continentia est in genere causæ efficientis, nam præmissæ continent conclusiones in genere causæ efficientis; ergo continentia virtualis objecti est in genere causæ efficientis.*

10 Noster Lichetus, super prædictum locum Scoti, plura satis lucida ad huius definitionis, & huiusmodi continentię intelligentiam; adducit, & ponit exemplum in homine, v. gr. qui immediate continet hanc propositionem immediatam; *Homo est animal rationale*, & hoc formaliter, & essentialiter, & quia talis immediata propositio, eo quod sit hominis definitio, est medium ad demonstrandas passiones de ipso homine; tanquam causa, & radix, ratione cuius homini propriæ passiones conveniunt, hinc dicitur hominem virtualiter continere veritates, quæ de ipso possunt demonstrari, ut sunt v. g. istæ; *Homo est visibilis, homo est admirativus*; quia includit in se formaliter illam immediatam, quæ in demonstratione se habet, ut causa efficiens illarum, & causa efficiens virtualiter continet suum effectum, & sic continentia illius propositionis immediatæ respectu prædictarum veritatum, est immediata; quia immediate, & per se in demonstratione illas causat; at verò continentia subiecti, scilicet hominis, est mediata, quia non immediate, & per se, sed mediatè, & per suam definitionem, quam essentialiter includit, illas causat; sic similiter dicendum est de quolibet objecto, seu subiecto alicujus scientiæ, scilicet, quod continet in genere causæ efficientis omnes veritates, quæ de ipso in scientia demonstrantur, quia definitio illius est medium in demonstratione ad prædictas veritates causandas.

11 Advertit tamen ipse Lichetus, quod, ut objectum sit adæquatum, non requiritur, quod contineat virtualiter omnes veritates omnium rerum, quæ tractantur in illa scientia, sed solum omnes passionēs, & proprietates convertibiles cum illo, ut quando ponitur aliquod subiectum commune genericum in aliqua scientia, non requiritur, ut sit subiectum illius, quod contineat proprietates inferiorum, sed sufficit, quod contineat proprietates convertibiles cum illo, & quod similiter quodlibet inferiùs contineat etiam proprietates convertibiles cum illo, & in tali casu, quot species continentur sub illo subiecto communi, tot specificæ scientiæ possunt hiberi, & sicut à prædictis inferioribus potest abstrahi unum obiectum commune communitate generica, ita ab illis scientiis partialibus, & specificis potest abstrahi una scientia communis, etiam communitate generica.

12 Quod, ut benè advertit Mastrius citatus, intelligitur de propria, & rigorosa continentia verum enim est, quod propriè, & rigorosè subiectum commune genericè solum continet virtualiter omnes veritates, seu proprietates cum illo convertibiles, at verò extendendo nomen *continentia*, ita ut non solum significet continentiam propriam, & proximam, sed etiam continentiam impropriam, & remotam, quæ inquit, consistit in hoc, quod subiectum commune sub se contineat sua inferiora, ut totum potentiale, benè potest dici, quod obiectum commune genericè etiam continet virtualiter omnes veritates suorum inferiorum, quia potentialiter continet inferiora, quæ virtualiter propriè, & proximè suas veritates continent, quod videtur colligi ex Scoto in 3. dist. 36. *Vers. Qualiter autem*, sub litt. **I.** Aliter autem explicat Pontius citatus prædictam virtualem continentiam obiecti communis in genere causæ efficientis; scilicet, quod tunc dicitur obiectum continere omnes veritates

tes illius habitus, cuius est obiectum, quando omnes prædictæ veritates in genere causæ efficientis continentur, & causantur ab omnibus illis, quæ in scientia tractantur, & ad obiectum commune reducuntur. Hæc explicatio, licet in verbis differat, in re tamen eadem videtur, ac explicatio Mastrii supra adducta de continentia remota, & impropria. Aliter etiam explicant alii prædictam continentiam, scilicet, quod obiectum commune continet omnes prædictas veritates, tanquam causa partialis obiectiva, eo quod omne commune includitur ut pars in suis inferioribus; ut animal, v. g. quod est commune homini, & bruto, includitur in illis ut pars essentialis, & sic continet virtualiter partialiter obiectivè omnes proprietates hominis, & bruti, quia totus homo, & totum brutum continent virtualiter suas proprietates; licet ratio illas continendi fiat suæ specificæ differentię; non tamen ratio continens. Hæc explicatio deducitur ex Scoto in 3. dist. 25. q. 2. vers. *ad secundum quæsitum*, litt. C.

13 Tenentes, hanc continentiam non esse in genere causæ efficientis: arguunt ex Scoto pro nostra conclusione citato, nam litt. D. dicit: *Ad primum respondeo, quod proportio obiecti ad potentiam est proportio motivi ad mobile, vel activi ad passivum: proportio subjecti ad habitum est sicut proportio causa ad effectum*; ergo in diverso genere causæ proportionatur subiectum ad habitum, ac proportionatur obiectum ad potentiam: sed obiectum motivum respicit potentiam in genere causæ efficientis, quia in hoc genere causæ movet illam: ergo habitus, & subiectum non proportionantur in genere causæ efficientis. Respondetur distinguendo minorem subsumtam; est enim vera loquendo de causa efficienti improprie sumpta; falsa autem loquendo de causa efficienti proprie sumpta. Unde negatur consequentia. Etenim obiectum, ut bene nota

Lichetus, non dicitur movere potentiam in genere causæ efficientis, quia aliquo modo sit causa efficiens ipsius potentia; nullatenus enim obiectum potentiam causat; sed tantum dicitur causa efficiens, eo quod aliquid producit in potentia, scilicet, speciem sui, quod improprie dicitur causare respectu potentia; licet proprie respectu speciei, subiectum autem proprie respicit scientiam in genere causæ efficientis; nam, simul cum potentia producit actus, seu veritates scientia, qui quidem actus in eodem genere causæ efficientis proprie causant habitum scientificum, Ex quo clarè apparet differentia. Ubi advertendum est, ut alia argumenta solvantur, quod obiectum alicuius scientia potest etiam dici finis illius (quod intelligitur de fine operis, non de fine operantis.) non tamen exerceat rationem obiecti in genere causæ finalis; sed in genere causæ efficientis, ut dictum est cum Scoto. quæst. antec. num. 17.

14 Ex quibus colligitur, quod ad rationem obiecti formalis adæquati alicuius scientia, tres conditiones necessario requiruntur. Prima, quod in scientia præsupponatur; non solum, quod sit obiectum, sed etiam quid sit, id est, quod præsupponatur eius essentialis definitio; quia in scientia demonstrantur passionēs de obiecto per illius essentialē definitionem. Secunda, quod obiectum habeat passionēs, quæ in scientia demonstrantur. Tertia, quod scientia, & obiectum adæquentur, ita ut nihil sit in obiecto, quod non consideretur a scientia, & nihil consideretur a scientia, quod non pertineat ad obiectum; quia scientia sumit suam unitatem ab obiecto formali, quam nullatenus ab illosumeret, si scientia, & obiectum non adæquarentur.



## S E C T I O II.

*In qua resolvitur quæstio.*

15 **C**irca præsentem difficultatem tot sunt sententiæ, quod valdè molestum, & prolixum esset illas sigillatim recensere; nam teste Mastrio quæst. proœm. de Natura Logicæ art. 3. viginti, & amplius numerantur; & licet non omnes ipse proponat, plures adducit, quæ apud ipsum possunt videri, & nos omittimus, tam brevitatis causa, quam quia ex dicendis in hac, & sequentibus quæstionibus, aliqua illarum notitia deducetur.

16 Notandum tamen est, ut clarè procedamus, primo, quod obiectum adæquatum Logicæ non sunt voces, quia licet Logica, sicut quælibet alia scientia, utatur vocibus ad significandas res, de quibus agit; tamen negari non potest, primariò agere de rebus significatis per voces, quod non solum docuit Arist. 4. Metaph. cap. 5. sed etiam patet experientia; nam semper experimur, quod etiam si Logici vocibus disputent, non tamen disputant de vocibus, non enim inquirunt, v.g. quid significet hæc vox; *Syllogismus*? Sed quo modo debeat confici, vel quas proprietates habeat res, quæ vocatur syllogismus?

17 Secundo notandum est, quod Logica dupliciter potest considerari. Primo, prout tantum comprehendit libros Logicales Arist. qui nunc extant, ut sunt libri categoriarum, Periermeniarum, Analyticorum, Topicorum, & Elenchorum, quibus jungitur liber Porphyrii de prædicabilibus. Secundo, prout non solum comprehendit prædictos libros, sed etiam duos tractatus de definitione, & divisione, qui ab aliquibus tribuuntur Socrati, & Platoni, & ab aliis ipsi Aristoteli; qui tractatus, ut aliqui tenent, injuria temporum perierunt. His notatis.

18 Dicimus primò : obiectum adæquatum Logicæ, in primo sensu, est syllogismus in tota sua latitudine. Hæc conclusio est communis inter Scotistas, & tenet eam Scotus. quæst. 3. universalium. Probatur; quia illud debet poni pro obiecto adæquato Logicæ, in quo tres supradictæ conditiones reperiuntur: sed huiusmodi est syllogismus: ergo syllogismus est obiectum adæquatum Logicæ in prædicto sensu. Minor, in qua potest esse difficultas, sic ostenditur; quia definitio syllogismi traditur ab Arist. 1. Priorum; deinde in eodem libro demonstrat passiones de syllogismo; denique nihil agitur in Logica, quod non reducatur ad syllogismum; nam in libr. Categ. agitur de rebus simplicibus, scilicet, substantia. quantitate, qualitate, &c. quatenus sunt materia remota syllogismi; in lib. Perierm. de propositione, ut est materia proxima syllogismi in libr. de prior. de forma syllogismi, & proprietatibus illam consequentibus, in lib. Posterior. Topicor. & Elenchor. de syllogismo demonstrativo, topico, & sophistico, qui sunt partes subiectivæ syllogismi: ergo syllogismus in tota sua latitudine habet prædictas tres conditiones; quippè præsupponitur; quid sit, id est, eius essentialis definitio, habet proprietates, quæ de illo in Logica demonstrantur, & adæquatur cum ipsa Logica in sensu conclusionis: ergo est obiectum formale, & adæquatum illius.

19 Arguunt 1. Nihil est obiectum adæquatum totius, & partis: sed syllogismus est obiectum in libris Priorum: ergo non est obiectum totius Logicæ. Respondetur ex Scoto citato distinguendo maiorem; nihil est obiectum adæquatum totius, & partis, secundum eandem rationem, concedo, secundum diversam rationem, nego, distinguo etiam minorem, syllogismus est obiectum in libris Priorum, quantum ad formam syllogisticam præcisè, concedo; & secun-

secundum hanc rationem, non est obiectum totius Logicæ; est obiectum in libris Priorum, tam secundum formam syllogisticam, quàm secundum partes integrantes, & subiectivas, nego, nam secundum istam rationem est obiectum totius Logicæ; unde similiter distinguitur consequens.

20 Arguunt 2. Scientia acquiritur per syllogismum; sed Logica est scientia: ergo si syllogismus est obiectum Logicæ, notitia de syllogismo acquiritur per syllogismum; sed hoc videtur impossibile, quia vel sequeretur, quòd daretur processus in infinitum; nam de illo syllogismo, per quem acquiritur scientia de syllogismo in communi daretur scientia; nunc inquirò, an illa scientia detur per alium syllogismum, an per ipsum, de quo est scientia? Si per alium, idem inquiram de illo, & sic in infinitum, si per ipsum, iam sequeretur aliud inconueniens, scilicet, quòd idem syllogismus erit notus, in quantum per illum habetur scientia, & erit ignotus, in quantum daretur scientia de illo: ergo nullatenus est concedendum, syllogismum esse obiectum Logicæ; ne aliquod ex prædictis inconuenientibus concedatur.

21 Respondetur negando minorem subsumptam, & ad probationem in illa inclusam, negamus; quòd sequatur aliquod ex prædictis inconuenientibus, nam quando inquiritur, an detur scientia de illo syllogismo per se ipsum, vel per alium? Resp. quòd datur per se ipsum, & sic cessat primum inconueniens, quia iam non datur processus in infinitum. Ad aliud verò dicimus, quòd talis syllogismus esset notus, & ignotus secundum diversas rationes, quòd nullum est inconueniens; esset quidem notus quoad veritatem præmissarum, & quoad illationem conclusionis ex illis, nam, ut benè notavit Arist. 1. Prior. syllogismus perfectus nulla re indiget, ut appareat necessarius, esset autem

ignotus secundum illas proprietates, quæ per ipsum demonstrantur de syllogismo in communi, secundum quas ipse syllogismus in communi est ignotus; & consequenter ille syllogismus in particulari, qui sub illo continetur. Videantur, quæ diximus quæst. 4. hujus disp. à num. 7. usque ad 12. & hic applicentur, quia ex illis alia fortè deducitur solutio ad præsens argumentum.

22 Dicimus secundò: Si Logica sumatur in secundo sensu, non syllogismus, sed modus sciendi in communi, prout sub se comprehendit syllogismum, definitionem, & divisionem, est objectum totale, & adæquatum illius. Hæc conclusio videtur esse Scoti 1. Prior. quæst. 2. dum dixit: *Syllogismus non est objectum totius Logica; modus sciendi est objectum in tota Logica*, ex quibus verbis cognoscitur, Scotum in diverso sensu locutum fuisse hic, ac in quæst. 3. universalium; nam ibi loquitur de Logica Arist. quam vocat veterem, & cui assignat pro objecto adæquato syllogismum; hic autem loquitur de Logica in majori amplitudine, ut denotant illa verba: *Totius, in tota*, cui assignat pro objecto modum sciendi.

23 Probatur conclusio ratione: quia modus sciendi in communi habet tres supradictas conditiones, quæ ad rationem objecti requiruntur: ergo est objectum adæquatum Logicæ. Probatur antecedens: nam supponitur de illo, an sit, & quid sit, quia licet Philosophus non tradiderit definitionem illius, ideò fuit quia in sua Logica præcisè egit de syllogismo, ut dictum est, tamen iam communiter à philosophis agentibus de Logica in tota sua latitudine, traditur hæc definitio: *Modus sciendi est oratio ignoti manifestativa*. Deinde habet passionem, tam ratione sui, quàm ratione inferiorum, quæ sub illo continentur, nam passio potissima modi sciendi in communi est esse directivum operationū intellectus.

tellektus, & deinde in Logica demonstrantur passionēs definitionis, divisionis, & argumentationis, seu syllogismi, quæ sunt partes subiectivæ, seu inferiora modi sciendi. Denique adæquatur cum Logica, ergo habet prædictas tres conditiones, & consequenter modus sciendi in communi est obiectum totius Logicæ.

24 Circa tertiam conditionem de adæquatione est difficultas, sic tamen ostenditur: quia scopus Logicæ in tota sua latitudine est tradere nobis notitiam omnium instrumentorum sciendi; quibus de qualibet re ignota scientiam, aut veram cognitionem habere possimus; sed hoc adæquatè fit per notitiam definitionis, divisionis, & argumentationis, seu syllogismi, quæ sunt species modi sciendi in communi: ergo modus sciendi in communi, & prout sub se, comprehendit tria prædicta instrumenta sciendi, adæquatur cum Logica in tota sua latitudine. Probatur minor; nam ad tria reducuntur omnia, quæ de qualibet re possumus ignorare, scilicet, ad essentiam, ad partes, & ad proprietates; sed hæc omnia adæquatè nobis manifestantur per tria prædicta instrumenta sciendi, modo explicato in summulis, agendo de modo sciendi; ergo per tria prædicta instrumenta sciendi habemus quidquid requiritur ad cognitionem cujuscunque rei, & consequenter modus sciendi in communi est obiectum adæquatum in tota Logica.

25 Quòd autem hæc ultima conditio non conveniat syllogismo probatur: quia Logica in tota sua latitudine non solum agit de syllogismo, & de pertinentibus ad ipsum sed etiam de definitione, & divisione, quæ neque sunt syllogismus, neque ad syllogismum pertinent; ergo syllogismus non adæquatur cum Logica in tota sua latitudine. Quòd definitio, & divisio non pertineant, neque reducantur ad syllogismum (quod negant tenentes, syllogismum esse obiectum

adæquatum in tota Logica dupliciter ostenditur. Primo, quia sine tractatu de definitione, & divisione traditur Arist. in sua Logica, perfectam notitiam syllogismi, tam secundum se formaliter, quàm secundum suas partes subiectivas, & integrantes materialiter, tam proximè, quam remotè, ut patet ex dictis in prima conclusione; ergo notitia de definitione, & divisione nullatenus ordinatur ad syllogismum. Secundo, quia etiam si repugnaret syllogismus, posset dari scientia de definitione, & divisione, quæ scientia vocaretur Logica, quia esset in ordine ad scientias comparandas: sed in tali casu non consideraret Logica definitionem, & divisionem in ordine ad syllogismum: ergo neque nunc considerat illas in ordine ad syllogismum. Patet consequentia; quia in tali casu eadem ratio formalis, & eedem proprietates definitionis, & divisionis considerarentur à Logica: ergo si tunc per se considerarentur à Logica independenter à syllogismo, etiam nunc eodem modo considerantur, & consequenter nullatenus considerantur in ordine ad syllogismum.

29 Arguunt contra aliqui Scotistæ, tenentes, syllogismum in communi esse obiectum adæquatum totius Logicæ, non verò modum sciendi in communi; modus sciendi non est univocus syllogismo definitioni, & divisioni, sed analogus; quia ratio formalis modi sciendi propriè convenit syllogismo; impropriè verò, & in ordine ad illum definitioni, & divisioni: ergo modus sciendi non est obiectum Logicæ, sed syllogismus. Probatur antecedens; quia modus sciendi est oratio ignoti manifestativa in ordine ad scientias comparandas; sed hoc solum convenit propriè syllogismo, impropriè verò definitioni, & divisioni, & in ordine ad syllogismum quatenus scilicet possunt deservire ad conficiendum illum: ergo solum syllogismus est propriè modus sciendi; definitio autem, & divi-

divisio improprie, & in ordine ad illum: ergo modus sciendi in communi non est univocus illis, sed analogus, & consequenter non modus sciendi, sed syllogismus est obiectum totius Logicæ.

37 Respondetur negando antecedens, ad cur-  
sus probationem negamus, quod esse ignoti ma-  
nifestativum in ordine ad scientias comparan-  
das, non conveniat proprie definitioni, & divi-  
sioni, verum tamen est, quod ratio modi sciendi  
in communi contrahitur ad syllogismum per  
differentiam perfectiorem, quam ad definitio-  
nem, & divisionem, nam ad syllogismum con-  
trahitur in ordine ad scientias comparandas stri-  
cto modo, scientia enim strictè sumpta, per  
syllogismum acquiritur; ad definitionem verò,  
& divisionem contrahitur in ordine ad scientias  
comparandas lato modo, quod nullatenus oppo-  
nitur univocationi, ut patet in animali, quod  
est univocum homini, & bruto, sicut per differe-  
ntiam perfectiorem contrahatur ad hominem,  
quàm ad brutum.

27 Deinde potest retorqueri argumentum in  
contrarios: nam sola demonstratio est ignoti  
manifestativa in ordine ad scientias strictè com-  
parandas, nam scientia strictè sumpta est actus,  
vel habitus per demonstrationem causatus; ergo  
sola demonstratio, & non syllogismus in com-  
muni debet poni pro obiecto adæquatè Logi-  
cæ, quod est contra ipsos; sed ipsi asserunt, hoc  
non obstante, quod syllogismus in communi;  
prout comprehendit etiam syllogismum topi-  
cum, v. gr. est obiectum adæquatum Logicæ:  
ergo ad rationem formalem obiecti Logicæ non  
requiritur, quod sit aliquid manifestativum  
ignotis in ordine ad scientias strictè comparan-  
das. Quidquid nobis respondeant, nos ipsis pos-  
sumus respondere. Si enim dicant, quod in scien-  
tiis non solum dantur veritates determinatæ  
certæ, quæ per demonstrationem causentur:  
sed

sed etiam veritates, probabiliter certæ; quæ causentur per syllogismum topicum, ideoque in Logica, quæ tradit modum cognoscendi omnia, quæ sunt cognoscibilia in scientia, non poni demonstrationem pro obiecto adæquato, sed syllogismum, prout etiam comprehendit topicum, etiam nos respondemus, quòd in scientiis non solum sunt veritates, quæ cognoscantur de obiecto per syllogismum, sed etiam veritates, quæ necessariò debent præcognosci de eodem obiecto scientiæ, scilicet, ejus essentia, & partes, & tales veritates cognoscuntur per definitionem, & divisionem independentem à syllogismo. Videantur, quæ diximus in summulis, loquendo de modo sciendi, nam ibi hoc insufficienter manet explicatum, ideoque non est opus hic illud repetere.

19 Alia via arguit contra nostram conclusionem quidam Eminentissimus Thomista; Modus sciendi incommuni non comprehendit sub se omnia, de quibus per se agit Logica; ergo non est obiectum adæquatum Logicæ. Probatur antecedens, quia non continet sub se propositionem, neque prædicabilia; sed de his agit Logica per se, ergo modus sciendi non comprehendit omnia, de quibus per se agit logica. Respondetur negando antecedens, & maiorem probationis, nam propositio attingitur à Logica prout est pars syllogismi, neque enim Aristot. egit de illa, nisi quatenus ad syllogismum, quem in sua Logica intendebat explicare, pertinet de universalibus etiam agit Logica, prout pertinent ad claram notitiam prædicamentorum, quæ sunt materia remota syllogismi, & hoc fuit intentum Porphyrii illorum Authoris qui de illis egit instantia Chrysaori, qui cum Arist. categorias perlegisset, ibique quasdam sibi ignotas voces invenisset, rogavit Porphyrium, ut in ea realicuius sibi foret auxilii, unde non pertinent similiter ad Logicam, sed tantum



tum secundum quid, nam si simpliciter pertinerent, neque Arist. neque ipse Porphyrius, absque illis Dialecticam, seu Logicam adipisci potuissent, sicut de facto adepti sunt, non tamen potest negari, quòd tractatus universalium est valdè utilis ad Logicam, & quantum ad intelligentiam prædicamentorum (quorum series ex generibus, speciebus, & differentiis, & aliquando ex accidentibus propriis, quæ loco differentiarum ponuntur) constituitur, & quantum ad definitiones, quarum definitum est species, & dantur per genus, & differentiam, & quantum ad divisiones, quæ vel sunt generis in species, vel subjecti in accidentia, &c. ex quibus facilè respondetur ad aliquas replicas, quæ possunt fieri.

30 Specialiter tamen sic potest replicari per simile nostræ rationi num. 25. positæ: etiam si repugnaret syllogismus, sed modus sciendi, posset dari scientia de propositione, illam per se, & secundum suas proprietates considerando, sicut nunc consideratur: sed talis scientia esset Logica: ergo independentè à syllogismo, seu modo sciendi, consideraret Logica propositionem: ergo eodem modo nunc illam considerat: ergo modus sciendi in communi non comprehendit sub se propositionem, ut tractatur à Logica, & consequenter modus sciendi in communi non est objectum adæquatum Logicæ. Respondetur primo, negando suppositum majoris, in illa enim supponitur esse possibilem scientiam, repugnantem modo sciendi, quod in ipsis terminis implicat. Secundo respondetur, admissio hoc impossibile, negando minorem; nam si daretur prædicta scientia de propositione, quæ per se illam consideraret, nullatenus esset Logica; quia deficeret ratio formalis objecti Logicæ, quæ est modus sciendi, nam propositio non includit in se formaliter rationem modi sciendi; propter quod dicimus, quòd ne-

que

xx

que nunc attingitur per se à Logica, nam Logica tantum per se agit de illis, quæ in se includunt rationem formalem modi sciendi, ut sunt syllogismus, definitio, & divisio, de propositione autem, & de aliis tantum agit per accidens, & in quantum sunt materia syllogismi, seu modi sciendi, ad quem reducuntur.

31 Aliter arguit quidam Scotista, si modus sciendi esset objectum adæquatum Logicæ, eo esset, quia est commune univocum instrumentis sciendi, & quod latius patet in aliqua scientia, debet poni pro objecto adæquato illius: sed hæc ratio non est sufficiens: ergo modus sciendi in communi non est objectum adæquatum Logicæ. Probat minor, quia oratio est communis univocè instrumentis sciendi, & latius patet, quam modus sciendi in communi: sed oratio in communi non ponitur pro objecto adæquato Logicæ: ergo neque modus sciendi in communi. Respondetur negando minorem, ad probationem dicimus, quòd est maxima differentia inter orationem in communi, & modum sciendi, nam oratio in communi se extendit ad plura, quæ per se non tractantur in Logica, & sic non debet poni pro objecto adæquato Logicæ, quia excedit ipsam Logicam; modus autem sciendi non se extendit ad aliqua, quæ per se non attinguntur à Logica; & sic debet poni pro objecto adæquato Logicæ, quia neque Logicam excedit, neque exceditur ab illa; nam solum debet poni pro objecto adæquato alicuius scientiæ, quod est commune, & latius patet inter illa, quæ per se attinguntur ab illa scientia, aliàs, ratio entis in communi deberet poni pro objecto adæquato cuiuscunque scientiæ; nam est ratio communis univoca, respectu omnium, quæ in scientia tractantur, & latius patet, quam quòdcumque aliud, de quo agitur in scientia, quod quàm absurdum sit, quisque videat.

## Q U Æ S T I O VII.

*Utrum Logica versetur circa modum sciendi formale, vel obiectivum.*

**P**RO intelligentia quæstionis notandum est, quod modus sciendi formalis est actus intellectus taliter tendens circa aliqua obiecta, disposita juxta regulas logicæ docentis, & obiecta taliter disposita, sunt modus sciendi obiectivus, v. g. quando conficitur syllogismus; tres actus intellectus in tali forma dispositi, sunt syllogismus formalis, id autem, quod affirmatur, vel negatur, vel deducitur, ut tali ordine, & dispositione, terminat prædictos actus intellectus est syllogismus obiectivus, qui etiam dicitur ab aliquibus actus passivus, & syllogismus formalis actus activus. Hoc notato.

2 Est triplex sententia circa hanc difficultatem. Prima asserit, Logicam solum agere per se de syllogismo formali, quam communiter tenent Jesuitæ, & quidam subtilis Scotista in manuscriptis, licet alia via procedat, ac Jesuitæ. Secunda tenet, logicam solum per se agere de syllogismo obiectivo. Tertia affirmat, logicam per se agere de syllogismo in communi, prout sub se comprehendit, tam syllogismum formalem, quam obiectivum. Circa has duas sententias sunt divisi Scotistæ. Adverte, quod quidquid dicitur de syllogismo, intelligendum est de quolibet modo sciendi, quia eadem est ratio.

3 Dicimus: Logica agit per se, tam de syllogismo formali, quam obiectivo: Hæc conclusio stat pro tertia sententia. Probatur primò: quia de illo per se agit Logica, quod habet rationem, & dispositionem syllogisticam: sed tam syllogismus formalis, quam obiectivus, habet rationem, & dispositionem syllogisticam: ergo de  
utro-

utroque syllogismo per se agit Logica. Probat-  
tur minor; quia sicut operationes intellectus  
habent formam syllogisticam, quia conforman-  
tur cum regulis Logicæ docentis, ita objecta ta-  
lium operationum habent dispositionem syllo-  
gisticam, quia conformantur cum ipsis regulis;  
ergo tam syllogismus formalis, quam objecti-  
vus habent dispositionem syllogisticam; & con-  
sequenter de utroque per se agit Logica.

4 Respondent pro prima sententia, syllogis-  
mum obiectivum solum esse obiectum materiale  
Logicæ; non vero formale, quia non ratione  
sui attingitur a Logica, sed ratione dispositionis  
syllogisticæ, quæ est extrinseca quædam deno-  
minatio proveniens ab actibus intellectus in  
forma syllogistica dispositis: & sic solus syllo-  
gismus formalis est obiectum formale Logicæ,  
quia attingitur a Logica ratione sui. Sed con-  
tra; quia ex hoc sequeretur, etiam syllogis-  
mum formalem esse obiectum materiale Logicæ.  
Probatur sequela; quia ex eo, juxta prædi-  
ctam responsionem, syllogismus obiectivus est  
obiectum materiale Logicæ, quia attingitur a  
logica ratione dispositionis syllogisticæ, quæ est  
denominatio extrinseca proveniens a syllogis-  
mo formali; sed etiam conceptus formales attinguntur a logica ratione dispositionis syllogisti-  
cæ, quæ etiam est denominatio extrinseca pro-  
veniens illis a directione logicæ docentis; ergo  
si propter hanc rationem syllogismus obiectivus  
esse obiectum materiale logicæ, idem dicen-  
dum esset de syllogismo formali; sed hoc non  
obstante, in prædicta sententia, syllogismus  
formalis est obiectum formale logicæ; ergo  
idem dicendum est de syllogismo obiectivo.

5 Probatur secundo conclusio; quia plura  
sunt in logica, quæ non possunt reduci ad syllo-  
gismum formalem, & plura, quæ non possunt  
reduci ad syllogismum obiectivum, & omnia  
reducuntur ad syllogismum, ut est quid com-  
mu-

mune, sub se comprehendens obiectivum, & formalem: ergo logica agit per se de syllogismo, prout utrumque comprehendit. Probatur antecedens, quoad primam partem; nam logica agit per se de syllogismo, qui constat triplici propositione, quarum quælibet componitur ex subiecto, & prædicato, & omnes ex majori, a ut minori extremitate, & medio taliter, vel taliter dispositis: sed hæc omnia non possunt reduci ad syllogismum formalem, quia actus intellectus non ponuntur tamquam subiectum, vel prædicatum, neque tamquam medium, major, aut minor extremitas; cum nullus actus intellectus de alio prædicetur; ergo de pluribus agit logica, quæ non possunt reduci ad syllogismum formalem. Probatur antecedens quoad secundam partem; quia logica per se agit de syllogismo, prout componitur ex propositionibus affirmativis, vel negativis, sed hæc non conveniunt syllogismo obiectivo, quia affirmare, vel negare solum convenit actibus intellectus, non vero eorum obiectis; ergo de pluribus agit Logica, quæ non possunt reduci ad syllogismum obiectivum; sed hæc omnia reducuntur ad syllogismum in communi, prout comprehendit obiectivum, & formalem; ergo de syllogismo in hoc sensu agit per se Logica.

6 Arguunt contra pro prima sententia; si Logica ageret per se de syllogismo obiectivo, ageret de omni ente, tam reali, quam rationis; sed hoc est proprium Metaphysicæ; ergo Logica non agit per se de syllogismo obiectivo. Probatur maior; quia syllogismus obiectivus nihil aliud est, quam obiectum syllogismi formalis; sed tam ens reale, quam rationis potest esse obiectum syllogismi formalis; ergo si Logica ageret per se de syllogismo obiectivo, ageret de omni ente, tam reali, quam rationis. Respondetur, quod Logica agit de omni ente sub diversa ratione, hac metaphysica, nam metaphysica agit

agit de illo secundum se, logica verò quatenus est dispositum in forma syllogistica, ex quo patet differentia, & facillè potest responderi ad argumentum in forma. Deinde potest retorqueri argumentum in contrarios; nam si logica agit de syllogismo formali: ergo agit de actibus intellectus: sed hoc pertinet ad libros de anima: ergo Logica non agit per se de syllogismo formali. Ad quod solum respondent, sicut nos ad suum argumentum, quod logica agit de actibus intellectus ut dispositis in forma syllogistica in libris verò de anima agitur de illis secundum se. Unde sufficienter tenet contra illos nostra responsio.

7 Arguunt contra: syllogismus objectivus non habet formam syllogisticam ratione sui, sed ratione syllogismi formalis, & per denominationem extrinsecam proveniente ab illo: ergo licet Logica agat de syllogismo objectivo, prout habet talem dispositionem, non agit de illo ratione sui, sed ratione syllogismi formalis. Pater consequentia, quia ratione syllogismi formalis habet rationem, sub qua attingitur à Logica; Ergo non ratione sui, sed ratione syllogismi formalis attingitur à Logica. Respondetur negando consequentiam; & ad probationem dicimus, verum esse, quod syllogismus objectivus ratione formalis habet illam dispositionem syllogisticam, sub qua attingitur à Logica; falsum tamen, ex hoc sequi, quod attingatur à logica ratione syllogismi formalis, nam solum sequitur, quòd à Logica attingatur ratione illius dispositionis, quam habet à syllogismo formali, non quatenus illam habet ab illo, sed quatenus talis dispositio est conformis regulis Logicæ docentis.

8 Ut aliqua argumenta solvantur, advertere oportet, quod quando Logica per se agit de syllogismo formali, agit etiam per accidens de syllogismo objectivo, quatenus propter conne-

xionem, quam habent inter se, potest aliquo modo dicit de obiectivo, quod dicitur de formati, v. gr. quando Logica docet, quod syllogismus debet constare propositionibus affirmativis, quod est proprium syllogismi formalis, potest etiam per accidens dici de syllogismo obiectivo, quod constat propositionibus affirmativis. Similiter, quando Logica agit de syllogismo obiectivo per se, & ut *quod*, egit etiam de syllogismo formali per accidens, & ut *quo*, propter eandem connexionem, v. gr. quando logica docet, quod syllogismus debet constare maiori, & minori extremitate, & medio taliter dispositis, quod per se, & ut *quod* convenit syllogismo obiectivo; potest etiam dici de syllogismo formali, quod constat maiori, & minori extremitate, & medio taliter dispositis per accidens, & ut *quo*.

9 Arguunt 1. pro secunda sententia: Nulla potentia, nullusque habitus, nec naturalis, nec supernaturalis, nec artificialis, habet per obiecto, nisi id, ad quod tendit mediis actibus: ergo idem dicendum est de Logica: sed Logica non comparatur ad actus directos mediante actu, sed immediatè; quoniam actus directi non sunt reflexè cogniti per alios actus, sed directè, & immediatè elicit à Logica, sicut qui eliciuntur directè à potentiis, & habitibus, tam naturalibus, quam supernaturalibus, & artificialibus: ergo sicut nullus eorū habet pro obiecto partiali actus, ita neque logica. Respondetur negando paritatem, quia actus, tam potentiarum, quam prædictorum habituum, non habent rationem formalem obiecti, neque de illis demonstrantur passionès à potentia, vel habitibus, sed tantum de illis obiectis, quæ per actus directos attinguntur, at verò actus directi Logicæ habent in se rationem formalem obiecti Logicæ, & de illis demonstrat Logica aliquas passionès, ut dictum est in nostra ratione; unde, licet in aliis habitibus non ponatur pro obiecto, nisi quod attingitur mediis actibus.

actibus directis ; in Logica tamen , non solum debet poni pro objecto , quod attingitur mediis actibus directis , ut est syllogismus obiectivus ; sed etiam quod attingitur mediis actibus reflexis , ut est syllogismus formalis. Vel aliter potest dici , quod semper Logica tendit in suum objectum , licet sit syllogismus obiectivus , mediis actibus reflexis intellectus ; quia ut dictum est , syllogismus obiectivus habet formam syllogisticam per denominationem extrinsecam proveniente ab actibus directis intellectus , qui sunt syllogismus formalis , & postea per actus reflexos considerat Logica talem formam syllogisticam in objectis , & de illa demonstrat passiones , quod est peculiare Logicæ , ut distinctæ ab aliis habitibus.

10 Arguunt 2. syllogismus formalis dicit ordinem ad obiectivum , ut ad eius objectum ; ergo Logica considerat syllogismum formalem per ordinem ad obiectivum , & consequenter syllogismus obiectivus attenditur per se à Logica , non verò syllogismus formalis. Respondetur distinguendo antecedens , syllogismus formalis dicit ordinem ad obiectum , ut ad obiectum attributionis Logicæ , nego : ut ad proprium objectum , & mensuram extrinsecam operationum intellectus , quibus constat , concedo , & nego consequentiam . Similiter potest fieri argumentum contra syllogismum obiectivum , quia etiam habet connexionem cum formali ; sed eodem modo respondetur , scilicet , quòd habet connexionem cum formali , tanquam cum suo actu ; non tamen tanquam cum suo obiecto attributionis.



## Q U Æ S T I O VIII.

*Utrum obiectum Logica pro formali sit quid reale, vel rationis?*

1 **N**ON inquirimus in præsentī, an obiectum Logicæ, sit omne ens reale, seu omne ens rationis, nam supponitur tanquam certum, obiectum formale Logicæ esse aliquod inferius entis realis, vel rationis; unde sequitur, quod ratio sub qua obiectum Logicæ attingitur à Logica non est ratio entis realis, vel rationis ut sic; alias omne, quod haberet rationem entis realis, vel entis rationis esset obiectum formale Logicæ; quod non est dicendum; ex quo ulterius sequitur, non rectè ab aliquibus controversi, an obiectum Logicæ attingatur à Logica sub ratione entis realis, vel rationis? Nisi hoc modo intelligatur, an ratio *sub qua* Logica attingit suum obiectum, sit in se aliquid reale, vel rationis? Sed in re utraque interrogatio idem valet, licet in nomine aliud, & aliud sonet.

2 Pro clariori autem intelligentia quæstionis supponendum est, rationem sub qua Logica attingit suum obiectum, esse rationem formalem modi sciendi, vel syllogismi: ad quod non obstat, quod materia, de qua agit, seu circa quam versatur Logica, sit ipse modus sciendi, vel syllogismus, nam quando materia, circa quam versatur aliqua scientia, est talis natus; quod unica tantum scientia circa illam versetur, non debet distingui ipsa materia à ratione formali sub qua attingitur à prædicta scientia, sed ipsa est materia, quæ attingitur, & ratione sui attingitur, cuius ratio est, quia ideo assignatur ratio formalis, sub qua aliqua materia attingitur ab aliqua scientia, ut talis scientia distinguatur à qualibet alia, quæ etiam attingit prædi-

dictam materiam, sub alia ratione formali sub qua; sed quando unica tantum scientia versatur circa aliquam materiam, eo præcisè, quod circa illam versetur, distinguitur à qualibet alia scientia; ergo in tali casu nulla est necessitas assignandi rationem formalem sub qua attingatur à tali scientia distinctam ab ipsa materia: sed huiusmodi est modus sciendi, vel syllogismus, nam est materia, circa quam versatur Logica, & nulla alia scientia versatur circa illum: ergo nulla est necessitas assignandi rationem formalem sub qua attingatur a logica, distinctam ab ipso modo sciendi vel syllogismo. Hoc supposito, quod inquirimus est, an ratio formalis modi sciendi, vel syllogismi sit quid reale, vel rationis?

3 Circa quod Merinerus quæst. 4. præem. tenet, rationem formalem modi sciendi, vel syllogismi, prout est obiectum logicæ, esse ens rationis. Poncius verò disp. 2. Logicæ q. 5. asserit, talem rationem non esse ens rationis. Pro quibus sententiis uterque adducit quam plures Authores; ideòque Scotistæ in manuscriptis ferè æqualiter sunt divisi.

4 Dicimus ergo: Obiectum Logicæ, scilicet, modus sciendi, seu syllogismus, non est pro formali quid rationis, imò est quid reale. Hæc conclusio stat pro secunda sententia. Probatur, omittis aliis, ac unica ratione: ratio formalis syllogismi, seu modi sciendi, est illa dispositio, quæ advenit entitatibus materialibus, iuxta regulas logicæ docentis; sed talis dispositio est aliquid reale: ergo modus sciendi, seu syllogismus pro formali, est aliquid reale. Probatur minor: quia prædicta dispositio causat verum effectum realem: sed effectus realis necessariò petit causam realem: ergo prædicta ordinatio est aliquid reale. Probatur minor: nam modus sciendi, seu syllogismus sic ordinatus generat scientiam: sed scientia est aliquid reale: ergo

cau-

causat effectum realem. Probatur maior; nam si ab entitatibus materialibus auferatur talis dispositio, non causant scientiam; ut patet in hoc syllogismo; *Omnis homo est animal, omne sensibile est animal; ergo omne sensibile est homo*; per quem non generatur scientia, quia non est dispositus juxta regulas logicæ docentis; si autem juxta prædictas regulas disponantur, hoc modo; *Omne animal est sensibile; omnis homo est animal; ergo omnis homo est sensibilis*, generat scientiam; ergo modus sciendi, seu syllogismus ordinatus juxta regulas logicæ docentis, generat scientiam, quæ est quid reale; & consequenter modus sciendi; seu syllogismus pro formali est quid reale.

5 Neque obstat, si dicant, talem dispositionem modi sciendi, non esse causam scientiæ; sed tantum conditionem, sine qua non causarent scientiam objecta materialia. Nam contra est; quia non minus requiritur, quòd sit realis conditio *sine qua non* ad causandum effectum realem, quam ipsa causa; ergo licet talis dispositio sit tantum conditio *sine qua non* ad causandam scientiam, necessariò erit quid reale. Probatur antecedens; quia licet approximatio ignis ad passum, v. gr. sit tantum conditio sine qua non combureret ignis passum, tamen tam realis debet esse approximatio, quam ipse ignis non autem sufficit, quòd sit ficta ab intellectu, ut ex se patet, nam aliàs ignis existens Matriti, posset comburere passum existens Romæ, per hoc præcisè, quòd intellectus fingeret approximationem, quod est absurdum; ergo ad causandum effectum realem, tam realis debet esse conditio sine qua non, quam ipsa causa, & consequenter licet dispositio modi sciendi sit tantum conditio *sine qua non* ad causandam scientiam realem, debet esse realis.

6 Respondent aliqui Scotistæ cum Merinero  
*Curfus Philos. Tom. I.*

N ci.

citato, talem dispositionem, seu directionem passivam modi sciendi, seu syllogismi, esse denominationem extrinsecam proveniente à Logica docente, tam actibus intellectus, qui sunt modus sciendi formalis, quàm obiectis prædictorum actuum; quæ sunt modus sciendi obiectivus, & cum talis extrinseca denominatio nihil intrinsecum ponat in actibus intellectus, neque in obiectis, & à Logico consideretur ut quid intrinsecum in illis, necessariò erit, prout attingitur à Logica, ens rationis.

7 Sed contra est primò; quia syllogismus, vel modus sciendi consideratur à Logica, ut est causa, vel conditio ad acquirendam scientiam? sed hoc habet, quin consideretur ejus dispositio ut quid intrinsecum in rebus: ergo quod consideretur ut quid intrinsecum, non est quid pertinens ad Logicam. Probatur minor, quia syllogismus in tantum pertinet ad acquirendam scientiam, in quantum habet tres propositiones, v. gr. tali vel tali modo dispositas; sed hoc habet, quin ejus dispositio consideretur ut quid intrinsecum in rebus: ergo syllogismus pertinet ad acquirendam scientiam, quin consideretur ejus dispositio ut quid intrinsecum in rebus. Probatur minor; nam hic syllogismus, v. gr. *Omnis homo est animal; Petrus est homo; ergo Petrus est animal*, hoc ipso, quòd sic conficiatur, etiam si nullus intellectus consideret, imò etiam si repugnaret quòd intellectus consideraret suam dispositionem ut quid intrinsecum in rebus, habet tres propositiones tali, vel tali modo dispositas; ergo syllogismus habet prædictam dispositionem; quin consideretur ut quid intrinsecum in rebus, & consequenter, ut pertinet ad Logicam, est quid reale, non verò quid rationis.

8 Contra secundo: Nam sicut Logica dirigit, & ordinat operationes intellectus; ita Philosophia moralis dirigit operationes voluntatis: sed

sed Philosophia moralis non considerat illam directionem ut quid intrinsecum in actibus voluntatis, aut in illorum objectis; ergo neque logica considerat illam directionem ut quid intrinsecum in actibus intellectus, aut in illorum objectis. Consequentia tenet à paritate, quia sicut actus voluntatis diriguntur à Philosophia morali ad consecutionem ultimæ felicitatis, quæ est finis illius, ita operationes intellectus diriguntur à Logica ad consecutionem aliarum scientiarum, quæ est finis illius: sed actus voluntatis, eo præcisè, quod terminent directionem activam Philosophiæ moralis, absque eo quod directio passiva illorum consideretur, ut quid intrinsecum in illis, aut illorum objectis, sufficiunt ad consecutionem ultimæ felicitatis: ergo similiter actus intellectus eo præcisè, quod terminent directionem activam Logicæ docentis, absque eo quod directio passiva illorum consideretur ut quid intrinsecum in illis, aut in illorum objectis, sufficiunt ad consecutionem aliarum scientiarum: sed ut ordinantur ad talem consecutionem, sunt objectum Logicæ: ergo Logica non considerat suum objectum, seu dispositionem illius, ut quid intrinsecum in rebus & consequenter objectum Logicæ pro formali non dicit quid rationis, sed quid reale.

9 Arguunt 1. Modus sciendi consideratur à Logica ut ordinatus & dispositus: sed in tali consideratione efficit ens rationis: ergo modus sciendi, prout consideratur à Logica, est ens rationis. Probatur minor: nam à parte rei non est talis ordinatio: ergo quando consideratur à Logico, ut quid existens in rerum natura, fabricatur ens rationis. Probatur antecedens, nam in propositionibus alicujus syllogismi, v. g. nullus est ordo à parte rei, cum quælibet habeat suum perfectum sensum independentem ab alia: ergo à parte rei non est ordinatio modi sciendi, & consequenter, si consideretur una propositio in or-

dine ad aliam, consideratur resaliter, ac est à parte rei, & sic fit ens rationis.

10 Plura æquivoca involuit hoc argumentum, ideòque ad auferendam æquivocationem, notandum est; aliud esse rationem formalem, sub qua attingitur objectum Logicæ, & aliud actuale considerationem illius; nam ratio formalis objecti præsupponitur ad actuale considerationem, unde quidquid provenit objecto ab actuali consideratione, non pertinet ad rationem formalem illius, v.g. objectum Physicæ est corpus sub ratione naturalitatis, quæ ratio præsupponitur in tali objecto ad actuale considerationem illius, & sic, quidquid provenit illi ab ipsa actuali consideratione, nullatenus pertinet ad rationem formalem objecti Physicæ. Hoc supposito.

11 Facile respondetur ad argumentum, concedendo, quod Logicus considerat modum sciendi taliter ordinatum, & dispositum, sed talis ordinatio præsupponitur ad ipsam actuale considerationem: quæ ordinatio est ratio formalis objecti Logicæ, & tantum consistit in denominatione extrinseca proveniente a regulis Logicæ docentis immediate actibus intellectus, qui sunt modus sciendi formalis, & his mediis, objectis eorum, quæ sunt modus sciendi objectivus; quæ denominatio est realis, & à forma reali proveniens, quando autem dicunt, quod talis ordinatio non est à parte rei, & sic quando propositiones ordinantur per intellectum, consideratur resaliter ac est, negamus hoc; quia quando tales propositiones ordinantur, non consideratur dispositio illarum, sed fit talis dispositio, & tunc verè est à parte rei, licet antea non esset, quod contingit in quolibet effectu, qui non est à parte rei, antequam producat; solum autem potest concedi, quod Logicus in consideratione sui objecti conficit ens rationis, quia propter imperfectionem intellectus, confide.

derat prædictam dispositionem (quæ cum sit, ut dictum est, denominatio extrinseca, nihil intrinsecum ponit in rebus) ut quid intrinsecum ipsis rebus inherens; ex quo nullatenus sequitur, quod obiectum logicæ sit ens rationis; quia solum est obiectum in quantum dicit illam denominationem extrinsecam, aut dispositionem in formamodi sciendi, quæ ut dictum est, est quid reale proveniens à forma reali; sed tantum sequitur, quod Logicus conficiat ens rationis in consideratione sui obiecti, quod per accidens se habet ad obiectum, cum præsupponatur, secundum suam rationem formalem, ad talem considerationem. Et deinde, si intellectus perfecte conciperet talem dispositionem, seu denominationem extrinsecam, ut est in se, non conficeret ens rationis, & tamen talis dispositio esset obiectum logicæ. Ex quo facillè respondetur ad alia similia argumenta.

12 Arguunt 2. Ens rationis nihil aliud est, quam id, quod habet esse ab intellectu: sed modus sciendi habet esse ab intellectu: ergo modus sciendi est ens rationis. Respondetur negando maiorem; quia non omne, quod habet esse ab intellectu est ens rationis; nam actus intellectus habent esse ab intellectu, & non sunt ens rationis, sed ens reale; solum enim est ens rationis, quod tantum habet esse obiectivè in intellectu, cuiusmodi non est modus sciendi, nam dispositio, in qua consistit, est denominatio extrinseca, ut dictum est, proveniens à Logica docente, vel ab actibus intellectus, quæ habet esse antequam sit obiectivè in intellectu, quod contingit in qualibet denominatione extrinseca proveniente ab aliquo actu intellectus, quæ habet esse per actum directè aliquod obiectum cognoscentem, & non habet esse obiectivè in tali actu: sed postea cognoscitur talis denominatio per actum reflexum, & in illo habet esse obiectivè, siue cognoscatur ut est, siue aliter.

accet; ex quo non sequitur, quod sit ens ratio-  
nis ex vi primi actus; per quem habet suum esse.  
Idem dicimus de denominatione extrinseca, in qua consistit ratio formalis modi sciendi,  
ut dictum est.

13 Arguunt 3. ex Aristot. 4. Metaph. text. 5.  
tam Logica, quàm Metaphysica versantur circa  
omne ens: sed Metaphysica versatur circa  
illud secundum esse, quod habet à parte rei sine  
fitione intellectus: ergo Logica, ut à Meta-  
physica distinguatur, debet versari circa illud,  
secundum esse, quod habet fictum ab intelle-  
ctu, & consequenter, ut ens rationis est. Patet  
consequentia; quia duo tantum sunt genera præ-  
dicatorum enti convenientium, unum indepen-  
denter ab intellectu, quod est reale, & pertinet  
ad Metaphysicam, & aliud dependenter ab intel-  
lectu, quod est rationis, & debet convenire Logi-  
cæ. Respondetur, verum esse, quod tam Logi-  
ca, quàm Metaphysica versantur circa omne  
ens, sed hoc sub diversis rationibus, nam Meta-  
physica versatur circa ens reale per se, & tan-  
quam circa proprium suum objectum, & versa-  
tur circa ens rationis per accidens, tanquam cir-  
ca oppositum enti reali, quod est suum obje-  
ctum: at verò Logica versatur circa ens reale,  
& rationis, tanquam circa materiam extrinse-  
cam, disponibilem in forma modi sciendi: circa  
quam formam primò, & per se versatur Logica,  
quod sufficit, ut Logica distinguatur à Metaphy-  
sica; unde non quodlibet genus prædicatorum  
pertinet ad quamlibet ex prædictis scientiis; sed  
utrumque genus ad utramque scientiam sub di-  
versis rationibus assignatis.

14 Arguunt 4. Logica dicitur scientia ratio-  
nalis: ergo idem est, quia habet pro objecto ens  
rationis. Respondetur negando consequentiam  
quia non ex eo dicitur Logica scientia ratio-  
nalis, quia habet pro objecto ens rationis; sed quia  
docet ratiocinare artificialiter mediis suis regu-  
lis.



lis, in quo differt ab aliis scientiis, quæ etiam, si aliquomodo dirigant operationes intellectus circa sua objecta, ministrando materiam; non tamen tradendo modum, seu regulas, quibus artificiosè disponantur prædictæ operationes intellectus ad acquirendas prædictas scientias; nam hoc est peculiare solius Logicæ.

15 Aliqui Scotistæ oppositum tenentes, arguunt ex Scoto quæst. 3. Prologi 2. laterali, §. *Contra istas, Vers. Contra viam*, sub litt. H, dicente; *Respectus ad extra est respectus rationis; sed scientia non considerans objectum suum sub ratione reali, non est realis, sicut nec Logica est realis, licet consideret de rebus, ut eis attribuuntur intentiones secunda: ergo secundum Scotum objectum Logicæ est ens rationis.* Respondetur, quòd Scotus loco citato, ut potest videri in ipsa littera, arguit contra aliquos afferentes, respectu ad extra in Deo esse objectum Theologiæ, & propter hoc, tunc dixit, Logicam non esse scientiam realem, quia hæc erat recepta sententia illis temporibus, & fortè ab illis Authoribus, contra quos arguit Scotus, admissa: in quo sensu habet vim argumentum, Scoti contra illos; nam respectu ad extra in Deo sunt entia rationis, ex quo infert Scotus: ergo si Logica non est scientia realis, sed rationis, eo quod habeat pro objecto ens rationis, ut tunc tenebat communior sententia, neque Theologia erit scientia realis, sed rationis, si habet pro objecto prædictos respectus ad extra, quod benè sequitur: sed non sequitur ex hoc mens Scoti circa hanc difficultatem; nam loquitur, ut dictum est, supponendo prædictam sententiam ex mente aliorum.

16 Advertetamen, quod si aliquando dixit Scotus, Logicam esse scientiam rationis, quod non debet intelligi formaliter (nam ut sic est habitus realis; sed tantum denominativè ab objecto) hoc intelligitur, non quia habet pro

objecto, ens rationis in rigorosa acceptione sumptum; sed quia habet pro objecto denominationes extrinsecas provenientes ab actibus intellectus, qui dicuntur actus rationis: quæ denominationes dicuntur secundæ intentiones, vel quia tales denominationes sunt fundamentaliter ens rationis, eò quod intellectus considerando illas ut quid intrinsecum in rebus, facit ens rationis; in quo sensu loquitur Scotus de ente rationis pluribus in locis; ut dictum est disp. de ipso ente rationis.

17 Ex dictis in hac, & duabus præcedentibus quæstionibus, habemus objectum adæquatum formale, & attributionis Logicæ esse modum sciendi in communi prout sub se comprehendit definitionem, divisionem, & argumentationem, seu syllogismum, tam objectivas, quam formales; & hoc loquendo de logica in tota sua latitudine, & similiter, syllogismum in communi, prout comprehendit objectivum, & formale, esse objectum adæquatum formale, & attributionis, loquendo de Logica Arist. habemus modum sciendi, & syllogismum esse materiam circa quam versatur Logica, secundum rationem formalem modi sciendi, & syllogismi, quæ ratio non est quid rationis, sed quid reale, licet intentionale. Ex quibus ulterius facile deducitur, obiectum materiale per se, seu formale inadæquatum Logicæ esse quamlibet speciem modi sciendi, vel syllogismi, & inter hæc objecta, principalius esse demonstrationem factam in *Barbara*; quia hic modus, eo quod habeat omnes propositiones universales affirmativas, perfectiori modo participat illud principium: *Dici de omni*, in quo fundatur forma syllogistica; objectum verò materiale per accidens esse omne ens, cui potest applicari forma syllogismi, seu modi sciendi. Quod omne ex ipsis terminis patet.

## Q U Æ S T I O X I.

*Verùm Logica sit una, & quomodo?*

1. **Q**uia Logica, sicut quælibet alia scientia, potest dupliciter considerari, scilicet, in esse rei, seu quatenus est quædam qualitas realis, & in esse scientiæ, & in utroque sensu est difficultas, an Logica sit una? Ideò, in duas sectiones, claritatis gratia hanc quæstionem dividemus, supponendo, quòd unum est indivisum in se, & divisum à quolibet alio, & unitas, à qua unum sumit denominationem, vel est numerica, vel specifica, vel generica, vel transcendentalis; unde etiam unum, vel est numericum, vel specificum, vel genericum, vel transcendentale, de quibus alibi commodius. Sit ergo

## S E C T I O I.

*Exagitur quæstio de Logica in esse rei?*

2. **N**on loquimur in præsentì de Logica actuali; nam certum est dari plures actus Logicæ, sed de Logica habituali, quæ consistit in quadam facilitate remanente in intellectu ex frequenti cognitione conclusionum Logicalium, & de hac facilitate, seu habitu inquirimus, an sit indivisibilis, vel divisibilis secundum extensionem? Seu, an sit una simplex qualitas, vel multiplex? Et non loquimur de qualitate habituali acquisita per repetitionem cognitionis unius conclusionis; quia supponitur, tanquam certum, juxta communem consensum, hanc esse simplicem, & indivisibilem; sicuti est simplex, & indivisibilis secundum extensionem veritas sui obiecti; sed loquimur de qualitate habituali acquisita per repetitionem cognitionū

omnium conclusionum, quæ ad Logicam pertinent.

3 Neque similiter loquimur de qualitate scientifica, quæ generatur ex repetitione actus scientifici, comparata ad qualitatem opinativam, quæ generatur ex petitione actus probabilis; nam certum est apud omnes, quamlibet scientiam habere conclusiones scientificas, & conclusiones probabiles, quæ generant diversos habitus, non solum specie, sed etiam genere, scilicet opinionem, & scientiam; unde solum controvertitur difficultas de habitu, seu qualitate acquisita per repetitionem actus scientifici, circa omnes scientificas conclusiones.

4 Circa quam difficultatem est triplex sententia. Prima asserit, Logicam habitualem, secundum extensionem esse simplicem, & indivisibilem qualitatem. Sic communiter Thomistæ cum suo Angelico Præceptore 1. 2. quæst. 54. art. 4. & in solutione ad 3. Secunda sententia tenet, Logicam esse unum habitum, seu qualitatem, licet non simplicem, & indivisibilem; sed compositam ex partibus homogeneis inter se physice unitis. Pro hac sententia communiter citatur Lorca 1. 2. disp. 10. & Rubius quæst. 4. præm. Tertia denique sententia tenet, Logicam non esse unam simplicem, & indivisibilem qualitatem secundum extensionem, sed tot simplices qualitates includere, quot sunt veritates, seu conclusiones, quæ in Logica demonstrantur, quæ quidem simplices qualitates non sunt homogeneæ, & eiusdem rationis; sed eterogeneæ, & diversæ rationis, iuxta diversitatem veritatum, seu conclusionum, & nullatenus inter se physice unitæ. Hæc sententia in re est omnium Scotistarum cum Scoto quæst. 3. Prologi 2. laterali, §. *Contra istud*, vers. *Ad secundum dico*, sub litt. D. & in 3. dist. 25. quæst. 2. §. *Ad secundum quæsitum*, litt. C. &

C. & aliis in locis ab Scotistis, communiter citatis.

5 Dicimus: Logica in esse rei, seu qualitatis non est una simplex, & indivisibilis qualitas, sed tot simplices qualitates diversæ rationis, quod sunt conclusiones diversæ rationis, quæ in Logica demonstrantur. Hæc conclusio est pro tertia sententia. Probatur primò: quia ubi sunt plures causæ sunt plures effectus: sed demonstratio est causa habitus scientifici in esse rei: ergo ubi sunt plures demonstrationes diversæ rationis, etiam debent esse plures qualitates, seu habitus scientifici diversæ rationis: sed in Logica, ut nullus non concedit, sunt plures demonstrationes diversæ rationis: ergo sunt plures qualitates, seu habitus scientifici diversæ rationis per prædictas demonstrationes acquisitæ.

6 Confirmatur, & simul explicatur prædicta ratio: nam habitus Logicalis acquisitus per repetitionem unius demonstrationis circa unum obiectum, augetur extensive per repetitionem alterius demonstrationis circa aliud obiectum: ergo aliquid additur de novo habitui acquisito per repetitionem primæ demonstrationis: sed id, per quod augetur, est aliqua nova entitas realis: ergo habitus logicalis non est una simplex, & indivisibilis qualitas. Probatur minor, quia secunda demonstratio est vera causa realis: ergo necessario debet habere aliquem effectum realem: sed hic effectus nequit esse habitus, seu qualitas causata per primam demonstrationem, nam quod semel est productum, nequit iterum produci: ergo est alia qualitas distincta de novo superaddita, & consequenter habitus Logicalis includit tot qualitates simplices, quot sunt veritates, seu conclusiones, quæ in Logica demonstrantur.

7 Qui tenent secundam sententiam, respondent, verum esse, aliquid de novo acquiri per

repetitionem secundæ demonstrationis; hoc tamen non esse qualitatem diversæ rationis, sed eiusdem rationis cum præcedenti, & sic unicum qualitate præcedenti, & constitutur unum per se, sicut contingit in aliis qualitatibus. Sed hæc responsio plura involvit difficultates; ideoque

8 Contra est primò: quia nulla est necessitas talis unionis physicæ inter prædictas qualitates: ergo non est admittenda. Probatur antecedens; nam, si aliquomodo esset necessaria prædictarum unio, maximè, ut habitus logicalis diceretur una scientia: sed ad hoc non requiritur; ergo nullo modo requiritur. Probatur minor; quia ad hoc, ut plures habitus, seu qualitates constituent unam scientiam, sufficit, quod omnes respiciant idem obiectum attributionis; sicut ad hoc, ut Regnum dicatur unum sufficit, quod omnes Provinciæ, seu Populi respiciant unum Regem, & dominio illius subiiciantur, quin inter se aliquomodo physicæ uniantur; ergo ad hoc, ut scientia dicatur una, non requiritur talis physica unio inter prædictas qualitates. Neque ex hoc sequitur, quod scientia constituta ex prædictis qualitatibus, sit unum per accidens, ut intendunt contrarii; nam ad hoc, ut sit unum per se, sufficit unitas attributionis, seu quod omnes habitus, seu qualitates dicant ordinem ad unum obiectum attributionis.

9 Contra secundo: quia videtur impossibilis talis unio physica: ergo non datur. Probatur antecedens: quia tantum duplici modo possunt aliqua physice uniri ad constituendum unum, per se, vel immediatè, quia se habent ut actus, & potentia per se; vel mediatè, medio aliquo indivisibili continuativo; sed neutro modo potest uniri illa qualitas de novo adveniēns qualitati præexistenti: ergo est impossibilis talis unio. Prima pars minoris patet: quia prædictæ qualitates non se habent tamquam actus, &

po.

potentia per se, præcipuè cum in sententia contraria sint eiusdem rationis, & actus, & potentia eiusdem rationis nequeant esse. Probat<sup>ur</sup> secunda pars; quia unio, quæ fit medio indivisibili, solum datur inter partes divisibiles secundum extensionem in alias proportionales usque in infinitum, ut dicitur in Physica loquendo de continuo: sed quælibet illarum qualitatum supponitur indivisibilis secundum extensionem: ergo nullatenus possunt inter se uniri physicè ad constituendum unum per se in esse qualitatis, & consequenter prædictæ qualitates sunt simpliciter plures. Per quod patet ad instantiam de aliis qualitatibus, quæ cum sint divisibiles in partes proportionales, benè possunt inter se physicè, medio indivisibili, uniri.

10 Contra tertio: quia gradus qualitatis de novo adveniens, nequit esse eiusdem rationis cum præcedenti: ergo ex nullo capite tenet solutio. Probat<sup>ur</sup> antecedens; primo, quia quæ producuntur a causis specie diversis, debent esse diversæ speciei: sed prædicti gradus qualitatis producuntur a demonstrationibus diversæ speciei, ut supra dictum est: ergo prædicti gradus, seu qualitates sunt diversæ rationis, seu speciei. Secundo, quia si prædicti gradus, seu qualitates essent eiusdem rationis, superflue poneretur secundus; difficile enim videtur assignare rationem, cur primus gradus non posset efficere, quidquid efficere posset secundus: sed non ponitur superflue, sed necessario: ergo signum evidens est, quod prædicti gradus, seu qualitates sunt diversæ rationis, seu speciei.

11 Qui primam sententiam tenent, variè respondent; primo, quod non acquiritur per secundam demonstrationem aliquis gradus, seu qualitas de novo, sed ille primus habitus, seu qualitas magis, ac magis intenditur. Sed (omisso pro nunc, quomodo fiat intensio qualitatis, quia  
pro-

proprium habet locum in libris de generatione) contra est; quia maior, & minor intensio habitus seu qualitatis, versatur circa eandem partem obiecti, quam antea respiciebat, & circa illam partem redditur potentia magis, aut minus facilis, per maiorem, vel minorem repetitionem demonstrationis circa illam partem obiecti; non tamen versatur talis intensio circa diversas partes obiecti: sed in nostro casu qualitas, seu habitus, primo acquisita per repetitionem primæ demonstrationis circa modum definiendi, v. g. antequam daretur aliqua demonstratio circa modum argumentandi, v. g. reddebat intellectum facilem ad definiendum: non vero ad argumentandum: ergo si postea intendatur talis qualitas, seu habitus, solum reddit intellectum magis facilem in ordine ad definiendum, seu circa eandem partem subiecti, non verò ad argumentandum, seu circa diversam partem obiecti; sed experientia docet, quod per repetitionem demonstrationis circa argumentationem, acquiritur facilitas circa eandem argumentationem, quæ est diversa pars obiecti a definitione; ergo per repetitionem demonstrationis circa argumentationem, non intenditur habitus, seu qualitas præexistens circa definitionem, sed extenditur circa argumentationem; & consequenter est novus habitus, seu nova qualitas,

12. Secundò respondent alii, non esse necessariam multiplicationem qualitatum, seu habituum; nam licet in logica sint plures veritates specie diversæ; cum tamen inter se sint naturaliter subordinatæ, ab unico habitu possunt attingi. Sed contra est primò, quia licet aliquæ veritates Logicæ sint subordinatæ, ita quod notitia unius præsupponat notitiam alterius; nam ad perfectam notitiam syllogismi præsupponitur notitia propositionis; tamen plures sunt veritates in ipsa Logica, quæ non ita sunt subordinatæ; nam benè potest quis scire, qui sit definitio,



nitio, quin sciat, quid sit divisio, & è contra, ita quòd notitia unius nullatenus dependeat à notitia alterius; ergo saltem, circa veritates non subordinatas, ponendæ sunt in Logica plures habitus, seu qualitates realiter distinctæ, & consequenter saltem ex hac parte Logica non erit unus simplex habitus, seu qualitas. Contra secundò: quia etiam si tales veritates sint subordinatæ, sunt specie distinctæ, & cognitiones, quæ ad ipsas terminantur, sunt etiam distinctæ specie, & circa quamlibet veritatem est specialis difficultas: ergo habitus, seu qualitates, quæ generantur ex prædictis cognitionibus, & facilitant intellectum circa prædictas veritates, erunt specie distinctæ.

13 Tertiò respondent alii, id, quod de novo acquiritur per secundam demonstrationem, non esse qualitatem, seu habitum, sed quemdam modum habitus præexistentis; & sic remanet indivisibilis prædictus habitus, sicut antea, & solum de novo modificatus. Sed contra primò; nam per id, quod acquiritur per secundam demonstrationem, eodem modo respicitur obiectum eius, ac respiciebatur obiectum primæ demonstrationis per id, quod per illam fuit productum; ergo sicut id, quod fuit productum per primam, est vera qualitas realis, ita id, quod producitur per secundam; nulla enim apparet dispar ratio. Contra secundò; quia per secundam demonstrationem acquiritur facilitas respectu cognitionis obiecti per ipsam demonstratam; sed qualitas, seu habitus acquisitus nihil aliud est, quam quædam facilitas respectu cognitionis obiecti; ergo quod acquiritur per secundam demonstrationem, non est modus, sed vera qualitas, & habitus realis. Tertiò; quia experientia constant, aliquando deperdi habitum, seu facilitatem acquisitam per primam demonstrationem, remanente facilitate acquisita per secundam; ergo hæc facilitas non est modus, sed qualitas.

litas, & habitus realis; aliàs modus remaneret finire, cujus est modus, quod videtur impossibile.

14 Ex quibus probatur secundò, seu roboratur nostra conclusio: quia habitus acquisiti ponuntur ad facilitandam potentiam: ergo ubi sunt diversæ difficultates vincendæ, ponendi sunt diversi habitus acquisiti: sed in Logica, ut dictum est, sunt diversæ difficultates vincendæ; juxta diversitatem veritatum, quæ in illa demonstrantur; ergo sunt ponendi diversi habitus realiter distincti. Quod potest confirmari, ex separatione reali unius facilitatis ab alia: quo nullum majus signum distinctionis realis.

15 Arguunt 1. Logica est una scientia: ergo est una simplex qualitas. Probatur consequentia; quia implicat, quòd multiplicetur ratio superior, quin etiam multiplicetur ratio inferior: sed ratio qualitatis est superior ad scientiam: ergo implicat, quòd multiplicetur qualitas, quin multiplicetur scientia. Hoc argumentum, quod est Achilles oppositæ sententiæ, potest retorqueri in contrarios; quia ratio superior non potest multiplicari, quin multiplicetur inferior: ergo quotiescumque datur multiplicatio superioris, debet dari multiplicitas inferioris: sed hæc consequentia non tenet in sententiâ contrariâ: ergo falsum est antecedens. Probatur minor; quia contrarii ad tenendum, habitum Logicæ esse indivisibilem, dicunt demonstrationes diversæ speciei non arguere habitus diversæ speciei, quia licet illæ demonstrationes sint specie distinctæ in esse rei; non tamen in esse scibilis. Nunc sic: in prædictis demonstrationibus esse rei est quid superius ad esse scibilis; ergo ad multiplicationem demonstrationum in esse rei, necessario presupponitur multiplicatio demonstrationum in esse scibilis: sed hoc non concedunt: ergo neque nos tenemur concedere consequentiam sui argumenti, eo quòd sicut qualitas

tas est superior ad scientiam, ita esse rei est superius ad esse scibilis.

16 Respondetur ergo ad argumentum, sicut illi possunt respondere ad nostram instantiam; distinguendo antecedens; Logica est una scientia unitate attributionis, ut postea dicemus, concedo; unitate indivisibilitatis, nego, & nego consequentiam. Etenim ex eo quod Logica sit una unitate attributionis, non sequitur, quod sit una simplex qualitas; nam ad hoc erat necessarium, quod esset una unitate indivisibilitatis, quod negamus, & amplius patebit sectione sequenti.

17 Arguunt 2. Unica potentia sufficit ad plures actus respicientes plura objecta specie diversa: ergo idem habitus Logicæ indivisibilis sufficiet etiam ad plures actus respicientes plura objecta specie diversa. Sed præterquamquod hoc argumentum magis probat, quam intendit probare; nam probat, quod sicut sufficit unus intellectus ad omnes actus scientiarum, ita etiam sufficeret unus simplex habitus, & consequenter, quod omnes scientiæ simul essent una simplex qualitas, quod aperte est falsum; respondetur negando paritatem; quia potentia non acquiritur per actus, sicut habitus, & sic potentia est causa universalis, & potest concurrere ad omnes actus, licet specie distinctos; habitus autem est causa particularis, & solum potest concurrere ad actus similes illis, à quibus fuit productus.

18 Arguunt 3. Unus, & indivisibilis habitus infusus, v.gr. fidei, sufficit ad assentiendum pluribus objectis credilibus specie differentibus: ergo unus, & indivisibilis habitus Logicæ sufficit ad plures veritates specie distinctas. Resp. neg. paritatem; nam cum habitus infusus fidei non detur ad faciliter operandum, sed ad substantiam actus, posito uno indivisibili habitu, non est necessarium ponere alium, sicuti

ex eo quod potentia non est ad faciliter operandum, sed ad substantiam actus, sufficit ad plures diversos actus unica potentia, & sicut in potentia ratio tendendi in omnia objecta est unica, scilicet, ratio entis, seu veri in intellectu, ita in habitu fidei, v.g. ratio tendendi in omnia objecta est unica, scilicet, veracitas Dei revelantis; at vero in habitibus acquisitis, cum dentur ad faciliter operandum, & cum respiciant objecta sub diversis rationibus, seu diversis difficultatibus debent multiplicari ad multiplicationem objectorum.

19 Arguunt 4. Idem habitus Prudentiæ, v.gr. sufficit ad actus omnium virtutum, etiam si specie differant: ergo similiter idem habitus Logicæ sufficiet ad omnes actus Logicales, etiam si specie differant. Et confirmatur, quia idem habitus Logicæ sufficit ad actus docentes, & utentes: ergo similiter ad omnes actus Logicales. Ad argumentum potest responderi primo negando antecedens, quia aliqui dicunt, dari diversos habitus parciales Prudentiæ circa diversas virtutes. Respondetur secundo directè negando paritatem, quia Prudentia non concurret elicitive, sed tantum regulative ad actus aliarum virtutum, & omnes possunt provenire regulative ab eodem indivisibili habitu; at verò Logica concurret elicitive ad suos actus, & sic ad diversitatem specificam actuum, debet poni diversitas specifica habituum. Similiter ad confirmationem respondetur, quia Logica concurret elicitive ad suos actus docentes, & directivè tantum ad utentes. Deinde quia, ut suo loco diximus, posito habitu Logicæ docentis, nulla remanet difficultas vincenda circa actus utentis, & sic non est necessitas multiplicandi habitus, sicut est circa diversas veritates Logicæ docentis, propter diversas difficultates, quas in se habet, ut dictum est.

## S E C T I O II.

*Exagitur questio de Logica in esse  
scibilis.*

20 **P**RO sectionis intelligentia supponendum est, quod non loquimur de unitate intrinseca Logicæ; quia tam Logica, quàm quælibet alia scientia per sua intrinseca prædicata, nobis ignota, habet suam intrinsecam unitatem, sed loquimur de unitate extrinseca, quæ desumitur ab objecto; in quo sensu, eadem unitas objecti, scientiæ tribuenda est.

21 Supponendum est etiam, quod objectum potest dici habere unitatem specificam, seu genericam. Tunc dicitur habere unitatem specificam, quando immediatè continet omnes veritates illius habitus, cuius est objectum, ita ut ratio sub qua attingitur à tali scientia possit assumi ut medium ad demonstrandas omnes passionem, quæ in scientia demonstrantur, licet in se objectum sit quid genericum, vel transcendens, quod contingit, quando ita attingitur objectum commune à scientia, ut attingantur sua inferiora, solum secundum illam rationem communem, & non secundum suas rationes particularitates. Tunc verò dicitur objectum habere unitatem genericam, quando licet omnia, quæ in scientia tractantur aliquomodo illi attribuantur, tamen ratio communis illius non potest assumi ad demonstrandas omnes passionem, quæ in scientia demonstrantur; sed præcisè illas, quæ cum illo convertuntur, & ad alias demonstrandas, assumuntur rationes inferiorum; quod contingit, quando scientia, ita attingit objectum commune secundum suam rationem ut etiam attingat inferiora, non solum secundum illam rationem communem, sed etiam secundum suas rationes particulares, quod expressè tenet.

tenet Scotus citatus num. 4. his verbis: *Ad secundum dico, quod multorum habituum specie differentium potest esse aliquod objectum commune, sicuti ab objectis eorum potest abstrahi objectum commune, à quo non est habitus unus secundum speciem, sed secundum genus.* His suppositis, facile resolvitur difficultas.

22 Dicimus primò: ergo Logica considerata in esse scientiæ est unus habitus, non unitate indivisibilitatis, sed unitate attributionis. Patet conclusio quoad utramque partem, quia ut dictum est in tota quæstione, non est una unitate indivisibilitatis; & deinde omnia, quæ tractantur in Logica attribuuntur modo sciendi, seu syllogismo, secundum diversas rationes Logicæ: ergo quomodocumque sumatur Logica, est una scientia unitate attributionis.

23 Dicimus secundò: Logica est una scientia unitate generica. Patet etiam conclusio; quia modus sciendi, vel syllogismus, est quid genericum, respectu suorum inferiorum, & Logica, non solum agit de ratione communi modi sciendi, vel syllogismi, sed etiam de rationibus particularibus inferiorum, ita ut omnes prædictæ rationes assumantur ad demonstrandas passionem, quas Logica demonstrat: ergo modus sciendi, vel syllogismus, est obiectum genericum, respectu Logicæ, & consequenter Logica, quomodocumque sumatur, est una in esse scientiæ unitate generica; siquidem ab unitate obiecti sumit, in esse scientiæ, suam unitatem. Neque aliquid contra hoc potest obiici, quod non facile solvatur ex dictis.

## Q U Æ S T I O X.

*Utrum Logica sit necessaria ad alias scientias  
acquirendas?*

**N**otandum est primò pro intelligentia  
quæstionis quod necessarium est, quod  
aliter se habere non potest, iuxta Arist. 5. Me-  
taph. & est duplex, aliud simpliciter, & aliud  
secundum quid in ordine ad consecutionem ali-  
cuius finis. Necessarium simpliciter, est illud  
sine quo finis consequi non potest, ut respiratio  
in ordine ad vivendum. Necessarium secundum  
quid est illud sine quo finis consequi potest,  
licet non ita commodè, ac cum illo, ut equus  
ad iter faciendum. Deinde adhuc dupliciter su-  
mitur necessarium simpliciter, physicè scili-  
cet, & moraliter. Necessarium physicè dicitur  
illud, sine quo nullatenus potest finis assequi;  
hoc modo est necessaria virtus calefactiva ad  
producendum colorem, Necessarium morali-  
ter est illud, sine quo finis physicè, & realiter  
potest acquiri, quia datur sufficiens virtus phy-  
sica ad illius consecutionem; sed tamen est ma-  
gna difficultas, ita ut videatur impossibile con-  
sequi, hoc modo est necessarium homini auxi-  
lium extrinsecum ad simul vincendum magnam  
multitudinem hominum, quia licet ad hoc ha-  
beat sufficientem virtutem physicam, tamen  
impossibile videtur, posse illos vincere sine ex-  
trinseco auxilio.

2. Secundo notandum est scientias posse con-  
siderari totaliter, quatenus comprehendunt  
omnes conclusiones ad ipsas spectantes, & par-  
tialiter, quatenus dicunt unam, vel alte-  
ram conclusionem. Deinde tam totaliter,  
quam partialiter consideratæ, possunt sumi in  
statu perfecto, quatenus habens prædictas  
scientias, potest reducere conclusiones ad sua  
prin.

principia, & cognoscere vim, & efficaciam earum, & in statu imperfecto, quatenus illas non potest reducere ad sua principia, neque earum vim, & efficaciam cognoscere. His notatis.

3 Circa hanc difficultatem, nullus negat, Logicam esse secundum quid necessariam ad alias scientias acquirendas; nam evidens est, eas melius acquiri cum Logica, quam sine illa. Omnes etiam concedunt, esse simpliciter necessariam ad facile acquirendas alia scientias. Unde solum est difficultas de necessitate simpliciter absolutè loquendo, & tam pro parte affirmativa, quàm negativa, sunt aliqui Authores, qui apud Recentiores possunt videri: quid autem videatur tenendum, per sequentes conclusiones declarabimus.

4 Dicimus primò: Logica artificialis neque physicè, neque moraliter est simpliciter necessaria ad acquirendam aliquam, vel aliquas conclusiones, etiam perfectò modo, cuiuslibet scientiæ. Probatur; quia aliqua principia sunt in scientiis solo lumine naturali nota; sed ex prædictis principiis deducuntur immediatè aliquæ conclusiones, quæ ipso lumine naturali cognoscuntur inferri ex illis: ergo in quacumque scientia possunt deduci aliquæ conclusiones sine Logica artificiali. Patet minor hoc exemplo, hoc primum principium. *Totum est maius sua parte*, est notum lumine naturali, & deinde per se patet, cubiculum regium esse partem palatii regalis; unde cognito illo principio, potest quis solo lumine naturali inferre has consequentias: ergo *Palatium regale est maius cubiculo regio*: ergo *Cubiculum regium est minus palatio regali*. In hac conclusione nulla videtur esse difficultas.

5 Si autem dicas, hoc solum probare, posse sine Logica acquiri aliquam conclusionem cuiuslibet scientiæ, non tamen acquiri perfectò modo; quia ad hoc est necessarium, quod intellectus per actum reflexum cognoscât bonitatem illa.



illationis, & quod per demonstrationem bonitatem consequentiæ ostendat, illam ad sua principia reducendo; sed ad hoc est necessaria Logica artificialis; ergo nulla conclusio alicuius scientiæ potest deduci perfecto modo sine Logica artificiali. Respondetur primò negando, quòd sit necessaria talis cognitio reflexa: quia ut aliqua conclusio perfectè acquiratur, sufficit, quòd intellectus sit certus de bonitate consequentiæ, & connexionem illius cum præmissis, ita ut cognoscat, rem aliter se habere non posse, quod totum solo naturali lumine potest cognosci sine aliqua reflexione.

6 Respondetur secundò negando minorem; sufficit enim ut reflexè possit cognosci bonitas illius consequentiæ, Logica seu demonstratio naturalis, per quam talis conclusio ad sua principia reducatur: non tamen requiritur advertentia ad principia, seu regulas Logicæ artificialis. Aliqua diximus quæst. 4. & quæst. 6. huius disp. quæ hic applicari possunt, & quibus ad alia similia augmenta potest responderi.

8 Dicimus secundò: Logica artificialis habitualis non est simpliciter necessaria, neque Physicè, neque moraliter ad acquirendas alias scientias totaliter, etiam in statu perfecto. Probatur primò, quia habitus acquisiti non requiruntur ad simpliciter, sed tantum ad faciliter operandum; sed Logica habitualis est habitus acquisitus; ergo Logica habitualis non requiritur ad simpliciter, sed tantum ad faciliter operandum; & consequenter nullatenus est simpliciter necessaria ad acquirendas alias scientias.

8 Probatur secundo; quia Logica artificialis solum concurret ad perfectam acquisitionem scientiarum medio suo actu, quod dirigit intellectum, ut sine errore procedat; ergo Logica habitualis nequit esse necessaria maiori necessitate, respectu acquisitionis scientiarum, quam respectu sui actus, medio quo concurret ad talem acquisitionem.

quisitionem ; sed actus Logicæ potest simpliciter haberi sine habitu ; ergo etiam sine tali habitu possunt scientiæ acquiri etiam in statu perfecto. Minor subsumpta sic ostenditur ; quia habitus acquisitus, ut dictum est, non requiritur ad simpliciter operandum, sed tantum ad faciliter ; ergo idem actus, qui habetur cum habitu, potest haberi sine illo. Patet consequentia ; nam aliàs habitus acquisitus daretur ad simpliciter operandum.

9 Et potest confirmari ; quia potentia simul cum obiecto, & sine habitu est sufficiens principium, ut simpliciter ponatur actus ; ergo habitus non est simpliciter necessarius ad actum. Probatur antecedens ; quia primi actus Logicæ docentis, ex quibus generatur habitus, dantur simpliciter sine habitu, ab obiecto, & potentia ; ergo similiter actus, qui postea habentur possunt simpliciter haberi sine habitu. Patet consequentia, quia actus, qui dantur ante habitum, sunt eiusdem rationis cum illis, qui dantur post habitum ; ergo sicut primi dantur simpliciter sine habitu, etiam secundi possunt dari simpliciter sine habitu, ergo Logica habitualis, non est simpliciter necessaria ad suum actum, & consequenter neque ad acquirendas alias scientias, etiam in statu perfecto, cum ad illarum acquisitionem solum concurrat medio suo actu.

10 Argues contra ; Logica habitualis est simpliciter necessaria ad promptè, & faciliter acquirendas scientias ; ergo est simpliciter necessaria ad acquirendas illas in statu perfecto. Patet consequentia ; quia acquirere scientias promptè, seu in statu perfecto, est illas promptè, & faciliter acquirere. Respondetur negando consequentiam, & probationem illius. Aliud enim est, acquirere scientias faciliter, & promptè, ac acquirere illas in statu perfecto ; nam acquirere scientias in statu perfecto ; nihil aliud est : quam posse reducere conclusiones ad sua principia,

pia, & cognoscere vim, & efficaciam illarum, præscindendo ab hoc, quod faciliter, vel difficulter acquirantur, & in hoc sensu dicimus, quod scientiæ possunt simpliciter acquiri sine logica habituali; acquirere autem scientias faciliter, & promptè solum dicit reducere conclusiones ad sua principia sine mora, & difficultate, quod per accidens se habet ad substantiam acquisitionis, ex quo solum sequitur, quod Logica habitualis sit secundum quid necessaria ad alias scientias acquirendas, ut dictum est num. 3. Alia argumenta, quæ solent fieri contra hanc conclusionem, non tantum sunt contra illam, quantum pro sequenti.

11 Dicimus tertio; Logica artificialis actualis est simpliciter necessaria, ad minus moraliter ad acquirendas alias scientias. Probatur primo ex Arist. qui 1. Physic. cap. 2. docet, Veteres in plures errores incidisse, & scientias imperfectè didicisse propter ignorantiam Logicæ. Secundo probatur argumento, quo usus est Galenus in libro; *An sanguis contineatur in arteriis?* Contra Erasistratum, qui negabat Logicam esse necessariam ad acquirendas scientias. quod huiusmodi est; aut ex quolibet sequitur quodlibet, aut non? Si sequitur, sic argutor; *Cigni sunt albi; Corvi sunt nigri; ergo Erasistratus est stultus.* Si non sequitur, ergo simpliciter est necessaria aliqua facultas, quæ doceat, quando aliquod sequitur ex alio, & quando non. Nunc sic; hoc docent actus Logicæ docentis artificialis: ergo Logica docens actualis artificialis aliquomodo est simpliciter necessaria ad acquirendas scientias.

12 Probatur tertio conclusio; quia Logica docens actualis artificialis indicat proximè viam, & modum acquirendi scientias sine errore; ergo sicut intendens ire Romam, v. g. nesciens iter; est moraliter impossibile, quod Romam recta via, & sine errore perveniat, etiam si

habeat visum, si illi via non indicetur, ita est moraliter impossibile, quod qui intendit scientias acquirere, illas perfectè, & sine errore acquirat, etiam si habeat lumen naturale, nisi illi per Logicam docentem artificialem actualem indicetur via, & modus talis acquisitionis: ergo Logica docens artificialis actualis est simpliciter necessaria moraliter ad acquirendas perfectè scientias.

13 Confirmatur; quia sæpè apparet intellectui prima facie, aliquem discursum esse bonum qui tamen bonus non est: & licet, si quis diligentiam magnam adhiberet, posset lumine naturali cognoscere, quod non esset bonus; tamen inter tot discursus, qui in qualibet scientia occurrunt, est omnino moraliter impossibile, quin multos prætereat, absque debito examine, nisi prius habeat logicam docentem actualem, qua mediante possit debite cognoscere prædictos discursus: ergo logica artificialis actualis est simpliciter necessaria moraliter ad acquirendas scientias in statu perfectò.

14 Arg. 1. Intellectus solo lumine naturali potest cognoscere conclusiones, quæ immediate sequuntur ex primis principiis: ergo ex illis conclusionibus cognitis potest deducere alias, quousque perveniat ad ultimas, quæ remotius in principiis continentur: sed hoc modo acquireret scientiam in statu perfectò: ergo solo lumine naturali, & sine logica possunt acquiri scientiæ in statu perfectò, & consequenter neque Logica actualis artificialis est simpliciter necessaria ad acquirendas scientias. Respondetur distinguendo consequens, & similiter totum argumentum, est enim verum physicè loquendo, falsum autem moraliter, & sic non est contra nos assertentes tantum, Logicam docentem actualem artificialem esse simpliciter necessariam moraliter ad acquirendas scientias. Similiter respondetur ad alia argumenta, quibus probatur

batur Logicam esse simpliciter necessariam ad acquirendas alias scientias.

15 Arg. 2. Ipsa Logica totalis fuit inventa sine alia Logica artificiali : ergo similiter aliæ scientiæ possunt acquiri sine illa. Respondetur primò, Logicam totalem fuisse acquisitam gradatim, & per partes, itaut secundum aliquam partem acquireretur sine Logica artificiali solo lumine naturali, & secundum aliam partem acquireretur juvamine primæ partis acquisitæ, & sic circa alias partes, ex quo solum sequitur Logicam secundum aliquam partem fuisse acquisitam sine Logica perfecto modo, quod est nostra prima conclusio pro omnibus scientiis. Videantur, quæ diximus quæst. 4. hujus disp. à num 9. usque ad 12.

16 Respondetur secundò neg. paritatem, quia aliæ scientiæ non sunt modi sciendi sicut Logica, & sic, ut perfectè acquirantur indigent Logica, qua regulentur; at verò Logica sibi ipsi deservit sicut lux, quæ, quia est ratio videndi, non solum deservit; ut videantur omnia sed etiam ut ipsa videatur. Cum quo potest responderi ad aliam instantiam, quia potest fieri, scilicet, quod sicut una pars Logicæ potest deservire ad acquirendam aliam, ita similiter una pars aliarum scientiarum potest etiam deservire ad acquirendas alias: nam est disparitas, quod partes Logicæ sunt partes modi sciendi, non tamen partes aliarum scientiarum.

# TRACTATUS

*De quinque vocibus, seu Universalibus Porphyrii.*

**D**iximus loquendo de obiecto Logicæ, Porphyrium, instantia Chrysaori, tractatum quem de quinque vocibus appellavit, ad intelligentiam prædicamentorum Arist. instituisse, ideoque in Logica, ut nunc extat, communiter præmittitur hic tractatus ad tractatum de prædicamentis, & quia universale ut sic est quid commune ad quinque voces, seu ad quinque universalia, quæ etiam dicuntur prædicabilia, & sunt genus, species, differentia, proprium, & accidens; ideo antequam de prædictis vocibus, seu universalibus in speciali disputetur, de universali in communi disputatur. Sit ergo.

D I S P. I.

*De Universalis metaphysico, & Unitate formali.*

**Q**uia universale est quoddam concretum dicens pro formali, & in recto universalitatem, & pro materiali, & de connotato naturam, quæ universalis denominatur; ideo licet agere de prædicta natura, propriè, & rigo-rose ad metaphysicum spectet; tamen iam communiter hic hæc de natura disputatio, & de pluribus ad ipsam pertinentibus præmittitur, quia valde conducit ad ipsius universalitatis formalis intelligentiam. Sit ergo.

QUÆ

## Q U Æ S T I O I.

*Utrum Natura, qua denominantur universales, dentur à parte rei?*

**P**RO intelligentia quæstionis notandum est, quod universale, generaliter loquendo; est illud, quod ad plura se extendit, & est multiplex; aliud dicitur universale in causando, ut est quælibet causa potens producere plures effectus diversæ rationis; cuiusmodi est Deus, & sol, aliud dicitur universale in repræsentando, seu insignificando, cuiusmodi est hæc vox *animal*, & quodlibet aliud signum plura significans, seu repræsentans, aliud dicitur universale in efficiendo, seu in prædicando, cuiusmodi est quælibet natura, quæ potest concipi ab intellectu ut apta inesse pluribus, & de illis prædicari. Certum autem est, universale in primo, & secundo sensu dari in rerum natura, & circa hoc inter Authores nulla est controversia: unde solum est difficultas de universali in tertio sensu, & inquirimus, an dentur in rerum natura aliquæ naturæ quæ possint ab intellectu concipi, ut aptæ inesse pluribus, & de illis prædicari?

**2** Ubi advertendum est, quod prædictæ naturæ, de quibus inquirimus, dicuntur secundum se universale metaphysicum, eo quod ad metaphysicum spectat agere de naturis, seu essentiis rerum secundum se; unde idem est inquirere, an dentur in rerum natura prædictæ naturæ? Ac inquirere, an in rerum natura detur universale metaphysicum? Et quidquid de prædictis naturis dicatur, de universali metaphysico dictum teneri debet; universale autem Logicum non dicitur quælibet ex prædictis naturis secundum se sed quatenus ab intellectu illis tribuitur Logica universalitas modo suo loco aptius explicando.

3 Circa præsentem difficultatem tenent Nominales, nullam dari naturam: quæ possit universalis denominari, ex parte rei, sed tantum dari universale in significando, seu in repræsentando; quod idem est, ac dicere, nullum conceptum obiectivum dari ex parte rei aliquomodo à singularibus præscindibile, cui possit universalitas applicari: sed hoc tantum provenire rebus per actum intellectus repræsentantem confusè omnia singularia ut similia. Plures Authores pro hac sententia adducit Mastrius in *Metaphysica* disp. 9. quæst. 1. Inter Reales autem assignantur aliquæ sententiæ: Prima asserit, nullam dari naturam ex parte rei, quæ possit universalis denominari, sed omnia esse ex se singularia. Hæc sententia videtur coincidere cum sententiâ Nominalium, & tribuitur ab Arist. 1. Met. cap. 6. & 4. Met. cap. 5. Heraclito, & cratilo, Secunda tenet per oppositum; non solum dari in rerum natura, naturas, quæ universales denominantur, sed etiam existere separatas à singularibus. Hæc sententia tribuitur ab Aristot. 1. Met. cap. 6. & 7. Met. cap. 8. Platoni dicenti, quòd datur à parte rei existens homo, seu humanitas in communi, de qua participant singuli homines, & similiter de aliis naturis, confingit enim hæc sententia præter hunc mundum visibilem ex singularibus compositum, dari alium mundum intelligibilem, qui universalibus, & communibus rebus componebatur; plures autem excusant Platonem ab hac sententiâ, dicentes, ipsum per mundum intelligibilem, non intellexisse naturas universales, sed quasdam ideas, seu similitudines omnium singularium existentes in mente divina, ad quarum instar Deus ad extra omnia singularia producit. Tertia sententia quasi media via procedit, asserit enim ex una parte, reperiri à parte rei naturas, quæ universales denominantur, & ex alia, prædictas naturas non existere separatas à singularibus.



ribus, sed in ipsis realiter inclusas. Hæc sententia est Arist. locis citatis, & pluribus aliis, & jam communiter admittitur à Philosophis, & eam tenet Scotus pluribus in locis quæstionibus sequentibus citandus.

4 Dicimus primò; à parte rei dantur naturæ, quæ universales possunt denominari, & consequenter universale in essendo non consistit in nudis vocibus, seu conceptibus formalibus. Hæc conclusio est contra Nominales, & contra Heraclitum, & Cratillum. Probatur primò; quia, natura, quæ potest denominari universalis, seu quæ dicitur universalis in essendo, nihil aliud est, quam natura apta concipi per intellectum, ut apta in esse pluribus, & prædicari de illis; sed plura sunt in rerum natura hoc modo conceptibilia, ut natura hominis, natura equi, &c. ergo à parte rei dantur naturæ, quæ possunt denominari universales.

5 Respondent Nominales negando minorem, quia (inquiunt) implicat dari aliquam naturam, quæ aliquomodo ex se sit apta, ut possit concipi pluribus inexistens, seu de pluribus prædicabilis, nam hoc solum provenit à vocibus, & conceptibus communibus immediatè significantibus, seu repræsentantibus omnia singularia in confuso.

6 Sed hanc responsionem pluribus rationibus impugnat Mastrius supra citatus, & quidam doctissimus recentior Thomista, quas hic breviter attingemus. Prima est, quia hæc vox: *Animal*, v. g. non significat immediatè hominem, & leonem, neque hæc vox; *Homo*, Petrum, & Joannem; sed aliquam naturam communem, in qua illa inferiora, & singularia conveniunt, & vel maximè, quia prædictæ voces sunt univocæ, & ut tenet Aristot. univoca sunt, quorum nomen est commune, & ratio significata in omnibus est eadem: ergo prædictis vocibus, seu nominibus debet correspondere ali-

qua res, seu natura communis per ipsas significata.

6 Secunda; quia datur prædicatio superioris de inferioribus; nam homo, v. g. prædicatur de Petro, & Paulo: sed non prædicatur vox, *homō*, sed res significata per illam: ergo datur aliquid significatum per prædictam vocem aliquomodo commune Petro, & Paulo, & consequenter ex parte reidatur aliqua natura communis, quæ possit universalis denominari. Tertia est similis præcedenti, & etiam desumitur ex prædicatione; nam in his prædicationibus, v. g. *Petrus est homo: Paulus est homo* prædicatur proprium, & immediatum significatum hominis: sed hoc nequit esse aliquod individuum particulare; nam nullum datur individuum, quod de pluribus prædicetur; neque collectio omnium individuorum in confuso; quia talis collectio nequit verificari de quolibet individuo seorsim: ergo solum restat, quod sit aliqua natura communis, quæ possit denominari universalis, & consequenter ex parte rei datur talis natura. Latè prosequitur Mastrius prædictas rationes impugnando aliquas responsiones ad illas, & etiam communiter Thomistæ, ostendendo dari præcisiones objectivas, quas pro nunc omittimus, & brevitatis causa, & quia ex dictis haud difficulter impugnari possunt quæcumque responsiones, & quia ex dicendis in tota disputatione amplius patebit nostra conclusio.

8 Secundò probatur conclusio: quia scientia non est de singularibus, quippè est de necessariis, qualia non sunt singularia, cum sint contingentia, sed est de universalibus, ut tenet Philosophus 1. Post. cap. 11. ergo ultra singularia debent poni in re aliquæ naturæ communes, quæ possint denominari universales, & ponantur pro objecto scientiæ, eo vel maxime, quia in scientia demonstrantur passionēs

con.

convertibiles cum objecto, & certum est passion-  
es específicas nullatenus converti cum aliquo  
singulari.

9 Arguunt contra: nihil datur in rerum na-  
tura, quod non sit singulare: ergo nulla natu-  
ra datur, quæ sit communis, seu possit denomi-  
nari universalis. Probatur antecedens; quia  
omne, quod est in rerum natura est productum  
per aliquam actionem: sed actiones sunt circa  
singularia: ergo nihil datur in rerum natura,  
quod non sit singulare. Confirmatur; quia omne  
quod est in rerum natura est capax existentiae:  
sed existentia solum convenit singularibus: ergo  
nihil datur in rerum natura, quod non sit sin-  
gulare.

10 Respondetur, hoc argumentum, & ejus  
confirmationem non tantum esse contra no-  
stram conclusionem, quantum probatione se-  
quenti, ut infra patebit, tamen respondetur  
in forma distinguendo antecedens, nihil datur  
in rerum natura, quod non sit singulare, for-  
maliter, vel identicè, concedo; formaliter præ-  
cisè, nego, & nego consequentiam. Ad probatio-  
nem antecedentis respondetur similiter, & eo-  
dem modo respondetur ad confirmationem, di-  
stinguendo majorem, omne quod est in rerum  
natura est capax existentiae formaliter, vel iden-  
ticè, concedo, formaliter præcisè, nego. Distin-  
guo etiam minorem, existentia solum conve-  
nit singularibus formaliter, concedo; identicè,  
nego. Similiter distinguo consequens, nihil  
datur in rerum natura, quod non sit singulare  
formaliter, vel identicè, concedo, formaliter  
præcisè, nego. Etenim verum est, quod omne  
quod in rerum natura existit est singulare, fal-  
sum tamen quod singularitas per se, & formaliter  
omnibus competat; nam naturis communibus  
non competit ex se, & formaliter singularitas;  
imò potius ex sua ratione formali à singulari-  
tate præscindunt, & ab illa, vel virtualiter,

vel formaliter, juxta diversas sententias, distinguuntur, licet alias sint identicè singulares, eo quod realiter cum ipsa singularitate identificentur: quæ identificat. o nullatenus obstat, ut ex se possint concipi, & denominari universales ab intellectu. Alia argumenta solum probant, non dari à parte rei universale formaliter, quod nos libenter fatemur, ut suo loco patebit; & sic non sunt contra nos.

11. Dicimus secundò; prædictæ naturæ, quæ denominantur universales, non dantur in rerum natura separatæ à singularibus, sed in illis realiter incluse. Hæc conclusio est contra sententiam, quæ tribuitur Platoni. Probatur primò argumento posito contra primam conclusionem: nam ut ibi dictum est, omne quod in rerum natura existit, necessario aliquomodo est singularis: ergo nihil potest dari in rerum natura, quod non sit ad minus identicè, & inclusivè singulare, & consequenter nulla datur natura universalis à singularibus separata.

12. Probatur secundò: quia implicat, essentiam alicujus rei, vel partem ipsius essentiæ existere extra rem, cuius est essentia, eo quod nihil magis intimum, & intrinsecum rei, quam ejus propria essentia; sed quælibet natura communis, vel est tota essentia singularis, ut homo respectu Petri, vel pars illius essentiæ, ut animal respectu ipsius Petri; ergo implicat, quòd existant prædictæ naturæ à singularibus separatæ.

13. Arguunt contra ratione posita num. 8. pro 1. conclusione, scilicet, quod scientiæ non sunt de singularibus, eo quod sunt contingentiæ, & corruptibilia; ergo debent dari aliquæ naturæ universales à singularibus separatæ, circa quas versentur scientiæ tanquam circa necessaria perpetua, & incorruptibilia. Respondetur negando consequentiam; quia sufficit, quod dentur naturæ universales, licet in singularibus

ribus inclusæ, ad hoc, ut scientiæ versentur circa perpetua necessaria, & incorruptibilia; quia scientiæ solum sunt de necessariis quoad essentiam, & quoad connexionem prædicatorum, quam necessitatem, & incorruptibilitatem habent naturæ universales, etiam si sint in singularibus inclusæ; nam semper est verum dicere, quod homo est animal rationale, quod est risibilis, &c. ideoque propositiones, quæ fiunt juxta prædictam connexionem prædicatorum, dicuntur propositiones æternæ veritatis; at vero scientiæ non sunt de necessariis, & incorruptibilibus quoad existentiam, quam necessitatem, & incorruptibilitatem non habent naturæ universales in singularibus inclusæ, quod nullatenus obstat, ut ponantur pro obiecto scientiarum. Videatur Scotus in 1. dist. 3. quæst. 4. litt. I. & K.

## Q U Æ S T I O . II.

*Utrum Naturis, quæ denominantur universales, conveniat unitas formalis, à parte rei.*

**P**RO intelligentia quæstionis notandum est primo ex Arist. 5. Met. cap. 6. & 10. quod unum est indivisum in se, & divisum a quolibet alio; unde cum oppositorum eadem sit ratio, quot modis dicitur divisum, tot dicitur & unum, indeque ad cognitionem unitatis, valde cognitio divisionis conducit. Igitur divisio, quoad præsens attinet est duplex, materialis scilicet, & formalis. Materialis dicitur illa, quæ causatur per principia materialia, seu per individuationes, (quæ ideo dicuntur principia materialia, quia contrahunt, & determinant naturam universalem ad esse individui, & singularis, & consequenter ad esse subiectionis, & frequenter apud Philosophos subiectum appel-

latur materia ) ut quando dividitur homo in Petrum, & Joannem. Divisio formalis dicitur illa, quæ causatur per principia formalia, id est per differentias essentielles, (quæ ideo dicuntur principia formalia, quia idem præstant in compositionibus metaphysicis, ac forma in compositionibus physicis ) ut quando dividitur aliquod genus in suas species, ut animal in hominem, & brutum.

2 Ubi advertendum est, quod divisio materialis nullam habet latitudinem, cum principia materialia, seu individualia nullam habeant communitatem, at vero divisio formalis latitudinem habet; quia potest dari per differentias essentielles minus, aut magis commune, ideoque dividitur in genericam, & specificam. Generica est, quæ datur per differentias genericas, ut quando dividitur substantia in corpoream, & in incorpoream, & hæc divisio erit magis, vel minus communis, juxta maiorem, vel minorem communitatem differentiarum, ut patet in arbores prædicamentali, & etiam infra loquendo de unitate. Divisio specifica dicitur illa, quæ datur per differentias específicas, ut quando dividitur animal in hominem, & brutum; licet alias hæc divisio etiam dicatur generica sumpta denominatione a diviso, sed hoc parum refert, quia reducitur ad quæstionem de nomine.

3 Unde sequitur, quod datur similiter duplex unitas, scilicet materialis, & formalis opposita supradictæ duplici divisioni. Unitas materialis est carentia divisionis materialis, quam habet quodlibet individuum, quia nequit dividi per materiales differentias. Unitas formalis est carentia divisionis formalis, quam habet natura humana, v.g. quia non potest dividi per formales differentias.

4 Ubi etiam est advertendum, sicut dictum est de divisione, quod licet unitas materialis.

rials, seu numerica nullam habeat latitudinem tamen unitas formalis latitudinem habet; nam alia est unitas, quæ dicit carentiam divisionis per differentias specificas, ut est unitas hominis, & vocatur unitas specifica, alia est, quæ dicit carentiam divisionis per differentias genericas, ut unitas animalis, & dicitur unitas generica, & cum genus possit esse magis, vel minus commune, & ut sic, vel vocatur genus supremum, vel intermedium, vel infimum, ut patebit in arbore prædicamentali, ita unitas formalis generica est magis, vel minus communis, & denominatur unitas generica suprema, intermedia vel infima, quod omne videtur deduci ex Philosopho 5. Met. text. 11. dicente: *Universaliter anim quacumque non habent divisionem, in quantum non habent, sic unum dicuntur, ut si in quantum homo, unus homo: si in quantum animal, unum animal.*

5 Nontandum est secundò, quod pluries apud Scotum reperitur, & etiam sequitur ex dictis, scilicet, unitatem formalem esse minorem unitate numerali, & inter unitates formales, illam esse minorem, quæ communiori principio convenit; cuius ratio est, quia unitas est carentia divisionis, & carentia tanto maior est, quanto minus formæ, qua privat, relinquit in subiecto: sed unitas materialis, seu naturalis, qua Petrus, v. g. est unus numero, nullam divisibilitatem relinquit in Petro; unitas vero formalis, qua idem Petrus est unus homo, relinquit in homine divisibilitatē per principia materialia in plura individua, & unitas formalis, qua idem Petrus est unum animal, relinquit non solum divisibilitatem per principia materialia in plura individua, sed etiam divisibilitatem formalem, seu per principia formalia in plures species animalis, & similiter suo ordine de aliis generibus subalternis, & supremis: ergo unitas materialis, seu numerica est maior unitate formali, & in-

tex

ter unitates formales illa est major, vel minor, quæ convenit magis, vel minus communi principio.

6 Hæc explicatio unitatis formalis est communis inter Thomistas, & Scotistas, & solum est controversia, an prædicta unitas conveniat naturis a parte rei, & independenter a consideratione intellectus? An vero solum per operationem intellectus illis conveniat? Circa quam difficultatem tenent omnes Scotistæ cum Scoto in 2. dist. 3. quæst. 1. talem unitatem a parte rei convenire naturis independenter ab intellectus consideratione. Thomistæ autem, illam per considerationem intellectus tribuunt naturis, licet ut advertit Mastrius disp. 9. Metaph. qu. 6. art. 1. aliqui ex Thomistis nostram sententiam tenere videantur.

7 Dicimus cum prima sententia; unitas formalis minor unitate numerali convenit naturis quæ denominantur universales a parte rei, & independenter a consideratione intellectus. Hanc conclusionem probat Scotus citatus pluribus rationibus, ex quibus præcipuas proponemus. Igitur probatur primo conclusio; quia secundum Philosophum 10. Met. in omni genere entium est unum primum, quod est metrum, & mensura omnium, quæ sunt illius generis; sed secundum ipsum Philosophum talis mensura est realis; nam mensuratum est reale, & mensura, & mensuratum debent esse eiusdem rationis: ergo tale unum constituitur unitate reali; sed talis unitas non est singularis, vel numeralis; quia nullum est singulare, quod sit mensura omnium, quæ sunt in suo genere; ergo est alia unitas, scilicet, unitas formalis, Probatur minor, quia secundum Philosophum 3. Met. in individuis eiusdem speciei non est hoc prius, illud posterius hoc est, ut inquit Scotus, non datur inter individua ordo essentialis, ita ut unum excedat aliud essentialiter, quod  
re.



requiritur ad rationem mensuræ, quæ debet excedere in perfectione mensurarum; ergo unitas, quæ requiritur ad rationem mensuræ non est unitas numeralis.

8. Aliqui respondent, quod non requiritur, quod detur unum, quod sit mensura omnium, quæ continentur sub uno genere; sed sufficit, quod dentur plura, quorum quodlibet sit mensura aliorum, quæ continentur sub illo genere, quod convenit omnibus individuis hominis, v. gr. nam quodlibet illorum per suam unitatem numericam est mensura omnium aliorum, quæ continentur sub genere animalis. Sed contra est; quia nos non negamus, quod quodlibet individuum hominis sit mensura omnium, quæ continentur sub genere animalis, sed tantum dicimus, quod hæc ratio mensuræ non convenit individuis naturæ humanæ per unitates numericas, sed per unitatem formalem; quod sic ostenditur, quia unitates numericæ in omnibus individuis ejusdem generis sunt ejusdem rationis; sed ad rationem mensuræ requiritur diversa ratio, & maior perfectio in mensura, quam in mensurato; ergo prædicta ratio mensuræ non convenit individuis ratione unitatis individualis. Deinde Petro & Paulo, ver. gr. qui sunt individua hominis, convenit ratio mensuræ respectu individuorum aliorum specierum animalis per aliquid, in quo Petrus & Paulus à parte rei conveniunt; sed non conveniunt in unitatibus individualibus, cum hæc potius sint rationes differentiarum, quam convenientiarum; ergo assignanda est alia ratio, in qua conveniant, ratione cuius sint mensura individuorum aliarum specierum animalis; sed hæc solum potest esse natura illis communis; ergo ratione talis naturæ habent unitatem aliam ab unitate individuali; sed hæc unitas nequit esse alia nisi formalis: ergo à parte rei convenit naturis, quæ denominantur universales a  
uni

unitas formalis alia ab unitate numerali.

9 Probatur secundò; quia secundum Philosophum 5. Met. cap. de , ad, aliquid, idem, simile, & æquale, fundantur super unum: sed relationes identitatis, similitudinis, & æqualitatis sunt reales: ergo unitas, in qua fundantur, debet esse realis: sed talis unitas non est numeralis: ergo est unitas formalis. Probatur minor; quia unitas, in qua fundantur tales relationes, est ratio convenientiæ inter ea, quæ referuntur: sed unitas numeralis potius est ratio disconvenientiæ, quam convenientiæ: ergo unitas, quæ est fundamentum talium relationum; nequit esse numeralis: & consequenter datur alia unitas realis à numerali, quæ nequit esse alia nisi formalis.

10 Confirmatur; quia relatio identitatis fundatur inter Petrum, & Paulum, quæ non fundatur inter Petrum, & æquum: sed si fundaretur in unitate numerali, non esset major ratio, ut fundaretur inter Petrum, & Joannem, quam inter Petrum, & equum, quia in singularitate æquè differunt, vel æquè conveniunt Petrus, & Paulus, ac Petrus, & æquus: ergo talis relatio identitatis non fundatur in unitate numerali; & consequenter fundatur in alia unitate, quæ nequit esse nisi formalis.

11 Probatur tertio conclusio, & est ratio similis præcedenti confirmationi; quia si non datur nisi unitas numerica: ergo non datur nisi distinctio numerica, nam unitas, & distinctio sunt opposita, & quot modis dicitur unum oppositum, dicitur & aliud: sed falsum est, quòd solum detur distinctio numerica: ergo etiam est falsum, quòd solum detur unitas numerica: Minor patet, nam si tantum daretur distinctio numerica, æquè differrent Petrus, & Paulus, ac Petrus, & equus: sed hoc est falsum, nam plus differunt Petrus, & equus, ac Petrus, & Paulus: ergo datur alia distinctio præ-

præter numericam, & consequenter alia unitas, quæ nequit esse nisi formalis.

12 Probatur quartò, unitas est passio entis: ergo quot modis aliquid dicitur ens, tot dicitur unum: sed naturæ, quæ denominantur universales, verè, & realiter sunt entia: ergo verè, & realiter habent unitatem: sed hæc unitas non est numeralis, cùm ex suo conceptu formalis naturæ ab ipsa præscindant: ergo est alia unitas; scilicet formalis. Confirmatur, & clarius explicatur præcedens ratio, quia unitas formalis est carentia divisionis formalis, seu per principia formalia: sed Petrus v. g. non solum caret divisione per principia materialia, sed etiam per principia formalia, id est per differentias específicas, & genericas: ergo non solum habet unitatem materiale, seu numericam, sed etiam unitatem formalem.

13 Communis solutio solet esse ad prædictas rationes, quod solum probant unitatem fundamentalem, seu virtuale. Sed contra est; quia unitas fundamentalis, seu virtualis non est actualis unitas, sed fundamentum, ut intellectus talem unitatem efficiat: sed inter Petrum, & Paulum, v. g. actualiter datur ratio indentitatis independenter ab intellectus consideratione: ergo unitas, supra quam fundatur talis relatio indentitatis, debet esse actualis independenter à consideratione intellectus. Patet consequentia; quia relatio, eo modo, quo est relatio, petit fundamentum.

14 Arguunt contra; esse formale non convenit rebus à parte rei, sed per operationem intellectus: ergo unitas formalis, quæ sequitur esse formale, non datur à parte rei, sed per operationem intellectus. Hoc argumentum est præcipuum fundamentum oppositæ sententiæ, quod latè prosequuntur adversarii, sed commodius respondetur quæstione sequenti. Pro nunc autem negamus antecedens: quia esse formale est esse in-

tionatam, sed quælibet natura habet propriam essentiam, ac entitatem secundum se, & ut à singularitate aliquomodo distincta; ergo ut sic habet propriam unitatem: sed hæc nequit esse alia, nisi formalis, ergo naturæ in statu essentiaæ convenit unitas formalis. Argumenta, quæ solent obiici contra hanc conclusionem, potius sunt contra sequentem.

3 Dicimus secundò; natura, adhuc in statu existentiaæ realis, habet suam unitatem formalem. Hæc conclusio deducitur ex Scoto loco citato, & potest probari rationibus, quibus quæstione antecedenti ostenditur convenientia à parte rei inter individua eiusdem speciei.

4 Deinde probatur aliis rationibus. Prima quia unitas numerica non opponitur unitati formali; ergo unitas formalis non deperditur per unitatem numericam. Secunda, quia divisio numerica solum oponitur unitati numericæ, non tamen unitati formali; ergo licet natura in statu existentiaæ sit multiplicata numericè, manet una formaliter. Tertia, quia unitas formalis est propria passio naturæ, & cum ea realiter identificata: ergo in quocumque statu sit natura habet unitatem formalem. Patet consequentia; quia quæ realiter identificantur, nullatenus separari possunt.

5 Arguunt primò; nequit dari aliqua unitas, nisi ratione entitatis indivisa; sed in individuis non datur natura indivisa, imò est multiplex, & divisa; ergo naturæ, prout in individuis, non convenit aliqua unitas. Respondetur, hoc argumentum procedere contra asserentes, unitatem formalem naturæ non multiplicari ad multiplicationem individuorum; non tamen contra nos ponentes talem multiplicationem, ut patebit quæstione sequenti. Itaque respondetur in forma distinguendo maiorem, nequit dari aliqua unitas nisi ratione entitatis.

indivisa, si talis unitas non sit multiplicata, concedo: si sit multiplicata nego: & concessa minori, nego consequentiam. Etenim, quod natura dividatur per differentias numericas, solum facit, quod unitas formalis ipsam naturam consequens sit numericè multiplex, non tamen, quod sit multiplex formaliter; quia ad hoc erat necessarium, quod natura divideretur per differentias formales, seu formaliter: quæ divisio opponitur unitati formali naturæ; non autem divisio numerica.

6 Argues contra: si unitas formalis est multiplicata; ergo jam non est unitas, sed multiplicitas; ergo naturæ in statu contractionis, & existentiae non convenit aliqua unitas formalis. Respondetur distinguendo consequens, non est unitas, sed multiplicitas, hoc est, non est unica, sed multiplex numero unitas formalis, concedo, non est una, sed multiplex, id est, formaliter multiplicata, nego: quia ad hoc erat necessarium quod divideretur natura per principia formalia. Et distingo ultimum consequens, in statu contradictionis non convenit naturæ aliqua unitas formalis, hoc est, omnibus naturis, quæ sunt in singularibus, non convenit simul aliqua unica unitas formalis, concedo; cuiuslibet naturæ non convenit sua unitas formalis, nego. Sicut enim multiplicatur natura, multiplicatur etiam unitas formalis ipsam consequens.

7 Dices; ergo unitas formalis non est minor unitate numerali. Probatur consequentia; quia si quælibet natura habet suam unitatem formalem, unitas formalis nullam relinquit divisionem; sed maioritas, vel minoritas unitatis cognoscitur, ex eo quod magis, vel minus relinquat divisionis, ergo unitas formalis non est minor unitate numerali. Respondetur negando consequentiam: cuius probationis distingo maiorem, si quælibet natura habet suam unitatem formalem, unitas formalis nullam relinquit divisionem per

per inexistentiã, id est, unica natura cum unica unitate formali non inexistit pluribus membris dividendibus, concedo, per indifferentiã, id est, natura cum sua unitate formali non est indifferens ad plura membra dividendia, nego. Similiter distinguo minorem; maioritas, vel minoritas unitatis cognoscitur, ex eo quod magis, vel minus relinquat divisionis, in illis, quibus natura inexistit præcisè, nego, in illis, ad quæ natura est indifferens, concedo, & nego consequentiã. Etenim, ut unitas formalis sit minor unitate numerali sufficit hæc differentia, scilicet, quod unitas numeralis, ita est determinata ad unum, ut ex se nullatenus alteri convenire possit; Petreitas enim, cui convenit unitas numeralis, ita ex se est determinata ad Petrum, ut nullatenus alteri convenire possit. Unitas verò formalis est talis naturæ, quod ex se non est ad unum determinata (licet alias per singularitatem sit determinata ad unum) sed indifferens ad plura, ita ut naturæ, cui convenit talis unitas formalis, non repugnet quantum est ex se coniungi cum alia singularitate ab illa, cum qua actualiter est conjuncta. De quo iterum redibit sermo loquendo de communitate naturæ. Hoc modo intelligimus Scotum, quando dicit, unitatem formalem esse minorem unitate numerali.

8 Arguunt secundò; tunc aliqua sunt formaliter, seu essentialiter unum, quando habent unam formam, seu unam essentiam; sed ipsa forma, seu essentia est divisa in individuis, & sic non una, sed multiplex; ergo in individuis, seu in statu existentia, non habet unitatem formalem. Respondetur distinguendo maiorem; tunc aliqua sunt formaliter, & essentialiter unum, quando habent unam formam, seu essentiam, unitate inexistentiæ, nego, unitate indifferentiæ, concedo. Similiter distinguo minorem; forma, seu essentia, quæ est divisa in individuis, non est una, unitate inexistentiæ, concedo;

uni-

unitate indifferentiæ, nego, & nego consequentiam. Etenim, ut aliqua individua dicantur esse unum formaliter, non requiritur, quod natura, seu essentia illorum sit una per inexistentialitatem in illis; sed sufficit, quod sit una per indifferentiam: quod convenit naturæ ubicumque reperiatur, licet sit materialiter divisa; de quo amplius quæstione sequenti, & etiam loquendo de communitate naturæ.

9 Pro aliis argumentis observandum est; quod status essentia; ut præscindens ab existentia, non solum dicit essentiam naturæ in statu potentialitatis, antequam producat, aut essentiam naturæ in esse obiectivo apud intellectum; sed etiam statum actualitatis, quatenus essentia, sub existentia manens, aliquomodo ab ipsa existentia ex sua ratione formali præscindit licet non neget existentiam, sed tantum dicit præcisionem, ad quam sequitur quasi indifferentia ex se ad existendum, vel non existendum, nam tunc loquitur de essentia, siue existat, siue non; sicut similiter scientia dicitur abstrahere ab existentia; non quia non possit haberi de rebus existentibus; sed quia indifferenter habetur, siue existant, siue non. Unde unitas, seu divisio, quæ convenit naturæ in statu essentia;, convenit etiam naturæ in statu existentia;, seu prout in individuis; non quidem reduplicativè, ut in illis, sed specificativè.

#### QUÆSTIO IV.

*Utrum multiplicetur unitas formalis naturæ ad multiplicationem individuorum?*

**H**Æc quæstio coincidit cum alia, quæ sub histitulis solet exagitari, an scilicet, natura per unitatem formalem sit communis per

per inexistentiā , vel per indifferentiam ?  
Vel an sit communis positivè , vel negativè ?  
Nos autem , claritatis gratia , prius illam sub  
proposito titulo exagitabimus , & postea de na-  
turæ communitate agemus.

2 Dicimus ergo : unitas formalis multipli-  
catur ad multiplicationem individuorum , ita  
ut non detur unica unitas formalis , sed tot  
quot sunt individua . Hæc conclusio videtur  
expressa Scoti , nam in 2. dist. 3. quæst. 6. §. *Ad  
questionem* , litt. E dicit , loquendo de unitate  
formali , ut potest videri in littera : *Concedo  
ergo , quod unitas realis non est alicuius entitatis  
existentis in duobus individuis , sed in uno* . Et in  
3. dist. 8. quæstione unica , in fine , innuit mul-  
tiplicationem unitatis formalis ad multiplica-  
tionem individuum ; dum inquit ; *Et tunc ad  
propositum dico , quod in natura humana in Chri-  
sto est unitas aliqua realis minor unitate numera-  
li , & similiter unitas realis in Maria* . Ubi no-  
tandum est illud verbum *similiter* , per quod cla-  
rè denotatur , quod unitas formalis humani-  
tatis Christi non est eadem numericè , ac uni-  
tas formalis humanitatis Mariæ ; sed numericè  
ab illa distincta , licet utraque unitas formalis  
sit similis :

3 Probatur autem conclusio ratione ; quia  
natura humana , v. gr. multiplicatur ad multi-  
plicationem individuorum ; ergo similiter mul-  
tiplicatur unitas formalis ipsam consequens .  
Probatur consequentia ; quia unitas formalis  
est propria , & intrinseca passio naturæ , & ab  
ea realiter indistincta ; sed implicat , quod ali-  
qua natura , seu essentia multiplicetur , quin  
etiam multiplicetur quidquid cum illa realiter  
identificatur ; ergo sicut natura multiplicatur  
numero ad multiplicationem individuorum ,  
ita multiplicatur unitas formalis cum ea reali-  
ter identificata . Hæc ratio prosequetur que-  
stio.



stione sequenti, & aliæ, quæ ibi ponendæ sunt, hic possunt applicari.

4 Arguunt primò: per unitatem dicitur aliquid unum in se, & divisum à quolibet alio: ergo si in quolibet individuo datur unitas formalis, constituet illud unum in se, & divisum à quolibet alio individuo formaliter: sed unum individuum non est divisum formaliter ab alio ejusdem speciei: ergo quodlibet individuum non habet unitatem formalem distinctam ab unitate formali alterius individui. Respondetur distinguendo antecedens: per unitatem dicitur aliquid unum in se, & divisum à quolibet alio, eo modo, quo unitas est propria illius, concedo: alio modo, nego; & distinguo consequens, si in quolibet individuo datur unitas formalis, constituet illud unum in se, & divisum à quolibet alio individuo formaliter; à quolibet alio individuo diversæ speciei, concedo, à quolibet alio individuo ejusdem speciei, nego, & concessa minori subsumpta, nego consequentiam.

5 Ut autem solutio huius argumenti, à qua dependent solutiones plurium argumentorum, clarè percipiatur, observandum est, quod illa unitas, quæ est propria unius, prout proprium opponitur communi, eo modo, quo est propria illius constituit illud unum, & eodem modo divisum à quolibet alio; unitas verò, quæ non est propria alicuius, prout proprium opponitur communi, sed est aliquomodo pluribus communis, non constituit illud unum in se, & divisum à quolibet alio eorum, quibus talis unitas est communis. Nunc ad propositum, unitas formalis, quæ est in Petro, v. gr. non est propria illius, prout proprium opponitur communi, nam talis unitas est communis per indifferentiam (sicut est communis ipsa natura; ad quam consequitur, ut dicimus quæstione se.

sequenti) Omnibus individuis speciei humanæ, ita ut quantum est ex se, non repugnet illi esse in quolibet alio individuo, ab illo in quo est, unde non constituit Petrum unum in se formaliter, & formaliter divisum à quolibet alio individuo suæ speciei; unitas verò numerica Petri est propria illius, prout proprium opponitur communi, unde constituit Petrum unum in se numericè, & numericè divisum à quolibet alio individuo suæ speciei; unitas tamen formalis naturæ Petri potest dici propria illius, prout proprium opponitur communi, facta comparatione cum individuis alterius speciei, eo quod sit propria speciei naturæ humanæ, & omnium, quæ sub illa continentur, & hoc modo constituet Petrum unum in se formaliter (sicut ex se nata est constituere per indifferentiam quodlibet aliud individuum ejusdem speciei) & formaliter divisum à quolibet alio individuo alterius speciei.

6 Arguunt secundo; natura humana, quæ est in individuis, non habet divisionem formalem; ergo habet unitatem formalem; sed hæc unitas formalis nequit esse multiplex; quia ad hoc requiritur formalis divisio, seu per differentias formales; ergo est unica, & consequenter non multiplicatur unitas formalis ad multiplicationem individuum. Confirmatur ex illo Arist. 5. Met. tex. 11. *Universaliter enim, quacumque non habent divisionem, in quantum non habent sic unum dicuntur, ut si in quantum homo, unus homo, sed Petrus & Paulus, v.g. in ratione humanitatis non habent divisionem; ergo in ratione humanitatis sunt unum, & consequenter unitas formalis humanitatis non multiplicatur in illis.*

7 Respondetur, concessio primo enthymemate, distinguendo minorem subsumptam; hæc unitas formalis nequit esse multiplex, numericè, nego; nequit esse multiplex, formaliter, concedo, & similiter distinguo consequens, est unica, &c. id est, nō multiplicata formaliter, con-

pedo, id est, non multiplicata numericè, nego? Etenim, benè stat, quod unitas formalis non multiplicetur formaliter, eo quod natura, quam consequitur, non multiplicatur, neque dividitur per differentias formaliter, & quod sit multiplex, seu multiplicetur numericè, eò quod natura, ad quam consequitur, numericè multiplicatur: nam benè stat divisio, seu distinctio formæ, quia sit distinctio, seu divisio formalis, ut benè advertit Scotus in 2. dist. 3. quæst. 7. litt. D. his verbis: *Differentia formalis potest accipi pro differentia in forma, & hoc videtur propriè significare hoc, quod dicitur differentia formalis; vel potest accipi differentia formalis pro differentia formarum, licet non sit in forma, ut in ratione differendi... non enim sequitur, forma differunt: ergo formaliter differunt, vel differunt in forma: sicut non sequitur; homines plures differunt: igitur in humanitate differunt; aliud enim est, aliquid distinguere, & aliud ipsum esse primam rationem distinguendi, vel distinctionis; quia cum hoc, quod ipsum sit distinctum, stat, quod ipsum non sit ratio distinguendi.* Hæc Scotus; quibus verbis clarè denotat; naturam, & consequenter unitatem formalem propriam illius multiplicari, licet non sint rationes multiplicandi, quod propriè est nostra conclusio, nam dicimus, unitatem formalem multiplicari ad multiplicationem individuorum, & sic esse unitates formales numericè distinctas; non tamen distinctas formaliter, quia non sunt rationes formales distinguendi, sed tantùm rationes formales distinctæ.

8 Ad confirmationem respondetur ex dictis, quod dictum Arist. intelligitur in sensu Scoti, scilicet, quod illa quæ non habent divisionem, in quantum non habent divisionem, sunt unum, id est, ratio in qua non habent divisionem, non est ratio illa distinguendi, cum quo componitur, quòd illa ratio sit distincta, unde ad minorem dicimus, quòd Petrus, & Paulus non habent di-

visionem in humanitate ex quo solum sequitur, quod humanitas non sit ratio distinguendi Petrum à Paulo, non tamen sequitur, quod humanitas non sit distincta, & multiplicata numericè in Petro & Paulo, & consequenter unitas formalis ipsam consequens, ratione differentiam individualium, quibus in Petro & Paulo coniungitur. Similiter respondetur ad aliud argumentum, quo intenditur probari, quod si unitas formalis multiplicaretur in individuis, individua essentialiter distinguerentur, ad quod argumentum etiã potest responderi ex dictis ad primum.

9 Arguunt tertio: si in quolibet individuo daretur unitas formalis distincta ab unitate formali alterius individui, sequeretur, tot esse species naturæ humanæ, quot sunt individua eiusdem naturæ humanæ; sed hoc est falsum; quia omnia individua naturæ humanæ sunt eiusdem speciei; ergo non multiplicantur unitates formales ad multiplicationem individuorum. Respondetur (& supponitur, quod loquimur de specie in sensu fundamentalis, non autem in sensu formali: quia species non datur formaliter à parte rei, sed per operationem intellectus, ut dicemus loquendo de universali Logico) negando sequelam, quia ad hoc, ut individua naturæ humanæ sint eiusdem speciei, non obstat, quod natura humana, & unitas formalis ipsam consequens, numericè multiplicetur in illis, quia cum hac multiplicatione remanet natura humana, cum sua unitate formali formaliter immultiplicata, & sic communis per indifferentiam omnibus individuis, ut quæstione sequenti explicabimus, quod sufficit, ut natura cum sua unitate formali sit fundamentum speciei naturæ humanæ, & licet quælibet natura cum sua unitate formali numericè ab alia distincta, sit sufficiens fundamentum speciei, non tamen speciei essentialiter diversæ ab illa, quam potest fundare quælibet alia natura; sed eiusdem rationis essentiali-

ter: cum fundamenta, ut dictum est, nullatenus essentialiter differant, imò quælibet natura ex se sit communis per indifferentiam omnibus individuis.

10 Arguunt quartò: relatio identitatis fundatur in unitate formali: sed Petrus & Paulus, v. g. sunt idem in natura per relationem identitatis: ergo natura, quæ est fundamentum talis relationis, est una in Petro & Paulo, & consequenter unitas naturæ non multiplicatur ad multiplicationem individuorum. Respondetur distinguendo consequens, natura quæ est fundamentum talis relationis, est una in Petro & Paulo, id est, non multiplicata formaliter, seu essentialiter, concedo: non multiplicata numericè, nego, & similiter distinguendum est ultimum consequens. Etenim relatio identitatis inter individua ejusdem speciei fundatur in unitate formali, quam ex se habet natura illorum, quæ licet numericè multiplicetur in illis, non tamen multiplicatur formaliter, seu essentialiter, imò ut sic est communis ipsis per indifferentiam, ideòque dicuntur inter se unum formaliter: non tamen plura formaliter: quod clarè patet per oppositum de fundamento relationis diversitatis, quæ datur inter hominem, & equum, nam ideò dicitur fundari in multitudine, quia neque unitas hominis, neque unitas equi est communis per indifferentiam homini, & equo, imò est una ab alia essentialiter diversa: ergo similiter ad hoc, ut Petrus & Paulus, v. gr. dicantur unum formaliter, & relatio identitatis inter illos dicatur fundari in unitate, sufficit, quòd unitas formalis naturæ cujuscumque non sit propria unius, prout proprium opponitur communi, sed communis ipsis per indifferentiam.

## Q U Æ S T I O V.

*An natura per unitatem formalem sit communis pluribus, & quomodo?*

**P**RO intelligentia quæstionis notandum est, quod communitas naturæ dupliciter potest considerari, scilicet, vel per inexistentiam, vel per indifferentiam. Communitas per inexistentiam consistit in hoc, quod una, & eadem natura, realiter sine formali ipsius naturæ divisione, sit in omnibus omnino immultiplicata. Communitas per indifferentiam consistit in hoc, quod una, & eadem natura ex se sit indifferens ad plura, ita ut per quodlibet possit determinari. Quæ communitas adhuc dupliciter potest sumi, scilicet, positivè, & negativè. Communitas positiva per indifferentiam dicitur illa, secundum quam natura concipitur in se indivisa, & ab omnibus differentiis individualibus abstracta, æqualiter respiciens omnes, & singulas, quæ indifferentia solet etiam appellari contraria; quia positivè contrariatur determinationi actuali per aliquam differentiam. Communitas negativa, seu per indifferentiam negativam dicitur illa, quam adhuc in se retinet natura quando contracta est per aliquam differentiam, nam cum etiam in statu contractionis ex se sit aliquomodo prior, & distincta a differentia, per quam contrahitur, retinet quædam non repugnantiam ex sua ratione formali, ut possit esse, quantum est ex se, sub alia singularitate ab ea, sub qua est, & dicitur indifferentia negativa, quia in illo statu contractionis est negata illa indeterminatione, seu indifferentia, quam diximus habere in statu abstractionis; licet talis negatio indeterminationis non proveniat illi ex se, & ab intrinseco, sed tantum ab extrinseco, scilicet, a differentia individuali.

2 Aliter solent explicari supradictæ indifferentiæ sub nomine aptitudinis, ita ut indifferentia positiva dicatur aptitudo proxima ad essendum in multis; licet divisivè, ita ut sine aliquo impedimento possit coniungi, cum qualibet differentia, seu singularitate: quod convenit naturæ in statu abstractionis, indifferentia vero negativa dicatur aptitudo remota ad essendum in multis, licet divisivè, & dicitur remota, quia, licet ex se habeat natura capacitatem, ut cum qualibet differentia, seu singularitate coniungatur, tamen talis capacitas est impedita per contractionem unius differentiæ, seu singularitatis, propter quod impedimentum, talis potentia, seu capacitas nequit reduci ad actum. Unde universaliter loquendo, communitas per indifferentiam negativam nihil aliud dicit, juxta communem modum loquendi Scotistarum, nisi quod natura ex se non sit singularis, imo ex suo conceptu formali excludat singularitatem, quia cum ut sic non dicat ex se impedimentum communitatis, scilicet, singularitatem, ex se potest dici negativè communis, quod idem est, ac ex se negans, seu excludens impedimentum communitatis. Hoc notato.

3] Duplex est sententia. Prima asserit, naturam esse communem individuis per existentiam. Sic plures Scotistæ citati a Maffrio disp. 4. Logice q. 1. ar. 1. & disp. 9. Met. q. 5. in initio, qui communiter citant pro se Scotum in 2. dist. 3. q. 1. Secunda sententia tenet, naturam solum esse communem negativè per indifferentiam. Sic Maffrius citatus, & est communior consensus Scotistarum, cum Scoto in fra citando. Huius questionis decisio dependet plurimum ex intelligentia questionis præcedentis. Recolantur ibi dicta. Quia tamen in hac questione est duplex controversia, altera circa communitatem per indifferentiam, & altera circa cōmunitatem per existentiam, ideo illā in duas sectiones dividemus.

## S E C T I O I.

*De communitate naturæ per indifferentiam..*

4 **S**upponitur tamquam certum, naturam non esse communem positivè per indifferentiam, quod patet, quia communitas positiva per indifferentiam, ut dictum est, convenit naturæ abstractæ ab omnibus differentiis individualibus, ita ut sit contrariè indifferens, seu indeterminata, vel ita ut absolutè excludat determinationem per aliquam differentiam, seu singularitatem: sed quælibet natura, licet ex se non sit singularis; absolutè tamen loquendo, semper est determinata, & contracta per aliquam differentiam, seu singularitatem: ergo non est communis positivè per indifferentiam. Unde communitas positiva per indifferentiam solum convenit naturæ in statu abstractionis per intellectum, quia in tali statu nullam dicit contractionem. Hoc supposito..

5. Dicimus: natura, cui convenit unitas formalis, est communis negativè per indifferentiam omnibus suis inferioribus modo supra explicato. Hæc conclusio videtur expresse Scoti in 2. dist. 3. quæst. 1. ubi §. *Ad questionem*, litt. B. dicit; *Aligua est unitas in re realis absque omni operatione intellectus minor unitate numerali, siue unitate propria singulari, qua unitas est natura secundum se, & secundum istam unitatem propriam natura, ut natura est, natura est indifferens ad unitatem singularem, ergo de se est sic una unitate illa, scilicet, unitate singularitatis. Et infra, vers. Qualiter*, litt. G. dicit, loquendo de natura: *Ita etiam in rerum natura secundum illam entitatem habet verum esse extra animam, & secundum illam entitatem habet unitatem sibi proportionabilem; qua est in-*

P 4

disse.



*differens ad singularitatem, ita quod non repugnat illi unitati de se, quod cum quacumque unitate singularitatis ponatur. Hoc ergo modo intelligo naturam habere unitatem realem minorem unitate numerali. Similia verba habet, §. Ad primum dico, litt. H. & vers. Ad secundam instantiam, litt. K. & vers. Dupliciter, sub eadem littera. Et §. Et per hoc patet, litt. L. & communiter in tota questione, hanc communitatem negativam per indifferentiam satis dilucidè explicat. Ecce quomodo nostra conclusio est expressè de monte Scoti.*

6 Probatur autem in conclusio ratione ex verbis ipsius Scoti deducta: quia natura, quæ a parte rei reperitur in aliquo individuo, non est ex se, & ab intrinseco singularis: ergo ex se præscindit a singularitate: sed natura a singularitate præscindens, eo modo, quo præscindit, est indifferens ad quamlibet singularitatem: ergo natura ex se habet hanc indifferentiam: sed talis indifferentia nequit reduci ad actum, propter impedimentum singularitatis, cum quæ realiter identificatur: ergo talis indifferentia est negativa modo supra explicato, & consequenter naturæ a parte rei est ex se communis negativè per indifferentiam. Antecedens, in quo est difficultas, probatur: quia si ex se esset natura singularis, nullatenus posset concipi sub opposito singularitatis, scilicet, sub non repugnantia, ut multiplicetur in pluribus, seu sub universalitate: sed natura creata, quæ est in individuo, potest concipi sub tali non repugnantia, seu sub universalitate; ergo ex eo est, quia natura creata non est ex se singularis. Probatur maior: quia natura divina nequit concipi sub tali non repugnantia, seu cum universalitate, quia ex se est hæc, & singularis: ergo si natura creata esset ex se singularis, non posset concipi sub tali non repugnantia, seu sub universalitate: ergo natura creata non est ex se singularis, & con-

se.

sequenter est communis negativè per indifferentiam.

7 Respondent aliqui negando paritatem; quia ex eo inquirunt, natura divina nequit concipi, ut communicabilis, seu universalis, quia est infinitè perfecta, quæ perfectio obstat, ut aliæ consimiles naturæ coëxistant; at verò natura creata est finita, & limitata, & sic non est inconveniens, ut sint plura individua ejusdem naturæ, & plures consimiles naturæ coëxistant; sed talis non repugnantia non est aliqua communicabilitas naturæ intellectum præcedens. Sed contra est; quia natura Divina nequit concipi sub non repugnantia, ut plurificetur ratione suæ infinitæ perfectionis, quæ petit, ut sit de se hæc, & singularis; ergo quòd natura creata possit concipi sub hac non repugnantia, erit quia ratione suæ finitæ, & limitatæ perfectionis, non est de se hæc, & singularis, & consequenter, quia ex se est communis negativè per indifferentiam: quæ communitas, ut dictum est, solum consistit in hoc, quòd natura ex se non sit singularis.

8 Confirmatur: quia, quòd natura Divina non sit multiplicabilis numero, pendet ex aliqua intrinseca proprietate ipsius naturæ Divinæ: ergo, quòd natura creata sit multiplicabilis numero, pendet ex aliqua proprietate intrinseca ipsius naturæ creatæ: sed in natura Divina nequit assignari alia intrinseca proprietas, qua non possit numero multiplicari, nisi quia propter suam infinitam perfectionem est de se hæc, & singularis: ergo in natura creata nequit assignari alia intrinseca proprietas, qua possit numero multiplicari, nisi quia propter suam finitam, & limitatam perfectionem, non est de se hæc, & singularis, & consequenter est communis negativè per indifferentiam. Aliæ responsiones contrariorum adducit. Mastrius disputat.

9. Met. quæst. 4. art. 1. quas ipse impugnat.

sed illas omittimus, quia videntur coincidere cum præcedenti, & ex dictis in hac, & antecedentibus quæstionibus impugnari possunt.

9 Arguunt primò: quidquid prædicatur de superiori, prædicatur de quolibet inferiori contento sub illo: sed de natura, quæ est superior, prædicatur, quòd est una formaliter negativè communis per indifferentiam: ergo de quolibet inferiori prædicatur, quòd est unum formaliter negativè commune per indifferentiam: sed hoc est falsum; quia inferius, seu individuum non est negativè commune per indifferentiam: ergo neque potest prædicari de natura, quæ est superior, quòd sit communis negativè per indifferentiam. Resp. prim. dist. mai. quidquid prædicatur de superiori, prædicatur de quolibet inferiori contento sub illo, si prædicatur suppositione personali, concedo; si prædicatur suppositione simplici, nego. Similiter distinguo minorem; de natura, quæ est superior, prædicatur, quòd est communis negativè per indifferentiam suppositione simplici, concedo; suppositione personali; nego. Unde nego consequentiam.

10 Aliqui Scotistæ non admittentes hanc responsionem, sic arguunt contra illam: prædicatum, quod convenit naturæ à parte rei, semper prædicatur de natura, ut supponitur suppositione personali: sed naturæ convenit à parte rei communitas negativa per indifferentiam: ergo prædicatur de natura, ut supponitur suppositione personali. Sed resp. dist. mai. prædicatum, quod convenit naturæ à parte rei, prædicatur de natura, ut supponitur suppositione personali, si tale prædicatum conveniat illi absolute, & sine addito, concedo; si non conveniat illi absolute, sed cum addito *ex se*, nego. Dist. etiam min. naturæ convenit à parte rei communitas negativa per indifferentiam, absolute, & sine addito, nego; cum addito *ex se*, concedo, & nego consequentiam. Quæ solutio aperte tenet, nisi hoc

hoc reducat ad quæstionem de nomine, de qua parùm est curandum.

11. Secundò respondent alii ad argumentum, dist. etiam mai. quidquid prædicatur de superiori, prædicatur de quolibet inferiori contento sub illo, secundum rationem, & eo modo, quo prædicatur de superiori, concedo: alio modo, nego, & similiter distinguitur totum argumentum. Etenim, cum de natura prædicetur communitas negativa per indifferentiam, non absolutè, sed cum addito *secundum se*, eodem modo, & non aliter potest prædicari de quolibet inferiori, hoc est, secundum illam naturam, ita ut verum sit dicere; individuum secundum naturam humanam est. unum formaliter negativè commune per indifferentiam; quia facit hunc sensum: humanitas, quæ est in individuo, est una formaliter negativè communis per indifferentiam, quod verum est. Aliter respondent alii, sed in idem incidit.

12. Arguunt secundò; quando aliquid alicui convenit per se, eius oppositum, neque per se, neque per accidens, potest illi convenire: sed communitas negativa per indifferentiam, & singularitas sunt opposita: ergo si naturæ convenit per se communitas negativa, singularitas neque per se, neque per accidens potest illi convenire; sed cuilibet naturæ saltim per accidens, convenit singularitas: ergo natura non est per se communis negativè per indifferentiam. Resp. comm. disting. mai. quando aliquid alicui convenit per se, eius oppositum neque per se, neque per accidens potest illi convenire, si est oppositum per se, concedo; si est oppositum per accidens, subdistinguo; nequit illi convenire per se, concedo, nequit illi convenire per accidens, nego; similiter distingo minorem, singularitas est oppositum communitatis negativæ per indifferentiam, per accidens, concedo, per se, nego, & distingo consequens,

si naturæ convenit per se communitas negativæ; singularitas nequit illi convenire per se, concedo; per accidens, nego, & concessa minori subsumpta, nego consequ. Etenim singularitas non per se opponitur communitati negativæ, quia cum communitas negativæ tantum dicat, quod natura ex se non sit singularis, tantum illi opponeretur per se quod per se esset singularis, quod nullatenus contingit, cum sit singularis per aliud scilicet, per hæcceitatem, seu singularitatem super additam, & sic singularitas tantum per accidens opponitur communitati negativæ per indifferentiam, unde per accidens potest naturæ sic communi convenire.

13 Aliter respondetur negando min. Etenim, communitas negativæ per indifferentiam non dicit absolutè carentiam singularitatis, imò necessario supponit conjunctionem cum singularitate, & per hoc dicitur communitas negativæ, seu per indifferentiam negativam; quia negat indifferentiam positivam, quæ absolutè dicit carentiam singularitatis, ut dictum est supra explicando prædictas indifferentias. Etenim, quando dicimus, quod natura est communis negativæ, seu per indifferentiam negativam; tantum intelligimus naturam, quæ absolutè à parte rei est singularis; sed tamen singularitas non convenit illi ex sua ratione formali. Ex quo patet, quod singularitas non opponitur communitati negativæ, sed per indifferentiam negativam; bene tamen opponitur singularitas communitati positivæ, seu per indifferentiam positivam, nam hæc communitas dicit abstractionem ab omni singularitate, & consequenter carentiam singularitatis.

14 Dices contra; communitas dicit negationem omnis determinationis; sed natura à parte rei existens, licet ex se non habeat determinationem, habet tamen illam à principio extrinseco; ergo nullam habet communita-

tem.

tem. Respondetur distinguendo maiorem, communitas dicit negationem omnis determinationis, si est communitas positiva, seu per indifferentiam positivam, concedo; si est communitas negativa, seu per indifferentiam negativam, nego, & concessa minori, distinguo consequens, natura nullam habet communitatem positivam, seu per indifferentiam positivam, concedo, nullam habet communitatem negativam, seu per indifferentiam negativam, nego. Etenim ut dictum est communitas negativa, seu per indifferentiam negativam non opponitur absolutè determinationi naturæ, sed determinationi naturæ secundum se, cum talis communitas non conveniat naturæ absolutè, sed naturæ secundum se, unde cum natura per singularitatem tantum sit absolutè determinata, non tamen ex se, tantum potest dici, quod absolutà non est communis, seu est determinata, non verò potest dici, quod ex se non est communis, seu est determinata, quia licet à parte rei natura semper sit determinata per singularitatem, & ut sic sit propria alicujus singularis, tamen non habet ex se talem singularitatem, neque talem appropriationem, & sic licet repugnet naturæ communicari alteri, ut est sub hæc singularitate, & in sensu composito, id tamen ex se illi non repugnat, & consequenter ex se, & intrinsecè exit apta, seu ei non repugnabit esse in alia singularitate ab illa in qua est, quod clarè innuit Scotus quæst. 1. supra citata litt. L. dicens: *Omnis substantia per se existens, est propria ei, cujus est, hoc est, vel ex se ipsa, vel est propria per aliquod contrahens facta propria, quo contrahente posito, non potest inesse alteri, licet non repugnet ei ex se inesse alii.*

15. Arguunt tertio: si natura ex se non dicit singularitatem: ergo ex se dicit carentiam singularitatis: ergo nunquam potest habere singularitatem. Respondetur primò, concessa

pria

primo enthymemate, distinguendo secundum consequens, numquam potest habere singularitatem ex se, concedo, absolutè, nego. Quæ distinctio patet ex supradictis. Respondetur secundò, & in idem incidit: distinguendo primum consequens, ex se dicit carentiam singularitatis præcisivè, concedo; negativè, nego: est dicere: natura ex se præscindit à singularitate, seu non includit illam in suo conceptu formali, non tamen dicit negationem singularitatis; seu negationem habendi singularitatem, imò potius, ut supra dictum est, supponit esse coniunctam à parte rei cum singularitate, à qua formaliter præscindit, seu quam non includit in suo conceptu formali, unde distinguendum est ultimum consequens, ut supra.

16 Arguunt quartò: si natura est prior singularitate, & ex se indifferens ad hanc, vel illam, singularitatem: ergo non repugnat illi, quod ponatur cum alia singularitate, vel sine aliqua. Patet consequentia: quia priori non repugnat esse sine posteriori, ut sæpè docet Scotus, & Arist. 5. Met. c. 16. ubi dicit, quòd priora natura dicuntur illa, quæ possunt esse sine aliis; non verò alia sine ipsis. Confirmatur primo, quia si natura non posset esse sine singularitate, dependeret ab illa; sed prius non dependet à posteriori ergo si natura est prior singularitate, poterit esse sine illa. Secundò; quia si natura est prior singularitate, est in aliquo instanti, in quo non est singularitas: sed quod est in aliquo instanti, in quo non est aliud, potest a Deo conservari sine illo: ergo natura potest conservari à Deo sine singularitate.

17 Respondetur ad argumentum distinguendo consequens; non repugnat ex se, concedo, ex aliquo concomitante, nego. Etenim verum est, quod priori reduplicativè, ut tali non repugnat ex se esse sine posteriori, potest tamen illi repugnare ex aliquo concomitante, scilicet,  
ex

ex identitate reali cum posteriori, ut patet in essentia respectu propriæ passionis, & hoc contingit in nostro casu, nam licet naturæ ex se, & ut est prior singularitate, non repugnet esse sine illa, vel cum alia, repugnat tamen, quia cum illa realiter identificatur, & in hoc sensu loquitur Scotus, quando dicit, quod prius potest esse sine posteriori. Arist. autem loquitur de prioritate existentiae, qualem habet materia, v. g. respectu formæ, in sententia Scoti, & sic potest esse, & conservari sine forma; sed hanc prioritatem non habet natura respectu singularitatis, cum non præsupponatur existens ad singularitatem, & sic nequit sine illa conservari. Vel intelligitur Arist. in sensu Scoti.

18. Ad primam confirmationem respondetur, quod nullum est inconveniens concedere, naturam dependere à singularitate dependentia à posteriori, quæ improprie dicitur dependentia, & proprie dicitur coexistentia; nam certum est, naturam coexistere singularitatem. Ad secundam confirmationem respondetur, quod tantum est vera, loquendo de instanti durationis, non verò de instanti naturæ; ut contingit in præsentī, cum natura non sit prior singularitate prioritate durationis; sed tantum prioritate naturæ. Vel aliter resp. neg. mai. quia licet natura sit prior singularitate, non inde sequitur, quod sit in aliquo instanti, in quo non est singularitas, quia esse, vel non esse solum mensuratur per prioritates, vel instantia durationis; non verò per prioritates, vel instantia naturæ: nam cum hoc, quod unum sit prius natura alio, stat, quod utrumque sit simul durarione, ut alibi amplius declarabitur.

19. Argues contra: natura in esse reali, & actuali est prior singularitate, & ut sic non repugnant illi esse sine quacumq; singularitate: ergo non determinat sibi aliquam singularitatem.

Pro-



Probat. consequentia per simile argumentum Scoti factum in 2. dist. 12. quæst. 2. litt. C. his verbis: *Quidquid contingenter se habet ad quodlibet cuiuslibet generis absoluti habet se contingenter ad illud genus absolutum; sed materia prima contingenter se habet ad quamlibet formam; ergo contingenter se habet ad totum genus forma.* Unde infert Scotus, quod materia potest esse sine omni forma. Nunc sic: si natura est prior singularitate, & ut sic indifferens ad omnem singularitatem, nullam singularitatem determinat, imò contingenter se habet ad omnem singularitatem, ergo sicut propter hoc materia potest esse sine omni forma, ita natura sine omni singularitate: sed hoc est falsum; ergo natura non est prior singularitate, neque indifferens ad omnem singularitatem. Respondetur distinguendo consequens; non determinat sibi aliquam singularitatem ex se, concedo; absolute, nego. Ad probationem nego paritatem; quia in argumento Scoti fit comparatio materiæ ad formas realiter distinctas ab illa, hic autem fit comparatio naturæ ad singularitates, non ut distinctas ab illa, & sic non tenet paritas.

20. Ut autem disparitas percipiatur, notanda est maxima differentia, quæ versatur inter materiam comparatam ad formas ex una parte, & inter naturam comparatam ad singularitates ex alia, etenim materia prima, non solum ex se non determinat sibi aliquam formam, sed neque absolute loquendo illam determinat, ideoque non solum ex se, sed etiam absolute loquendo potest esse sub alia distincta ab illa sub qua est, ut naturaliter contingit per generationem, & corruptionem, & etiam potest esse sine aliqua per potentiam Dei absolutam, ut intendit argumentum Scoti: at verò natura, licet ex se non determinet sibi aliquam singularitatem, tamen absolute loquendo illam sibi determinat; ideoque licet ex se non repugnet naturæ esse

esse sub alia singularitate ab illa sub qua est, vel sine aliqua, repugnat tamen absolute loquendo, imò in hoc consistit indifferentia negativa, nam ut supra diximus, talis indifferentia negat indifferentiam positivam, quæ dicit carentiam determinationis absolute, & sic negativa indifferentia naturæ ex se, necessario dicit determinationem per aliquam singularitatem absolute loquendo.

21. Argues contra: nihil potest identificare sibi illud, sine quo aliquando potuit esse, imò absolute potest esse: sed humanitas Petri, v. g. potuit esse sine differentia individuali Petri, nam sicut fuit contracta per illam, ita potuit contrahi per differentiam individualement Pauli, imò adhuc, ut est contracta per differentiam individualement Petri, est indifferens ad hoc, ut per aliam differentiam individualement contrahatur: ergo nequit sibi identificare differentiam individualement Petri. Respondetur ex dictis distinguendo maiorem, nihil potest identificare sibi illud, sine quo aliquando potuit esse absolute loquendo, concedo; sine quo potuit esse ex se præcisè, nego. Similiter distinguo minorem humanitas Petri potuit esse sine differentia individuali Petri, ex se præcisè, concedo, absolute loquendo, nego. Eodem modo distinguo consequens; nequit sibi identificare differentiam individualement Petri, ex se præcisè, concedo, absolute loquendo, nego. Etenim verum est, quod natura ex se non determinat, neque sibi identificat aliquam singularitatem, imò ex se est indifferens ad quamlibet sibi identificandam, tamen absolute loquendo illam sibi necessario identificat.

22. Ut autem hoc clarius percipiatur advertendum est, quod determinatio rei, tam in esse possibili, quam in esse existentiali, propriè convenit individuis, nam sicut omne quod existit necessario est individuum, ita similiter,

ter, omne quod est possibile; nam possibilitas est in ordine ad existentiam: omnia autem illa, quæ per se non possunt existere, consequenter per se non sunt possible, & sic per se non sunt determinata, neque secundum esse possibile, neque secundum esse existentielle, sed solum sunt determinata ratione individuorum. Nunc ad propositum: natura secundum se, neque est determinata ad esse possibile, neque ad esse existentielle, & consequenter neque ad esse individuale, quia tamen individuum in quo est natura ex se est determinatum ad esse tale, tam in esse possibili, quam in esse existentielle, ideo absolute loquendo dicitur, & est natura determinata ad esse talis individui, tã in esse possibili, quam in esse existentielle ratione determinationis individui, & cum natura ex se, seu in suo formalissimo conceptu, non includat aliquod prædicatum ratione cuius, ad esse talis individui determinetur, ideo dicimus, quod ex se, seu ex sua ratione formali, est indifferens ad hoc, ut sit in quolibet individuo, seu cum quacumque singularitate identificetur, licet alias, seu absolute loquendo, hoc illi repugnet; quia absolute identificatur cum aliquo prædicato, scilicet, cum determinata singularitate, ratione cuius nequit cum alia identificari.

23 Argues contra: natura Petri, v. g. distinguitur realiter à qualibet alia singularitate; ergo etiam realiter distinguitur a singularitate Petri. Consequentia patet, quia quod distinguatur a pluribus eiusdem rationis, distinguitur a quolibet alio illius rationis, non enim apparet maior ratio unius quam alterius. Resp. dist. antec. natura Petri distinguitur realiter a qualibet alia singularitate, ratione singularitatis Petri, quam absolute loquendo habet, concedo, ex se, seu ex sua ratione formali, nego, & nego consequentiam. Ad probationem respondetur, quod est vera, quãdo non est aliqua specialis ratio unius, quam.

quam alterius, ut denotavi in probatione ibi inclusa, falsa tamen quando est aliqua ratio unius, & non alterius, unde negamus, quod in præsentī non sit maior ratio unius, quam alterius.

24. Etenim singularitas Petri, v. g. est ratio distinguendi naturam Petri ab aliis singularitatibus, & sic nequit natura Petri distingui realiter a tali singularitate, sicut distinguitur a quolibet alia, quæ non est ratio distinguendi illam, sicut est singularitas Petri: quod intelligitur absolute loquendo, nam ex se natura, seu ex sua ratione formali, sicut est, indifferens ad hoc ut sit sub hac, vel sub illa singularitate, ita est indifferens ad hoc, ut cum hac, vel cum illa identificetur, seu ad hoc, ut hæc, vel illa sit ratio illam distinguendi ab aliis; unde dicendum est (in quo consistit tota ratio communitatis naturæ) quod natura ex se est indifferens ad hoc ut identificetur, cum quacumque singularitate realiter, & ad hoc, ut formaliter distinguatur a quacumque; licet absolute loquendo determinate identificetur realiter, cum aliqua singularitate, & ab ea formaliter distinguatur, ut supra dictum est num. 22. Alia huc conducentia possunt videri apud Lichetum super Scotum in 2. dist. 3. qu. 1. & apud Mastrium disp. 9. Metaph. qu. 2. & 4. subtiliter discussa.

## SECTION II.

### *De communitate natura per inexistentiā.*

25. **N**ON defuerunt aliqui, præcipue inter Scotistas asserentes naturas creatas esse communes individuis per inexistentiā, ita quod una, & eadem humanitas, v. g. reperiat in omnibus hominibus simul, & humanitas unius non differat ab humanitate alterius entitative, sed tantum extrinsece, & ratione diffe-

ren-

rentiarum individualium, quod idem est, ac dicere, quod individua speciei humanæ realiter distinguuntur, non tamen illorum naturæ. Pro hac sententia citat Mastrius disp. 9. Metaph. quæst. 5. aliquos Scotistas antiquos non parvi momenti, unde nihil mirum, quod pro hac sententia citetur Scotus ab aliquibus extra subtilem scholam velligerantibus, cum etiã à supra dictis Scotistis citetur; tamen opposita sententia est communior consensus Scotistarum, tam veterum, quam recentiorum citantium Scotum locis à nobis citatis, in hac disputatione qu. 4. num. 2. nam hic, & ibi eadem videtur esse ratio, & pluribus aliis in locis, in quibus loquendo de communitate naturæ, nunquam per inexistenciam in individuis, sed semper per indifferentiam illam explicat. Igitur pro hac sententia.

26 Dicimus: natura creata, cui convenit unitas formalis, non est communis individuis per inexistenciam. Hanc conclusionem pluribus rationibus probant Scotistæ ex quibus præcipuas proponemus. Probatur igitur primò: si natura esset communis individuis per inexistenciam esset universale formale à parte rei, & independenter ab intellectus consideratione: sed hoc est contra Scotum, nam loquendo de universali formali in 2. dist. 3. qu. 1. lit H. inquit; *Universale in actu est illud, quod habet unitatem secundum quam idem ipsum est in potentia proxima, ut dicatur de quolibet supposito, quia 1. Poster. universale est, quod est unum in multis, & de multis; nihil enim secundum quaxlibet unitatem in re est tale, quod secundum ipsam unitatem sit in potentia proxima ad quodlibet suppositum, ut dicatur de quolibet supposito predicatione dicente; hoc est hoc.... hoc est enim solum possibile de obiecto eodem indifferenti actu considerato ab intellectu, ergo natura non est communis individuis per inexistenciam. Se-*

quela

quæla videtur evidens; quia si natura esset una, & communis pluribus per inexistentiā, posset de illis prædicari prædicatione dicente, hoc est hoc: ergo daretur à parte rei universale formaliter.

27 Respondent, quod ad rationem universalis non sufficit, quod natura sit una formaliter, seu formaliter indivisa in pluribus; sed etiam requiritur, quod sit numericè indivisa, unde licet natura sit una formaliter, & communis pluribus per inexistentiā, cum non sit numericè indivisa, imò divisa numericè, non est universalis formaliter. Sed contra hoc arguunt communiter Scotistæ. Primò, quia ad rationem formalem universalis sicut requiritur unitas formalis, requiritur etiam divisio numerica, nam universale est unum in multis, & de multis: quod melius nequit intelligi, nisi quod sit unum per unitatem formalem, & in multis per divisionem numericam; sed hoc ipsum habet natura juxta prædictam responsionem, si est una formaliter communis pluribus per inexistentiā; ergo prædicta responsio, admissa communitate naturæ per inexistentiā, non aufert universalitatem formalem.

28 Secundò; quia illa unitas sufficit ad universale, quæ sufficit, ut aliquid sit proximè prædicabile de pluribus; sed si natura est una formaliter, & communis pluribus per inexistentiā, est proximè prædicabilis de illis: ergo, quod sit divisa numericè non obstat ad hoc ut sit formaliter universalis. Probatur minor, quia ad hoc, ut aliquid sit proximè prædicabile de pluribus sufficit, quod sit intrinsecè, & essentialiter in illis secundum illam rationem, secundum quam prædicatur, sed si natura humana, v. gr. est una formaliter, & communis pluribus per inexistentiā includitur intrinsecè, & essentialiter in illis secundum illam rationem, secundum

secundum quam prædicatur, licet numericè sit divisa; ergo est universalis formaliter. Minor patet; quia natura humana solum prædicatur secundum rationem formalem naturæ; non verò secundum rationem numericam, ergo si natura humana est ut formaliter, & communis pluribus per inexistenciam, includitur intrinsece, & essentialiter in illis secundum illam rationem, secundum quam prædicatur, licet sit numericè divisa, & consequenter admissa communitate naturæ per inexistenciam, non obstat divisio numerica, ut natura sit proximè prædicabilis de pluribus, & ut sic formaliter universalis.

29 Aliter tamen impugnatur prædicta responsio, quia ex illa videtur deduci evidenter nostra conclusio, nam in illa dicitur, quod natura est numericè divisa; ergo natura multiplicatur numero; & consequenter tot sunt numero distinctæ naturæ, quot sunt ipsius individua; sed unitas formalis naturæ necessariò multiplicatur ad multiplicationem naturæ; nam est propria passio illius, & cum illa realiter identificata, & nequit unum multiplicari, quin eodem modo multiplicetur quod cum illo realiter identificatur; ergo non datur in natura aliqua unitas formalis ratione cuius sit communis pluribus per inexistenciam.

30 Deinde quando dicunt, quod natura est indivisa formaliter, vel intelligunt, quod non est divisa per principia formalia, vel quod ipsa natura, quæ dicitur essentia, seu forma, non est divisa, seu distincta in pluribus? Si primum hoc verum est, sed non contra nos; nam ex hoc solum sequitur, quod ubicumque sic natura habeat unitatem formalem, quod nos libenter concedimus, nam dicimus, quod natura in quolibet individuo habet unitatem formalem; sed ex hoc non probatur communitas naturæ per inexistenciam; sed tantum per indifferentiam negativam, modo dicto questione antecedenti.

Si

Si dicant secundum, contra hoc est, quia secundum Scotum, cum hoc, quod natura non sit divisa, seu distincta per principia formalia, stat, quod sit forma, seu essentia distincta, ut expresse tenet in 2. dist. 3. quæst. 7. ut videre est quæst. 4. hujus disputationis num. 7. ergo ipsa natura est multiplex, & realiter distincta in individuis, & consequenter unitas formalis ipsam consequens; ergo non datur aliqua natura à parte rei una formaliter communis pluribus per existentiam, quæ consequentia evidenter deducitur ex ipso Scoto in 2. dist. 3. quæst. 6. *S. Ad questionem*, litt. E, ubi loquendo de natura, & de unitate formali ipsius, inquit; *Concedo ergo, quod unitas realis non est alicujus entitatis existentis in duobus individuis, sed in uno*. Ecce expresse de mente Scoti quomodo per inexistenciam non detur in pluribus aliqua natura, neque videmus, unde Scotistæ contrarii ex Scoto deducant oppositam sententiam.

31 Probatur secundò conclusio, quia impossibile est, quòd idem indistinctum creatum sit in pluribus realiter distinctis; sed hoc sequitur ex opposita sententia; quia eadem indistincta natura esset simul in pluribus individuis realiter distinctis; ergo nulla datur natura, quæ sit una communis pluribus per inexistenciam.

32 Respondent distinguendo majorem; est est vera, inquit, de indiviso, & indistincto creato numericè, non autem de indiviso, & indistincto formaliter tantum: nam cum hac indivisione, & indistinctione stat divisio, & distinctio numerica. Sed contra est, nam vel talis divisio, & distinctio numerica facit, quod natura, & unitas formalis illius sit multiplex, & distincta realiter, vel non; Si primum; ergo jam non datur una realis natura, & unica unitas formalis, ratione cujus sit communis pluribus per inexistenciam; sed tot naturæ, & tot unitates formales realiter inter se distinctæ, quot sunt indi-



individua realiter distincta, quod est nostra conclusio. Si dicant secundum; non vitant inconveniens, quod idem creatum realiter indistinctum sit in pluribus, seu identificetur cum pluribus realiter distinctis, quod est peculiare essentiae Divinae, quae manens una omnino realiter indistincta, est in tribus Divinis personis realiter distinctis, & cum tribus personalitatibus Divinis distinctis realiter identificatur.

33 Deinde si natura per divisionem numericam, non esset multiplex realiter, sed eadem in individuis, sequeretur, quod non posset destrui unum individuum, v.g. Petrus, quin destrueretur aliud, quod evidenter apparet absurdum. Patet sequela, quia quando aliquid destruitur, destruitur quidquid cum illo realiter identificatur; sed natura Petri realiter identificatur cum illo; ergo nequit destrui Petrus, quin ejus natura destruat; sed ipsa realiter est natura Pauli, juxta praedictam responsionem; ergo nequit destrui Petrus, quin destruat natura Pauli, & consequenter ipse Paulus.

34 Respondent negando sequelam, quia inquirunt, naturam destructo Petro, desinere esse in Petro, seu esse sine petreitate, non tamen desinere esse in Paulo, seu esse sine pauleitate; sed adhuc remanere conjunctam cum pauleitate, seu in Paulo. Sed contra est primò, quia ex hoc videtur evidenter sequi, naturam Petri realiter distingui à petreitate, quod nullus admittit. Patet sequela; nam juxta commune proloquium Scholasticorum, quae sunt realiter identificata, unum esse nequit sine alio; sed in tali hypothese natura Petri esset sine petreitate, si quidem remaneret in Paulo, destructo Petro; ergo natura Petri distingueretur realiter à petreitate.

35 Contra secundò; quia sequeretur, Deum non posse annihilare aliquod individuum, neque aliquod de novo creare, quod non est minus absurdum.

fardum, quam præcedens. Patet sequela; quia annihilatio est destructio rei, nihilo ejus remanente; & creatio est productio rei, nihilo ejus præsupposito: sed, juxta talem responsionem, destructo uno individuo, natura ejus remanet in alio: & ad productionem alicujus individui, præsupponitur in aliis illius natura; ergo nec Deus posset annihilare, nec de novo creare aliquod individuum. Alia inconvenientia solent adduci contra oppositam sententiam, ad quæ ferè similiter respondent, & ex dictis eorum responsiones facilè impugnantur, ideòque illa omittimus. Omnia argumenta, quæ posita sunt contra conclusionem 4. quæst. hujus disp. etiam videntur militare contra istam, quæ ibi sufficienter manent soluta; nunc alia proponemus.

36 Arguunt primò quasi replicando ad dicta circa aliqua argumenta quæst. 4. citatæ; natura Petri, & natura Pauli, v. gr. ut præcedunt singularitates non distinguuntur realiter, ergo sunt una, & eadem realiter natura; sed semper præcedunt singularitates; ergo semper sunt una, & eademmet natura; & consequenter natura est communis individuis per inexistentiam. Aliqui respondent, quòd quælibet natura, ut prior singularitate, neque est una realiter, neque ab alia realiter distincta; quia ut sic non includit principium talis unitatis, nec distinctionis; sed tantum dicit sua prædicata essentialia in primo modo dicendi per se, & in secundo unitatem formalem ipsam consequentem. Quæ responsio optima est, si benè percipiatur; nam nihil potest fundare unitatem, seu distinctionem realem, nisi quòd est ex se capax existentiae, & cum natura ex se non sit capax existentiae, ita ut per se, & independentè à singularitate possit existere, ideò nequit fundare unitatem, seu distinctionem realem. Cum quo etiam respondetur ad quandam replicam, quæ hic solet ab aliquibus fieri, scilicet, quòd si Deus po-

neret naturam sine different iis individualibus esset una realiter, & non plures, & quod eodem modo debet esse una, adhuc quando est in singularibus, cum sit prior singularitatibus. Negamus enim hoc esse possibile fieri a Deo, nam in solum a Deo potest poni in rerum natura, quod est capax existentiae, quod non habet natura sine singularibus.

37 Aliter respondetur ad argumentum distinguendo antecedens, natura Petri, & natura Pauli, ut praecedunt singularitates, non distinguuntur realiter; id est, non dicunt distinctionem realem reduplicativè, ut praecedunt singulares, concedo, nam ut sic tantum dicunt suas rationes formales, & sicut praecedunt singularitates, & ab illis praescindunt, ita praescindunt a distinctione reali, id est, negant distinctionem realem, nego antecedens, unde nego consequentiam, & concessa minori subsumpta, nego ultimam consequentiam. Etenim natura Petri, & natura Pauli, ut priores singularitatibus, & ex se, sicut non dicunt singularitates, non dicunt unitatem, neque distinctionem realem, quia haec unitas, vel distinctio provenit illis a singularitatibus, non tamen negant talem unitatem, vel distinctionem, imo absolute loquendo quaelibet natura est una realiter; per suam singularitatem, & omnes inter se realiter distinctae per suas singularitates, aliud enim est aliqua non habere, seu negare aliquod praedicatum, & aliud, quod praedicatum, quod absolute habent illis secundum aliquam rationem non conveniat, primum nequit dici de praedictis naturis in nostro casu, nam nequit affirmari, quod non habent, seu quod negant distinctionem realem, bene tamen potest dici secundum, scilicet, quod distinctio realis, quam habent inter se, non convenit illis reduplicativè ut sunt priores singula-

gularitatibus . Unde juxta superius dicta , potest in hoc argumento uti illa distinctione , *ex se* , & *absolute* , seu , quod idem est , *reduplicative* , & , *specificative* , nam licet prædictæ naturæ reduplicative , ut priores singularitatibus non distinguantur realiter , distinguuntur tamen specificative sumptæ , hoc est , ipsæ naturæ , quæ sunt priores singularitatibus realiter distinguuntur .

38 Arguunt secundo : natura Divina ideò est in tribus Divinis Personis una numericè per inexistentiā , quia numericè non dividitur per Divinas Personalitates : sed natura humana , v. g. non dividitur formaliter per singularitates , quippè non sunt differentię formales : ergo est una formaliter per inexistentiā in pluribus . Respondetur distinguendo majorem , natura Divina ideò est in tribus Divinis Personis una numericè per inexistentiā , quia numericè non dividitur per Divinas Personalitates præcisè , nego , quia nullo modo per Personalitates dividitur , seu est entitas nullatenus divisa per Personalitates , concedo , distinguo etiam minorem , natura humana non dividitur formaliter per singularitates , hoc est , non dividitur per differentias formales , ut dicitur in argumento , concedo , non dividitur formaliter per singularitates , id est , est entitas , seu forma nullatenus per singularitates divisa , nego , unde nego consequentiā .

39 Etenim natura Divina non ex eo præcisè , quod non sit numericè divisa , sed quia nullatenus per Personalitates Divinas est divisa , ita ut possit dici , quod sunt tres naturæ Divinæ realiter distinctæ , dicitur & est una numericè in tribus Personis per inexistentiā , unde ut natura humana esset una positivè formaliter per inexistentiā in pluribus individuis , non solum erat necessa-

rium, quod non esset formaliter divisa per principia formalia; sed etiam, quod ipsa natura nullatenus per singularitates divideretur, ita ut posset dici, quod essent plures naturæ realiter distinctæ; quod cum non contingat, imo potius oppositum; nam ut sæpè dictum est, natura multiplicatur ad multiplicationem individuum, hinc est, quod nulla datur natura creata, quæ sit una formaliter pluribus communis per existentiam.

40 Pro complemento disputationis maximè observandum est ad auferendam æquivocationem, quod quando dicimus, quod natura dividitur, non ita intelligendum est, quod detur aliqua natura communis antequam dentur individua, quæ per singularitates dividatur; nam hoc esset ponere in rerum natura ideam Platonis, quam absolutè negamus: sed solum intelligitur, naturam dividi, id est, multiplicari per propagationem, seu prductionem individuum; natura enim, quæ verè, & propriè dividatur divisione Logica, est propriè universale Logicum, quod tantum datur per intellectum, & per intellectum dividitur modo suo loco explicando.

41 Ex dictis in tota hac disputatione facile deducitur quid sit universale metaphysicum; est enim quælibet natura, quæ potest ab intellectu considerari, ut Logicè universalis, non ut sic consideratur, neque ut est in singulari reduplicativè; sed ipsa natura secundum se, seu, ut est prior singularitate, & negativè indifferens ad hanc, vel illam singularitatem. Unde quando aliqui Scotistæ dicunt, quod natura secundum se considerata est universale metaphysicum, non ita intelligendum est, quod necessarium sit considerare naturam, ut sit universale metaphysicum, sed ita, quod ipsa natura, quæ secundum se consideratur, ut est obiectum talis considerationis, & ipsam præcedens (sicut quodlibet obje-

objectum præcedit potentiam, seu actum, cuius est objectum) est universale metaphysicum, quod absque controversia debet admitti ab omnibus Scotistis, tum quia hoc expressè traditur ab Scoto ubicumque loquitur de natura communi, quam dicit pertinere ad metaphysicum. Tum etiam quia aliàs compositio metaphysica, non daretur à parte rei, sed per opus intellectus, cujus oppositum tenetur ab Scotistis contra Thomistas, & alios, imò in hoc fundatur in creatis distinctio formalis ex natura rei. Tum denique quia metaphysica habet pro obiecto aliquid à parte rei existens independentè à consideratione intellectus, ut differat à Logica, cujus objectum ab intellectu dependet.

## D I S P. II.

*De distinctionibus.*

**Q**uia hic communiter exagitur, quonam distinctionis genere naturæ superiores ab inferioribus distinguantur? Ad cujus resolutionem distinctionum notitia omninò est necessaria, ideò hæc de distinctionibus disputatio in præsentì tractatu inferenda est, Sit ergo.

## Q U Æ S T I O I.

*Quot sint genera distinctionum?*

**P**ro intelligentia quæstionis notandum est, ne in æquivoco procedatur, identitatem posse sumi dupliciter. Primò, ut opponitur diversitati; in quo sensu Petrus, & Paulus, v. g. habent identitatem in ratione hominis; quia in tali ratione non sunt diversi. Secundò, ut opponitur distinctioni, & est illa unitas, qua quodlibet constituitur in suo esse particulari; in qua

unitate, seu identitate unum, vel plura includuntur, ut denotat Arist. 5. Met. cap. 2. his verbis; *Perspicuum est, identitatem unitatem esse quamdam ipsius esse, aut plurium.* Unde tam distinctionem, quam identitatem per oppositum sic communiter definiunt Philosophi. *Distinctio est, unum non esse aliud, vel duo esse diversa. Identitas est, aliquid esse unum in se, vel unum esse aliud.*

2 Cum autem, quot modis dicitur unum oppositum, dicatur & aliud, ut cognoscatur quotuplex sit distinctio, cognoscere oportet, quotuplex sit identitas illi opposita (de alia autem identitate, quæ diversitati opponitur, non loquimur in præsentibus; habet enim proprium locum disp. de relatione.) Igitur identitas alia dicitur realis, & est, qua unum constituitur in suo esse reali, prout ab alio realiter distinctum, vel est unitas plurium formalitatum, v. gr. unitas, qua Petrus constituitur in suo esse reali individuali à quolibet alio realiter distincto, vel unitas animalis, & rationalis, quæ realiter in homine identificantur. Alia dicitur identitas formalis, & est unitas cujuslibet formalitatis distinctæ ab alia, v. gr. unitas, qua rationale est unum, ut distinctum ab animali, absolute enim loquendo illa dicitur identitas formalis, ubi unum includitur essentialiter in ratione formali alterius, quam explicat Scotus in 1. dist. 2. quæst. 7. §. *Sed hic restat, Vers. vel ut propriissime*, litt. HH. his verbis: *Vocatur autem identitas formalem, ubi illud, quod dicitur sic idem includit illud, cui sic est idem, in ratione sua formali, & per consequens per se primo modo.* Alia dicitur identitas rationis, & est quando aliqua, quæ à parte rei non sunt idem, quasi si essent idem concipiuntur. Hoc notato, non erit difficile assignare genera distinctionum per oppositum ad identitatem.

3 Dicimus ergo; distinctio in communi primo.

mò dividitur in distinctionem ex natura rei , & in distinctionem rationis. Distinctio ex natura rei est unum non esse aliud independenter à consideratione intellectus. Distinctio rationis est unum non esse aliud per considerationem intellectus. Hæc divisio est communis inter Philosophos.

4 Distinctio ex natura rei subdividitur ab Scotistis in distinctionem realem strictam , & in distinctionem realem formalem , quam vocant medium inter distinctionem realem strictam , & distinctionem rationis . Distinctio realis stricta est illa , quæ absolutè datur inter rem , & rem , ut inter Petrum , & Paulum , vel inter rem , & modum ejus , ut inter sedentem , & sessionem ejus , quæ etiam solet appellari molis . Distinctio realis formalis est illa , quæ datur inter duas formalitates realiter absolutè identificatas , quarum una excludit aliam à suo conceptu formali , ut inter animal , & rationale , quæ licet in homine realiter absolutè identificentur , unum tamen excludit aliud à suo conceptu formali .

5 Alii autem præter Scotistas , nullatenus dividunt distinctionem ex natura rei , sed tantum admittunt distinctionem realem strictam ; dividunt tamen distinctionem rationis in distinctionem rationis ratiocinantis , & in distinctionem rationis ratiocinatæ . Distinctio rationis ratiocinantis dicitur illa , quæ fit ab intellectu sine aliquo fundamento in re , ut si quis distinguat Petrum à seipso . Distinctio rationis ratiocinatæ dicitur illa , quæ fit ab intellectu cum aliquo fundamento in re , ut quando concipitur , inquiunt aliqua entitas , quæ in re est unica , ut si esset multiplex , eo quod includit virtualiter , seu eminenter aliquos effectus , seu aliqua prædicata , quæ seorsim possunt terminare cognitionem , licet inadæquatam , & imperfectam ,



Etiam, ut quando concipitur in homine ratio animalis, ut distincta à ratione rationalis, quæ distinctio ab aliquibus vocatur fundamentalis in re ab aliis vero virtualis, & formalis, & actualis solum per intellectum, Hæ divisiones distinctionis sunt magis usitatæ in scholasticis tamen.

6 Ab aliquibus plures aliæ distinctiones solent assignari, nam inquirunt, datur distinctio rationis modo supra explicato, & distinctio ex natura rei, & distinctio formalis, sed inter has duas distinctiones non facile assignant discrimen; ideoque jam communiter inter Scotistas pro eadem usurpantur, & distinctio realis absoluta modo supra dicto, & distinctio essentialis, quæ reperitur inter illa, quæ habent diversas essentias, sed hæc reducitur ad distinctionem realem, & distinctio subjectiva, quæ versatur inter ea, quæ non conveniunt in aliqua realitate potentiâ, & contrahibili per alias realitates, ut distinctio, quæ datur inter Deum, & creaturam; nam cum Deus sit omnino simplex, prout simplicitas opponitur compositioni, nequit in illo dari aliqua realitas potentialis; seu contrahibilis per aliam, & in qua conveniat cum creatura, & distinctio obiectiva, quæ versatur inter ea, quæ in nullo conceptu reali quidditativo conveniunt, ut est distinctio, quæ datur inter ultimas differentias; sed hæ distinctiones etiam possunt reduci ad distinctionem realem, & sunt quasi membra subdividentia illius. Aliis nominibus solent explicari aliquæ distinctiones, sed omnes ad supradictas reducuntur. Totum quod diximus in hac quæstione solum intendit proponere distinctiones, quibus communiter utitur in scholis abstrahendo à qualibet controversia circa illas, maxima autem difficultas circa hanc materiam est, an sit admittenda distinctio formalis ex natura rei, quam adducunt Scotistæ? Pro ejus resolutione, & majori claritate ad distinctionum intelligentiam præmittenda est hæc.

QUÆ.

## QUÆSTIO II.

*Quid sit res? Quid formalitas? Ubi ponuntur via ad distinctiones cognoscendas.*

**D**icimus primò; nomine rei, ut à realitate, seu formalitate, secernitur nihil aliud intelligimus, nisi entitatem ex se capacem existentiae, & consequenter in linea Metaphysica compositam ex genere; & differentia, & ulterius in tali linea inordinabilem. Unde omnia individua, cujuscumque generis sint propriè, & rigorosè in hoc sensu dicuntur res, & hoc, siue sint physicè completa, ut est quodlibet compositum ex materia, & forma, siue incompleta, ut sunt materia, & forma substantialis, siue sint substantia, siue accidentia, siue entitates absolutæ, siue respectivæ, vel modales, nam omnia prædicta sunt per se existentiae capacia, ut propriis locis patebit. Ratio hujus est, quia ut dictum est, hic accipitur res, prout à realitate, seu formalitate secernitur: sed realitas, seu formalitas, ut jam dicemus, est aliquid rei completæ; ergo res, ut illi opponitur, est entitas completa, scilicet individuum.

**2** Dicimus secundo: nomine realitatis, seu formalitatis nihil aliud intelligimus nisi rationem, quæ in se considerata non est res, quia non potest per se existere, sed est aliquid rei non sicut materia, & forma sunt aliquid compositi: sed per identitatem, quatenus est aliquis gradus Metaphysicus essentiae rei, ideòque appellatur vocabulo diminutivo formalitas, seu realitas, seu quod idem est, aliquid, seu aliquid rei, unde sic solet ab Scotistis describi: formalitas est ratio objectiva conceptibilis in aliqua re conceptu perfectò, & adæquato distincto

Q 5 à con-

à conceptu, quo concipitur alia ratio obiectiva ejusdem rei, & dicitur; *conceptus perfectus*, & *adaquatus*; quia diuersa conceptibilitas imperfecta; & inadæquata; non infert diuersam formalitatem, sed tantum diuersa munera ejusdem formalitatis, quòd clarè deducitur ex Scoto; nam ad ostendendam distinctionem formalem pluries recurrit ad adæquatam, & perfectam conceptibilitatem, & infra amplius patebit.

3 Dicimus tertio: plures solent assignari viæ ad distinctionem realem cognoscendam. Prima est via generationis: Secunda via corruptionis; certum enim est, ea quæ diuersis productionibus producuntur, & quæ diuersis corrumpuntur corruptionibus, & realiter distinguui. Tertia est via separationis; illa enim, quæ inter se ita habent, ut unum possit ab alio separari, vel sine illo existere, saltim de potentia Dei absoluta, realiter distinguuntur. Quarta est via originis, illa enim, quæ se habent tanquam produciens, & productum, tanquam causa, & causatum, licet separari non possint, realiter distinguuntur. In Divinis enim Pater distinguitur à Filio, & Pater, & Filius à Spiritu Sancto, quia licet separari non possint, se habent ut produciens, & productum, quod inquit Scotus in 2. dist. 2. quæst. 2. potest dici separabilitas proportionalis; nam produciens, & productum, licet separari non possint, proportionem tamen correspondent his, quæ possunt separari, idem contingit in creatis in sententia Scottistarum; inter compositum per se physicum, & suas partes simul sumptas, & unitas; ut dicetur in Physica. Quinta est via existentiae, & subsistentiae, illa enim, quæ habent diuersas existentias, & diuersas subsistentias, realiter distinguuntur; hæc tamen via reducitur ad viam productionis; nam illa, quæ terminant diuersas productiones, habent diuersas existentias, & si sint entitates substantiales

com-

completæ, habent diversas subsistentias. Hinc facile deducitur, quæ distinguantur realiter, vel non.

4 Dicimus quartò: plures solent assignari viæ inter Scotistas ad cognoscendam distinctionem formalem, tres verò tantum proponemus, ad quas aliæ facile reducuntur. Prima est via definitionis; illa enim, quæ realiter identificantur, & tamen diversis definitionibus essentialibus definiuntur, formaliter inter se distinguuntur. Advertendum tamen est, quòd dicimus, *definitionibus essentialibus*; quia definitiones, quæ dantur per additamentum, vel per ordinem ad diversa munera, seu ad diversa connotata, non inferunt distinctionem formalem, quia tales definitiones potius dantur ad cognoscenda diversa munera ejusdem formalitatis, quàm ad explicandam ejus essentiam, ut patet in intellectu, qui diversis definitionibus definitur respectu trium suarum operationum, & tamen non est multiplex, sed unica formalitas, idem est de voluntate respectu volitionis, & nolitionis, & clarius patet in scientia Dei, quæ est una, & simplicissima formalitate, & tamen diversa definitione definitur, ut dicitur scientia simplicis intelligentiæ, acut dicitur scientia visionis, propter diversa connotata; nam ut scientia simplicis intelligentiæ respicit, seu connotat possibile; & ut scientia visionis respicit, seu connotat futura.

5 Secunda est via contradictionis, quando enim aliqua sunt realiter identificata, & de ipsis, absque aliqua intellectus operatione, verificantur duo prædicata contradictoria, tunc illa distinguuntur formaliter ante operationem intellectus. Advertendum tamen est, quòd talia prædicata contradictoria debent illis convenire independentem ab aliqua extrinseca connotatione, & in ordine ad conceptus perfectos, & adequatos; nam si solum illis conveniant per ex-

trinfecas connotationes, & in ordina ad conceptus imperfectos, & inadæquatos, non inferunt distinctionem formalem, quòd patet in voluntate Divina, quæ dicitur volens in quantum hominem ordinat ad gloriam, & dicitur nolens in quantum hominem ordinat ad poenam, similiter eadem volitio Divina dicitur efficax in quantum ordinat objectum ad existentiam, & dicitur inefficax in quantum tendit in objectum, absque eo quòd illi absolutè existentiam decernat, quæ non inferunt distinctionem formalem, sed tantum diversa munera ejusdem formalitatis, licet habeant diversas denominationes, & ex illis possint inferri prædicata contradictoria, eo quòd talia prædicata, solum convenient penes diversa extrinseca connotata.

6 Idem potest exemplificari in Divinis; nam ibi substantia relativa, & Paternitas est eademmet formalitas, & tamen intellectus imperfectè, & inadæquatè concipiens illam; potest illi tribuere duo prædicata contradictoria, scilicet, quòd conveniat Pater cum Filio in ratione substantiæ relativæ, & non conveniat in ratione paternitatis.

7 Igitur tunc duo prædicata contradictoria, inferunt distinctionem formalem, quando de aliquibus realiter identificatis verificantur in ordine ad conceptus perfectos, & adæquatos, quibus perfectè cognoscens, circa aliquam entitatem cognitione intuitiva tendens cognoscit, quòd de aliquo illius entitatis verificatur unum cōtradictorium, quod de alio ipsius entitatis non verificatur, & è contra, quod patet in essentia Divina, & paternitate, quæ realiter identificantur in Patre, & de paternitate verificatur, quòd est incommunicabilis, quod nullatenus convenit essentiæ, de hac verò verificatur, quòd est communicabilis, quod nullatenus convenit paternitati, & de hoc à parte  
rei

rei independenter ab intellectus fictione; nam ipse Deus perfectissimè, & intuitivè cognoscens, hoc ita se habere cognoscit; idem exemplificatur in creatis; nam homo, v. g. convenit cum bruto per animalitatem, & non convenit per rationalitatem, quod Deus, ita esse cognoscit, unde hæc prædicata contradictoriæ; *communicabile, & incommunicabile; convenire, & non convenire*, inferunt distinctionem formalem inter essentiam, & paternitatem in Divinis; & inter animal, & rationale in creatis: quod amplius patebit quæstione sequenti.

8. Tertia, est via reduplicationis, quando aliquid convenit à parte rei, & independenter à consideratione intellectus alicui entitati secundum unam rationem, non verò secundum aliam, tunc illæ rationes formaliter ex natura rei distinguuntur; quia enim homini, in quantum est rationalis, convenit risibilitas, non verò in quantum est animal, infertur in homine distinctio formalis inter animal, & rationale: quod semper intelligendum est in ordine ad conceptus perfectos, & adæquatos.

### Q U Æ S T I O III.

*Verum simul cum identitate reali detur distinctio formalis ex natura rei?*

1 **C**irca hanc difficultatem est duplex ex diametro opposita sententia. Prima nullam admittit distinctionem ex natura rei inter ea, quæ realiter identificantur; sed tantum distinctionem rationis, vel ratiocinantis, vel ratiocinatae, juxta diversos modos dicendi. Sic ferè omnes extra subtilem scholam militantes. Secunda concedit distinctionem formalem ex natura rei inter aliqua simul cum identitate reali illorum. Hæc sententia est communis consensus Scotistarum cum Scoto pluribus in locis infra

374 *Log. Mag. de Universalibus*,  
fra citandis, & ex aliis citantur pro hac senten-  
tia Fonseca 5. Metaph. cap. 6. quæst. 6. Cursus  
Conimbricensis in præfatione Porphyrii quæst.  
4. art. 2. Ægidius de præfatione lib. 5. de vi-  
sione Divinæ essentiae quæst. 5. artic. 4. Ubi sal-  
tim in creatis asserit, non posse prædictam di-  
stinctionem negari.

2 Dicimus ergo: ante omnem operationem  
intellectus datur distinctio formalis ex natura  
rei inter formalitates realiter identificatas. Hæc  
conclusio est pro secunda sententia, & eam te-  
net Scotus in 1. dist. 2. quæst. 7. §. *Sed hac restat*,  
lit. FF. his verbis: *Dico sine assertionem, & præju-  
dicio sententia melioris, quod ratio, qua forma-  
liter suppositum est incommunicabile, & ratio  
essentia, ut essentia habent aliquam distinctionem  
precedentem omnem actum intellectus creati, &  
increati. Et infra vers. Breviter igitur, sub litt.  
HH. sic prosequitur; Dico omittendo illa verba  
de distinctione rationis, & de distinctione virtua-  
li, non quia sint male dicta; sed quia non opor-  
tet eis uti, quod in essentia Divina ante actum in-  
tellectus est entitas A. & est entitas B. & hac non  
est formaliter illa; ita quod intellectus paternus  
considerans A. & considerans B. habet ex natura  
rei, unde ista compositio sit vera. A non est forma-  
liter B. non autem præcisè ex aliquo actu intellectus  
circa A. & B. Et prosequitur ponens exemplum  
in creatis hoc modo; Est tamen in albedine ali-  
quid realiter, unde habet rationem coloris & ali-  
quid, unde habet rationem differentie; & hac rea-  
litas formaliter non est illa realitas, nec è converso  
formaliter; imò una est extra realitatem alterius  
formaliter loquendo; sicut si essent duæ res, licet  
modo per identitatem istæ duæ realitates sint una  
res. Et distinct. 8. quæst. 4. per totam. Et in 4.  
dist. 46. quæst. 3. per totam.*

3 Dices, quod ab Scoto vocatur hæc distin-  
ctio rationis, & virtualis; & deinde dicit, quod  
melius explicatur per non identitatem, quam  
per

per distinctionem; ergo videtur non dari ex mente Scoti distinctionem formalem ex natura rei. Sed respondetur, quod ipse Scotus se explicat; nam quando talem distinctionem appellat distinctionem rationis, non ita intelligit, ut ratio accipiatur pro differentia formata ab intellectu, sed. pro quidditate rei; quando autem illam vocat distinctionem virtuales, intelligit, quod illud quod habet talem distinctionem, non habet rem, & rem, sed est una res habens virtualiter, sive eminenter plures res: unde vocat illam virtuales: non quia accipiat esse actuale ab intellectu, sed propter æquivalentiam; quia cum dicat solum plures formalitates ex natura rei distinctas, æquivalet pluribus rebus distinctis realiter. Et amplius se explicat ipse Scotus verbis supra relatis.

4 Quando autem dicit Scotus, quod melius est uti negativa non identitate, quam affirmativa distinctione, ideo est; quia ex communi modo loquendi, præsertim tunc temporis, distinctio ex natura rei pro vera, & rigorosa distinctione reali usurpari solebat, propter quod ne aliquam æquivocationem pateretur, potius non identitatem formalem, quam distinctionem ex natura rei, illam Scotus appellabat.

5 Ex quo sequitur, quàm sine fundamento arguunt aliqui contra Scotum ex Concilio Rhemenfi; nam ibi D. Bernardus arguit contra Gilbertum Porretanum, qui videbatur ponere distinctionem realem inter Deum, & suam bonitatem, quod falsum est, & valdè diversum à sententia Scoti, qui simul cum identitate reali adstruit distinctionem formalem ex natura rei inter Deum, & attributa Divina. Similiter dicendum est ad aliquas auctoritates Conciliorum, & SS. PP. nam solum negant distinctionem realem absolutam inter essentiam Divinam, & attributa, & relationes. Imò aliqui



Patres videntur expressè tenere nostram sententiam, nam D. August. 7. de Trinit. capit. 1. vel 6. apud Scotum citatum, dicit: *Omnis essentia, qua relativè dicitur, est aliquid excepto relativo.* Citatur etiam cap. 5. ubi dicit: *Non eo Pater, quo Deus.* Et D. Damasc. 1. de fide cap. 4. inquit: *Si dixeris bonum, justum, &c. non naturam Dei, sed qua juxta naturam sunt dixisti;* ergo secundum prædictos Patres aliquomodo distinguitur essentia Divina in re à relatione, & ab attributis: sed non realiter absolutè: ergo ex natura rei formaliter. Statuta ergo distinctione formali ex natura rei ex mente Scoti.

6 Probatur rationibus conclusio primò, duæ relationes oppositæ petunt distincta fundamenta respectu ejusdem termini; ergo relationes similitudinis, & dissimilitudinis debent habere distincta fundamenta respectu ejusdem termini. Hoc enthymema videtur evidens, quia cum relatio resultet ex fundamento, & termino, si sit idem fundamentum, & idem terminus, unica tantum resultabit relatio, non autem plures, & oppositæ; nunc sic; in homine, v. g. ante omnem operationem intellectus datur relatio similitudinis cum equo in animalitate, & relatio dissimilitudinis in rationalitate; ergo ante omnem operationem intellectus debent prædicta fundamenta, scilicet animalitas, & rationalitas, distingui: sed non distinctione reali stricta, ut omnes fatentur: ergo distinctione formali ex natura rei.

7 Probatur secundò, & hæc ratio coincidit, cum præcedenti; duo prædicata contradictoria nequeunt à parte rei convenire eidem rei omnino à parte rei indistinctæ, sed homini conveniunt à parte rei duo prædicata contradictoria, scilicet, convenire, & non convenire, nam convenit cum equo per animalitatem: & non convenit per rationalitatem; ergo ani-  
ma.

malitas, & rationalitas, quæ sunt rationes propter quas homini conveniunt prædicta prædicta contradictoria, aliquomodo à parte rei distinguuntur; sed non distinctione reali stricta: ergo distinctione ex natura rei formali.

8 Diversimodè conantur adversarii hanc efficacem rationem evertere, & primò respondent Jesuitæ, verum esse dari prædictas relationes in homine respectu equi ante omnem operationem intellectus; falsum tamen, fundamenta prædictarum relationum esse aliquomodo distincta ante omnem operationem intellectus, quia animalitas est ratio assimilandi hominem equo, quatenus est fundamentum, ut homo confundatur cum equo in hoc conceptu generico, *animal*; in quo sensu etiam rationalitas est ratio assimilandi hominem equo; rationalitas verò est ratio dissimilandi hominem equo, quatenus est fundamentum, ut non confundatur homo cum equo in hoc conceptu specifico, *homo*; in quo sensu etiam animalitas est ratio dissimilandi, quod nulla est contradictio; quia in eodem sensu, in quo animalitas est ratio assimilandi, etiam est rationalitas, & in eodem sensu, in quo rationalitas est ratio dissimilandi, etiam est animalitas.

9. Contra est, quia ideò animale est ratio conveniendi genericè, quia ratio essentialis animalis reperitur in homine, & equo: sed ratio formalis rationalis non invenitur in equo: ergo nequit esse ratio assimilandi hominem equo: ergo in eadem linea, scilicet, in convenientia generica, animal est ratio conveniendi, & rationale non est ratio conveniendi, & consequenter in eadem linea reperitur contradictio: sed hæc nequit eidem rei secundum eandem rationem convenire; ergo animal, & rationale, quorum rationes homini conveniunt, aliquomodo ex natura rei distinguuntur; non realiter absolutè, ergo formaliter.

10 Aliter respondent etiam Jesuitæ; nempe ; animalitatem dupliciter posse sumi , primò entitativè , id est , pro entitate , quæ est principium sentiendi , & ratiocinandi ; secundo præcisivè , id est , prout tantum dicit principium sentiendi . Si primò modo sumatur , verum est dicere , quòd eadem entitas est similis , & dissimilis equo ratione diversarum operationum . Si secundo modo , nequit de animalitate verificari similitudo respectu equi realiter ; tum quia cum animalitas non sit præcisa realiter a rationalitate , sed tantum per rationem , id quod convenit illi , ut præcisæ , non convenit illi realiter , sed per rationem . Tum etiam quia nequit præscindi animalitas à rationalitate , quin etiam præscindatur ab inhabilitate , & sic potius est una cum animalitate equi , quam similis ; quia similitudo non potest esse ejusdem ad se ipsum ; ad similitudinem enim requiritur distinctio in eà ratione , in qua aliqua dicuntur similia .

11 Sed contra , quia essentia animalis , vel consistit in hoc , quod sit principium sentiendi , & ratiocinandi simul ? Vel in hoc , quod sit principium sentiendi tantum ? Si primum ; ergo essentia animalis non reperitur in equo ; nam in equo reperitur principium ratiocinandi . Si secundum ; ergo homo est similis equo in essentiali ratione animalis , & dissimilis in essentiali ratione rationalis ; sed tales rationes essentialiter conveniunt animali , & rationali ante omnem operationem intellectus ; ergo essentia animalis , & essentia rationalis ante omnem operationem intellectus distinguuntur .

12 Quando autem dicunt , quod animalitas ; ut præcisa est una , & sic non est ratio assimilandi , verum est loquendo de præcisione per intellectum ; sed ex hoc nihil contra nos , quia nullatenus dicimus , quod natura animalis , ut præ-

præcisa per intellectum, est ratio assimilandi, sed prout à parte rei dicit suam essentiam, quæ formaliter, & ex se præscindit à rationalitate, & ut sic reduplicativè, neque est una, neque plures, ut diximus loquendo de unitate formali, sed specificativè est multiplicata, & realiter distincta ratione differentiarum individualium, quod sufficit, ut possit esse ratio assimilandi. Alias responsiones solent adducere Jesuitæ, quas brevitatis causa omittimus, quia coincidunt cum antecedentibus, & ferè eodem modo impugnantur, observando quæ diximus de unitate formali.

13 Aliter respondent Complutenses, quòd licet eadem entitas non possit fundare plures relationes numero diversas, potest tamen fundare plures diversas specie; eadem enim quantitas bicubita est æqualis alteri bicubitæ, & inæqualis tricubitæ. Sed contra; quia licet idem fundamentum respectu diversorum terminorum possit fundare diversas relationes, ut patet in exemplo; tamen ex hoc non probatur, quòd idem fundamentum possit fundare relationes oppositas respectu ejusdem termini; sed homo fundat relationes oppositas supradictas respectu ejusdem termini, scilicet, equi; ergo rationes fundandi tales relationes debent aliquomodo distingui.

14 Aliter respondent aliqui Thomistæ, nostrum argumentum probare plus quàm intendit, nam inquirunt, probat distinctionem realem animalitatis à rationalitate; quia prædicta prædicata contradictoria, realiter distinguuntur, unde etiam realiter debent distingui illa, quibus à parte rei conveniunt. Sed contra; quia ipsi salvant prædicta contradictoria cum sola distinctione virtuali, & sine aliqua distinctione reali actuali; ergo prædicta contradictoria non arguunt distinctionem realem absolutam, & consequenter prædicta responsio, juxta ipsorum fun-

fundamenta, se ipsam destruit. Deinde, prædicata contradictoria, tunc solum inferunt distinctionem realem absolutam, quando realiter, & absolute conveniunt; non verò quando conveniunt eidem entitati, non absolute, sed secundum diversas rationes: nos enim non dicimus, quod animal convenit, & rationale non convenit cum equo, sed quod homo convenit ratione animalitatis, & non ratione rationalitatis cum equo, & quod homo non convenit, seu differt ab equo ratione rationalitatis, & non ratione animalitatis; ad quod sufficit distinctio ex natura rei formalis, & nullatenus requiritur distinctio realis absoluta inter animalitatem, & rationalitatem hominis.

15 Dicunt præterea, nostrum argumentum probare, plura distingui formaliter ex natura rei, quæ in nostra sententia taliter non distinguuntur; quia inquirunt, aliquæ formalitates sine distinctione formali respiciunt diversa, connotata, quorum ratione fundant prædicata contradictoria. Sed contra hoc est, quod juxta dicta quæstione antecedenti, illa solum distinguuntur formaliter, quæ fundant diversa prædicata contradictoria, & habent diversas definitiones sine ordine ad diversa extrinseca connotata; & quæ possunt concipi conceptu perfecto, & adæquato; & sic nihil convincit contra nos prædicta responsio.

16 Immediate autem respondent ad argumentum, quod ad salvanda prædicta contradictoria sufficit distinctio virtualis ante omnem operationem intellectus, quæ distinctio consistit in hoc, quod à parte rei animalitas, & rationalitas est eademmet entitas, & solum præstat fundamentum, ratione suæ æquivalentiæ ad plura distincta, ut intellectus illam distinguat in duplicem formalitatem objectivam, & ratione unius affirmet aliquod prædicatum de ipsa, & ratione alterius illud neget; unde præ-

di.

dictæ rationis oppositæ, seu prædicata contradictoria possunt de homine verificari, licet sit una simplicissima entitas; quia est plures in virtute propter suam eminentiam; sicut plures virtutes inferiorum, etiam si specie differant, continenter in unica virtute causarum universalium, v.g. in sole, qui unica virtute potest producere plures effectus specie diversos propter suam eminentiam.

17 Sed contra est; quia prædicta prædicata contradictoria non solum tribuuntur ab intellectu homini ratione animalitatis, & rationalitatis; sed etiam ipsi homini conveniunt, seclusa, quacumque consideratione intellectus: ergo non solum distinguuntur animalitas, & rationalitas virtualiter, & per ordinem ad intellectum, sed actu, & formaliter independenter ab intellectus consideratione. Ad exemplum dicimus, quod est maxima disparitas: quia virtutes oppositæ ad producendos plures effectus distinctos, non continentur in causa universali actu, & formaliter, qua ratione sunt plures, sed tantum eminenter: rationes vero animalitatis, & rationalitatis continentur in homine actu, & formaliter, id est, secundum suas rationes formales, & essentielles, unde licet prædictæ virtutes, quæ in inferioribus sunt plures, ut continentur in causa universali, sint tantum unica virtus formaliter, seu entitativè, & plures virtualiter, & eminenter; tamen animalitas, & rationalitas sunt ex natura rei in homine plures formaliter.

18 Propter hoc aliter respondet ad argumentum quidam Thomista; quod prædicata contradictoria non possunt verificari de eadem re, ut est in se: bene tamen de eadem re significata, ut distincta in actu signato; animalitas autem & rationalitas, inquit, per hos terminos non solum significantur, ut distincta virtualiter; quia distinctio virtualis convenit illis,

ut

ut sunt in se, sed significantur, ut distincta per rationem in actu non exercitam, sed signatam, quod est significari, ut distinguibilia, non subiectivè, sed obiectivè distinguibilitate identificata non cum animali; & rationali, sed cum distinctio, ne actuali possibili; de animali autem, & rationali, ut actu involventibus distinctionem rationis, possunt verificari contradictoria ante operationem intellectus exercitam, non ante operationem intellectus possibilem, & signatam.

19 Sed contra primò; quia relationes identitatis, seu similitudinis diversitatis, seu dissimilitudinis, quæ fundantur in homine ratione animalitatis, & rationalitatis, sunt reales, & ab omni consideratione intellectus independentes: ergo rationes fundandi prædictas relationes sunt reales, & ab omni intellectus consideratione independentes. Patet consequentia, quia relationes reales petunt fundamenta realia: ergo animalitas, & rationalitas subiectivè, & non obiectivè sumptæ, sunt fundamenta prædictarum relationum, & in hoc sensu conveniunt illis prædicata contradictoria conveniendi, & non conveniendi: sed ut fundant prædictas relationes, & illis conveniunt talia prædicata contradictoria, debent distinguì actu: ergo distinguuntur independentè a consideratione intellectus distinctione ex natura rei formali.

20 Contra secundò; quia distinctio debet esse, sicut est contradictio: sed contradictio est actualis ante operationem intellectus exercitam, juxta prædictam responsionem: ergo ante operationem intellectus exercitam est actualis distinctio: ergo ut detur contradictio actualis, non sufficit operatio intellectus signata. Patet consequentia; quia operatio intellectus signata non ponit actualem distinctionem, sed tantum possibilem: ergo non sufficit ad actualem contradictionem, sed ad summum ad contradictionem possibilem: sed contradictio est actualis ante  
ope.

operationem intellectus exercitam: ergo etiam distinctio: sed talis distinctio non est rationis; quia distinctio rationis fit actualis per operationem intellectus exercitam: ergo est distinctio actualis a parte rei: sed non realis absoluta: ergo formalis.

21 Probatur secundò conclusio ratione Theologica; nam in Divinis actu, & formaliter reperitur contradictio inter essentiam Divinam, & paternitatem, v. g. quæ absolute realiter identificantur: ergo actu, & formaliter ex natura rei distinguuntur. Probatur; nam de essentia Divina verificatur, quod communicatur Filio, & de paternitate, quod non communicatur Filio; ergo inter essentiam Divinam, & paternitatem reperitur actualiter contradictio, siquidem de illis verificatur duplex contradictorium. Hæc ratio latè prosequitur in Theologia, ubi impugnantur plures responsiones ad illam: nunc autem breviter aliquas assignabimus.

22 Aliqui dicunt, prædicta contradictoria non convenire essentiæ, & paternitati a parte rei, sed prout a nobis concipiuntur, & sic sufficere distinctionem rationis. Sed contra, quia vel Deus cognoscit, essentiam communicari Filio, & paternitatem non communicari? Vel non cognoscit? Si primum: ergo a parte rei essentia communicatur Filio, & paternitas non communicatur; nam Deus cognoscit rem sicuti est, & consequenter independenter a nostro modo concipiendi conveniunt essentiæ, & paternitati prædicta prædicata contradictoria. Si secundum: ergo ideo erit, quia a parte rei essentia non communicatur, sicut nec paternitas, & consequenter fallitur noster intellectus quando judicat, essentiam Divinam communicari Filio, & non paternitatem; unde sequeretur, has propositiones esse falsas: *Essentia Divina communicatur Filio: paternitas non communicatur Filio:* nam ut tenent omnes Philosophi, ab eo quod res est,

vel



vel non est, propositio dicitur vera, vel falsa; non tamen ab eo, quod à nobis sic, vel sic concipitur; quod autem prædictæ propositiones sint falsæ, nullus catholicorum concedit.

23 Alii autem dicunt, sufficere distinctionem virtuales ad verificanda prædicta contradictoria. Sed hæc responsio impugnatur ex dictis. Deinde, contra est primò: nam ubi non, est summa identitas actualis, est aliqua actualis distinctio; sed inter essentiam Divinam, & paternitatem non datur summa identitas actualis ex natura rei ( hoc non debet intelligi de summa identitate reali absoluta ) ergo datur aliqua distinctio actualis ex natura rei. Minor probatur; quia si inter essentiam Divinam, & paternitatem daretur summa identitas actualis ex natura rei, essentia Divina non haberet maiorem identitatem actualem cum se ipsa ex natura rei, quam cum paternitate, ergo sicut essentia Divina actualiter ex natura rei est essentia Divina, ita actualiter ex natura rei esset paternitas: ergo sicut essentia Divina actualiter ex natura rei communicatur Filio, ita paternitas actualiter ex natura rei communicaretur Filio: sed hoc nullatenus conceditur: ergo debet concedi, quod essentia Divina, & paternitas simul cum identitate reali absoluta habent aliquam distinctionem ex natura rei.

24 Contra secundò; quia ideò admittunt distinctionem virtuales ad salvanda prædicta contradictoria, non verò distinctionem formalem; quia iudicant, formalem distinctionem arguere in Deo compositionem metaphysicam, sed hæc, vel etiam arguitur ex distinctione virtuali, vel non arguitur ex distinctione formali; ergo ex hoc capite nequit distinctio formalis ex natura rei negari. Probatur minor; quia ipsi admittunt compositionem metaphysicam in creatis inter animal, & rationale; sed inter animal,

mal, & rationale solum admittunt distinctionem virtuales; ergo distinctio virtualis sufficit ad compositionem metaphysicam; sed talem distinctionem virtuales admittunt in divinis: ergo admittunt sufficientem distinctionem ad compositionem metaphysicam, & consequenter ex hoc capite non debet negari distinctio formalis in divinis; nam idem sequitur ex distinctione virtuali ac ex distinctione formali.

25 Si autem dicant, non sufficere in creatis distinctionem virtuales ad metaphysicam compositionem; quia talis compositio non datur à parte rei, sed tantum per intellectum; contra hoc est, quod licet verum sit in sua sententia, tamen eo quod detur à parte rei distinctio virtualis, datur etiam à parte rei virtualiter metaphysica compositio, aut datur sufficiens fundamentum à parte rei ad ipsam compositionem metaphysicam per intellectum concipiendam; ergo si in divinis datur à parte rei distinctio virtualis, datur sufficiens fundamentum ad concipiendam compositionem metaphysicam, ergo si fundamentum ex parte rei ad concipiendam compositionem metaphysicam in creatis dicit imperfectionem, ita similiter fundamentum ad compositionem metaphysicam in divinis concipiendam; ergo ex eodem fundamento, quo negant formalem distinctionem ex natura rei, videntur debere negare distinctionem virtuales, vel sicut admittunt virtuales, debent admittere formalem; sed ut dictum est, non sufficit virtualis distinctio ad contradictionem, actualem salvandam: ergo ponenda est distinctio formalis ex natura rei, eo vel maxime, quia ex illa non sequitur prædictum inconveniens; ut infra patebit.

26 Ulterius potest probari nostra conclusio etiam ratione Theologica; nam Filius procedit per intellectum, & non per voluntatem; Spiritus

tus Sanctus procedit per voluntatem, & non per intellectum : ergo intellectus , & voluntas in Divinis formaliter actualiter distinguuntur . Patet consequentia ; nam alias non esset major ratio , ut Filius esset genitus , acut esset genitus Spiritus Sanctus ; non enim alia ratione dicitur genitus Filius, nisi quia procedit per intellectū ; neque alia ratione non dicitur genitus Spiritus Sanctus nisi quia non procedit per intellectum , sed per voluntatem : ergo si intellectus actualiter formaliter est voluntas , Spiritus Sanctus actualiter procedit per intellectum , & sic erit genitus sicut Filius , quod nullatenus est dicendum : ergo intellectus , & voluntas formaliter actualiter distinguuntur.

27 Solet etiam probari nostra conclusio pluribus autoritatibus Philosophi , nam 3. Met. cap. 10. ait ; genus esse extra rationem differentiarum , ita ut formaliter se invicem excludant secundum proprias rationes formales. Et 5. ei hic. ait , virtutem , & justitiam esse eandem rem , esse tamen distincta secundum rationem quidditativam . Aliis in locis solet citari ab Scotistis , & potest videri apud Mastrium in Metaph. d. 6. q. 9. art. 2.

28 Pluribus argumentis intendunt adversarii distinctionem formalem ex natura rei è medio tollere . Arguunt igitur primo : distinctio formalis ex natura rei est duplex formalitas realiter identificata , & formaliter in re distincta : hoc implicat : ergo implicat distinctio formalis ex natura rei . Probatur minor ; formalitates realiter identificatæ , sunt formalitates formaliter in re identificatæ : sed implicat duplex formalitas in re formaliter identificata , & in re formaliter distincta ; ergo implicat duplex formalitas realiter identificata , & formaliter in re distincta . Probatur major : formalitates esse in re formaliter identificatas , nihil aliud est , quam rationem formalem , conceptibilitatem , sive  
de.

definitionem objectivam unius esse in re ipsammet rationem formalem, conceptibilitatem, si-  
ve definitionem objectivam alterius; sed impli-  
cat, formalitates realiter identificari, quin unius  
ratio formalis, conceptibilitas, & definitio sit  
ratio formalis, conceptibilitas, & definitio alte-  
rius, ergo formalitates realiter identificate sunt  
formalitates in re formaliter identificate. Pro-  
batur min. identificari realiter formalitates est,  
unam formalitatem esse in realiter alteram; sed for-  
malitates sunt ipsæmet rationes formales,  
conceptibilitates, & definitione unius, & alte-  
rius; ergo implicat formalitates realiter identi-  
ficari, quin ratio formalis, conceptibilitas, &  
definitio unius sit in re ratio formalis, concepti-  
bitas, & definitio alterius.

29 Hoc argumentum tantum, & benè pro-  
bat, quòd sicut realiter identificantur formalita-  
tes, ita realiter identificantur rationes forma-  
les, conceptibilitates, & definitiones objectivæ  
illarum; non tamen probat, formalitates, ra-  
tiones formales, conceptibilitates, & definitio-  
nes illarum formaliter ex natura rei identificari  
itaque.

30 Resp. in forma, negando minorem, &  
majorem probationis, & illius probationis di-  
stinguo majorem; formalitates esse in re forma-  
liter identificate, nihil aliud est, quam ratio-  
nem formalem unius, &c. esse in re ipsammet  
rationem formalem alterius, &c. si ly *in re* in-  
telligatur realiter absolute, nego; si intelli-  
gatur realiter formaliter, concedo. Distinguo  
etiam minorem; implicat, formalitates realiter  
identificari, quin unius ratio formalis, &c. sit  
ratio formalis alterius, &c. in re realiter abso-  
lutè, concedo; in re realiter formaliter, nego, &  
nego consequentiam. Unde patet ad probatio-  
nem minoris.

31 Sed replicant: unum esse in re formaliter  
aliud, nihil aliud est, quam quod in re ratio

formalis unius sit ratio formalis alterius : ergo implicat solutio in terminis, dum dicit, rationem formalem unius esse in re, sed non formaliter rationem formalem alterius. Probatur antecedens; quia unum esse realiter entitativè alterum, nihil est aliud, quam entitatem unius esse in re entitatem alterius; ergo unum esse in re formaliter aliud, nihil est aliud, quam rationem formalem unius esse in re rationem formalem alterius. Et confirmant; formalitas realiter identificata cum altera, essentialiter est identificata cum illa; sed formalitas essentialiter identificata cum altera, est formaliter identificata cum illa; ergo formalitas realiter identificata cum altera, est formaliter identificata cum illa.

32 Ad replicam respondetur distinguendo antecedens; unum esse in re formaliter aliud, nihil aliud est, quam quòd in re ratio formalis unius sit ratio formalis alterius, sumpto *ly in re*, ut est idem, ac realiter absolutè, nego; ut est idem, ac realiter formaliter, conc. Ad prob. concessio antec. neg. conf. Etenim benè; ex eo quod entitas unius sit entitas alterius; sequitur, unum esse realiter entitativè alterum; quia hoc solum est dicere, quod absolutè sunt idem realiter; non tamen sequitur, ex eo quod ratio formalis unius sit ratio formalis alterius in re, quod unum sit formaliter aliud; cujus ratio est, quia *ly in re* absolutè prolatum denotat esse reale absolutum, & sic benè infert identitatem entitativam, sive realem absolutam; cum tamen *ly in re* etiam significet esse formale ex natura rei, non semper infert identitatem formalem ex natura rei; unde licet argumentum benè probat, rationem formalem unius formalitatis esse realiter absolutè rationem formalem alterius; non tamen probat, rationem formalem unius esse formaliter ex natura rei rationem formalem alterius.

Ad

33 Ad confirmationem respondetur negando maiorem, quia aliud est realis identificatio, & aliud identificatio essentialis; nam ad identificationem realem sufficit, quod aliqua inter se conveniant ad constitutionem alicujus metaphysicè, modo alibi explicando; ad identificationem verò essentialem etiam requiritur, quod ratio formalis, & essentialis unius includatur in ratione formali, & essentiali alterius, quod nullatenus contingit in formalitatibus, nam licet realiter identificentur, tamen quælibet excludit aliam à suo conceptu formali, & essentiali. Quando autem contrarii probant maiorem, solum probant, quod formalitates ita necessariò identificantur realiter, ut absolute non possint non identificari realiter; ex quo nullatenus sequitur, quod essentialiter identificentur, prout essentialiter identificari dicit essentialiam unius esse de conceptu formali alterius, licet sequatur, quod essentialiter identificentur, prout essentialiter identificari dicit necessariam identificationem realem absolutam.

34 Arg. 2. Distinctio est propria passio, seu proprietas entis; sed tantum dantur duo genera entium, scilicet, ens reale, & ens rationis: ergo tantum dantur duo genera distinctionum, scilicet, distinctio realis, & distinctio rationis, & consequenter non datur distinctio formalis ab illis distincta. Resp. Argumentum esse verum, si rectè intelligatur; etenim datur ens rationis, & ens reale; sed hoc dividitur in ens reale absolutum, & in ens reale formale ex natura rei; unde similiter tantum datur distinctio realis, & distinctio rationis, intelligendo pro distinctione reali omnem distinctionem, quæ datur à parte rei independenter à consideratione intellectus; sed hæc distinctio realis subdividitur in distinctionem realem absolutam, quæ versatur inter rem, & rem, & in distinctionem realem formalem, quæ versatur inter

390 *Log. Mag. de Universalibus*,  
realitates, seu formalitates realiter absolute  
identificatas.

35 Unde sequitur, quod distinctio formalis  
non est distinctio à distinctionibus reali, & ra-  
tionis supra numeratis diversa, sed continetur  
sub distinctione reali, modo explicato; quando  
autem distinctio ex natura rei formalis appella-  
tur ab Scotistis distinctio media inter realem, &  
rationis, non est, quia de utraque participet;  
sed quia est minor distinctione reali absoluta,  
& major distinctione rationis; sed hoc videtur  
reduci ad quæstionem de nomine, de qua pa-  
rum est curandum. Ex dictis ad hoc argumen-  
tum facile respondetur ad aliquas replicas, &  
sic eas omittimus.

36 Arguunt tamen tertio in ordine, contra  
illud, quod diximus, scilicet, distinctionem  
ex natura rei formalem, esse minorem distin-  
ctione reali absoluta: distinctio formalis datur  
per differentias intimiores, quàm distinctio rea-  
lis absoluta: sed distinctio, quæ datur per diffe-  
rentias intimiores, est major: ergo distinctio  
formalis est major, quàm distinctio realis abso-  
luta: sed quæ identificantur realiter, non di-  
stinguuntur realiter absolute: ergo neque for-  
maliter. Patet consequentia, quia quæ non di-  
stinguuntur distinctione minori, nequeunt di-  
stingui distinctione majori. Respondetur ne-  
gando minorem, quia majoritas, vel minoritas  
distinctionis non desumitur ex magis, vel minus  
intimis differentiis, sed ex eo quod magis, vel  
minus admittat identitatis, quæ distinctioni op-  
ponitur, unde cum distinctio realis stricta nul-  
lam identitatem admittat, distinctio verò for-  
malis admittat identitatem realem, hinc est,  
quod distinctio formalis est minor distinctione  
reali stricta, & absoluta; ex quo, concessa mino-  
ri subsumpta, negatur consequentia.

37 Arguunt quarto: distinctio formalis da-  
tur inter realiter distincta: ergo non est distin-  
ctio

ctio inter formalitates realiter identificatas . Probatur antecedens ; nam quælibet formalitas unius individui distinguitur formaliter à quolibet formalitate alterius individui ; sed prædictæ formalitates realiter distinguuntur : ergo distinctio formalis datur inter formalitates realiter distinctas . Respond. omisso antecedenti, negando consequentiam ; etenim ex eo quòd datur distinctio formalis inter formalitates realiter distinctas, nullatenus sequitur, quòd non datur etiam inter formalitates realiter identificatas, modo dicto in tota quæstione . Omisimus enim antecedens ; quia inter formalitates distinctorum individuorum non datur propriè, & rigorosè loquendo distinctio formalis, sed realis absoluta ; non ratione ipsarum formalitatum, quia ex se, cùm non sint res, non possunt fundare distinctionem realem, sed ratione singularitatum, & individuorum, in quibus sunt, ut dictum est de naturis, loquendo de unitate formali ; potest autem talis distinctio appellari formalis, sumpta denominatione ab ipsis formalitatibus, quæ distinguuntur ; sed melius dicitur distinctio realis formalitatum, ut ibi similiter dictum est .

38. Arguunt quiatò ; fundamentum ad ponendam distinctionem formalem sumitur ex diversis conceptibus, & definitionibus ; sed eadem indivisibilis formalitas potest habere diversos conceptus, & definitiones ; ergo ruit fundamentum . Probatur minor : nam intellectus, v. gr. diversum habet conceptum, & definitionem, prout est principium simplicis apprehensionis, iudicii, & discursus, & voluntas similiter prout est principium volitionis, & nolitionis : sed intellectus, & voluntas sunt simplices formalitates, ergo eadem indivisibilis formalitas potest habere diversos conceptus, & definitiones ; ergo ex diversis conceptibus, & definitionibus non infertur distinctio formalis .

R 4 Resp.



39 Resp. dist. maiorem; fundamentum distinctionis formalis sumitur ex diversis conceptibus adæquatis, & ex diversis definitionibus quidditativis, & sine ordine ad diversa connotata, concedo; ex diversis conceptibus in adæquatis, & ex diversis definitionibus non quidditativis, & in ordine ad diversa connotata, nego. Distinguo etiam minorem; eadem indivisibilis formalitas potest habere diversos conceptus in adæquatos, & diversas definitiones non quidditativas, & in ordine ad diversa connotata, concedo; diversos conceptus adæquatos, & diversas definitiones quidditativas, nego, & nego consequentiam. Similiter debet distingui probatio minoris; tantum enim probat, intellectum, habere diversos conceptus in adæquatos, & diversas definitiones non quidditativas in ordine ad diversa connotata; & similiter voluntatem, ut etiam dictum est quæstione antecedenti.

40 Ratio huius est: nam conceptus adæquatus est fundamentum definitionis essentialis, & quidditivæ, & cum hæc explicet naturam, & essentiam rei, implicat, unam simplicem formalitatem habere plures conceptus adæquatos, & plures definitiones quidditativas, sicut implicat habere plures essentias, at verò conceptus in adæquatus est fundamentum definitionis non quidditivæ, seu in ordine ad extrinsecum connotatum, & cum hæc non explicet essentiam, sed tantum aliquod munus formalitatis, non implicat, unam simplicem formalitatem habere plures conceptus in adæquatos, & plures definitiones non quidditativas, & in ordine ad diversa extrinseca connotata, sicut non implicat habere diversa munera.

41 Dices, nihil potest definiri, nisi in ordine ad operationem: sed operatio est extrinsecum connotatum; ergo nihil definitur, nisi in ordine ad extrinsecum connotatum, & consequen-

quentes nullum est signum ex hoc capite ad colligendam distinctionem formalem. Sed præterquamquod assumptum argumenti est falsum; tum quia plura sunt definibilia, quæ non sunt de genere activorum, & sic nequeunt definiri in ordine ad operationem. Tum etiam, quia nulla daretur definitio essentialis, & quidditativa, sed omnes essent descriptivæ, & a posteriori, quod nullus concedit; adhuc in his, quæ sunt operativa, neganda est major; nam inquit Scotus in 2. dist. 1. quæst. 6. §. *Dico tunc*, litt. B. *Quidquid est potens agere, est aliquod ens habens actum primum, & prior est ibi secundum naturam ratio actus primi secundum se, quam in comparatione ad actum secundum, cuius potest esse principium; ita quod licet illud, quod tale ens est principium actus secundi, non sit aliud a natura sua; non tamen prima entitas sua est natura sua; ut est principium talis actus secundi, sed natura sua, ut in se est hac, & ita prima distinctio entis non est per naturam suam in quantum est principium talis operationis; sed per naturam suam, ut hac natura;* quod latè prosequitur Scotus; ex cuius verbis clarè deducitur, adhuc rem operativam posse quidditivè, & essentialiter definiri, sine ordine ad propriam operationem, verum tamen est, quod quia pluries essentia rerum nos latent, communiter ipsas definimus in ordine ad operationes, seu ut sunt principium operationum.

42 Inquires tamen, unde cognoscatur, aliquam rem definiri in ordine ad conceptus adequatos, & sine ordine ad extrinseca connotata? Resp. Hoc formaliter non posse cognosci, siquidem, ut dictum est, omnia communiter definiuntur in ordine ad suas operationes, quæ sunt extrinseca connotata; solum autem hoc potest cognosci argutivè, hoc est, ex diversis definitionibus, etiam in ordine ad operationes potest

colligi, res habere diversas essentias, & diversos conceptus adæquatos; ad cuius cognitionem signum erit, quando ex pluribus definitionibus de eadem re, una potest alteri rei convenire, cui non conveniat alia, tunc illæ definitiones arguunt diversas essentias formalitatum, & ostendunt diversos adæquatos conceptus, v.g. in homine datur definitio animalis, & definitio rationalis, & quia definitio animalis convenit etiam bruto, cui nequit convenire definitio rationalis, hinc colligitur, diversam esse essentiam animalis ab essentia rationalis, & utrumque terminare diversum conceptum adæquatum; quod per oppositum contingit in definitionibus, quæ dantur de intellectu, ut principium est simplicis apprehensionis, iudicii, & discursus, & de voluntate, ut est principium volitionis, & nolitionis; nam nequit una alicui convenire; quin simul & altera conveniat, unde non inferunt diversas essentias, nec diversos conceptus adæquatos, sed tantum denotant diversa munera, quorum ratione eadem formalitas terminat diversos conceptus inadæquatos.

43 Advertendum tamen est, quod in aliquibus formalitatibus, quarum una nequit esse in aliquo, quin sit alia, ex alio capite debet cognosci definitiones arguere diversas essentias, & fundari in conceptibus adæquatis, scilicet, quia earum operationes respiciunt objecta sub diversis rationibus, intellectus enim & voluntas sunt duæ formalitates ex natura rei distinctæ, & definitiones illorum inferunt diversas essentias, & fundantur in conceptibus adæquatis; quia etiam si intellectus nequeat esse in aliquo, in quo non sit simul voluntas, & e contra; tamen respiciunt sua objecta secundum diversas rationes, vel intelligibilis, vel volibilis: quod non contingit in operationibus intellectus; nam sub eadem ratione respiciunt ob-

obiectum, & sic non arguunt diversas essentias, neque diversos conceptus adæquatos, sed tantum diversa munera intellectus, & diversos inadæquatos conceptus. Idem dicendum est de operationibus voluntatis.

44 Neque ex hoc inferas, omnia quæ habent diversas essentias, distingui formaliter; nam plura realiter distinguuntur, quæ habent diversas essentias, ut *homo*, & *lapis*; nam non benè sequitur, formalitates, quæ habent diversas essentias formaliter distinguuntur: ergo omnia, quæ habent diversas essentias, formaliter distinguuntur; quia non valet consequentia ab inferiori ad superius, seu a particulari ad commune; non enim valet, *aliquis homo est albus*; ergo *omnis homo est albus*. Etenim omnia, quæ habent diversas essentias, distinguuntur ex natura rei, vel realiter, si sint res, & per se capacia existentiae, & terminandi productionem, vel formaliter, si sint formalitates, seu realitates realiter absolutè identificatæ.

45 Arguunt sextò: si daretur distinctio ex natura rei formalis, daretur in Deo compositio metaphysica: sed hæc dicit imperfectionem, a Deo penitus rélegandam; ergo non datur distinctio ex natura rei formalis. Probatur major, nam compositio est distinctorum coniunctio; sed si daretur distinctio formalis, formalitates coniungeretur inter se in Divinis: ergo daretur in Deo compositio. Respondetur neg. mai. & disting. maiorem probationis: compositio est coniunctio distinctorum se habentium tanquam actus, & potentia, concedo: non se habentium tanquam actus, & potentia, nego. Similiter distinguenda est minor; formalitates coniungerentur in Divinis tanquam actus, & potentia, nego; non tanquam actus, & potentia, sed per summam identitatem realem, ratione infinitatis, concedo, & nego consequentiam.

46 Et si dubites, in quo consistat hæc summa identitas inter formalitates Divinas? Respondet Scotus in 1. dist. 8. quæst. 4. §. *Ad argumentum principale*, litt. Z. & *vers oppositum est*, litt. AA. quod hæc summa identitas consistit in hoc, quod formalitates Divinæ identificantur ratione sui, seu modi intrinseci infinitatis; nam quælibet est formaliter infinita, ad differentiam creaturarum formalitatum, quæ non ratione sui, sed ratione tertii, quod constituunt, identificantur; unde animal, v.g. est in potentia, ut determinetur per rationalitatem, quæ se habet tanquam actus, formalitates autem Divinæ nullatenus sunt in potentia, ut per alias determinentur, cum quælibet ex se dicat identitatem cum alia, quod patet ex eo quod formalitates Divinæ, quantumcumque abstrahantur, possunt identicè prædicari, hæc enim prædicatio est vera: *Sapientia Divina est bonitas*, & aliæ similes, quia adhuc in ultima abstractione, non amittunt infinitatem, ratione cuius identificantur; e contra vero contingit in formalitatibus creatis; hæc enim prædicatio est falsa: *Animalitas est rationalitas*; quia cum non ratione sui, sed ratione tertii identificentur, amittunt identitatem, quando ultima abstractione abstrahuntur.

47 Si adhuc dubites, unde colligatur, ex eo quod formalitates Divinæ identificentur summa identitate reali, unam non esse in potentia, ut determinetur per aliam? Respondetur, hoc ex eo colligi, quod infinitas, ratione cuius summè identificantur, est ratio identificandi quodcumque compossibile, & ita, ubi datur una formalitas infinita, necessario cum illa identificantur omnes formalitates cum ipsa compossibiles, taliter, quod nullatenus potest una esse sine alia; unde ut identificetur cum illis, non indiget aliquo determinante; quia se cum habet rationem identificationis, & consequen-

quenter nullam habet potentialitatem. E contra vero contingit in formalitatibus creatis, quæ se habent, ut superius, & inferius, seu differentia, quia cum non identificentur ratione sui, sed ratione tertii, potest una esse sine alia, ut patet in animalitate, quæ est in bruto sine rationalitate, & sic, ut identificetur cum illa indiget aliquo determinante, respectu cuius est in potentia ad constitutionem tertii, in quo tam determinativum, quam determinabile identificantur.

48 Sed contra argues: ergo Deus non est summè unus, & summè simplex maiori unitate, & maiori simplicitate excogitabili: sed hoc est contra D. Bernardum, qui lib. 5. de consid. dicit: Deum esse unissimum, quod excogitari potest: ergo ex hoc capite non est admittenda in Deo distinctio formalis. Resp. disting. consequens: Deus non est summè unus, & summè simplex maiori unitate, & simplicitate excogitabili, quæ opponitur resolubilitati in plures conceptus, concedo, quæ opponitur compositioni, nego, & in hoc secundo sensu loquitur D. Bern.

49 Pro cuius intelligentia notandum est, quod duplex datur unitas, seu simplicitas, altera quæ opponitur resolubilitati in plures conceptus, & hæc dicit imperfectionem, quia tantò magis aliquid est imperfectum, quantò minus est resolubile, ut patet in conceptu entis abstractio, qui sicut est minus resolubilis, quod excogitari potest, ita est magis imperfectus, unde hæc unitas, seu simplicitas non est admittenda in Deo. Altera est unitas, seu simplicitas, quæ opponitur compositioni, & hæc nullam dicit imperfectionem, imò maximam perfectionem: nam sine imperfectione potentialitatis includit omnes perfectiones formalitatum, quas in se habet, quæ perfectio nequit stare cum irresolubilitate; quia implicat, quod plures formalitates actu.

actu, & formaliter in aliquo existens transeant in unicum formalitatem, cum quælibet ex sua ratione formali excludat aliam. Quod autem talis resolutibilitas in plures formalitates sine compositione non opponatur summæ Dei simplicitati, ex eo patet, quod relationes Divinæ etiam si inter se realiter distinguantur, non auferunt summam unitatem, & simplicitatem Dei. ergo multo minus formalitates, quæ tantum inter se formaliter distinguuntur.

## Q U Æ S T I O IV.

*Quomodo natura superiores ab inferioribus distinguantur.*

**1** PRO intelligentia quæstionis notandum, est, quod naturæ superiores possunt dupliciter ad inferiores comparari, nam vel comparantur ad differentias, per quas contrahuntur ad esse inferiorem, ut si comparatur animal ad rationalitatem: in quo sensu patet ex dictis quæstione antecedenti, distingui ex natura rei formaliter adæquatè, cum totaliter naturæ superiores excludant a sua ratione formali differentias: vel comparantur ad ipsas naturas inferiores, ut si comparatur animal ad hominem, in quo sensu procedit quæstio.

**2** Circa quam divisi sunt Scotistæ, aliqui asserunt, naturas superiores distingui formaliter ab inferioribus, non verò è contra, imò naturas inferiores esse idem formaliter cum superioribus. Alii per oppositum dicunt, naturas inferiores distingui formaliter a superioribus; non verò è contra, imò naturas superiores esse idem formaliter cum inferioribus. Hæ duæ sententiæ concedunt distinctionem ex natura rei formalem, sed non mutuam inter naturas superiores, & inferiores. Alii autem affirmant, naturas superiores distingui formaliter in a-

inadæquatè à naturis inferioribus, & è contra, & sic concedunt inter prædictas naturas distinctionem formalem mutuam, licet inadæquatam. Hæc sententia est communior inter Scotistas. Videatur Merin. in Logica cap. de Universalibus disp. 1. quæst. 2. ubi tenens hanc ultimam sententiam, tam pro illa, quam pro aliis adducit plures Authores.

3. Pro majori autem claritate, tam quæstionis, quam terminorum quibus controvertitur, notandum est, quod identitas formalis potest dupliciter sumi. Primo dicitur aliquid esse idem formaliter cum alio, eo quod includit illud in suo conceptu formali, & hæc dicitur identitas includentis cum incluso, cui suo modo correspondet distinctio includentis ab incluso. Secundo dicitur aliquid esse idem formaliter cum alio eo quod includitur in conceptu formali illius, & hæc dicitur identitas inclusi cum includente, cui suo modo correspondet distinctio inclusi ab includente. Quæ duplex identitas, & similiter distinctio, licet in re eadem sit, diversis tamen terminis explicatur, quod non est abs re, cum pluries propter defectum terminorum, oriatur in quæstionibus maxima confusio. Hoc notato.

4. Dicimus primò: naturæ inferiores distinguuntur formaliter inadæquatè a superioribus distinctione includentis ab incluso, & sunt idem formaliter inadæquatè cum illis identitate includentis cum incluso: naturæ verò superiores, neque sunt idem, neque distinctæ, formaliter ab inferioribus hoc genere identitatis, & distinctionis. Probatur prima pars: quia illud dicitur idem formaliter cum alio identitate includentis cum incluso, quod includit illud in suo cōceptu formali, & tunc dicitur inadæquatè idem, quando præter illud, quod includit, dicit aliquid aliud, nam secundum illud aliud, quod dicit, nequit esse idem, imo potius distinctum: sed

natu-



natura inferior, v. g. *homo* includit naturam superiorem, v. g. *animal*, & præter *animal* dicit aliud, scilicet, *rationalē*: ergo natura inferior est idem formaliter inadæquatè cum superiori identitatè includentis cum incluso, & inadæquatè ab illa formaliter distincta distinctione includentis ab incluso.

5 Probatur secunda pars: nam naturæ superiores nullatenus includunt inferiores in suo conceptu formali: *animal* enim, v. g. non includit hominem in suo conceptu formali: sed tam ad identitatem includentis cum incluso, quàm ad distinctionem includentis ab incluso requiritur quod id, quod est idem cum alio, vel distinctum ab alio, includat illud in suo conceptu formali: ergo sumpta identitate, & distinctione in hoc sensu, naturæ superiores, neque sunt idem cum inferioribus, neque ab illis distinctæ.

6 Dicimus secundo, naturæ superiores sunt idem inadæquatè cum inferioribus identitatè inclusi cum includente, & distinctæ formaliter inadæquatè ab illis distinctione inclusi ab includente: naturæ vero inferiores neque sunt idem, neque distinctæ a superioribus hoc genere identitatis, & distinctionis. Probatur prima pars: nam illud dicitur idem cum alio hoc genere identitatis, quod inciuditur in ratione formali illius, & tunc talis identitas est inadæquata, quādo non dicit totam rationē formalem illius; nā potius distinguitur ab illo ratione illius, quod non dicit sed natura superior, v. g. *animal* est de ratione formali naturæ inferioris, ut est *homo*, & non dicit, totam rationem formalem hominis nam etiam rationalitas est de ratione formali hominis, & *animal* non dicit rationalitatem: ergo natura superior est idem formaliter inadæquatè cum inferiori identitate inclusi cum includente, & distincta formaliter inadæquatè ab illa distinctione inclusi ab includente.

7 Probatur secunda pars: nam naturæ inferiores

riores nullatenus includuntur in superioribus, homo enim, v. gr. non includitur in ratione formali animalis, sed tam ad identitatem inclusi cum includente, quam ad distinctionem inclusi ab includente requiritur, quod id, quod sic est idem, vel distinctum, sit de ratione formali illius, cum quo est idem, vel à quo est distinctum; ergo sumpta identitate, & distinctione in hoc sensu, naturæ inferiores neque sunt idem cum superioribus, neque ab illis distinctæ.

8 Ex his duabus conclusionibus facile possunt conciliari tres supradictæ sententiæ; nam cum prima dicit, superius distingui ab inferiori debet intelligi distinctione inclusi ab includente, & cum dicit, quod inferius est idem cum superiori, debet intelligi identitate includentis cum incluso. Secunda verò sententia, cum dicit, quod inferius distinguitur à superiori, debet intelligi distinctione includentis ab incluso; cum autem dicit, quod superius est idem formaliter cum inferiori, debet intelligi identitate inclusi cum includente; quod totum benè componitur loquendo de distinctionibus, & identitatibus inadæquatè modo explicato in conclusionibus, unde nullatenus opponuntur prædictæ sententiæ, quælibet tamen procedit diminutè, nam quòd una dicit, alia tacet.

7 Tertia verò sententia, cum dicit superius, & inferius mutuò inadæquatè distingui formaliter, & ex consequenti mutuo inadæquatè esse formaliter idem, non debet intelligi in eodem genere distinctionis, & identitatis, sed de distinctione, & identitate, mutua, & inadæquata distributione accomoda, ita ut superius distinguatur ab inferiori, & identificetur cum illo formaliter inadæquatè, & similiter, inferius distinguatur à superiori, & identificetur cū illo formaliter etiam inadæquatè; sed non in eadem linea identitatis, & distinctionis, ut dictum est in conclusionibus.

clusionibus; quod non est peculiare huius identitatis, & distinctionis, nam etiam contingit in relationibus disquiparantiae, quæ licet sint mutue, non sunt ejusdem rationis, ut patet in relationibus causæ, & effectus, quæ sunt mutue, & diversæ rationis; Pater enim, v. gr. dicit ad filium relationem causæ, scilicet paternitatis, & filius dicit ad Patrem relationem effectus, scilicet filiationis, relatio autem paternitatis est diversæ rationis à relatione filiationis: non enim sunt extrema illarum ad invicem partes, nec ad invicem filii, unde sequitur quod tertia sententia non opponitur duabus præcedentibus, imò sic explicata, affirmat conjunctim, quod ipsæ separatim. Neque apparet quid contra nostras conclusiones possit obijci, quod ex dictis facile non solvatur.

10 Arg. tamen; non possunt aliqua esse simul idem, & distincta eodem modo; sed superius, & inferius sunt idem formaliter inædæquatè; ergo non sunt distincta formaliter inadæquatè. Deinde quæ sunt eadem formaliter uni tertio, sunt eadem formaliter inter se; sed animal, & rationale, v. g. sunt eadem formaliter uni tertio, scilicet homini; ergo sunt eadem formaliter inter se; sed hoc est contra dicta questione antecedenti: ergo animal, & rationale non sunt eadem formaliter homini, & conseq. natura superior non est idem formaliter naturæ inferiori.

11 Ad primum resp. dist. mai. & similiter totum arg. est enim verum, & habet vim loquendo secundum eandem rationem, non vero secundum diversas rationes. Etenim superius est idem formaliter cum inferiori, quatenus est de ratione formali illius, & distinguitur formaliter ab inferiori quatenus non dicit totam rationem formalem illius, similiter inferius est idem formaliter cū superiori quatenus includit illud in sua ratione formali, tanquam partem, & distinguitur formaliter à superiori quatenus addit ali-

aliquid aliud super illud, scilicet, differentiam per quam contrahitur superius ad esse inferioris: quod clarè denotat distinctionem, & identitatem formalem inadæquatam inter superius, & inferius secundum diversas rationes.

12 Ad secundum resp. dist. mai. quæ sunt eadem formaliter uni tertio, sunt eadem formaliter inter se, si sint eadem adæquatè, conc. si sint eadem tantum inadæquatè, neg. Similiter dist. min. animal, & rationale sunt eadem formaliter homini, quodlibet inadæquatè, concedo; adæquatè, nego, & nego consequ. & similiter neg. est min. subsumpta, & consequ. deducta ex ipsa, quæ solutio patet ex dictis in tota quæstione.

13 Præter supradictas sententias, aliam noviter invenerunt aliqui, non parvi momenti. Scotistæ, qui asserunt in manuscriptis superius, & inferius, vel distinguunt formaliter mutuo adæquatè, vel tantum distinctione rationis ratiocinatæ, quod sic suo videri efficaciter probant: distinctio formalis inadæquata est distinctio à parte rei: ergo ejus extrema debent esse à parte rei: sed extrema distinctionis inter superius, & inferius non sunt extrema à parte rei: ergo superius, & inferius non distinguuntur formaliter inadæquatè. Prob. min. quia animal, quod est in homine, & est superius non potest comparari, nisi cum homine, vel cum rationalitate, & comparatum cum rationalitate, distinguitur ab illa formaliter mutuo adæquatè, ut supponitur: sed non potest comparari cum homine, nisi per intellectum, & comparatum cum homine dicit distinctionem inadæquatam: ergo extrema distinctionis inadæquatæ non sunt à parte rei, sed per intellectum. Prob. min. quia si animal est unum extremum, solum remanet à parte rei rationale, ad quod comparetur; nam homo solum est animal rationale: ergo non potest comparari à parte rei animal cum homine, sed tan-

tantum per intellectum, & consequenter distinctio inadæquata non est à parte rei, sed tantum rationis ratiocinatae.

14 Sed hæc sententia, & illius probatio plures patitur instantias, nam contra illam est primo, quod è medio tollit unitatem formalem à parte rei, quod sic ostenditur: unitas formalis, secundum Scotum, & communem Scotistarum consensum convenit à parte rei cuilibet naturæ, tam genericæ, quàm specificæ, id est, tam superiori, quàm inferiori: ergo natura superior habet è parte rei unitatem formalem à parte rei distinctam ab unitate formali, quam à parte rei habet natura inferior. Consequentia est evidens; nam natura generica per unitatem formalem est communis negativè per differentiam ad plures species à parte rei: sed natura specifica per unitatem formalem non est indifferens negativè per indifferentiam ad plures species à parte rei, sed tantum ad plura individua: ergo unitas formalis, quæ à parte rei consequitur naturam genericam, est à parte rei distincta ab unitate formali, quæ consequitur à parte rei naturam specificam, & consequenter naturæ, quas consequuntur prædictæ unitates, sunt distinctæ à parte rei.

15 Nunc sic: ablata à parte rei distinctione inter naturam genericam, & specificam, seu quod idem est, inter superius, & inferius, aufertur distinctio à parte rei inter prædictas unitates formales ipsas naturas consequentes: ergo auferuntur unitates formales à parte rei.

16 Si autem dicant, dari unitatem genericam, & specificam; sed unitatem genericam includi in specifica à parte rei, & propter hanc inclusionem non distingui ab illa à parte rei, & similiter dari naturam genericam, & specificam, sed naturam genericam includi in specifica, & propter hanc inclusionem non distingui ab illa à par-

à parte rei. Contra est, quia similiter deberet philosophari de natura specificata, & de unitate specifica respectu naturæ numericæ, & unitatis numericæ, nam sicut natura, & unitas generica includitur in natura, & unitate specifica, ita natura, & unitas specifica includitur in natura, & unitate numerica; ergo si propter illam inclusionem natura & unitas generica non distinguitur à parte rei à natura, & unitate specifica, similiter propter istam inclusionem natura, & unitas specifica non distinguitur à parte rei natura, & unitate numerica; & consequenter à parte rei tantum datur natura; & unitas numerica, siquidem nulla datur natura, neque unitas à parte rei ab illa distincta; sed hoc est expressè contra Scotum asserentem dari à parte rei unitatem formalem distinctam ab unitate numerali, nam in 2. dist. 3. quæst. 1. §. *Ad questionem*, litt. E. dicit; *Aliqua est unitas in re realis ab, & que omni operatione intellectus minor unitate numerali*; ergo propter talem inclusionem non est neganda aliqua distinctio ex natura rei inter superius, & inferius.

17 Contra secundo; quia secundum prædictam sententiam destrueretur illud commune proloquium; *Totum est maius sua parte*, ab omnibus admissum, quod patet; nam posita parte pro uno extremo comparisonis, non remanet totum ad quod comparetur, sed tantum alia compars; nam totum illud, tantum dicit suas partes; ergo si non posset fieri à parte rei comparatio inter totum, & suam partem, rueret prædictum principium, ne ergo tale principium destruaturnon dicendum est, posse à parte rei fieri comparationem inter totum, & suam partem; ergo quod pars includatur in toto non obstat, ut à parte rei dentur totum, & pars illius, ut extrema comparisonis à parte rei: ergo quod superius includatur in inferiori, tanquam pars in toto,  
non

non obstat, ut dentur à parte rei superius, & inferius, tanquam extrema à parte rei requisita ad comparationem necessariam ad distinctionem formalem inadæquatam ex natura rei.

18 Contra tertio: quia juxta prædictum fundamentum, neque potest dari distinctio rationis ratiocinatæ, quam ipsi Scotistæ adstruunt inter superius, & inferius: ergo tale fundamentum etiam est contra ipsos. Probatur antecedens; quia ex eo dicunt superius, & inferius, non posse distingui ex natura rei formaliter, quia posito superiori, ut extremum distinctionis est, non remanet à parte rei inferius ad quod compareretur; nam hoc inferius, v. gr. *homo* tantum includit à parte rei *animal*, quod est superius, & *rationale*, quod est differentia, & sic posito animali, ut extremum distinctionis est, non remanet *homo*, ad quem compareretur, tanquam ad aliud extremum distinctionis, sed tantum rationale: sed posito animali pro extremo distinctionis rationis, non remanet *homo*, ad quem compareretur, tanquam ad aliud extremum distinctionis rationis, sed tantum rationale; ergo juxta prædictum fundamentum, non potest dari distinctio rationis ratiocinatæ inter superius, & inferius. Pater minor, quia sicut *homo* à parte rei tantum includit *animal rationale*, ita *homo* per intellectum tantum includit *animal rationale*: ergo sicut posito à parte rei animali pro extremo distinctionis ex natura rei, non remanet *homo*, ad quem compareretur, tanquam ad aliud extremum talis distinctionis, ita posito per intellectum animali pro extremo distinctionis rationis, non remanet *homo*, ad quem compareretur, tanquam ad extremum talis distinctionis: ergo ex eodem capite, quo negant distinctionem formalem ex natura rei inter superius, & inferius, tenentur negare distinctionem rationis ratiocinatæ; & consequ. sibi contrariantur, dum

dum negantes distinctionem formalem ex natura rei inter superius , & inferius distinctionem rationis ratiocinatæ admittunt inter illa.

19 Nunc respondetur ad fundamentum prædictæ sententiæ , concesso primo entymemate , negando min. subsumptam , & minorem prob. illius , & ad istius minoris probationem , disting. antec. si animale est unum extremum distinctionis , solum remanet rationale , ad quod comparatur comparatione requisita ad distinctionem formalem adæquatam ex natura rei , concedo , ad distinctionem inadæquatam , nego. Similiter disting. conseq. animal nequit comparari cum homine à parte rei , comparatione requisita ad distinctionem formalem adæquatam ex natura rei , concedo , ad distinctionem inadæquatam , nego. Etenim ad hoc , ut animal comparatur cum homine comparatione requisita ad distinctionem formalem inadæquatam ex natura rei , non est necessarium , quod posito animali pro uno extremo , remaneat homo , tanquam aliud extremum totaliter excludens animal , imò potius requiritur oppositum , scilicet , quòd animal includitur in homine , tanquam pars illius ; nam cum sit distinctio inadæquata , unum extremum debet in altero includi etiam inadæquatè , est enim distinctio includentis ab incluso : si autem unum extremum totaliter excluderet aliud , jam distinctio esset adæquata , ut est inter animal , & rationale.

20 Dubitabis , an distinctio dicat relationem ? Respond. quòd loquendo de distinctione formali , certum est , non dicere relationem propriè sumptam ; quia relatio propriè sumpta requirit extrema realiter distincta , qualia non sunt extrema distinctionis formalis , explicatur autem per modum relationis , quia dicit habitudinem unius extremi ad aliud : Loquendo autem de distinctione reali , non videtur posse negari , dicere relationem , non quia supponat extrema



trema distincta actualiter, nam cum distinctio sit forma, seu ratio distinguendi, nequit supponere extrema actu distincta, sed tantum fundamentaliter, sicut relatio similitudinis non supponit extrema actu, & formaliter similia, sed tantum fundamentaliter. Hoc debet intelligi, quando extrema distinctionis sunt positiva; non vero quando aliquod extremum est negativum, cum relatio, quæ est entitas positiva, nequeat fundari in negatione, neque ad illam terminari. Hæc relatio distinctionis potest reduci ad relationem diversitatis.

21 Hic solet etiam dubitari, an sint idem, non identitas, & distinctio? Sed hoc reducitur ad questionem de nomine, de qua non est multum curandum. Potest tamen responderi, quod distinctio semper includit non identitatem; nam nequeunt aliqua distingui, quin in eodem genere, in quo sunt distincta, sint non idem, ut si sunt distincta formaliter, non sunt idem formaliter, & si sunt distincta realiter, non sunt idem realiter; at verò non identitas non dicit semper, & necessario distinctionem; possunt enim aliqua non esse idem in aliquo genere, & non esse distincta in illo genere, v. gr. Petrus, & Paulus non sunt idem formaliter, & tamen non sequitur, quod sint distincti formaliter; cuius ratio est, quia non identitas, cum dicat tantum negationem, tantum denotat Petrum, & Paulum non se includi formaliter, seu non esse eandem formalitatem, quod verum est, distinctio autem formalis necessario requirit, quod illius extrema sint duæ formalitates realiter identificate, quales non sunt Petrus, & Paulus. Unde videtur dicendum, quod non identitas & distinctio se habent tanquam superius, & inferius, valet enim; *Sunt distincta*; ergo *non sunt idem*; non autem valet; *Non sunt idem*; ergo *sunt distincta* nisi ut dictum est, hoc reducatur ad questionem de nomine.

## D I S P. III.

*De prædicationibus:*

**Q**uia universalitas Logica dicit prædicabilitatem de multis , ideò antequam de illa differamus, & ad maiorem ipsius intelligentiam oportet agere de prædicationibus . Pro quibus sit.

## Q U Æ S T I O I.

*Quid, & quotuplex sit prædicatio.*

**1** Pro primo, quod inquit quæstio, dicimus primò: prædicatio absolutè loquendo, idem sonat, ac enunciatio, seu propositio, unde sicut in Summulis propositionem sic definimus: *Est oratio iudicativa unius de alio*, ita hic possumus prædicationem definire, sed in præsentī sumitur prædicatio pro enunciatione affirmativa.

**2** Pro secundo, quod inquit quæstio, dicimus secundò, prædicatio dividitur in identicam, & formalem. Identica est, quando aliquid affirmatur de alio, respectu cuius non se habet per modum formæ, neque est de ratione formalis illius, sed solum affirmatur ratione identitatis, quam inter se habent, vel ratione alicuius tertii, in quo uniuntur, hæc enim propositio: *Misericordia est iustitia* est vera identicè in Divinis propter identitatem, quam habent inter se, ut dictum est disp. 2. quæst. 3. & similiter hæc propositio: *Album est dulce*, in lacte est vera identicè, ratione unionis, quam habent albedo, & dulcedo in eodem subjecto, scilicet, in lacte. Prædicatio formalis est; in qua aliquid affirmatur de alio, respectu cuius se habet tanquam forma informans, ut, *homo est albus*, vel

tanquam forma constituens subiectum in aliquo esse formali, ut, *homo est animal*. Alia solet assignari prædicatio identica, illa, scilicet, in qua unum prædicatur de se ipso, vel secundum idem nomen, ut, *Petrus est Petrus*, vel secundum diversum, ut, *gladius est ensis*; sed talis prædicatio est nugatoria, & inutilis.

3 Prædicatio formalis dividitur in essentiallem, & extra essentiallem. Essentialis est, in qua prædicatum est de essentia subiecti, ut, *homo est animal*. Extra essentialis est, in qua prædicatum non est de essentia subiecti, ut, *homo est albus*.

4 Prædicatio formalis essentialis, quæ etiam dicitur prædicatio quidditativa, seu *in quid*, dividitur in prædicationem *in eo quod quid*, & *in quale quid*. Prædicatio *in eo quod quid* est, in qua prædicatum non solum est de essentia subiecti, sed etiam se habet per modum per se stantis contrahibilis, & determinabilis, ut quando prædicatur genus de specie, ut, *homo est animal*, & species de individuo, ut, *Petrus est homo*. Prædicatio *in quale quid* est, in qua prædicatum, & si sit de essentia subiecti, non tamen se habet per modum contrahibilis, & determinabilis, sed per modum contrahentis, & determinantis, ut quando de individuo prædicatur differentia essentialis specifica, ut, *Petrus est rationale*. Prædicatio extra essentialis dividitur in necessariam, quæ etiam dicitur, *in quale necessario*, & in accidentalem, quæ etiam dicitur, *in quale contingenter*. Necessaria est, in qua licet prædicatum non sit de essentia subiecti, est tamen necessario connexum cum illo, ut quando prædicatur propria passio, ut, *homo est risibilis*. Accidentalis est, in qua prædicatum accidentaliter, & contingenter convenit subiecto, ut, *homo est albus*.

5 Prædicatio formalis adhuc dividitur <sup>indirectam</sup>, & in indirectam. Directa est, in qua ponitur pro subiecto, quod se habet tanquam materia, & pro prædicato, quod se habet tanquam forma, ut, *homo est albus*. Indirecta est, in qua ponitur pro subiecto, quod se habet tanquam forma, & pro prædicato; quod se habet tanquam materia, ut *album est homo*. Ex quo sequitur, quòd quando superius prædicatur de inferiori, & differentia propria passio, & accidens prædicantur de illis, respectu quorum sunt universalialia prædicatio, est directa, quando verò è contra evenit, est indirecta.

6 Adhuc dividitur prædicatio in signatam, & exercitam. Prædicatio signata est, in qua ponitur verbum significans prædicationem, seu potentiam ad prædicari, ut, *genus potest prædicari de specie: Animal potest prædicari de homine*. Prædicatio exercita est, in qua implicite, vel explicitè ponitur verbum est absolute significans unionem prædicati cum subiecto, ut, *homo est animal: homo currit*. Ubi advertendum est quod quando prædicatio signata est vera, etiam est vera exercita illi correspondens, quia enim hæc signata est vera: *animal potest prædicari de homine*, etiam est vera hæc exercita: *homo est animal*; quod non debet intelligi semper eisdem terminis, nam si prædicatio signata fiat in terminis secundæ intentionis, non valet exercita in eisdem terminis, sed in terminis primæ intentionis, licet enim hæc signata sit vera: *Genus potest prædicari de specie*, non tamen est vera hæc exercita; *species est genus*, benè tamen hæc, *homo est animal*.

## Q U Æ S T I O II.

*Quid significet concretum primò, & per se?*

1 **I**AM diximus in Summulis quid sit concretum & abstractum, nunc autem pro quæstionis intelligentia notandum est primò, concretum, vel concernere suppositum, ut concretum substantivum de prædicamento substantiæ, ut *homo*, vel concernere subiectum, ut concretum accidentale, tam substantivum, ut *Pater*, quam adjectivum, ut *album*, & etiam adjectivum substantiale, ut *rationale*, quod non debet intelligi, ita ut propriè concernat subiectum: nam substantia non dicitur propriè esse in subiecto, sed tantum similitudinariè, & metaphoricè, quatenus explicatur per modum alteri adjacentis.

2 Notandum est secundò, cum Scoto in 1. dist. 5. quæst. 1. litt. A. & B. quod quanto aliquid magis fuerit concretum, tantò magis abstrahi potest; unde diversimodè fit abstractio in substantiis, in accidentibus absolutis, & in accidentibus relativis. Etenim cum in substantiis solùm sit concretio rationis quidditativè cum suppositis, seu individuis, solùm potest fieri unica abstractio, ut cum ab hoc concreto *homo* abstrahitur *humanitas*; quæ abstractio dicitur ultima, quia licet sit prima, nulla alia potest fieri.

3 In accidentibus verò absolutis, cum sit duplex concretio, scilicet, & rationis quidditativè cum individuis, & individuorum cum subiecto, cui inhærent, duplex etiam fit abstractio: nam ab hoc concreto *album*, abstrahitur *albedo*, quæ licet, ut sic non concernat subiectum, concernet tamen individua, & sic ab albedine abstrahitur ratio quidditativa albedinis,

dinis, quæ solet appellari *albedineitas*, quæ dicitur ultima abstractio.

4. In accidentibus autem relativis, cum sit triplex concretio; scilicet; quidditatis relationis cum suis individuis, & ipsius relationis cum fundamento, & fundamenti cum subiecto, sic etiam est triplex abstractio, scilicet, fundamenti à subiecto, ut cum ab hoc concreto relativo *causa*, quod concernit subiectum, abstrahitur *potentia causandi*, quæ licet non concernat subiectum, concernit tamen fundamentum, & sic fit alia abstractio, scilicet, *causalitas*, quæ etiam si non concernat subiectum, neque fundamentum, concernit tamen propria individua, & sic ab illa fit alia abstractio, scilicet, *quidditas*, seu *ratio causalitatis*, & hæc dicitur ultima abstractio. His notatis.

5. Difficultas est, an concretum significet primo, & per se formam in recto, an verò subiectum? Quæ difficultas magis videtur grammaticalis, quàm philosophica: nam versatur circa rectum, & obliquum, qui termini grammaticales sunt. Aliqui asserunt, concretum significare subiectum in recto, & formam in obliquo. Pro hac sententia communiter citantur Thomistæ, Scotistæ verò affirmant per oppositum concretum significare in recto formam, & in obliquo, seu connotato subiectum, quod expressè tenet Scotus in 1. dist. 4. quæst. 1. sub litt. E. in fine.

6. Dicimus ergo: concretum primò, per se, & in recto significat formam; subiectum verò tantum de connotato, & in obliquo. Probatum primò ex Arist. qui cap. de subst. dicit, albam solam qualitatem significare, & cap. de denominativis, dicit, denominativa solum casu differre à formis, à quibus sumunt denominationes, hoc est (ut docet Scotus in 2. dist. 12. qu. 1. §. *Ad argumentum Vers. Dico igitur*, lit. H.) quod denominativum cadit supra subiectum;

non verò forma denominans in abstracto; ergo concretum primò, & in recto significat formam, non verò subjectum. Patet consequentia, quia aliàs non solum casu, & in modo significandi, sed etiam re ipsa differunt denominativa à formis dominantibus.

7 Probatur secundò ratione de concretis accidentalibus, quia si primò, & per se significarent subjectum, unum album, ut album distingueretur specie ab alio albo, ut albo, quod nequit admitti. Patet assumptum, quia unum concretum album potest esse homo, & aliud equus; sed homo, & equus distinguuntur specie; ergo si concretum significaret primò, & per se subjectum, unum album, ut album distingueretur specie ab alio albo, ut albo. Patet consequentia, quia tunc aliqua specie distinguuntur, quando id, quod primò, & per se dicunt, specie distinguitur.

8 Confirmatur primò: hæc propositio; *Petrus est albus* est accidentalis, & in materia contingenti, ergo per se significatum prædicari, est id, quod ita convenit subjecto, quod possit ei adesse, & ab illo abesse: sed hoc tantum est forma albedinis, ut patet, ergo forma albedinis est primò, & per se significatum hujus concreti *album*. Confirmatur secundò; quia si concretum primò & per se significaret subjectum, ista propositiones: *Lignum est album*; *lignum est quantum*, &c. essent nugatoriæ; nam facerent hunc sensum; *Lignum est, lignum habens albedinem, & quantitatem*, quod est nugatio, nam idem ponitur pro subjecto, ac pro prædicato. Aliqua ex dictis possunt suo modo applicari concretis substantialibus.

6 Probatur tamen specialiter de concretis substantialibus; quia concretum substantiale, v. g. *homo* ponitur in prædicamento substantiæ, tanquam species; sed in prædicamento non ponitur suppositum tanquam species; quia species est

est communicabilis, suppositum verò incommu-  
nicabile: ergo concretum substantiale non dicit  
in recto suppositum, sed formam. Hæc ratio  
potest etiam applicari concreto accidentali; nam  
ponitur in prædicamento accidentis, in quo  
non ponitur subiectum, quia sæpè est sub-  
stantia.

10 Arguunt contra: hæc propositio: *Album  
est dulce* est vera; hæc autem, *albedo est dulce*,  
*do* est falsa: sed ratio hujus est, quia prima dicit  
subiectum, non verò secunda: ergo concre-  
tum primò, & per se dicit subiectum. Resp.  
disting. min ratio est, quia prima dicit subje-  
ctum, non verò secunda primò, & per se, nego:  
connotativè, concedo, & nego conseq. Ete-  
nim prima propositio est vera; quia facit hunc  
sensem: *Albedo, & dulcedo habens idem subie-*  
*ctum*; scilicet, lac, & sic dicit subiectum de  
connotato, secunda autem propositio est falsa,  
quia nullatenus albedo, & dulcedo dicunt sub-  
iectum.

11 Replic. concreta communiter explican-  
tur, per *habens* album enim est habens albedi-  
nem: sed habens albedinem est subiectum: ergo  
cōcreta primò, & per se dicuntur subiectum. Ad  
hanc replicam. respondet Scotus citatus num. 5.  
his verbis: *Ad probationem per Damascenum dico,*  
(Damascenus enim hoc modo explicat concre-  
tum, ut videre est apud Scotum) *quod descriptio  
sua est quadam explicatio nominis; non autem ex-*  
*pressio per se significati; quia nomen concretum de*  
*per se significato, non importat hoc, quod est ha-*  
*bens, sive habere, sed tantum de modo significan-*  
*di, in quo distinguitur ab abstracto; solum enim con-*  
*cretum importat ipsam formam, quia album solam*  
*qualitatem significat, unde importat hoc, quod*  
*est habens, quia concernit suppositum habens suum*  
*significatum; tamen idem significat concretum, &*  
*abstractum, licet modus significandi sit alius.*  
Hæc Scotus, ex quo in forma distinguenda est



major, est enim vera de explicatione nominis, non autem de expressione per se significati.

12 Quia tamen diximus, hanc quæstionem esse grammaticalem, omne enim supponunt, concretum duo dicere, scilicet, formam pro formali, & subiectum pro materiali, ne ergo contentio fiat de nomine, advertendum est, concretum dupliciter posse sumi, scilicet, adiectivè, ut quando forma comparatur ad subiectum, & in hoc sensu dicit in recto formam, & subiectum in obliquo, & substantivè, ut quando subiectum comparatur ad formam, & in hoc sensu significat in recto subiectum, & formam in obliquo, cuius ratio est, quia subiectum habet modum per se stantis, & forma modum alteri adiacentis, unde benè explicatur concretum, sumptum adiectivè, hoc modo, *est forma concernens subiectum*, & substantivè, hoc modo: *est subiectum habens formam*. Cum qua distinctione facilè respondetur ad quælibet argumenta. Semper tamen observandum est, quòd hoc præcisè intelligitur quantum ad explicationem grammaticalem; nam secundum se, concretum utrumque in re significat, scilicet, formam, & subiectum, sed formam pro formali, & per se, subiectum verò tantum pro materiali.

### Q U Æ S T I O III.

*Quibus terminis fiat prædicatio?*

1 **P**RO intelligentia quæstionis notandum est, quòd ad prædicationem requiritur, quòd prædicatum habeat cum subiecto aliquam connexionem, alias propositio esset falsa, & similiter, quòd prædicatum explicetur diverso termino, ac subiectum, & diverso conceptu, alias propositio esse nugatoria. Deinde ad prædica-

dicationem formalem in speciali requiritur ; quod prædicatum sit formaliter in subiecto , vel tanquam ratio formalis illius , vel tanquam forma illud afficiens , & quod significetur , ut concernens subiectum . Ad prædicationem vero identicam solum requiritur identitas subiecti cum prædicato , quod non debet intelligi de identitate stricta , sed vel de illa , vel de identitate subiecti , quæ solet dici identitas per unionem , & consistit in hoc , quod subiectum , & prædicatum aliquomodo uniantur in eodem subiecto . Hoc notato , prædictio , vel fit in terminis concretis , vel abstractis primæ , vel secundæ intentionis . Nunc .

2 Dicimus primò : si prædicatum , & subiectum sumantur in concreto , primæ intentiones universales cuiuscumque prædicabilis , prædicantur de primis intentionibus inferioribus prædicatione formali . Unde istæ prædicationes sunt veræ : *Homo est animal ; Petrus est homo ; Petrus est rationalis ; Petrus est risibilis ; Petrus est albus* . Ratio est , quia in his prædicationibus , & aliis similibus prædicatum est formaliter in subiecto , & significatur , ut concernens subiectum , quod requiritur ad prædicationem formalem .

3 Dicimus secundò : quodlibet concretum prædicatur de alio prædicatione identica , quando subiectum , vel suppositum est idem in utroque , unde istæ prædicationes sunt veræ : *album est dulce* , loquendo de lacte , quia est idem subiectum utriusque : *Deus est homo* , loquendo de Christo ; quia utriusque est idem suppositum . Ratio est , quia ad prædicationem identicam sufficit , quod subiectum , & prædicatum aliquomodo uniantur in eodem subiecto . Ubi advertendum est , quod hæc prædictio : *album est dulce* , etiam est formalis , si subiectum illius non sumatur pro forma , sed pro subiecto habente illam ; nam tunc prædicatum est

forma in subiecto, & significantur, ut concernens illud.

4 Dicimus tertio: si subiectum, & prædicatum sumantur in abstracto, non ultima abstractione possunt prædicari in primis intentionibus superiora de inferioribus prædicatione formali; unde istæ prædicationes sunt veræ: *Albedo est color: hæc albedo est albedo*. Ratio est, quia quæ non sunt abstracta ultima abstractione; licet non connotent subiectum, connotant sua inferiora, & sic prædicatum est formaliter in subiecto, & significatur, ut concernens subiectum. Diximus, *non ultima abstractione*, quia si subiectum, & prædicatum sumantur ultima abstractione, non valet prædicatio formalis; quia tunc prædicatum nullatenus significatur, ut concernens subiectum.

5 Dicimus quarto, si subiectum, & prædicatum sumantur ultima abstractione in primis intentionibus, non valet prædicatio identica, nisi extrema sint idem formaliter. Hanc conclusionem tenet Scotus in 1. dist. 8. q. 4. §. Ad argumentum. Ratio est, quia concipiendo abstractum ultima abstractione, concipitur quidditas rei sine habitudine ad quodcumque, quod est extra propriam rationem quidditatis: ergo solum poterit habere identitatem cum illo, quod est unum formaliter cum ipso in essentia, & quidditate, unde infert Scotus, quod hæc propositio: *Animalitas est rationalitas*, est falsa, quia extrema illius sumuntur ultima abstractione, & non sunt idem formaliter. Ex quo etiam infertur, quod hæc prædicatio: *Humanitas est animalitas, & rationalitas*, est vera, quia licet extrema sumantur ultima abstractione, tamen unum est de essentia, & quidditate alterius, nam humanitas quidditative, & essentialiter nihil aliud est, quam animalitas, & rationalitas.

6 Controvertitur autem inter Scotistas, an istæ

istæ propositiones sint veræ in sensu identico; *Humanitas est animalitas; humanitas est rationalitas*; Sunt qui dicunt, non esse veras, eo quod prædicatum, & subiectum non sunt idem formaliter adæquatè, tamen communior Scotistarum consensus tenet, esse veras, licet non sit inter extrema illarum identitas formalis adæquata, quia Scotus supra citatus solum dicit, quod abstracta ultima abstractione nequeunt prædicari prædicatione identica, nisi sint idem formaliter, quin loquatur de adæquata, vel inadæquata identitate. Ne autem contentio fiat de nomine, dicendum est prædictas propositiones esse veras in sensu identico, non absolutè, sed cum addito, *inadæquatè*; non ita quod inadæquatio appellet supra veritatem; nam vel non datur veritas, vel est veritas, adæquata, quia consistit in indivisibili; sed ita quod inadæquatio appellet supra identitatem formalem extremorum, quæ est fundamentum veritatis prædictarum prædicationum in sensu identico.

7 Ab hac conclusione exeipiuntur ab Scoto extrema formaliter infinita, in quibus valet prædicatio in sensu identico, adhuc in ultima abstractione sumpta, licet non sint idem formaliter, unde istæ prædicationes, sunt veræ in Divinis; *Sapientia est bonitas: Essentia est paternitas*. Ratio est, quia cum prædicta extrema non identificentur ratione alienius tertii; sed ratione infinitatis; quàm præseferunt in quocumque statu considerentur, hinc est, quod licet sint abstracta ultima abstractione, possunt ad invicem prædicari, cum adhuc, ut sic retineant rationem identificationis, quæ est fundamentum veritatis prædicationis identicæ. Ex quo sequitur, quod hæc prædicatio non est vera in Divinis; *Paternitas est spiratio activa*, quia nullum extremum illius est formaliter infinitum, de quo latè agitur in Theologia.

8 Ab aliquibus etiam excipiuntur ab hac conclusione prædicata transcendentia, tamen si transcendentia benè comprehendantur, non debent excipi. Pro quorum intelligentia notandum est, quod aliqua sunt transcendentia essentialia, & solent explicari his nominibus; *Quidditas*, *entitas*, *essentia*, quæ prædicata formaliter includuntur in qualibet entitate, & sic istæ prædicationes sunt veræ; *Humanitas est entitas*, *Humanitas est quidditas*, &c. Alia sunt transcendentia extra essentialia, quæ his nominibus solent explicari, *unitas*, *bonitas*, *veritas*, quæ non sunt idem formaliter cum qualibet entitate, & sic non prædicantur de abstractis ultima abstractione identicè, unde istæ prædicationes non sunt veræ; *Humanitas est unitas*, *humanitas est bonitas*, &c. Similiter dicendum est de ipsis prædicatis transcendentibus inter se comparatis; nam prima prædicata possunt ad invicem prædicari quia unum in re est formaliter aliud, unde hæc est vera; *quidditas est entitas*, & aliæ similes in sensu identico; Secunda verò prædicata nequeunt ad invicem prædicari, quia non se includunt formaliter, unde hæc est falsa; *unitas est bonitas*, & aliæ similes in sensu identico, & propter eandem rationem, neque prima prædicata de secundis, neque secunda de primis possunt prædicari, unde istæ prædicationes; *entitas est veritas*, *veritas est entitas*, & aliæ similes non sunt veræ in sensu identico. Hoc amplius patebit loquendo de transcendentia entis. Unde manet firma nostra conclusio, scilicet, quod in abstractis ultima abstractione, non valet prædictio identica, nisi extrema sint idem formaliter.

9 Dicimus quinto: neque abstractum de proprio concreto, neque concretum de proprio abstracto potest prædicari prædicatione formali. Ratio est, quia concretum non est prædicatum, quod sit formaliter in abstracto,

cto, neque abstractum est prædicatum significatum, ut concernens subiectum; unde istæ prædicationes sunt falsæ: *homo est humanitas: humanitas est homo.*

10 Diximus, concretum non prædicari de proprio abstracto; quia de abstracto non proprio pluries prædicatur in sensu formali; unde istæ prædicationes sunt veræ: *albedo est similis: quantitas est aqualis*: quia in illis prædicatum est formaliter in subiecto, & significatur, ut concernens subiectum.

11 Ab hac conclusione excipitur quantitas, de qua prædicatur proprium concretum prædicatione formali: unde hæc propositio est vera, in sensu formali: *quantitas est quanta*. Pro hac exceptione citatur Scotus quæst. 17. Prædicamental. Et ratio est, quia quantitas, non solum est forma, qua alia denominantur quanta; sed etiam ipsa est subiectum extensionis, & sic non solum dicitur quanta, id est forma, qua alia extensa dicuntur; sed etiam dicitur quanta, id est, habens in se extensionem; vel aliis terminis, non solum est quantitas, *ut quo*, sed etiam quanta, *ut quod*, in quo differt ab aliis abstractis, quibus solum convenit sua ratio, *ut quo*; albedo enim solum est albedo, *ut quo*, non tamen alba, *ut quod*. Etiam excipiuntur ab hac conclusione transcendentia; nam in illis concretum prædicatur de proprio abstracto; unde hæc est vera: *Entitas est ens*, quia propter suam transcendentiam sunt nomina synonyma, & sic prædicatum est formaliter in subiecto, & deinde, significatur, ut concernens subiectum; propter defectum huius ultimi, non valet è contra prædictio in sensu formali; unde hæc est falsa: *Ens est entitas*.

12 Aliqui autem dicunt, quod quantitas non excipitur a conclusione, quod rectè potest teneri, si notetur, ut ipsi subtiliter notant, quod quantitas potest dupliciter sumi. Primo, pro

accidenti absoluto de prædicamento quantitatis. Secundo, pro extensione in ordine ad locum, quæ consequitur tale accidens. Similiter quantum potest dupliciter sumi. Primò, pro habente quantitatem in primo sensu. Secundo, pro habente quantitatem in secundo sensu: unde quantitas in primo sensu est abstractum quanti etiam in primo sensu, & sic quantum nequit prædicari de quantitate; nam hæc propositio: *Quantitas est quanta*, faceret hunc sensum: *Quantitas, qua est accidens absolutum, est habens quantitatum, qua est accidens absolutum*; quod est falsum, nam nihil potest dici habere se ipsum: quantitas vero in secundo sensu, est abstractum quanti etiam in secundo sensu, & sic nequit prædicari quantum de quantitate, propter eandem rationem; at vero quantum in secundo sensu potest prædicari de quantitate in primo sensu, nam ut sic hæc propositio, *Quantitas est quanta*, faceret hunc sensum: *Quantitas, qua est accidens absolutum, est extensa, seu habet extensionem in ordine ad locum*, quod verum est, sed in tali casu non prædicatur concretum de proprio abstracto, ut patet ex dictis.

13 Dicimus sexto: concretum potest prædicari de proprio abstracto, & e contra in Divinis, prædicatione identica, propter eandem rationem, qua in Divinis prædicantur identicè abstracta ultima abstractione; unde istæ propositiones sunt veræ: *Deus est Deitas*; *Deitas est Deus*, & aliz similes. Aliqui extendunt hanc conclusionem ad prædicata transcendentia, eo quod ut supra diximus, concretum, & abstractum in transcendentibus sunt prædicata synonyma. Alii etiam extendunt hanc conclusionem ad omnia abstracta, quæ sunt de ratione formali concretorum; unde istæ propositiones sunt veræ in sensu identico: *Homo est humanitas*; *risibile est risibilitas*, & aliz similes.

14 Dicimus septimò: secundæ intentiones in concreto prædicantur de primis intentionibus etiam in concreto, ita ut secundæ intentiones prædicentur de naturis, quas denominant, unde istæ prædicationes sunt veræ: *Animal est genus; homo est species*, & aliæ similes, quod debet intelligi prædicatione formali; quia secundæ intentiones in concreto, & sunt formæ in subiectis, & significantur, ut concernentes subiecta. Ubi advertendum est, quod quando prædicantur secundæ intentiones, tunc primæ intentiones supponuntur suppositione simplici unde quòd prædicatur de superiori, nequit de inferioribus prædicari, & sic licet hæc sit vera: *Homo est species*, hæc tamen est falsa: *Perrus est species*.

15 Dicimus octavo: primæ intentiones in concreto non prædicantur prædicatione formali de secundis etiam in concreto; quia neque primæ intentiones sunt formaliter in secundis, neque significantur, ut concernentes illas, unde istæ propositiones sunt falsæ: *Genus est animal; species est homo*, & aliæ similes. Ubi advertendum est, quod nullo alio modo possunt prædicari secundæ intentiones de primis, neque è converso, sive sumantur in abstracto, sive in concreto; quia semper deficit aliqua ex conditionibus ad veram prædicationem requisitis, ut patebit per singulas scrutanti.

16 Pro prædicationibus secundarum intentionum inter se, nihil novum se offert; sed semper attendendum est ad modum, quo inter se prædicantur primæ intentiones, qui suo ordine debet servari, & cum eisdem regulis in secundis intentionibus.



## D I S P. IV.

*De Universali Logico.*

**H**ucusque locuti sumus de Universali pro materiali, seu metaphysicè sumpto, & de prædicationibus; quæ valdè conducunt ad intelligentiam universalis pro formali, seu Logicè sumpti, de quo in præsentī est sermo.

## Q U Æ S T I O I.

*In quo consistat ratio formalis universalis Logici?*

**P**ro intelligentia quæstionis notandum est quod universale Logicum, non datur à parte rei, sed convenit naturis per operationem intellectus; unde, non benè citatur Scotus ab aliquibus asserentibus, Scotum ponere a parte rei, & independenter a consideratione intellectus universale formale; nam loco, quò citari solet, neque unicum verbum habet: ex quo possit deduci, hanc esse mentem ipsius, imo oppositum aperte docet, & solum adstruit à parte rei communitatem naturæ per indifferentiam negativam modo a nobis dicto disp. 1. quod, ut videatis, accipite eius verba in 2. dist. 3. quæst. 1. §. *Ad quæstionem, vers. ad primum dico*, litt. H. ubi dicit: *Universale in actu est illud, quod habet unitatem indifferentem, secundum, quam, ipsum idem est in potentia proxima, ut dicatur de quolibet supposito, quia 1. Post. universale est, quod est unum in multis, & de multis; nihil enim secundum quamlibet unitatem in re est tale, quod secundum ipsam unitatem præcisam sit in potentia proxima ad quodlibet suppositum, ut dicatur de quolibet supposito prædicatione dicente; hoc est hoc; quia licet alicui existenti in re.*

re, non repugnet esse in alia singularitate ab illa in qua est, non tamen illud verè dici potest de quolibet inferiori, quòd quodlibet est ipsum, hoc est enim solùm possibile de obiecto eodem indifferenti actu considerato ab intellectu. Hæc Scotus, quo nihil clarius ad negandam universalitatem formalem à parte rei. Hoc notato.

2 Tripliciter describitur universale ab Aristotel. nam lib. 1. de interpretatione cap. 5. illud per aptitudinem prædicandi de multis, his verbis explicat: *Dico autem universale, quod de pluribus prædicari natum est* Et 7. Met. tex. 45. illud per aptitudinem ad essendum in pluribus his verbis describit: *Universale est, quod pluribus aptum est inesse*. Et 1. Post. cap. 18. illud per actualem inhæSIONem in multis, & prædicationem, seu prædicabilitatem de illis, his verbis declarat: *Universale est unum in multis & de multis*. Ex his descriptionibus universalis orta est divisio inter Authores, in quo ratio formalis universalis Logici constituenda sit?

3 Aliqui enim dicunt; universale formaliter constitui in aptitudine ad essendum in multis, prædicabilitatem verò de illis esse passionem universalis. Sic communiter Thomistæ. Alii verò per oppositum asserunt, prædicabilitatem de multis esse rationem formalem constitutivam universalis; aptitudinem verò ad essendum in multis esse propriam passionem illius. Sic Merin. cap. 1. de universal. disput. 2. quæst. 2. apud quem possunt videri plures Authores pro aliis sententiis; Alii autem dicunt, non aptitudinem, ad essendum in multis, sed esse in multis actu per inexistentiã, esse rationem formalem constitutivam universalis: ex quo tamquam propria passio sequitur aptitudo prædicandi de pluribus. Sic Mastrius disputat. 4. de universal. quæst. 2. artic. 3. in qua quæstione adducit aliquos Authores, tam pro hac

hac sententia, quam pro aliis. Alii verò asserunt, prædictam inexistentiam in pluribus, & prædicabilitatem de illis esse eandemmet formalitatem, & rationem constitutivam universalis. Alii autem aptitudinem ad essendum in pluribus, & aptitudinem ad prædicari de illis, adstruunt esse eandem formalitatem, & constitutivum formale universalis. Alii denique in actuali prædicatione de pluribus, inquirunt, rationem formalem universalis consistere. Unde juxta prædictos modos dicendi, aliqui unam ex supradictis definitionibus universalis, dicunt, esse quidditativam; alii verò alteram, & similiter, unam vel alteram esse descriptivam. Ex Scoto autem non facile deducitur, in quo ratio formalis universalis ponenda sit, nam, locis, quibus ab Scotistis solet citari, tantum adducit unam, vel alteram ex prædictis definitionibus, quin determinet, an aliqua ex illis sit essentialis, vel descriptiva: nam qualiscumque illa sit, sufficit ad intentum Scoti. Nos autem claritatis gratia, & ab Scoti via nullatenus deficientes, quid videatur tenendum persequentes conclusiones proponemus.

4. Dicimus primò: ratio formalis universalis Logici non consistit in actuali prædicatione. Hæc conclusio est contra ultimum modum dicendi. Probatur, quia nequit assignari aliqua prædicatio actualis, quæ sit prædicatio unius de pluribus: ergo ratio formalis universalis, nequit constitui per actualem prædicationem. Prob. antec. Quia prædicatio actualis, vel sit hoc modo, v. g. *Petrus, & Ioannes, &c. sunt homines*: in qua prædicatione non unum de pluribus, sed plura de pluribus prædicantur; vel hoc modo: *Petrus est homo*, in qua non unum de pluribus: sed unum de uno tantum prædicatur, vel hoc modo: *Petrus est homo: Ioannes est homo, &c.* in quibus licet unum de pluribus prædicetur; non tamen unica, sed pluribus prædi-

dicationibus, quarum nulla potest esse ratio constitutiva universalis, cum sit prædicatio unius de uno; ergo nequit assignari aliqua prædicatio actualis, quæ sit unius de pluribus, & consequenter ratio formalis universalis non est ponenda in actuali prædicatione. Hæc conclusio ex pluribus dicendis potest corroborari, & præcipuè ex conclusione sequenti.

4 Dicimus secundo, ratio formalis universalis Logici non consistit in actualiter esse in pluribus per intellectum. Hæc conclusio est contra tertium modum dicendi, & ex consequenti contra quartum. Probatur; quia universale debet esse unum plura respiciens; sed in actuali inhæensione naturæ in pluribus non datur unum plura respiciens; ergo nequit consistere ratio formalis universalis in actuali inhæensione, seu inelusione in pluribus per intellectum. Probatur minor; quia cum natura apprehenditur inclusa in pluribus; nequit apprehendi ut una, sed ut plures; ergo in actuali inhæensione, seu inelusione naturæ in pluribus non datur unum plura respiciens. Probatur antec. Quia dum consideratur natura inclusa in pluribus, consideratur pluribus applicata, sed dum consideratur pluribus applicata, nequit considerari ut una, sed ut plures inter distinctæ; ergo dum consideratur inclusa in pluribus, nequit considerari ut una, sed ut plures inter se distinctæ. Probatur minor, quia dum consideratur natura pluribus applicata, consideratur ut conjuncta cum differentiis individualibus; sed ut conjuncta cum differentiis individualibus, non est una, sed plures realiter distinctæ, ergo dum consideratur pluribus applicata, nequit considerari ut una, sed ut plures realiter distinctæ. Minor patet à paritate, nam natura à parte rei ex eo, non est una, sed plures realiter distinctæ, & consequenter neque universalis; quæ est conjuncta cum differentiis individualibus.

dualibus ipsam realiter distinguuntibus, ut dictum est loquendo de unitate formali, & est communior Scotistarum consensus; ergo similiter, ut coniuncta cum differentiis individualibus per intellectum, nequit apprehendi, ut una sed ut plures realiter distinctæ, eo vel maximè, quòd differentiæ in individuales quomodocumque sumantur, semper sunt rationes distinguendi naturam realiter.

6 Confirmatur; quia secundum Scotum citatum in initio quæstionis, ratio universalis secum fert indifferentiam naturæ; sed natura considerata, ut actu inexistens pluribus, non habet secum talem indifferentiam; ergo considerata, ut pluribus inexistens, non habet rationem universalitatis. Probatur minor; quia indifferentia, quam habet natura universalis, opponitur determinationi ipsius naturæ: sed natura considerata, ut actu pluribus inexistens, consideratur ut determinata: ergo natura considerata, ut actu pluribus inexistens, non habet secum talem indifferentiam. Probatur minor; quia natura considerata pluribus actu inexistens, consideratur coniuncta singularitatibus: sed hæc conjunctio est determinatio opposita prædictæ indifferentiæ: ergo ut consideretur pluribus actu inexistens, consideratur, ut determinata, & consequenter, ut sic non dicit rationem formalem universalis.

7 Arguunt contra; nequit aliquid prædicari de aliquo, seu esse prædicabile de illo; quin prius sit, seu apprehendatur in illo; sed natura universalis est prædicabilis de pluribus, ergo prius est, seu apprehenditur in illis, & consequenter, quòd natura consideretur in pluribus per inexistentiam, est ratio constitutiva universalis. Et confirmant, quia Arist. supracitatus definit universale per actualiter esse in pluribus, quam definitionem admittit Scotus etiam supra citatus. Respond. concessio primo syllogis.

gismo, negando ultimam consequentiam ex illo deductam; minimè enim sequitur ex eo quod ad prædicabilitatem requiratur apprehensio naturæ in illo, de quo prædicatur, quod ipsa apprehensio naturæ in pluribus sit ratio formalis constitutiva universalis, quod ex dicendis constabit. Ad confirmationem resp. iuxta commune proloquium, quod verba in definitione non dicunt actum, sed aptitudinem; unde licet Arist. definierit universale per esse in pluribus, non debet intelligi per actualem inexistentialitatem in illis, sed tantum per aptitudinem ad existendum in illis per intellectum.

8. Dicimus tertio; ratio formalis, seu essentia universalis Logici consistit in aptitudine ad essendum in pluribus seu in aptitudine ad prædicari de pluribus, ita ut utraque aptitudo sit eademmet formalitas, & ratio constitutiva universalis. Hæc conclusio est juxta quartum modum dicendi, & immediatè contra primum, & secundum, quorum quilibet ponit unam ex prædictis aptitudinibus pro essentia universalis, & alteram pro passione, seu proprietate; tenent tamen eam plures Scotistæ, non parvi momenti, in manuscriptis, habet etiam fundamentum in Scoto; ut patebit in probatione, licet quæst. 6. universal. videatur distinguere hanc duplicem aptitudinem, sed ibi nullatenus determinat essentiam universalis, sed tantum videtur conformari cum aliis sententiis, abstrahendo à determinatione.

9 Probatur igitur conclusio, quia secundum Scotum, illa sunt idem formaliter, quorum unum nequit concipi sine alio; sed aptitudo ad essendum in multis per intellectum, & prædicabilitas, seu aptitudo ad prædicari de illis, ita confunduntur unico conceptu, ut nequeat una sine altera perfectè concipi; ergo utraque aptitudo est idem formaliter. Prob. min. quia aptitudo ad essendum in multis per intellectum nihil aliud est,

est, quam quod natura possit per intellectum poni in illis pluribus, tanquam in inferioribus : sed prædicabilitas, seu aptitudo ad prædicari de pluribus nihil aliud est, quam quod natura possit poni in pluribus per intellectum : ergo utraque aptitudo, ita est eadem, ut nequeat una sine altera concipi. Prob. min. & roboratur tota ratio ; quia unus actus est unius, & unicæ potentix : sed prædicatio actualis ponit naturam in pluribus, eo modo, quo ponibilis est : ergo prædicabilitas, quæ est potentia, cui correspondent actus prædicationis actualis, est potentia correspondens actui, quo natura ponitur in pluribus, eo modo, quo ponibilis est : sed aptitudo ad essendum in pluribus per intellectum est potentia correspondens actui, quo natura ponitur in pluribus, eo modo, quo ponibilis est : ergo aptitudo ad essendum in pluribus per intellectum, & prædicabilitas, seu aptitudo ad prædicari de illis est eademmet formaliter aptitudo ; sed in aliqua illarum ponitur communiter ratio formalis universalis ; ergo talis ratio formalis universalis in utraque aptitudine, tanquam in eadem formalitate debet constitui.

10 Utautem nostra conclusio, & illius ratio rectè percipiatur, advertendum est, quod universale, seu natura universalis neque est, neque concipitur apta ad essendum in pluribus per inhæSIONEM realem, sed tantum per intellectum, & hoc non ita, quod possit esse in pluribus per intellectum sine aliqua sui divisione, imò necessario est ponibilis in pluribus per intellectum cum sui divisione, ad differentiam essentix Divinæ, quæ est verè, & realiter in pluribus, scilicet, in tribus Divinis Personis, sine aliqua sui divisione, propter quod omnes fatentur, non esse naturam universalem ; itaque natura universalis nihil aliud est, quam quædam natura concepta ab intellectu, ut quid  
su.

superius, & sub se plura respiciens, in quæ potest per intellectum dividi, quæ divisio nihil aliud est, quam quod natura prædicetur de illis dicendo, v. gr. *Petrus est homo; Joannes est homo; &c.* quod clarè deducitur ex Scoto citato in initio quæstionis, ubi explicat naturam universalem.

11 Quæ explicatio deducitur à simili de idea Platonis qui ponebat naturam communem separatam à singularibus, & ab ipsis realiter cum sui divisione participabilem, quæ quidem natura, si ita à parte rei daretur, à parte rei esset universalis; hoc igitur modo apprehenditur natura ab intellectu, non in singularibus inclusa, sed à singularibus abstracta, ipsa tamen singularia sub se respiciens, & ab ipsis per intellectum cum sui divisione participabilis; & sicut natura in sensu platonico participaretur ab inferioribus per propagationem, ita natura universalis in nostro sensu participatur ab inferioribus per prædicationem intellectus; unde idem est poni in pluribus per intellectum, ac prædicari de illis, & consequenter eadem est potentia, seu aptitudo ad essendum in pluribus per intellectum, seu ad hoc, ut ponatur, seu participetur ab illis per intellectum, ac prædicabilitas, seu aptitudo ad prædicari de illis.

12 Cùm tamen natura fiat universalis per intellectum, non chimæricè, sed cum fundamento in re, necessariò ut natura, v. g. humana, quæ sit universalis, participetur per intellectum, seu prædicetur de Petro & Paulo, &c. non autem de individuis alterius speciei, præsupponitur cognitio individuum in re habentium rationem formalem humanitatis, quæ cognitio est simplex apprehensio, quæ requiritur ad hoc; quod intellectus possit prædicare naturam universalem de suis inferioribus, non autem requiritur simplex apprehensio cognoscens  
ip-



ipsam naturam universalem abstractam à singularibus, inclusam in illis, nam ut sic non esset universalis, seu una participabilis de pluribus, sed actu participata, & plurificata, cum participetur ab illis cum sui divisione. Quod valde observa, & facile nostras conclusiones comprehendes, & plura argumenta præcipuè argumentum factum contra secundam conclusionem, num. 7. solves.

13 Pro primo modo dicendi arguunt; illud est essentia alicujus, quod convenit illi primò, & per se; quod autem convenit illi per se secundo, & ratione prioris, est propria illius passio: sed aptitudo ad essendum in pluribus per intellectum primò, & per se convenit universali; prædicabilitas autem, seu aptitudo ad prædicari convenit illi per se secundo, & ratione aptitudinis ad essendum: ergo aptitudo ad essendum in pluribus est essentia universalis; aptitudo verò ad prædicari est propria passio: Prob. min. quia hæc est vera causalis: *Quia universale est aptum esse in pluribus, idè est aptum prædicari de illis*: sed causa est naturaliter prior suo effectu: ergo aptitudo ad essendum in multis est, quòd primò convenit universali; aptitudo verò ad prædicari de illis convenit secundo, & ratione aptitudinis ad essendum. Resp. neg. min. & distinguendo mai. probatio: Est enim vera in sensu formali; falsa autem in sensu causali. Etenim hæc propositio; *Quia natura est apta inesse pluribus per intellectum, est apta prædicari de illis*, si intelligatur, ita quòd una aptitudo sit causa alterius (sicut hæc propositio; *Quia homo est rationalis, est risibilis*, intelligitur, ita ut rationalitas sit causa risibilitatis) est falsa; si autem intelligatur, ita ut eadem sit utraque aptitudo, licet diverso nomine significata (sicut hæc propositio, *Quia homo est animal, est vivens sensibile*, intelligitur, ita ut animal est vivens sensibile formaliter, licet

cet diverso nomine significetur ) est vera, & concessa minori, neg. conseq.

14 Pro secundo modo dicendi arguunt similiter ponendo prædicabilitatem, seu aptitudinem ad prædicari de pluribus pro essentia universalis, & aptitudinem ad essendum in illis pro passione, seu proprietate illius, cum hac causali: *Quia natura est apta prædicari de pluribus, est apta ad essendum in illis.* Sed resp. sicut ad præcedens argumentum.

15 Deinde arguunt ex Porphyrio, qui universalis definivit per prædicabilitatem, seu aptitudinem ad prædicari de pluribus. Et ex Scotto etiam declarante universale per prædicabilitatem, nam in 2. dist. 3. quæst. 1. §. *Sed contra*, litt. H. habet hæc verba: *Universale in actu est illud, quod habet unitatem indifferentem, secundum quam ipsum idem est in potentia proxima, ut dicatur de quolibet supposito:* ergo prædicabilitas, seu aptitudo ad prædicari de pluribus, est essentia universalis. Resp. concedendo totum, sed ex hoc nihil contra nos: nam argumentum solum probat, prædicabilitatem, seu aptitudinem ad prædicari de pluribus esse essentiam, seu rationem formalem constitutivam universalis, quod nos etiam asserimus: non tamen probat, prædictam aptitudinem ad prædicari de pluribus esse distinctam ab aptitudine ad essendum in pluribus per intellectum quod nos negamus, nam dicimus, utramque esse eandem formaliter aptitudinem, & de essentia universalis, licet diverso nomine significetur. Plura quæstionibus sequentibus dicenda, non parùm conducunt ad huius amplioris intelligentiam.

## QUÆSTIO II.

*Per quam operationem intellectus fiat universale Logicum?*

1 **P**RO intelligentia quæstionis supponitur tamquam certum, universale logicum fieri ab intellectu, quia tamen intellectus plures actus habet, dubitatur, per quam operationem, & per quem actum ipse intellectus universale conficiat? Ad cuius resolutionem notandum est, quod juxta Arist. lib. de sensu, & sensato, nihil est in intellectu, quin prius fuerit in sensu; unde in cognitione rerum hic ordo communiter assignatur a Philosophis; prius enim res, seu objecta materialia, quæ pro hoc statu cognoscuntur, emittunt species in sensibus externis, & deinde transeunt prædictæ species ad quandam facultatem internam, quæ dicitur sensus communis, seu phantasia, & hucusque species sunt materiales.

2 Quia verò species materiales nequeunt recipi in intellectu, qui spiritualis est, assignatur communiter quædam spiritualis facultas, quæ dicitur intellectus agens, ut simul cum specie existente in phantasia, producat speciem intelligibilem, quæ est spiritualis: quæ quidem species intelligibilis recipitur in alia facultate spirituali, quæ dicitur intellectus possibilis, seu passibilis, qui simul cum specie intelligibili, producit intellectionem, & intelligit objectum. Tam intellectus agens, dum producit speciem intelligibilem, natam repræsentare aliquam naturam, & non aliquod singulare; quam intellectus possibilis, dum intelligit talem naturam, nullo intellectu singulari, dicuntur abstrahere naturam a singularibus, & post prædictam abstractionem potest intellectus possibilis cognoscere naturam cum ordine ad inferiora, absque

eoquòd affirmet esse in illis, qui actus intelligendi est proprius simplicis apprehensionis, & dicitur simplex comparatio; potest etiam ipse intellectus possibilis ipsam naturam cognoscere cum ordine ad inferiora, & affirmando, esse in illis, qui actus intelligendi est proprius iudicii, & dicitur comparatio composita. Hinc ortum habent varii modi dicendi circa universalis Logicæ efficientiam.

3 Aliqui enim dicunt universale Logicum fieri per abstractionem intellectus agentis. Alii verò, per abstractionem intellectus possibilis. Alii autem, per simplicem comparisonem. Alii denique, per comparisonem compositam. Authores pro his sententiis possunt videri apud recentiores, præcipuè apud Maffrimum disp. 3. de universal. quest. 3. & apud Merin. cap. 1. de universal. disp. 2. quest. 3. quid autem tenendum videatur, per sequentes conclusiones proponemus.

4 Dicimus primò: universale Logicum non fit per abstractionem intellectus agentis, seu per actum, quo simul cum phantasmate, seu specie impressa materiali producit speciem intelligibilem præsentativam naturæ, absque conditionibus individualibus. Hæc conclusio est communis contra aliquos oppositum tenentes, quam expressè tenet Scotus in 2. dist. 3. quest. 1. *§. Sed contra, vers. Ex hoc apparet*, sub litt. H. his verbis: *Ex hoc apparet improbatio illius dicti, quòd intellectus agens facit universalitatem in rebus per hoc, quòd denudat ipsum, quòd est in phantasmate exiens.*

5 Probatur ratione; quia natura debet fieri universalis Logicè per actum cognoscitivum: sed actus abactivus intellectus agentis non est cognoscitivus: ergo per talem actum non fit natura universalis Logicè. Prob. mai. Quia universale Logicum est unum aptum inesse pluribus, & prædicari de illis: sed quod non est co-

gentium, nequit prædicari de pluribus: ergo natura nequit fieri universalis logicè nisi per actum cognoscitivum. Minor prim syllogismi patet; quia natura per abstractionem intellectus agentis tantum est virtualiter repræsentata, seu proxime cognoscibilis, non verò actualiter repræsentata, & formaliter cognita; nam species impressa intelligibilis producta ab intellectu agente est tantum virtualis repræsentatio objecti, formalis verò præsentatio objecti est species expressa, seu intellectio producta ab intellectu possibili: ergo actus abstractivus intellectus agentis non est formaliter cognoscitivus, & consequenter non fit per illū natura universalis logicè.

6 Arguunt contra, hoc ipso, quod natura sit denudata à conditionibus individualibus, est formaliter universalis: sed per abstractionem intellectus agentis est natura denudata à conditionibus individualibus: ergo fit universalis formaliter per talem abstractionem. Resp. neg. mai. Quia ad universalitatem formaliter non sufficit abstractio à conditionibus individualibus, sed etiam requiritur, quod natura dicat positivum ordinem ad plura, ut superius ad inferiora, quod nullatenus habet per talem abstractionem intellectus agentis. Aliter respondent alii, & sufficit ad intentum (quæ responsio deducitur ex ratione conclusionis) dist. mai. natura fit universalis logicè per hoc, quod denudetur à conditionibus individualibus, si denudetur repræsentatione formali, & expressa, admitto; si denudetur repræsentatione tantum virtuali, nego. Et similiter distinguitur minor; quia per abstractionem intellectus agentis, ut dictum est, tantum virtualiter repræsentatur natura denudata à conditionibus individualibus; formaliter verò per abstractionem intellectus possibilis. Admisimus autem majorem in sensu dicto; non tamen illā concessimus, quia ut infra patebit, non affirmamus, adhuc per abstractionem intellectus possibi.

bilis, fieri naturam formaliter universalem logicè, sed tantum fundamentaliter proximè; prædicta autem distinctio videtur sufficere ad solutionem argumenti.

7 Dicimus secundò; universale Logicum non fit per abstractionem intellectus possibilis. Hæc conclusio est communior; tam inter Scotistas, quam Thomistas, licet aliqui ex illis oppositum tribuant, tam Angelico, quam subtili Magistris, quid autem sit de Scoto, infra videbitur. Probatur primò; quia juxta communem consensum, universalitas logica consistit in relatione rationis unius ad plura; sed per abstractionem intellectus possibilis non dicit naturam ordinem rationis ad plura; ergo per abstractionem intellectus possibilis non fit natura logicè universalis. Prob. min. Quia per abstractionem intellectus possibilis segregatur natura à pluribus; sed segregatio naturæ à pluribus non est ordo naturæ ad plura; ergo per abstractionem intellectus possibilis, non dicit naturam ordinem rationis ad plura. Hæc ratio etiam probat conclusionem præcedentem.

8 Respondent aliqui neg. min. quia, inquiunt natura, licet per abstractionem intellectus possibilis segregatur à pluribus, non ex hoc sequitur, quod non dicat ordinem ad plura, imò requiritur talis segregatio à pluribus, ut ad illam ordinem dicat; nam inclusio naturæ in pluribus, cum sit causa divisionis ipsius naturæ, est impedimentum, ut sit positivè communis pluribus, & ut dicat ordinem positivum ad plura. Quod sic explicant, ex dictis loquendo de unitate formali, & communitate naturæ; natura secundum se est una formaliter, & ratione talis unitatis est indifferens; seu dicit ordinem indifferentiæ ad plura, ita ut quantum est ex se, possit coniungi cum qualibet singularitate, licet ratione singularitatis, cum qua natura à parte rei identificatur, talis indifferentia nequeat reduci

ad actum, ideòque dicatur indifferentia negativa, cum verò natura abstrahitur à singularibus, cum secum ferat suam unitatem formalem, etiam secum fert talem indifferentiam, seu ordinem ad plura, & cum per talem abstractionem auferatur impedimentum singularitatis, talis indifferentia potest reduci ad actum per intellectum, ita ut jungatur natura cum qualibet singularitate. Ecce quomodo cum abstractione naturæ à pluribus componitur ordo ipsius naturæ ad plura per indifferentiam positivam, & consequenter quomodo natura per abstractionem constituatur formaliter universalis.

9 Sed contra est, quia admissa, tanquam vera, prædicta explicatione indifferentiæ naturæ ad plura, adhuc ex illa non sequitur, naturam fieri formaliter universalem per talem abstractionem; quod sic ostenditur, quia indifferentia, quam habet natura abstracta, est eadem quam habet natura contracta, licet non impedita, ut erat in statu coniunctionis cum singularitate; sed hæc indifferentia non sufficit ad rationem formalem universalis Logici; ergo natura non fit universalis Logicè per talem abstractionem. Prob. min. Quia talis indifferentia ita respicit plura, ut possit conjungi cum uno, vel alio divisivè; non tamen cum omnibus conjunctivè, sed ad rationem universalis Logici requiritur, quod natura possit participari ab omnibus inferioribus conjunctivè; ergo talis indifferentia, quam habet natura abstracta, non sufficit ad rationem formalem universalis Logici, & consequenter abstractio non tribuit naturæ ordinem rationis, qui requiritur ad rationem formalem universalis Logici.

10 Et potest confirmari à simili de idea Platonis, quæ si à parte rei daretur, esset à parte rei universale formaliter, & ad cuius instar fit universale Logicum per intellectum, quia ideò natura à Platone ideata esset formaliter uni-

ver-

versalis, quia ita respiceret plura, ut ab omnibus simul esset participabilis, licet cum sui divisione; non tamen quia esset participabilis ab hoc, vel illo indifferenter, & divisivè: ergo ad hoc, ut fiat natura universalis per intellectum, debet per intellectum esse participabilis ab omnibus inferioribus simul, licet cum sui divisione, & non tantum ab hoc, vel illo divisivè, & indifferenter: sed hoc ultimum tantum habet natura per abstractionem intellectus possibilis; ergo per talem abstractionem non dicit ordinem positivum ad plura modo requisito ad universalitatem Logicam, & consequenter per talem abstractionem non fit natura universalis Logice.

11 Probatur secundo conclusio; quæ juxta communioem consensum, universale Logicum est relatio rationis, seu enrationalis: sed per abstractionem intellectus possibilis, non resultat talis relatio rationis; ergo per abstractionem intellectus possibilis, non fit universale Logicum. Prob. minor. Quia per abstractionem intellectus possibilis tantum consideratur natura secundum se, & sine singularibus; sed talis consideratio, non tribuit naturæ talem relationem rationis ad plura: ergo per abstractionem intellectus possibilis non resultat talis relatio rationis. Prob. min. Quia nequit concipi relatio, quin, concipiantur extrema; sed extrema relationis rationis universalis est natura, & singularis: ergo per abstractionem, qua concipitur natura sine singularibus, non tribuitur naturæ talis relatio rationis ad plura.

12 Dices, verum esse, universale dicere relationem rationis: falsum tamen, talem relationem non resultare in natura per abstractionem intellectus possibilis, nam posita natura abstracta per intellectum, ponitur fundamentum proximum talis relationis, quo posito, resultat prædicta relatio, absque aliquo alio actu



intellectus. Sed contra est, quia est maxima differentia inter relationem realem, & relationem rationis; scilicet, quod relatio realis resultat posito fundamento proximo, absque aliquo alio actu terminato ad illam, relatio verò rationis, non resultat posito fundamento proximo, sed necessario requirit actum intellectus terminatum ad illam, distinctum ab actu, quo ponitur tale proximum fundamentum; unde licet actus abstrahens naturam ponat fundamentum proximum relationis rationis universalitatis; tamen non resultat talis relatio, quin ab alio actu intellectus consideretur.

13. Patet assumptum ex ipsa natura entis, seu relationis rationis. Primò; quia relatio rationis nihil aliud est, quam considerare, quæ non referuntur, ut si referrentur: sed per abstractionem non consideratur natura, quæ non refertur ad plura, ut si referretur ad illa: ergo per abstractionem non resultat relatio rationis ad plura. Secundo, quia ex dictis, loquendo de ente rationis, ens rationis est, quod tantum habet esse objectivè in intellectu; ergo non datur relatio rationis universalitatis nisi per actum, quo cognoscitur, & habet esse objectivè in intellectu sed per abstractionem tantum cognoscitur natura secundum se, & non aliqua relatio ad plura: ergo per talem abstractionem non datur in natura relatio rationis universalitatis.

14. Si autem dicas, universalitatem non esse ens rationis formaliter: nihil videtur magis voluntarium; quid enim potest esse quædam similitudo ideæ Platonice fabricata ab intellectu, nisi ens rationis? Quid enim minus est in rebus & magis ab intellectu fabricatur, quam natura una separata à singularibus, & tamquam quid superius ab omnibus, tamquam inferioribus, participabilis? Nulla enim videtur ratio, cur propria ratio entis rationis universali logico de-negetur, & præcipuè, cum ferè ab omnibus Phi-

Ioso.

loſophis talis propria ratioentis rationis uni-  
verſali logico concedatur.

25 Arguunt primò aliqui Scotiſtæ ex aliqui-  
bus locis Scoti, & præcipuè loco citato num. 4.  
huius quæſtionis, ubi dicit, loquendo de uni-  
verſali; *Tantum eſt in potentia proxima, ut eſt  
in intellectu poſſibili*, ſed natura per abſtractionem  
eſt in intellectu poſſibili; ergo per abſtra-  
ctionem eſt in potentia proxima, ut prædicatur  
de pluribus, de qua potentia loquitur Scotus;  
& conſequenter per talem abſtractionem fit na-  
tura formaliter univerſalis Logicè. Reſp. neg.  
utramque conſequentiam; & ad Scotum dici-  
mus, quòd ibi tantum intendit, quòd natura  
non fiat univerſalis per abſtractionem intel-  
lectus agentis, ſed per actum intellectus poſſibilis;  
non autem determinat per quem actum intel-  
lectus poſſibilis fiat, ut patebit litteram Scoti per-  
ſcrutanti.

18 Deinde in eodem loco §. *Ad quæſtionem*,  
*verſ. Qualiter* litt. F. habet hæc verba: *Non  
ſolum autem ipſa natura eſt de ſe indifferens ad  
eſſe in intellectu, & in particulari; ac per hoc ad  
eſſe univerſale, & ſingulare; ſed & ipſa habens eſſe  
in intellectu non habet primò ex ſe univerſalita-  
tem; licet enim ipſa intelligatur ſub univerſalita-  
te, ut ſub modo intelligendi ipſam; tamen univer-  
ſalitas non eſt pars conceptus ejus primi; quia non  
conceptus metaphyſici, ſed Logici, Logicus enim  
conſiderat ſecundas intentiones applicatas primis;  
prima ergo intellectio eſt natura, ut ei non coin-  
telligitur aliquis modus, neque qui eſt ejus in  
intellectu, neque qui eſt ejus extra intellectum;  
licet illius intellecti modus intelligendi ſit uni-  
verſalitas, ſed non modus intellectus. Hæc  
Scotus.*

17 Ex quibus verbis ſic argumentantur con-  
tra noſtram conſuſionem; per primam intel-  
lectionem, qua concipitur natura ſecundum  
ſe, non cointelligitur aliquis modus, neque qui

est ejus in intellectu, scilicet, universalitas, neque qui est ejus extra intellectum, scilicet, singularitas: sed juxta verba Scoti modus intelligendi naturam, est universalitas: ergo per illam primam intellectionem fit natura formaliter universalis. Patet consequentia, quia nihil aliud est naturam fieri universalem, nisi quod concipiatur modo universali: sed per illum actum, juxta Scotum, concipitur natura modo universali, siquidem modus cognoscendi illam est universalitas; ergo per illum actum fit formaliter universalis; sed talis actus est abstractio intellectus possibilis: ergo natura fit formaliter universalis per abstractionem intellectus possibilis.

18 Valdè prolixum esset omnia supradicta Scoti verba sigillatim exponere; pro illis potest videri noster Lichetus super Scotum citatum, ubi pulchram, & longè subtilem adducit doctrinam explicando prædictum locum; ex quo, & ex motivo subtilis Doctoris non difficilè deducitur quid sit respondendum. Igitur intentum Scoti est, quod natura de primo suo conceptu, & de prima intentione non habet ex se universalitatem, sed est indifferens ad hoc, ut per intellectum universalitas illi applicetur, sicut ex se est indifferens ad singularitatem à parte rei, ita ut quomodocumque concipiatur natura secundum se, sive sit à parte rei sub modo singularitatis, sive sit in intellectu sub modo universalitatis, non dicit ex se, seu in cognitione secundum se, universalitatem; unde Scoti verba potius videntur stare pro nobis, cum dicat, quod natura secundum se concepta, non dicit universalitatem. Ex quo

19 In forma respondetur ad argumentum deductum ex prædictis verbis, disting. mun. Modus intelligendi naturam, est universalitas secundum Scotum, ita ut semper, quod intelligitur natura secundum se, intelligatur sub  
mo-

modo universalis, nego; ita ut natura, etiam ut est sub modo universalis, possit intelligi secundum se, non intellecto modo universalis, seu universalitate, concedo; quod clarè denotant verba ipsius Scoti, nam dicit: *Licet illius intellectus modus intelligendi*, id est, modus sub quo est natura quando intelligitur, *sit universalitas*; unde negatur consequentia; cujus probationis disting. mai. Nihil aliud est, naturam fieri universalem, nisi quòd concipiatur modo universalis; id est, quòd concipiatur esse universalem; concedo; quia cum ut dictum est, universale Logicum sit ens rationis, nihil aliud est fieri naturam universalem, quam concipere in illa universalitatem, nisi quòd concipiatur modo universalis, id est, quòd modus sub quo est, quando concipitur secundum se, sit universalitas, nego; & in hoc secundo sensu loquitur Scotus; unde negatur consequentia.

20 Ut autem hoc clarius percipiatur, advertendum est, quòd sic contra nostram conclusionem arguentes, in æquivoco laborant, nam quando dicit Scotus: *Licet illius intellectus modus intelligendi sit universalitas*, per modum intelligendi, accipiunt illum actum intellectus, quo concipitur natura secundum se, vel aliquid proveniens naturæ per talem actum; idèdque dicunt, per prædictum actum recipere universalitatem, quod quidem non sic debet intelligi, quia per modum intelligendi, accipit Scotus modum sub quo est natura, quæ secundum se intelligitur; qui modus, sive sit in re, ut est singularitas, sive sit per intellectum, ut est universalitas, non cointelligitur, quando secundum se intelligitur natura, hoc tantum dicit Scotus, non autem determinat ibi per quem actum intellectus tribuatur naturæ modus universalitatis. Videatur ejus littera, & Lichetus citatus.

11 Arguunt secundò ratione; ablatio unius oppositi est positio alterius: sed universale, & singulare sunt opposita: ergo ablatio singularitatis est positio universalitatis: sed per abstractionem intellectus possibilis aufertur à natura singularitas: ergo ponitur in natura universalitas, & consequenter per abstractionem intellectus possibilis fit natura formaliter universalis. Resp. primò, distin. mai. si sint opposita ejusdem rationis, admittò; si sint opposita diversæ rationis, nego. Disting. etiam min. universale, & singulare sunt opposita; si utrumq; sumatur Logicè, vel metaphysicè, sunt opposita ejusdem rationis, concedo; si unum sumatur Logicè, & aliud metaphysicè, sunt opposita ejusdem rationis, nego. Similiter dist. consequ. ablatio singularitatis est positio universalitatis, in eadem linea, concedo; in diversa linea, nego. Disting. etiam min. subsumptam; per abstractionem intellectus possibilis aufertur à natura singularitas, metaphysicè, concedo; logicè, nego, & disting. consequens, per talem abstractionem ponitur in natura universalitas, metaphysicè, concedo; logicè, nego. Unde verum est ultim. consequ. loquendo de universali metaphysico; falsum autem loquendo de universali Logico.

22 Etenim, tam singulare quàm universale possunt dupliciter sumi, scilicet, Logicè, & Metaphysicè. Singulare metaphysicè est natura contracta per singularitatem, quæ est ultima formalitas metaphysica, & universale metaphysicum illi correspondens, est natura secundum se, non dicens singularitatem, sive consideretur, sive non consideretur ab intellectu, & sic in intellectu abstrahens naturam, sive illam concipiens, sine singularitate, tantùm concipit universale metaphysicum, non concepto metaphysico singulari. Universale logicum est natura, ut superior respiciens plura, ut inferiora, & dicens respectum prædicabilitatis de illis; singulare

Iare verò Logicum illi correspondens, est illud, quòd dicit respectum rationis subiicibilitatis ipsi universali Logico; quod quidem non habet singulare à parte rei, sed per ipsam operationem intellectus, qua tribuitur universali Logico relatio prædicabilitatis, eùm sint relationes mutux: unde clarè constat, quòd ablatio singularitatis metapyficæ per abstractionem intellectus possibilis, non est positio universalitatis Logicæ.

32 Resp. secondò, dist. etiam mai. ablatio unius oppositio est positio alterius, si sint opposita immediatè, concedo, si sint opposita mediata, nego. Disting. etiam min. universale, & singulare sunt opposita, mediata, concedo; immediata, nego, & nego consequentiam. Etenim singulare à parte rei non opponitur immediatè universali Logico, sed tantum mediata, hoc est, datur aliquid mediū inter singulare à parte rei, & universale Logicum, quod etiam opponitur singulari à parte rei, scilicet, ipsa natura secundum se, quæ in suo conceptu formali non includit singularitatem, sive abstrahatur, sive non abstrahatur per intellectum.

24 Ubi obiter observa, ut alia argumenta solvas, quòd illud principium: *Ablatio unius oppositi est positio alterius*, non est universaliter verum; nam in relativè oppositis è contrario evenit, positio enim unius est positio alterius, & ablatio unius est ablatio alterius, positio enim patris, v.g. est positio filii, & ablatio patris est ablatio filii, quod intelligitur in esse relativorum, correlativa enim sunt simul natura, cognitione, & definitione. Cùm ergo univ. Log. sit relativum rationis dicens ordinem superioris ad inferiora, nequit ablatio inferiorum esse positio illius, imò positio universalis est positio inferiorum, & è contra, & ablatio universali est ablatio inferiorum, & è contra.

25 Arg. 3. univ. Log. est unum aptum inesse plu.

pluribus : sed per abstractionem constituitur natura una apta inesse pluribus : ergo per abstractionem fit formaliter univ. Log. Prob. min. Quia natura in statu abstractionis non est propria alicujus singularis : ergo per abstractionem constituitur apta inesse pluribus. Respond. primò , ut communiter respondēt Scotistæ disting. min. Per abstractionem cōstituitur natura apta inesse pluribus, fundamentaliter proximè, conc. formaliter, neg. & neg. conseq. Etenim naturā in statu contractionis dicitur universale fundamentaliter, sed hoc remotè ; quia habet impedimentum , ut concipiatur , ut formaliter universalis, scilicet , singularitatem , cui est appropriata, in statu autem abstractionis dicitur natura universalis fundamentaliter proxime , eo quòd nullum habet impedimentum , ut concipiatur, ut universalis, quippè in tali statu nulli singulari est appropriata, non tamen est formaliter universalis quoadusque concipiatur ab intellectu cum ordine superioris ad plura inferiora.

26 Resp. 2. explicando majorem , universale Logicum est unum aptum inesse pluribus simul , licet cum sui divisione , non autem unum aptum inesse pluribus divisivè , seu per solam indifferentiam ; hoc est universale est unum participabile à pluribus modo dicto de idea Platonica, si daretur ; non autem solùm participabile ab hoc , vel illo , seu contrahibile per hanc , vel illam differentiam individualement ; hoc enim est proprium partis potentialis ; non autem totius potentialis , seu potestativi , ut est universale Logium , ut alibi dicitur. Unde disting. min. per abstractionem fit natura una apta esse in pluribus, divisivè , per indifferentiam , seu ut pars potentialis, concedo , simul , & ut totum potestativum , nego , & nego conseq. Quòd autem natura in statu abstractionis , nō fit alicui singulari appropriata , solam facit , quòd indifferen-  
tia

tia naturæ, quæ tantum erat negativa in statu realis existentia, jam fit positiva, seu contraria modo dicto loquendo de communitate naturæ.

27 Dicimus 3. natura non fit universalis Logice per comparisonem compositam, seu per prædicationem actualem; fit tamen sic universalis per simplicem comparisonem. Hæc conclusio est communior in utraque scola. Quoad primam partem probatur; tum ex dictis quæstione antecedenti conclusione 1. & 2. quæ haud difficulter huic possunt applicari. Deinde quia comparatio composita, siue prædictio actualis supponit naturam prædicabilem de multis, nam quilibet actus supponit potentiam sibi correspondentem: sed universale est prædicabile de pluribus: ergo comparatio composita, seu actualis prædictio supponit universale factum, & consequenter talis comparatio composita non est effectiva universalis Logici.

28 Pro secunda parte conclusionis, aliquibus in locis citatur Scotus ab Scotistis, sed Scotus non clarè loquitur circa hanc determinationem; solum autem denotat, fieri universale Logicum per aliquem actum comparativum, nam semper illud explicat per aliquem ordinem rationis ad plura, qui ordo solum potest provenire naturæ per actum collativum intellectus, qui actus, cum non sit comparatio composita, ut dictum est, benè infertur ex Scoto, quod sit simplex comparatio. Deinde potest probari conclusio per exclusionem aliorum actuum intellectus ab efficientia universalis Logici, ut dictum est conclusionibus antecedentibus, nam si non fit universale Logicum per abstractionem intellectus agentis, neque intellectus possibilis, neque per comparisonem compositam; solum restat, quod fiat per simplicem comparisonem.

29 In forma autem probatur conclusio hæc  
bre.



brevi ratione ; quia universale logicum est unum aptum inesse pluribus , & prædicari de illis ; ergo fit per actum intellectus , quo concipitur natura , ut apta inesse pluribus , & prædicari de illis , sed per simplicem comparisonem concipitur sic natura ; ergo per simplicem comparisonem fit Logicè universalis . Minor patet , quia quòd actualiter prædicatur , priùs supponitur apprehensum , ut prædicabile , sed talis apprehensio nihil aliud potest esse , quam simplex comparatio ordinans naturam , seu illam apprehendens in ordine ad inferiora , ergo simplex comparatio apprehendit naturam , ut prædicabilem de pluribus , & consequenter est effectiva universalis Logici .

30 Arguunt contra ; natura fit universalis Logicè per illum actum , quo cognoscitur in pluribus ; Sed talis actus est comparatio composita ; ergo universale logicum fit per comparisonem compositam . Prob. min. quia cognoscere naturam in pluribus , est cognoscere illam , ut identificatam cum illis , sed nequit concipi , ut identificata cum pluribus nisi per comparisonem compositam ; ergo actus , quo cognoscitur natura , ut una in pluribus est comparatio composita . Resp. neg. mai. Quia universale non est natura una in pluribus , sed una apta inesse pluribus , & prædicari de illis ; unde actus , quo cognoscitur , non ut actu existens in pluribus , sed ut apta inesse pluribus est universalis Logici effectivus , qui quidem actus est simplex comparatio , non verò composita : Et licet concederemus , quod non concedimus , scilicet , universalitatem consistere in hoc , quod natura actu sit in pluribus , & consequenter fieri universale logicum per actum intellectus , quo natura conciperetur actu inesse pluribus ; negare tamen possemus , hoc fieri per comparisonem compositam , bene tamen per simplicem comparisonem , qua apprehenderetur natura una  
in

in pluribus, quin de illis per comparisonem, compositam prædicaretur. Alia argumenta, vel coincidunt cum præsentibus, vel facile solvuntur ex dictis in hac, & præcedenti quæstione.

### Q U Æ S T I O I I I.

*Quodnam sit definitum in definitione universalis.*

**P**RO intelligentia quæstionis aliqua notanda sunt. Primò, universale, ut alibi dictum est, esse quoddam concretum accidentale dicens pro materiali naturam, & pro formali universalitatem. Secundo, inter complexa accidentalia, ut *homo albus*, & concreta, ut *album*, hanc versari differentiam, quod complexum dicit in recto, tam subiectum, quàm formam, unde nequit unica definitione definiri, cum subiectum, & forma sint diversæ rationis; at vero concretum, eum dicat unum, scilicet, formam (in nostra sententia) in recto, & aliud scilicet subiectum, in obliquo, optimè potest unica definitione definiri. Tertio, duplex esse definitum; formale, scilicet, cui primo, & per se convenit definitio, & materiale, cui non primo, & per se, sed secundario, & per accidens convenit definitio; huius enim definitionis, *Album est disgregativum visus*; *album* est definitum formale, & subiectum albedinis est definitum materiale. Nunc

2. Resolutio huius quæstionis dependet ex alia iam discussa loquendo de prædicationibus, scilicet, *Quid primò, & per se significet concretum?* Qui enim dicunt, concretum æque significare formam, & subiectum, consequenter tenent, aggregatum ex natura, & secunda intentione universalitatis esse definitum in definitione universalis. Qui autem tenent,

con-

concretum primò, & per se significare subiectum, secundariò vero, & de connotato formam, communiter sultinent naturam, ut subest secundæ intentioni universalitatis, esse definitum in definitione universalis. Scotistæ verò, cum teneant cum Præceptore subtili, concretum primò, per se, & in recto significare formam, secundariò verò, & in obliquo subiectum, consequenter affirmant definitum in definitione universalis esse secundam intentionem universalitatis in concreto, seu prout connotat, & denominat naturam. Præter hos modos dicendi, non desunt, qui asserant, vel naturam secundum se, vel secundum intentionem universalitatis in abstracto esse definitum in definitione universalis.

3 Dicimus primo; definitum in definitione universalis, non est natura secundum se. Probatur, quia definitio per se debet convenire suo definito: sed definitio universalis, non convenit per se naturæ secundum se sumptæ; ergo natura secundum se sumpta non est definitum in definitione universalis. Minor patet, quia ut dictum est, universalitas accidit naturæ per intellectum; sed quod sic accidit naturæ, non convenit illi per se; ergo quod natura sit universalis non convenit illi per se, & consequenter, neque definitio universalis. Neque apparet quid contra hanc conclusionem possit obijci, quod alicujus sit momenti, nisi intendatur probari dari universale Logicum à parte rei, quod ex dictis in tota disputatione facilè refellitur.

4 Dicimus secundo; secunda intentio universalitatis in abstracto non est definitum in definitione universalis. Probatur breviter: quia secunda intentio in abstracto nullatenus est prædicabilis de pluribus; ergo nullatenus est definitum in definitione universalis. Antecedens patet, quia non est prædicabilis prædicatione signata, falsum enim est dicere: *Universalibus potest*

*potest predicari de pluribus*, neque est prædicabilis exercitè; falsum etiam est dicere; *Homo est universalitas*; ergo secunda intentio universalitatis in abstracto nullatenus est prædicabilis de pluribus, & conseq. neque est definitum in definitione universalis. Nihil videtur obicibile contra hanc conclusionem.

5 Dicimustertio; aggregatum ex natura, & secunda intentione simul in recto non est definitum in definitione universalis. Probatur, quia secunda intentio, & natura simul in recto constituunt unum ens per accidens: sed ens per accidens nequit propriè definiri; ergo aggregatum ex natura, & secunda intentione simul in recto non est definitum in definitione universalis. Major est certa, nam illud est unum per accidens, quod dicit in recto res diversorum prædicamentorum, ut est natura, & secunda intentio universalitatis. Minor patet, quia res diversorum prædicamentorum habent diversas essentias: sed diversæ essentiæ non unica, sed pluribus definitionibus explicantur; ergo ens per accidens nequit unica definitione definiri; ac per consequens aggregatum ex natura, & secunda intentione universalitatis non est definitum in definitione universalis. Latè prosequuntur aliqui hanc rationem impugnando aliquas responsiones ad illam, quod nos omittimus, & brevitatæ causa, & quia facilè impugnatur quælibet responsio, cognita natura entis per accidens.

6 Aliter directè probatur conclusio, quia illud est definitum in definitione universalis, quod de pluribus est prædicabile, & prædicatur: sed aggregatum ex natura, & secunda intentione in recto nullatenus prædicatur de pluribus; ergo tale aggregatum non est definitum in definitione universalis. Prob. min. Quia secunda intentio universalitatis non prædicatur exercitè, falsum enim est dicere; *Animal est universalitas*; homo est

*est generalitas, vel genus; &c. neque natura prædicatur signatè; falsum enim est dicere: Natura seu animal est signum, seu ratio formalis prædicandi de pluribus; ergo aggregatum ex natura; & secunda intentione simul in recto, neque exercitè, neque signatè prædicatur de pluribus; & consequenter, neque est definitum in definitione universalis.*

7 Arguunt primò; aggregato ex natura, & secunda intentione simul in recto convenit definitio universalis: ergo est definitum in tali definitione. Prob. ant. Quia secunda intentio prædicatur, ut *quo*, natura prædicatur, ut *quod*, ergo aggregato ex natura, & secunda intentione convenit definitio. Solutio hujus argumenti facile deducetur ex dicendis. Pronun autem resp. neg. antec. & conseq. prob. nam ex hoc, quod natura prædicetur, ut *quod*, & secunda intentio, ut *quo*, non sequitur propositum, imò oppositum sequitur; nam aggregato, neque ut *quo*, neque ut *quod* prædicari convenit, quod enim alicui parti ~~seorsim~~ convenit, nequit toti aggregato convenire, & deinde patet ex nostra ratione.

8 Arguunt secundò; definitum in definitione universalis includit essentialiter secundam intentionem, & aliquid plus: sed aggregatum includit secundam intentionem essentialiter, & aliquid plus, scilicet, naturam denominatam: ergo tale aggregatum in recto est definitum in definitione universalis. Confirmatur: quia, nullum totum constituitur in recto ex una sola parte: sed universale est quoddam totum: ergo constituitur in recto ex utraque parte, scilicet, ex natura, & secunda intentione, & consequenter, ut sic est definitum in definitione universalis.

9 Resp. disting. mai. definitum in definitione universalis includit essentialiter secundam intentionem, & aliquid plus etiam essent aliter,

ter, nego, & aliqui plures de connotato, concedo, & concessa minori, neg. consequ. Sufficit enim ad definitum universalis, quod dicat secundam intentionem essentialiter, seu in recto, & naturam de connotato, imo hoc solum requiritur, ut possit definiri, nam definitum debet dicere aliquid unum per se, & essentialiter, verum autem est, aggregatum dicere secundam intentionem, & naturam, sed utrumque dicit in recto, & ut sic non dicit unum per se, & essentialiter, sed plura simpliciter, ideoque nequit unica definitione definiri, ut dictum est de complexo.

10 Ad confirmationem respond. distingu. maior. Nullum totum constituitur ex una sola parte in recto, ut est quoddam complexum, concedo, ut est quoddam concretum, subdistinguo. non constituitur ex una sola parte in recto, ita, ut nullatenus dicat aliam partem, concedo, si dicat aliam partem, saltem de connotato, nego, & concessa minori, distingu. consequens; constituitur in recto ex utraque parte, ut est quoddam complexum, concedo, ut est quoddam concretum, nego. Unde neg. ultimam consequ. quia universale non est definitum, imo neque definibile unica definitione, ut complexum, sed ut concretum.

11 Dicimus quarto. definitum in definitione universalis non est natura, ut subest secundæ intentioni universalitatis. Probatur; quia definitum in definitione universalis est id, quod per se est universale; non vero, quod tantum est universale per accidens, & denominativè: sed natura, ut subest secundæ intentioni, solum est universalis accidentaliter, & denominativè: ergo natura, ut subest secundæ intentioni non est definitum in definitione universalis. Minor patet, quia natura constituitur universalis per secundam intentionem, quæ est quoddam accidens rationis denominans ipsam.

ipsam naturam: ergo naturæ, ut subest secundæ intentioni, sed solum accidentaliter, & denominativè convenit esse universalem, ac per consequens, nequit esse definitum in definitione universalis.

12 Resp. argumentum benè probare, naturam secundum se, seu specificativè sumptam, non esse definitum in definitione universalis, nō tamen hoc probare de natura reduplicativè, ut subest secundæ intentioni. Sed contra, inquiremus à sic respondentibus, quid intelligant per hanc reduplicationem: *Natura quatenus subest secundæ intentioni?* Si enim intelligant aliquid pertinens ad ipsam naturam, scilicet, capacitatem, seu potentiam passivam ad recipiendam talem secundam intentionem, videtur inutilis talis reduplicatio, idem enim est dicere: *Natura quatenus subest secundæ intentioni universalitatis, est universalis*, ac dicere: *Natura est universalis*; sicut idem est dicere: *Corpus quatenus subest albedini, est album*, ac dicere: *Corpus est album*; nam omne prædicatum dicitur de subiecto, quatenus est capax, & subiicitur formæ, quæ de illo prædicatur. Deinde prædicta capacitas naturæ convenit illi a parte rei, & sic est extra essentiam universalitatis, quæ est forma rationis: ergo tam accidentaliter convenit naturæ definitio universalis cum prædicta reduplicatione, ac sine illa.

13 Si verò per prædictam reduplicationem intelligant ipsam secundam intentionem universalitatis, verum est, quod ut sic definitio convenit essentialiter naturæ, quia definitiones accidentales cum hac repuplicatione fiunt essentielles; nam hæc definitio: *Paries est disgregativus visus*, quæ est accidentaliter respectu parietis, fit essentialis hoc modo: *Paries in quantum albus, est disgregativus visus*; quia reduplicatio facit, quod prædicatum non appellet supra subiectum albedinis, sed supra albedinem

con-

concernentem subiectum. Sic similiter, hæc definitio accidentalis: *Natura est prædicabilis de pluribus*; quæ est accidentalis respectu naturæ, sit essentialis hoc modo: *Natura, ut subest secundæ intentioni universalitatis, seu quatenus universalis, est prædicabilis de pluribus*, in qua ratione reduplicationis, non appellat prædicatum supra naturam, quæ est subiectum secundæ intentionis universalitatis, sed supra ipsam secundam intentionem concernentem naturam: ergo nullatenus convenit naturæ essentialiter definitio universalis, sed tantum accidentaliter, & denominativè.

14 Et potest confirmari nostra ratio, quia definitum per se debet dicere in recto rationem formalem propter quam definitur; sed natura, ut subest secundæ intentioni, non dicit in recto, sed in obliquo universalitatem, quo est ratio formalis propter quam definitur definitione universalis: ergo natura, adhuc, ut subest secundæ intentioni universalitatis, non est definitum in hac definitione. Argumenta contra hanc conclusionem commodius proponuntur post conclusionem sequentem.

15 Dicimus quinto: definitum per se, & formale in definitione universalis est secunda intentio universalitatis in concreto, seu ut concernens naturam. Probatur primo ex significatione concretorum, quia quod primò, & per se significat concretum, est per se definitum in definitione illius: sed concretum primò, & per se significat formam, & de connotato subiectum, ut suo loco diximus: ergo definitum per se in definitione concretorum est forma, ut concernens subiectum, sed universale est quoddam concretum accidentale: ergo definitum formale, & per se in definitione illius est forma, scilicet, secunda intentio universalitatis, ut concernens naturam.

16 Prob. secundò, quia illud est definitum in  
defi-



definitione universalis, cuius essentia per illam explicatur: sed per definitionem universalis solum explicatur essentia secundę intentionis universalitatis concernentis naturam, in qua exercetur universalitas: ergo secunda intentio universalitatis in concreto est definitum in definitione universalis. Prob. min. quia per definitionem explicatur essentia illius, cuius effectus manifestatur: sed per definitionem universalis manifestatur prædicatio de pluribus, quæ est effectus secundę intentionis universalitatis connotantis naturam, ut subiectum in quo exercetur prædicatio: ergo per definitionem universalis explicatur essentia secundę intentionis connotantis naturam, ac per consequens, secunda intentio universalitatis in concreto est definitum in tali definitione.

17 Confirmatur, quia licet, quod videtur, v. g. sit album, tamen obiectum formale specificativum visus est albedo, ut connotans subiectum: ergo licet, quod prædicatur de inferioribus sit, quod est universale, definitum per se, & formale definitionis universalis erit secunda intentio universalitatis, ut connotans subiectum, seu naturam. Paritas videtur tenere; quia ex eo subiectum albedinis non est obiectum formale, & specificativum visus, sed albedo, quia specificativum visus non videtur ratione alterius, & subiectum videtur ratione albedini, sed prædicari de pluribus, quod explicatur per definitionem universalis, non convenit naturæ ratione sui, sed ratione secundę intentionis: ergo non natura, ut subest secundę intentionis: sed secunda intentio, ut connotat naturam, est definitum formale, & per se in definitione universalis, eo vel maximè, quia definitio non debet convenire definito per se, & formali ratione alterius.

18 Arguunt primò; illud est definitum per se, & formale in definitione universalis, quod  
per

per se prædicatur de pluribus, sed natura prædicatur per se de pluribus, non verò secunda intentio universalitatis; non enim valet: *Homo est genus*; *Petrus est species*, &c. valet tamen: *Homo est animal*; *Petrus est homo*, &c. ergo natura, & non secunda intentio, est per se definitum in definitione universalis.

19 Antequam hoc argumentum solvamus, potest retorqueri in tenentes oppositum huius, & antecedentis conclusionis, in hunc modum; ergo definitum per se in definitione universalis non est natura, ut subest secundæ intentioni. Prob. conseq. Quia juxta argumentum, illud est definitum per se in definitione universalis, quod per se prædicatur de inferioribus, sed natura, ut subest secundæ intentioni, non prædicatur per se de inferioribus; ergo non est definitum in definitione universalis. Prob. min. quia falsum est dicere; *Homo est animal*; ut *animal subest secundæ intentioni genericitatis*; quia idem est, ac dicere; *Homo est genus* (nam animal, ut subest secundæ intentioni genericitatis est genus) quod falsum est; ergo natura, ut subest secundæ intentioni universalitatis, non prædicatur per se de inferioribus, ac per consequens in hoc sensu natura non est definitum in definitione universalis. Ecce quomodo sic contra nos arguentes, contra se ipsos æqualiter militant.

20 Nunc directè ad argumentum resp. primò, neg. min. quia natura non per se, sed per accidens prædicatur de inferioribus; nam ut dictum est, prædicari de illis convenit illi ratione secundæ intentionis universalitatis, quæ est quoddam accidens rationis ipsis naturæ per intellectum applicatum; unde illæ prædicationes; *Homo est animal*, &c. accidentaliter conveniunt naturæ.

21 Replic. natura, quæ prædicatur de pluribus, v. gr. *Animal*, essentialiter includitur in  
*Cursus Philos. Tom. I.* V in-

inferioribus: ergo non convenit illi accidere alteri, sed essentialiter prædicari de illis. Resp. neg. conseq. Aliud enim est, naturam includi essentialiter in inferioribus, & aliud, quod essentialiter conveniat illi prædicari de illis, nam quod includatur in illis essentialiter, solum facit, quod sit essentialiter id, quod prædicatur; non autem essentialiter illi convenire prædicari de illis; nam solum de illis prædicatur natura, ut concipitur ab intellectu, ut prædicabilis, quod quidem, ut sæpè dictum est, solum accidentaliter convenit naturæ: quippè ratione accidentis rationis, scilicet, secundæ intentionis universalitatis.

22 Respondetur secundò ad argumentum disting. mai. illud est definitum per se, & formale in definitione universalis, quod per se prædicatur de pluribus prædicatione signata, concedo; prædicatione exercita, nego. Disting. etiam min. sed natura prædicatur per se de pluribus, non verò secunda intentio, prædicatione exercita, omitto, prædicatione signata, nego; & neg. conseq. Omissa min. quia natura, nec exercitè, nec signatè prædicatur per se de inferioribus, ut dictum est, & amplius dicetur; solum autem secunda intentio universalitatis prædicatur per se signatè, ut infra etiam amplius patebit.

23 Replic. prædictio signata dicit potentiam, prædictio exercita dicit actualem prædicationem: sed cui convenit potentia prædicandi, convenit prædicari actualiter: ergo cui convenit prædicari signatè, convenit prædicari exercitè, sed secundæ intentioni non convenit prædicari exercitè; ergo neque convenit prædicari signatè. Resp. 1. dist. min. cui convenit potentia prædicandi, convenit prædicari actualiter, potentia prædicandi convenit illi, ut est quid signatum in illa potentia, concedo, si tantum conveniat illi, ut est ratio signandi talem potentiam, nego. Simil. dist. conf. cui convenit præ-

prædicari signatè, convenit prædicari exercitè, si prædicari signatè conveniat illi, ut est quid signatum in illa potentia, concedo, si tantum conveniat illi, ut est ratio signandi talem potentiam, nego, & concessa minori subsumpta, dist. ultimum consequ. secundæ intentioni nequit convenire prædicari signatè, ut quid signatum in potentia prædicandi, concedo; ut ratio signandi talem potentiam, nego. Etenim natura per secundam intentionem est quid signatum in potentia prædicandi, seu fit prædicabilis de pluribus, ideòque exercitè de illis prædicatur: secunda verò intentio tantum est ratio signandi talem potentiam, seu ratio constituens naturam prædicabilem de pluribus, ideòque non prædicatur exercitè.

24 Aliter tamen potest responderi disting. min. & simul consequ. cui convenit potentia prædicandi, seu prædicari signatè, convenit prædicatio actualis, seu prædicari exercitè, eo modo, quo convenit unum, convenit aliud, concedo, alio modo, nego, & disting. min. subsumpt. secundæ intentioni non convenit prædicari exercitè, ut *quo*, seu ut ratio formalis, qua natura exercitè prædicatur, nego, ut *quod*, seu ut id, quod exercitè prædicatur, concedo, & disting. consequ. secundæ intentioni non convenit prædicari signatè, ut *quo*, seu ut ratio formalis, qua natura est prædicabilis, nego, ut *quod*; seu ut id, quod est prædicabile, ut *quod*, concedo. Etenim tam in prædicatione signata, quam exercita ingreditur natura, & secunda intentio; nam natura est prædicabilis, & prædicatur, ut *quod*; secunda verò intentio universalitatis est prædicabilis, & prædicatur, ut *quo*, hoc est, est ratio formalis, qua natura est prædicabilis, & prædicatur actualiter de pluribus, ita ut, si natura non esset affecta secunda intentione universalitatis, neque esset prædicabi-

lis, neque actualiter prædicaretur de pluribus. Est tamen maxima differentia inter naturam, & secundam intentionem, quòd naturæ, tam prædicabilitas, quam prædicatio actualis de pluribus, ut *quod*, convenit peraccidens, hoc est, ratione secundæ intentionis, quæ ut sæpè dictum est, est accidens rationis applicatum naturæ per intellectum; at verò secundæ intentioni, tam prædicabilitas, quam prædicatio actualis, ut *quo*, convenit per se, per se enim est ratio formalis, quia natura est prædicabilis, & prædicatur de pluribus. Unde cum in præsentiquæstione solum inquiramus, quodnam sit definitum per se, & formale in definitione universalis? Manet firmum, tale definitum solum esse secundam intentionem concernentem naturam, cum illi per se, & formaliter conveniat prædicabilitas, seu definitio; naturam verò, ut subest secundæ intentioni, solum esse definitum peraccidens, & materiale, cum illi tantum peraccidens, & materialiter conveniat prædicabilitas, prædicatio, seu definitio.

25 Dices contra; ex prædicta doctrina sequitur, quod secunda intentio tantum est definitum *quo* in definitione universalis, sed in hac quæstione loquitur de definito, *quod*: ergo secunda intentio non est definitum in definitione universalis, modo, quo inquiritur in quæstione. Aliqui respondent, concessa mai. neg. min. & conseq. Quia, inquiunt, in concretis accidentalibus, ut est universale, non datur propriè, & rigorosè definitum formale *quod*, quia cum prædicta concreta non significant formam, ut per se stantem, id est, ut *quod est*, sed ut alteri adjacentem, id est, ut *quod aliud est*, nihil mirum, quòd propriè, & rigorosè non habeant definitum formale *quod*.

26 Aliter potest responderi neg. mai. Quia ipsa secunda intentio in concreto est definitum  
for-

formale *quod*; nam definitum *quod*, nihil aliud est, nisi id, cujus natura per definitionem explicatur, & cum per definitionē universalis explicetur natura secūdx intentionis universalitatis in concreto, hinc est, quòd talis secunda intentio in cōcreto est definitum formale *quod* in tali definitione, licet aliàs prædicabilitas tantum conveniat illi, ut *quo*, modo explicato; nam respectu diversorū benè potest aliquid esse *quo*, & *quod*; albedo enim in hac definitione: *Album est disgregativum visus*, est *quod* per se definitur, & est *quo* subjectum est album, similiter secunda intentio universalitatis est *quod* per se definitur in definitione universalis, & est *quo* natura est prædicabilis.

#### Q U Æ S T I O IV.

*Verum universalia, seu prædicabilia sint tantum quinque?*

**P**RO intelligentia quæstionis notandum est, quòd quando Porphyrius divisit universale, seu prædicabile in genus, speciem, differentiam, proprium, & accidens, tantum divisit universale limitatum, & prædicamentale; quia hoc fecit ad intelligentiam prædicamentorum, unde aliquæ conditiones solent assignari, juxta varias sententias ad rationem universalis prædicamentalis, nostri autem communiter quatuor assignant. Prima, quòd sit unum incomplexum; quia prædicamenta sunt voces simplices, & incomplexæ. Unde complexa, etiam si de pluribus prædicentur à ratione universalis prædicamentalis excluduntur, ut *homo albus*: *animal rationale*. Secunda, quòd sit univocum; quia universale debet significare unā naturam communem. Unde æquivoca, & analogica excluduntur à ratione universalis, quia non unicam, sed plures naturas significant.

V 3 Ter.

Tertia, quòd sit finitum, & limitatum, & non sit transcendens. Unde Deus, & transcendentia excluduntur à ratione universalis; de quo amplius in Metaphysica. Quarta, quòd significet naturam abstractam ab individuis. Unde individuum vagum, ut *quidam homo* excluditur à ratione universali, quia non unum commune pluribus, sed plura indeterminatè significat. Quas conditiones, si rectè observaveris, plura argumenta solves.

2. Dicimus: prædicta divisio universalis, seu prædicabilis in quinque membra assignata est adæquata. Hæc conclusio est communior consensus Philosophorum, quam tenet Scotus quæst. 12. Universal. & in 1. dist. 8. quæst. 3. sub litt. S. licet non desint aliqui, qui ex una parte tenent, prædictam divisionem esse nimis latam, & alii ex alia, esse valde diminutam, ut in argumentis patebit.

3. Probatur autè sufficientia divisionis ratione deducta ex Scoto citato quæst. 12. univ. Quia universalis, seu prædicabilia inter se differunt per diversos modos, quibus de inferioribus prædicantur: sed quinque tantum modis possunt universalis prædicari de inferioribus: ergo quinque sunt prædicabilia, seu universalis. Probatur min. Quia omne, quod prædicatur, vel prædicatur in *quid*, vel in *quale*; si in *quid*, vel dicit totam essentiam inferioris, & sic est species; vel dicit partem essentiae, & sic est genus: Si in *quale*, vel essentialiter, & sic est differentia, vel extra essentialiter, seu accidentaliter, & hoc, adhuc dupliciter: vel accidentaliter necessario, & sic est proprium, vel accidentaliter contingenter, & sic est accidens: sed præter hos modos prædicandi, nullus alius assignari potest: ergo quinque sunt modi, quibus universalis possunt prædicari, & non plures, & consequenter quinque assignata, & non plura, sed pauciora, sunt prædicabilia, seu universalis.

4 Intendentes prædictam divisionem esse nimis latam, sic arguunt ex Arist. 1. Topic. c. 2. 3. & 4. ubi tantum numeravit quatuor prædicata, scilicet genus definitionem, proprium, & accidens: ergo tantum sunt quatuor prædicabilia. Patet consequentia; nam tot sunt prædicabilia, quot prædicata. Resp. neg. consequ. & disting. prob. tot sunt prædicabilia, quot prædicata. Logica, concedo, quot prædicata topica nego; Aristot. autem solum prædicata topica numeravit, quæ sunt illa, quæ habent subiectum commune, de quo prædicentur, & sic inter illa non numeravit speciem, quia non est prædicabilis de subiecto communi, differentiam autem non numeravit, quia subalterna convertitur cum genere, & infima cum definitione.

¶ Arguunt ratione; numerus prædicabilium desumitur ex diverso modo prædicandi: sed tantum sunt duo modi prædicandi; scilicet, essentialiter, & accidentaliter; ergo tantum sunt duo prædicabilia. Resp. disting. min. Tantum sunt duo prædicti modi prædicandi, ulterius indivisibiles, nego; ulterius divisibiles, concedo, & neg. consequ. Etenim verum est, universale, seu prædicabile in communi immediate dividi in prædicari essentialiter, & accidentaliter, seu in *quid*, & in *quale*, & deinde, quilibet modus prædicandi subdividitur modo dicto in nostra ratione, & ulterius nulla datur divisio prædicabilium. Ex quo facile resolvitur duplex dubium, quod in præsentia occurrit; primum, an divisio universalis in quinque prædicabilia sit immediata? Constat enim ex dictis esse mediatam, cum prius dividatur in prædicari in *quid*, & in *quale*, & deinde in quinque prædicta membra. Secundum, an quinque prædicabilia enumerata sint species infimæ universalis? Ad quod respondetur etiam ex dictis affirmativè; quia species infimæ sunt illæ, quæ non subdivi-



duntur in alias species : sed quinque prædicta prædicabilia non subdividuntur in alias species universalis, ergo sunt species infimæ.

5 Intendentes prædictam divisionem esse diminutam, arguunt primò, prædicamenta sunt decem : ergo & prædicabilia. Probatur conseq. Quia numerus prædicabilium desumitur ex modo prædicandi : sed etiam numerus prædicamentorum sumitur ex modo prædicandi : ergo tot sunt prædicabilia, quot prædicamenta. Probatur minor ; quia modus prædicandi desumitur ex modo essendi : sed prædicamenta desumuntur ex modo essendi : ergo desumuntur ex modo prædicandi. Resp. neg. consequ. cujus prob. neg. minor. & disting. maior. prob. modus prædicandi desumitur ex modo essendi per se, vel in alio, tanquam in subiecto, neg. ex modo essendi in inferioribus, conc. disting. etiam min. prædicamenta desumuntur ex modo essendi per se, vel in alio, tanquam in subiecto, conc. ex modo essendi in inferioribus, neg. & neg. consequ. Prædicamenta enim desumuntur ex modo essendi per se, quod convenit substantiæ, & ex diversis modis essendi in alio, tanquam in subiecto in hæssionis, qui modi, cum sint novem, ut suo loco dicitur, constituunt novem genera accidentium, & sic sunt decem prædicamenta ; at verò prædicabilia desumuntur ex modo prædicandi fundato in modo essendi in inferioribus ; & cum tantum quinque modis enumeratis possint rationes communes esse in inferioribus, ideo tantum assignantur quinque prædicabilia, seu universalia.

7 Arguunt secundo, differentia infima, & subalterna constituunt duo prædicabilia diversa : ergo non sunt tantum quinque prædicabilia. Prob. antec. Quia ex eo genus, & species constituunt duo prædicabilia diversa, quia genus prædicatur de differentibus specie, & species de differentibus numero ; sed differentia subalterna præ-

prædicatur de differentibus specie, v.g. *sensibile* prædicatur de *homine*, & *bruto*; & differentia infima prædicatur de differentibus numero, v.g. *rationale* prædicatur de *Petro*, & *Paulo*: ergo species infima, & subalterna constituunt duo diversa prædicabilia. Respond. neg. ant. & major. prob. Etenim genus, & species non ex eo constituunt diversa prædicabilia, quia genus prædicatur de pluribus differentibus specie, & species de pluribus differentibus numero, sed ex eo quod genus tantum dicit partem essentiae per modum potentiae, & contrahibilis, species verò dicit totam essentiam, at verò differentia infima, & subalterna non variant modum prædicandi; nam quælibet dicit partem essentiae actuantis, & contrahentis de quibuscumque prædicentur, unde non duo, sed unum tantum prædicabile constituunt.

## Q U Æ S T I O V.

*Utrum universale sit genus ad quinque prædicabilia?*

**P**RO intelligentia quæstionis notandum est, quod non loquimur de prædicabilibus materialiter sumptis, seu de naturis, quæ universales denominantur; nam certum est, universale non esse genus respectu illarum; nam aliquando sunt substantiæ, aliquando accidentia; jam entia realia, jam entia rationis, quibus nihil commune genericum assignari potest, loquimur autem de prædicabilibus formaliter sumptis.

2 Dicimus: universale est genus ad quinque prædicabilia. Hæc conclusio est communior consensus Philosophorum. Probatur, quia illud est genus, quod prædicatur in *quid*, & univocè de differentibus specie: sed universale est univocum, & prædicatur in *quid* de quinque

prædicabilibus, quæ inter se differunt specie: ergo universale est genus ad quinque prædicabilia. Minor in qua est difficultas, probat. quoad primam partem, quia univoca sunt, quorum nomen est commune, & ratio significata per illud in omnibus est eadem: sed nomen *universale* est commune quinque prædicabilibus, & ratio significata per illud, scilicet, *prædicabilitas de pluribus*, in omnibus est eadem: ergo universale est univocum respectu quinque prædicabilium.

3 Prob. min. quoad secundam partem; Quia ratio universalis essentialiter includitur in quinque prædicabilibus: sed quod includitur essentialiter, prædicatur in *quid*: ergo universale prædicatur in *quid* de quinque prædicabilibus. Prob. minor. quoad tertiam partem; Quia illa differunt specie, quæ habent diversas essentialiter differentias: sed quinque prædicabilia habent diversas differentias essentialiter, scilicet, diversos modos prædicandi assignatos: ergo quinque prædicabilia differunt specie, & consequenter ex omni parte universale est genus ad quinque prædicabilia.

4 Arguunt primò; universale non est quid commune univocè quinque prædicabilibus: ergo non est genus ad illa. Prob. antec. Quia quod convenit aliquibus per se, & aliquibus per accidens, non est commune univocum illis: sed prædicabilitas de pluribus per se convenit aliquibus prædicabilibus, quæ essentialiter prædicantur, ut sunt genus, species, & differentia, accidentaliter verò aliis, quæ extra essentialiter prædicantur, ut sunt proprium, & accidens: ergo universale non est quid commune univocè quinque prædicabilibus. Respond. neg. antec. & minor. prob. Omnibus enim prædicabilibus convenit essentialiter prædicabilitas de pluribus, licet aliqua ex illis sint quid essentialiter, si materialiter sumantur, respectu illorum de quibus

bus prædicantur, & alia sint quid accidentale; nam si formaliter sumantur, ut sumuntur in præsentī, tam per se, & essentialiter convenit accidenti prædicari accidentaliter, quam generi prædicari essentialiter.

5 Arguunt secundò: Si universale esset genus ad quinque prædicabilia, esset superius, & inferius respectu suæ speciei: hoc implicat: ergo universale non est genus ad quinque prædicabilia. Prob. major. Nam universale, ut supponitur, est superius ad omnia prædicabilia, tanquam ad species illius: sed etiam esset inferius respectu unius prædicabilis, scilicet generis in communi, sub quo contineretur, ut quoddam genus particulare; ergo esset superius, & inferius respectu suæ speciei. Respond. disting. mai. esset superius, & inferius respectu suæ speciei, secundum eandem rationem, nego, secundum diversas rationes, concedo; eodem modo distinguendum est totum argumentum. Ut autem hæ diversæ rationes percipiantur.

6 Observandum est, universale dupliciter posse considerari. Primo, essentialiter, quatenus dicit rationem prædicabilitatis de pluribus, abstrahendo ab hoc, vel illo modo prædicabilitatis, & denominativè, seu accidentaliter, quatenus per aliam secundam intentionem prædicabilitatis de pluribus differentibus specie dicitur genus, quia una secunda intentio benè potest fundari super aliam, & in tali casu, secunda intentio, quæ est fundamentum alterius, dicitur prima comparativè ad illam, unde secunda intentio universalis dicitur prima comparativè ad secundam intentionem generis, quam fundat. Unde sequitur, quod universale essentialiter sumptum, est quid superius, & includitur essentialiter in quinque prædicabilibus, sumptum vero denominativè, seu accidentaliter, ut dicit secundam intentionem generis, est inferius, & con-

tinetur sub genere in communi, tanquam quoddam genus particulare. Ecce ergo diversas rationes, sub quibus universale est superius, & inferius, respectu suæ speciei, scilicet generis in communi, nam est superius essentialiter in ratione universalis, & est inferius accidentaliter, & denominativè, ut est quoddam genus particulare.

7 Dices; si universale tantum denominativè, & accidentaliter est genus; ergo non est genus essentialiter ad quinque prædicabilia; sed hoc non est dicendum; ergo ruit doctrina supradicta. Resp. concedendo libenter primam consequ. & neg. min. subsumptam, & ultimam consequ. Etenim universale non est essentialiter, sed tantum accidentaliter genus ad quinque prædicabilia, quod non est peculiare universalis, sed idem est de qualibet alia natura, quæ genus, seu quodlibet aliud prædicabile denominatur, animal enim, & est animal, & est genus respectu hominis, & bruti, sed diversimodè, nam est animal essentialiter, & est genus accidentaliter, & denominativè, sumpta denominatione a secunda intentione generis, quæ accidentaliter illi applicatur ab intellectu, sic similiter universale, & est universale, & est genus, respectu quinque prædicabilium, sed diversimodè; nam est universale essentialiter, & est genus accidentaliter, & denominativè sumpta denominatione a secunda intentione generis, quæ accidentaliter illi applicatur ab intellectu.

8 Dices iterum; animal nullatenus continetur sub homine, adhuc accidentaliter; quia animal est genus ad hominem; ergo si universale continetur, saltem accidentaliter sub genere, primò prædicabili, non est genus ad illud. Resp. disting. antec. Quia animal est genus ad hominem præcisè, nec accidentaliter continetur sub illo, nego, quia nec animal, nec secunda intentio generis illud denominans, continetur sub  
sub

sub homine, concedo, & nego consequentiam : Etenim, licet universale secundum se, & essentialiter, non contineatur sub genere primo prædicabili, sicut neque animal sub homine; tamen secunda intentio, à qua universale denominatur genus, continetur sub genere in communi primo prædicabili, at vero secunda intentio, qua animal denominatur genus, non continetur sub homine, & sic nihil mirum, quod universale accidentaliter contineatur sub genere primo prædicabili, licet animal, neque accidentaliter contineatur sub homine.

9 Arguunt tertio; si universale esset genus ad quinque prædicabilia, una species prædicaretur de alia; sed hoc non est dicendum; ergo universale non est genus ad quinque prædicabilia. Prob. mai. Quia hæ essent veræ prædicationes; *Genus est species universalis, differentia est species universalis*, & sic de aliis; ergo secundum prædicabile (scilicet species) quod est una species universalis, prædicaretur de aliis prædicabilibus, quæ sunt etiam species universalis. Resp. disting. mai. una species prædicaretur de alia accidentaliter, & denominativè, concedo; essentialiter, nego, quod nullum est inconveniens, ut patet ex supradictis. Aliter potest responderi, neg. mai. Ad prob. Dicimus, quod ratio speciei, quæ prædicatur in supradictis prædicationibus, non est ratio secundi prædicabilis, quia hoc constituitur in esse talis per rationem speciei prædicabilis, quæ ratio nullatenus prædicatur de aliis prædicabilibus; ratio autem, quæ ibi prædicatur, est ratio speciei subiicibilis, quæ convenit quinque prædicabilibus respectu universalis in communi per secundam intentionem subiicibilitatis; quod contingit in quibuscumque aliis speciebus, respectu sui generis, nam homo, & brutum non prædicantur ad invicem, eo quod sint species animalis; benè tamen de quolibet prædicatur

accidentaliter, quod sint species respectu sui generis per secundam intentionem subiicibilitatis, valet enim: *Homo est species animalis: brum est species animalis.* Alia argumenta coincidunt cum præcedentibus, ideoque illa omitimus, quia si rectè attendatur ad doctrinam supra datam, non difficilè solventur.

## Q U Æ S T I O VI.

*In qua resolvuntur aliqua dubia circa universale.*

1 **Q**uia diximus, universale esse prædicabile de pluribus aliqua dubia se offerunt ad maiorem illius intelligentiam. Igitur, dubitabis primo, an universale requirat plura inferiora realiter existentia? Resp. negativè; sufficit enim, quod habeat plura inferiora possibilia. Probatur; Quia scientiæ versantur circa universalia secundum rationem, qua sunt necessaria, & non secundum rationem, qua sunt contingentia: sed quævis inferiora, quoad existentiam sunt contingentia, & quoad essentiam sunt necessaria, prout abstrahunt ab existentia: ergo universale non requirit plura inferiora realiter existentia, sed sufficiunt possibilia. Confirmatur; Quia juxta communiores sententiam, natura Solis, Lunæ, & Fœnicis possunt concipi, ut universales: sed non dantur actualiter existentia plura individua Solis, Lunæ, & Fœnicis, sed tantum possibilia: ergo universale solum requirit plura inferiora possibilia, non autem existentia.

2 Argues contra; ut natura fiat universalis, requiritur, quod abstrahatur: sed si non existunt inferiora a parte rei, non est unde abstrahatur natura: ergo ut fiat universalis, requirit plura inferiora actualiter existentia. Confirmatur; Quia natura non dicitur actu existere,

eo quòd potest existerè: ergo natura nequit dici universalis actualiter, nisi actualiter existat in pluribus.

2 Resp. neg. min. Quia natura potest abstrahi ab uno solo individuo existente, & licet nullum existat, potest abstrahi ab individuis possibilibus cognitis. Ad confirmationem resp. neg. parit. Quia ad hoc, ut natura dicatur actu existerè, non sufficit, quòd possit existerè, seu sit intra causas, sed necessariò requiritur, ut actu ponatur extra illas; at verò, ut natura actu dicatur universalis, nullatenus requiritur, quòd actualiter fundamentaliter sumpta existat in pluribus; sed sufficit, quòd in illis multiplicata possit existerè; solum autem requiritur, quòd tam universale, quàm inferiora, formaliter, ut talia sint extra suas causas, hoc est, facta ab intellectu per secundas intentiones superioris, & inferiorum, quòd utique potest esse, absque reali existentia inferiorum; cum tamen sint possibilia, & cognita.

4 Dubitabis secundò, an ut natura fiat universalis, requiratur, quòd sit multiplicabilis realiter in plura inferiora? Resp. affirmativè. Probatur; Quia licet universale fiat per intellectum, tamen habet fundamentum in re: sed tale fundamentum nequit esse aliud, quàm quòd naturæ non repugnet plurificari in pluribus à parte rei: ergo ut natura fiat universalis, necessariò requiritur, quòd sit plurificabilis à parte rei. Probat. min. Quia si repugnet naturæ à parte rei plurificari, nequit per intellectum concipi, auferendo ab illa talem repugnantiam, & illi tribuendo aptitudinem oppositam; alias natura Divina, cui repugnat multiplicari, posset concipi sine tali repugnantia, & cum aptitudine ad opposita, & consequenter, ut universalis, quòd nullus concedit: ergo fundamentum universalitatis est non repugnantia naturæ, ut plurificetur.

Con-



5 Confirmatur ; Quia natura , cui repugnaret pluralitas , vel conciperetur cum tali repugnantia , vel sine illa , seu cum aptitudine opposita : sed ut fiat universalis , nullo modo ex prædictis potest concipi : ergo natura , cui repugnat pluralitas , nequit fieri universalis. Prob. min. quoad primam partem ; quia , universale est natura concepta cum aptitudine ad essendum in pluribus : ergo natura concepta cum tali repugnantia , non concipitur , ut universalis. Prob. min. quoad secundam partem ; quia tunc natura conciperetur cum opposito suæ essentiae : sed hoc prorsus repugnat ; quia esset aliquomodo destructio suæ essentiae ; ut si intellectus conciperet hominem cum rudibilitate , quæ directe opponitur rationalitati , & sic conciperet destructionem essentiae hominis : ergo natura , cui repugnat pluralitas , nullatenus potest concipi , ut universalis. Deinde repugnantia pluralitatis nequit præbere fundamentum intellectui ad concipiendam non repugnantiam , seu aptitudinem ad plurificari : ergo natura , cui repugnat pluralitas , nequit concipi , ut apta plurificari cum aliquo fundamento in re ; ergo cum universale fiat ab intellectu cum fundamento in re , nequit natura , cui repugnat pluralitas , fieri universalis ab intellectu.

6 Arg. contra 1. universalitas est relatio rationis ; ergo ad illam apprehendendam sufficiunt inferiora apprehensa per intellectum , licet sint impossibilia . Patet consequ. quia sicut relatio realis petit terminum realem , relationi rationis sufficit terminus rationis ; sed inferiora apprehensa per intellectum , licet sint impossibilia , sunt quid rationis ; ergo sufficiunt pro termino universalitatis. Resp. disting. antec. universalitas est relatio rationis cum fundamento in re , concedo ; sine fundamento in re , nego , & neg. consequ. & disting. mai. prob. relationi rationi sufficit

ficat terminus rationis, eo modo quo est relatio concedo; alio modo, nego, id est si relatio rationis est cum fundamento in re, ut est universalitas, sufficit illi terminus rationis cum fundamento in re; non autem terminus rationis sine fundamento in re; disting. etiam min. inferiora apprehensa, licet sint impossibilia, sunt quid rationis sine fundamento in re, & concedo; cum fundamento in re, nego: sicut enim in natura cui repugnat plurificari, deficit fundamentum, ut concipiatur, ut universalis, seu superior; ita in individuis impossibilibus, seu repugnantibus deficit fundamentum, ut concipiantur, ut inferiora; nam superius, & inferius sunt correlativa rationis idem fundamentum requirentia; unde neg. conseq.

8 Arg. 2. Natura Angelica potest concipi, ut universalis; sed repugnat multiplicari numericè; ergo natura, cui repugnat multiplicari, potest concipi, ut universalis. Confirmatur ex Arist. dicente, corpora cœlestia posse fieri universalis, licet ut ipse asserit, nequeant multiplicari, eo quod unum quodque illorum constat tota materia, non solum actuali, sed etiam possibili in sua specie. Resp. neg. min. non enim repugnat, naturam Angelicam numericè multiplicari, ut latè dicitur in materia de Angelis, & etiam colligitur ex dicendis in Physica loquendo de principio individuationis, unde etiam colligitur, quid sit respondendum ad confirmationem. Pro nunc autem resp. ad illam, quod Arist. loquitur de immultiplicabilitate ab extrinseco, non autem ab intrinseco, hoc est, non quia forma, & natura cœlorum non sit alteri communicabilis, sed quia non datur aliquod agens naturale, quod possit inducere formam illorum in aliquam materiam.

8 Dubitabis 2. An natura universalis per actuale prædicationem amittat universalitatem? Resp. quod natura universalis specificativè  
sum.

sumpta, hoc est, ipsa natura, quæ actualiter prædicatur, prout est concepta, ut superior, & universalis, non amittit universalitatem; at verò si sumatur reduplicativè, ut actualiter prædicata, amittit universalitatem.

6 Prob. 1. pars; Quia natura, quæ actualiter prædicatur, est quæ repræsentatur, ut superior, & universalis per intellectum; ergo ipsa natura, quæ actualiter prædicatur, prout repræsentatur, ut superior per intellectum, manet universalis, eo vel maximè, quia circa naturam potest simul esse duplex actus intellectus; alter respiciens naturam, ut prædicabilem de pluribus, & alter actualiter prædicans ipsam naturam de aliquo, qui actus nullatenus opponuntur, unde quòd actualiter per unum actum prædicetur de aliquo, non obstat, ut maneat universalis, quatenus per alium actum manet concepta, ut prædicabilis de pluribus. Sic debet intelligi Scotus quando dicit, quod universale est in potentia proxima, ut prædicetur de inferioribus, ita quòd quodlibet sit ipsum, nam si quando prædicatur de uno, non remaneret prædicabile de aliis, iam universale non esset prædicabile de pluribus, sed de uno tantum. Ubi adverte, quod si natura universalis prædicatur actualiter de omnibus inferioribus possibilibus, tunc non remaneret universalis, quippè non remaneret in potentia ad prædicari; quod est de essentia universalis, cum quo facile aliqua argumenta solvuntur.

10 Prob. 2. pars; Quia natura reduplicativè, ut actualiter prædicata; fit determinatè alicuius inferioris, v. gr. natura animalis reduplicativè, ut prædicata in hac prædicatione; *Homo est animal*, fit determinatè speciei humanæ; sed natura, ut est determinatè alicuius inferioris, nequit prædicari de alio: ergo natura reduplicativè, ut actualiter prædicata, non remanet universalis. Minor patet; quia natura,

ra, ut est determinatè alicujus inferioris, dicit non solum ipsam naturam, sed etiam differentiam illius inferioris: sed natura, prout dicit differentiam alicujus inferioris, nequit de alio inferiori prædicari, ut ex se patet, nam hæc est falsa prædicatio: *Equus est animal, prout animal est simul rationale*; ergo natura, prout est determinatè alicujus inferioris, nequit prædicari de alio, & consequenter, reduplicativè, ut prædicata actualiter non remanet universalis. Cum hac distinctione naturæ specificativè, & reduplicativè sumpta respondetur faciliè ad quælibet argumenta.

11 Dubitabis 3. Quomodo intelligatur Scotus, quondo dicit, universale habere unitatem etiam numeralem; nam in 2. dist. 3. quæst. 1. §. *Sed contra, vers. Ad primum dico* litt. H. loquendo de universali; habet hæc verba; *Quia licet alicui existenti in re non repugnet esse in alia singularitate ab illa, in qua est; non tamen illud verè dici potest de quolibet inferiori, quòd quodlibet est ipsum, hoc est enim solum possibile de obiecto eodem indifferenti actui considerato ab intellectu, quòd quidem, ut intellectum habet unitatem etiam numeralem obiecti, secundum quam ipsum idem est prædicabile de omni singulari, dicendo, quòd hoc est hoc: & ratio dubitandi est quia quod habet unitatem numeralem, seu quod est unum numero, nequit prædicari de pluribus: ergo vel universale non habet talem unitatem numeralem, vel non est prædicabile de pluribus.*

12 Pro responsione nota, ut sæpè dictum est, quòd universale duo includit, scilicet, secundam intentionem pro formali, & naturam pro materiali, & de connotato. Hoc notato.

13 Resp. Ad dubium ex Licheto super Scotum citatum, quòd in utroque sensu potest dici, universale habere unitatem numeralem, dixer-

verſimodè tamen, nam ſi univerſale ſumatur materialiter, ſeu pro natura denominata, non dicitur habere unitatem numericalem propriè, & rigorosè, quatenus ſcilicet, unitas numeralis dicit differentiam numericam, ſeu individua-lem; ſed quatenus univerſale in hoc ſenſu, eſt unū de numero intelligibilium, quod ſic intel-ligitur; ens in communi eſt adæquatum intelli-gibile, quippè eſt obiectum adæquatum intelle-ctus; omnia autem entia partialia, ut continen-tur ſub ente, ſunt intelligibilia partialia, quippè ſunt obiecta partialia intellectus, & cum quæli-bet natura ſit intelligibilis, ut obiectum partiale intellectus, quælibet natura poteſt dici, eſſe unum de numero intelligibilium.

14 Si autem univerſale ſumatur formaliter, ſeu pro ſecunda intentione univerſalitatis, tunc univerſale eſt unum numero propriè dictum; quia ſecunda intētio univerſalitatis eſt una nu-mero. Per quod patet ad rationem dubitandi, diſtinguimus enim antec. Quod habet unitatem numericalem in primo ſenſu, nequit prædicari de pluribus, nego; quod habet unitatem nume-ricalem in ſecundo ſenſu, ſubdiſtinguo; nequit prædicari de pluribus, ut id, quod prædicatur, concedo; ut id, quo aliud prædicatur, nego, & ſimiliter diſting. eſt conſeq. Etenim id, quod prædicatur eſt natura, quæ in hoc ſecundo ſenſu non eſt una numero, ſed tantum in primo; id verò, quo natura prædicatur, ſeu ratio forma-lis qua prædicatur natura, eſt ſecunda intentio univerſalitatis; ad quod non obſtat, quòd ſit una numero, adhuc in ſecundo ſenſu, quia prædicari de pluribus multiplicat numero id, quod prædi-catur; non tamen id quod eſt ratio prædicandi; ideoque, licet unitas numerica quæ eſt immul-tiplicabilis opponatur ei, quòd per prædicatio-nem multiplicatur, non tamen opponitur ei, quod non multiplicatur per prædicationem.

## D I S P. V.

*De Genere primo prædicabili.*

**L**Oquuti sumus in præcedentibus de universali, seu prædicabili in communi, nunc autem agimus de universalibus, seu prædicabilibus in particulari, & primò de genere, quod est primum in ordine prædicabilium.

## Q U Æ S T I O I.

*An Genus rectè definiatur?*

**1** **P**RO intelligentia quæstionis supponendum est primò, quòd non loquimur in præsentì de definitione propriè, & rigorosè sumpta; quia cum hæc explicet naturam rei, illud solum, quod est propriè ens, potest definiri, non autem, quod solum secundum quid est ens, ut est genus, & quodlibet aliud prædicabile, quippè sunt entia rationis; solum autem loquimur de definitione impropriè, & secundum quid sumpta, sicut potest applicari entibus rationis ad similitudinem definitionis, quæ applicatur entibus reallibus.

**2** Supponendum est secundò, quod Porphyrius hic sic genus definivit: *Genus est, quod prædicatur de pluribus differentibus specie in eo, quod quid*. Circa quam definitionem est præsens difficultas, an per illam rectè genus definiatur?

**3** Dicimus; rectè definitur genus per prædictam definitionem. Conclusio est communis, & probatur; Quia illa est bona definitio, quæ constat genere, & differentia: prædicta definitio constat genere, & differentia, ergo optimè per illam definitur genus. Minor probatur explicitè.

plicando definitionem, nam *ly pradicatur de pluribus*, est genus; quia dicit rationem universalis, quod est genus ad quinque prædicabilia, in quo convenit genus cum aliis prædicabilibus. Cæteræ particulae sunt differentia, nam per *ly differentibus specie*, differt genus à specie secundo prædicabili, quod prædicatur de differentibus numero. Per *ly in eo quod quid*, differt ab aliis prædicabilibus, à differentia, quæ etiam si prædicetur in *quid*, non tamen in *eo quod quid* sicut genus, sed in *quale quid*; à proprio, & accidenti, quæ non in *quid*, sed in *quale* prædicantur: ergo prædicta definitio constat genere, & differentia; ac per consequens rectè per illam genus definitur.

4 Pro maiori autem claritate, tam hujus definitionis, quam definitionum aliorum prædicabilium, observandum est, quòd particula *quid*, dicit aliquid essentialiter, & particula *quale* aliquid accidentale, unde quod prædicatur in *quid*, prædicatur essentialiter, & quod prædicatur in *quale*, prædicatur accidentaliter; prædicari autem in utroque, sensu, adhuc potest provenire dupliciter, vel ex parte rei, quæ prædicatur, vel ex parte modi prædicandi. Illud dicitur prædicari in *quid* ex parte rei, quod est de essentia illius, de quo prædicatur, illud verò dicitur prædicari in *quid* ex parte modi prædicandi, quod prædicatur per modum per se stantis, seu contrahibilis; ideòque dicitur prædicari in *eo quod quid*, exemplo res fiet manifesta; animal v. g. prædicatur de homine in *quid* ex parte rei, quia animal est de essentia hominis, & etiam prædicatur in *quid* ex parte modi, quia prædicatur per modum per se stantis, & contrahibilis; ideoque prædicatur in *eo quod quid*.

5 Illud autem prædicatur in *quale* ex parte rei, quod est extra essentiam illius, de quo prædicatur, illud autem prædicatur in *quale* ex parte

te modi, quod prædicatur per modum alteri adjacentis, vel contrahentis, sive in se sit de essentia, vel non, illius de quo prædicatur, quod patet exemplis, duo ultima prædicabilia, scilicet, proprium, & accidens, prædicantur in *quale* ex parte rei significatæ, quia sunt extra essentiam subiecti, & etiam prædicantur in *quale* ex parte modi prædicandi, quia prædicantur per modum alteri adjacentis: tertium autem prædicabile, scilicet differentia, prædicatur in *quale* ex parte modi prædicandi, quia prædicatur per modum alteri adjacentis; & contrahentis, licet ex parte rei significatæ prædicetur in *quid*; quia differentia est de essentia illius, de quo prædicatur; ideoque differentia dicitur prædicari in *quale quid*, ly *quale* denotante modum prædicandi, & ly *quid* rem, quæ prædicatur.

6 Arguunt 1. Definitio debet constare genere, & differentia: sed generis non datur genus, alias daretur processus in infinitum: ergo genus nequit rectè definiri. Confirmatur 1. Quia si genus definiretur per genus, esset respectu eiusdem superius, & inferius, nam jam genus in communi containeretur sub genere, per quod definiretur, & sic esset inferius; deinde, genus, quod hic definitur, cum sit genus in communi, containeret sub se illud genus, per quod definiretur, & sic esset superius: sed nihil, respectu eiusdem, potest esse superius, & inferius: ergo genus nequit definiri. Confirmatur 2. Quia sola species constat genere, & differentia; ergo sola species potest definiri; sed genus non est species: ergo genus nequit definiri.

7 Resp. disting. min. generis non datur genus formaliter, ut tale, seu essentialiter, concedo; materialiter, seu denominativè, & accidentaliter, nego, & nego conseq. Etenim genus, quod hic definitur, est formaliter, & essentialiter genus: genus autem per quod definitur,



tur, scilicet, universale, tantum est genus materialiter, denominativè, & accidentaliter per aliam secundam intentionem generis illi accidentaliter ab intellectu applicatam, ut dictum est. quæst. 5. disp. antec. unde cessat processus in infinitum, nam hic solum sequeretur, si genus definiretur per genus secundum eandem rationem; per quod patet ad primam confirmationem, nam genus est superius & inferius respectu generis per quod definitur; non secundum eandem rationem, sed secundum diversas rationes assignatas, quod nullum est inconveniens. Ad secundam confirmationem respond. neg. minor. subsumpt. Quia genus, ut dictum est quæstione citata, est species subiicibilis, sicut & omnia alia prædicabilia respectu universalis in communi, quod est genus ad illa.

8 Arguunt 2. Prædicta definitio non differt essentialiter à definitione speciei; ergo non est bona. Prob. antec. Quia traditur per prædicari de differentibus specie, & definitio speciei per prædicari de differentibus numero; sed hæc differentia est accidentalis in ratione prædicabilis; ergo definitio assignata generis non differt essentialiter à definitione speciei. Prob. min. Quia differentia subalterna prædicatur de differentibus specie, & differentia infima de differentibus numero; sed tantum accidentaliter, & non essentialiter differunt in ratione prædicabilium; ergo definitio generis tradita per prædicari de differentibus specie, non differt essentialiter à definitione speciei tradita per prædicari de differentibus numero.

9 Resp. neg. antec. & mai. probationis distinguendo; definitio generis traditur per prædicari de differentibus specie, & definitio speciei per prædicari de differentibus numero, ita ut prædictæ definitiones denotent diversum modum prædicandi, concedo; ita ut non denotent

rent diversum modum prædicandi, nego. Disting. etiam min. talis differentia est accidentalis, quando non denotat diversum modum prædicandi, concedo; quando denotat diversum modum prædicandi, nego, & nego consequ. Similiter disting. maj. prob. differentia subalterna prædicatur de differentibus specie, & infima de differentibus numero, denotando diversum modum prædicandi, nego; non denotando, concedo, & concessa minori, neg. consequentiam.

10 Etenim, genus prædicatur, ut pars essentia, species autem prædicatur, ut tota essentia; quæ differentia prædicandi explicatur per definitiones generis, & speciei: nam per prædicari *in eo quod quid de differentibus specie*, datur intelligi, quod id, quod prædicatur, est tantum pars essentia; nam cum differentia specificæ addant novum gradum essentia, nihil potest dari speciebus commune, quod sit tota essentia illarum: per prædicari autem *in eo quod quid de differentibus numero*, datur intelligi, quod id, quod prædicatur, est tota essentia illorum, de quibus prædicatur, nam cum differentia individuales non addant novum gradum essentialem, necessariò, quod de individuis prædicatur *in eo quod quid*, seu per modum contrahibilis, dicit totam essentiam illorum. En quomodo definitio generis secum fert diversum modum essentialem prædicandi, ac definitio speciei. Hoc autem non contingit in differentia subalterna, & infima, nam, licet illa de differentibus specie, & hæc de differentibus numero prædicetur, nulla tamen illarum, ut tota essentia, sed utraque, ut pars essentia, prædicatur de pluribus, sive specie, sive numero differant, quod est quid accidentale.

11 Arg. contra, differentia subalterna prædicatur de differentibus specie, ut pars essentia: ergo convenit illi definitio generis; & con-

sequenter non est bona. Resp. disting. anteced. differentia subalterna prædicatur de differentiis specie, ut pars essentialis per modum per se stantis, nego; per modum alteri adjacentis, concedo, & nego consequentias. Genus enim prædicatur ut pars essentialis, & in hoc convenit cum differentia subalterna, prædicatur autem per modum per se stantis, in quo differt ab illa, quæ differentia explicatur in definitionibus, nam genus prædicatur *in eo quod quid*, & differentia *in quale quid*. Videatur, quod dictum est num. 4.

12 Arg. contra ex Arist. cap. de substantia, ubi dicit quod secundæ substantiæ, quæ sunt naturæ superiores, significant *in quale quid*, ergo genus, quod est natura superior, significat *in quale quid*; & consequenter non differt à differentia. Confirmatur ex eodem Arist. 7. Topic. cap. 2. ubi dicit, tam genus, quàm differentiam prædicari *in eo quod quid*: ergo ex hac parte non differunt genus, & differentia. Resp. quod Arist. primo loco loquitur contra Platonem asserentem, naturas communes esse separatas, & non inclusas in singularibus, ideòque dixit, secundas substantias significare *in quale quid*, id est, esse inclusas in singularibus. Sic respondent aliqui; tamen hæc responsio non videtur sufficiens, quia *quale quid* non videtur significare naturas inclusas in singularibus; nam potius videtur significare naturam, ut sic, & ut præscindit à singularibus, ad differentiam *hoc aliquid*, quod significat naturam singularem.

13 Ideòque aliter resp. ex Angelico Præceptore, quod secunda substantia, id est, natura communis significat *in quale quid*, eò quod in propositione prima substantia, scilicet individuum, habet rationem subjecti; secunda verò substantia rationem prædicati, & certum est, prædicatum similitudinariè habere rationem

formæ, cui convenit significare per modum *quale*; non autem dicitur significare *in quale quid*, eo quod prædicetur *in quale*, seu per modum alteri adjacentis, sicut differentia. Ad secundum locum Arist. dicimus, quod prædicari *in eo quod quid*, sumpsit Arist. pro prædicari quidditative, seu pro eo quod id, quod prædicatur, sit de essentia illius, de quo prædicatur, quod utique convenit tam differentiæ, quàm generi, non autem sumpsit illud pro prædicari per modum per se stantis, in quo sensu sumitur in definitione generis, & per quod differt à differentia, ut sæpè dictum est.

14 Arg. 3. Genus prædicatur de differentibus genere, & etiam de differentibus numero: ergo malè ponitur in definitione prædicari de differentibus specie. Prob. antec. Quia hæ sunt veræ prædicationes: *Corpus est substantia: spiritus est substantia: Petrus est animal: Joannes est animal*: sed corpus & spiritus differunt genere; Petrus autem & Joannes differunt numero: ergo genus prædicatur de differentibus genere, & differentibus numero. Resp. disting. anteced. Quoad primam partem; genus prædicatur de differentibus genere, ut genera sunt, nego; ut species subjicibiles sunt, conc. & neg. conf. Etenim tam corpus, quàm spiritus possunt considerari, ut dicunt ordinem ad sua inferiora, & ut sic sunt genera, in quo sensu non prædicatur de illis genus substantiæ, & possunt considerari, ut dicunt ordinem ad substantiam in communi, & ut sic non dicunt rationem generis, sed rationem speciei subjicibilis, in quo sensu prædicatur de illis genus substantiæ.

15 Disting. etiam antec. Quoad secundam partem, genus prædicatur de differentibus numero, immediate, nego; mediate, concedo, & nego conseq. Ideò enim genus prædicatur de individuis; quia prædicatur de specie, nam si animal, v.g. non prædicaretur de homine, nullate-

nus prædicaretur de individuis speciei humanæ, prædicatio autem immediata est de ratione formali universalis, non verò prædicatio mediata. Hæc argumenta non parum conducunt ad alia prædicabilia, & alia, quæ sigillatim circa alia prædicabilia proponentur, etiam ad genus suo modo conducunt.

16 Dubitabis, an prædicta definitio generis sit essentialis, & quidditativa? Resp. affirmativè: Probatur: Quia illa definitio est essentialis, & quidditativa, quæ explicat naturam, & essentiam definiti: sic se habet prædicta definitio respectu generis: ergo est essentialis, & quidditativa. Minor in qua potest esse difficultas, manet probata disp. antec. quæst. 1. ubi diximus, prædicabilitatem est essentiam universalis, qui autem dicunt, prædicabilitatem non esse essentiam universalis, sed tantum propriam passionem illius, consequenter asserunt, prædictam definitionem esse tantum descriptivam; unde solutio argumentorum, quæ possunt fieri contra hanc resolutionem, desumenda est ex dictis quæst. cit.

## Q U Æ S T I O II.:

*An genus prædicetur de speciebus, ut pars;  
vel ut totum?*

1 **N**ON inquirimus in præsentī, an genus dicat partem essentiae, vel totam essentiam specierum, de quibus prædicatur? Inanis enim esset talis inquisitio, nam jam constat ex dictis, tantum dicere partem essentiae, in alio enim procedit sensu præsens difficultas; Pro cuius intelligentia notandum est, quadrupliciter posse considerari naturam genericam. Primò, ut dicit sua prædicata essentialia sine aliquo ordine, seu respectu ad aliud, & ut sic dicitur totum actuale. Secundò, ut actu simul cum

cum differentia ipsam contrahente constituit speciem, & ut sic dicitur pars actualis. Tertiò, ut est contrahibilis per hanc, vel illam differentiam specificam ad esse hujus, vel illius speciei, & ut sic dicitur pars potentialis. Quartò, ut est quid sub se continens plures species in potentia subjectiva ratione suæ superioritatis, & universalitatis, & ut sic dicitur totum potentiale. Hoc notato, quod inquirimus est, quæ sit ratio, propterquam genus prædicatur de speciebus.

2 Et ut certa ab incertis separemus, supponitur, ut evidens apud omnes, naturam genericam non prædicari de suis speciebus, ut totum actuale; quia prædicta natura prædicatur de speciebus, ut dicit aliquem ordinem, seu respectum ad illas, & cum ut totum actuale, nullum respectum dicat natura generica ad suas species, sed tantum sua prædicata essentialia, ut dictum est, sequitur evidenter, non prædicari de speciebus, ut totum actuale.

3 Aliqui tenent, naturam genericam prædicari, ut partem, vel actualem, vel potentialem, de suis speciebus, ut videre est apud Meriner. capit. de genere q. 4. Communior tamen sententia, tam apud Thomistas, quàm Scotistas, tenet naturam genericam prædicari de suis speciebus, ut totum potentiale, licet diversimodè hanc sententiam explicant.

4 Dicimus 1. claritatis gratia, genus non prædicatur de speciebus, ut pars potentialis; Prob. Quia natura generica, ut prædicatur de speciebus, dicit ordinem ad illas; sed ut pars potentialis non dicit ordinem ad species, sed tantum ad differentias; per quas est contrahibilis: ergo natura generica non prædicatur, ut pars potentialis de suis speciebus. Neque apparet quid contra hanc conclusionem possit obijci, quod aliquam vim secum afferat.

5 Dicimus 2. Natura generica prædicatur de  
X 3 suis

suis speciebus, ut totum potentiale, id est, ratio totius potentialis est propterquam natura generica prædicatur de speciebus. Pro hac conclusione adducit Merin. citat. Scotum quæst. 16. univers. & 1. Prior. quæst. 23. Etiam potest adduci ipse Scotus citatus disput. antec. qu. 6. num. 11. ubi dicit, quòd universale habet etiam unitatem numeralem, ratione cuius, est prædicabile proximè de pluribus, ex quo potest deduci hæc ratio ad probandam nostram conclusionem. Secundùm Scotum natura prædicatur de pluribus prædicatione exercita dicendo, quòd hoc est hoc, ratione illius unitatis numeralis: sed illa unitas numeralis est unitas conveniens secundæ intentioni universalitatis, ut dictum est quæst. citat. num. 13. ergo ratione secundæ intentionis universalitatis prædicatur natura de suis inferioribus: sed secunda intentio universalitatis constituit naturam inesse totius potentialis; ergo natura generica prædicatur, ut totum potentiale de suis speciebus.

6 Deinde, aliter prob. conclusio. Quia etiam si, ut natura generica prædicetur de speciebus, duo requirantur, scilicet, & quod includatur in illis, ut pars actualis, & quod concipiatur ab intellectu, ut totum potentiale, seu ut quid superius ad species, tamen inter utrumque est maxima differentia, nam quòd natura generica sit pars actualis specierum, est conditio remota, & fundamentalis ad prædicationem, quod autem concipiatur, ut totum potentiale, est conditio formalis, & proxima: ergo licet ratio partis actualis sit ratio remota prædicabilitatis; tamen ratio totius potentialis est ratio proxima. Prob. anteced. & simul consequentia. Quia secundùm illam rationem proximè convenit alicui actus secundus, secundùm quam convenit illi proximè actus primus: sed prædictio actualis est actus secundus, & prædicabi-

litas de speciebus est actus primus: ergo secundum illam rationem proximè prædicatur natura generica de speciebus, secundum quam est proximè prædicabilis de illis: sed est proximè prædicabilis de illis, ut est totum potentiale: ergo ratio proxima, qua natura generica prædicatur actualiter de speciebus, est ratio totius potentialis. Minor est certa: Quia natura generica est proximè prædicabilis de pluribus ratione secundæ intentionis universalitatis, seu genericitatis; hæc secunda intentio constituit naturam in esse totius potentialis; non autem in esse partis actualis specierum, quia hoc supponitur in natura ex parte rei, tanquam fundamentum universalitatis, seu proximè prædicabilitatis: ergo natura generica est proximè prædicabilis de speciebus, ut est totum potentiale, & consequenter, ut totum potentiale prædicatur de illis, non tamen, ut pars actualis, id est, esse totum potentiale est ratio formalis, & proxima, qua natura prædicatur de speciebus, quod autem sit pars actualis illarum, tantum est ratio remota, & fundamentalis, ut prædicetur de illis.

7 Arg. 1. ex Aristot. 1. Poster. cap. 4. ubi dicit, integram definitionem, & singulas ejus partes per se prædicari de definito: sed genus est pars definitionis: ergo sentit Aristot. genus prædicari de speciebus, ut est pars illarum. Resp. neg. conseq. Quia Arist. solum intendit, partes definitionis, scilicet, genus, & differentiam, prædicari de definito, scilicet, de specie, & esse partes illius; non tamen determinat, an prædicentur, ut sunt partes speciei, an ut totum potentiale. Unde Arist. non est contra nos.

8 Arg. 2. Sub illa ratione prædicatur genus de speciebus, quæ est ratio propter quam de illis prædicatur: sed ratio partis actualis est propter quam de illis prædicatur: ergo prædi-



catur sub ratione partis actualis. Prob. min.  
 Quia ratio, propter quam animal prædicatur de homine, & bruto; non verò de lapide, vel de ligno est, quia est pars actualis hominis, & bruti: non autem ligni, vel lapidis: ergo ratio partis actualis est propter quam natura generica prædicatur de speciebus. Resp. disting. maj. Sub illa ratione prædicatur genus de speciebus, quæ est ratio proxima, & formalis, propter quam de illis prædicatur, concedo; quæ est ratio remota, & fundamentalis, nego. Disting. etiam min. ratio partis actualis est ratio proxima, & formalis, propter quam genus prædicatur de speciebus, nego, est ratio remota, & fundamentalis, concedo, & neg. conseq. Probatio autem minoris solum convincit, necessarium esse, naturam genericam includi in speciebus, ut partem, ad hoc, ut possit prædicari de illis, quod nos etiam fateamur, non autem convincit, talem rationem partis esse proximam, & formalem rationem prædicandi, sed tantum fundamentalem, & remotam necessariò requisitam, ut concipiatur natura generica, ut universalis, seu totum potentiale, in quo stat ratio proxima, & formalis prædicabilitatis, & prædicationis de speciebus, eo vel maximè, quòd universale est ens rationis cum fundamento in re.

9 Arg. 3. Genus differt à specie, quia hæc prædicatur completè, seu ut tota essentia; illud verò incompletè, & ut pars essentiæ: ergo genus prædicatur ut pars. Respond. disting. antec. ly *completè*, vel *incompletè*, ut *tota essentia*, vel ut *pars essentia* denotantibus id, quod prædicatur, seu rationem fundamentalem, & remotam prædicabilitatis, & prædicationis, concedo; denotantibus rationem formalem, & proximam, nego. Similiter disting. conseq. genus prædicatur, ut pars, ly *ut pars* denotante id, quod prædicatur, seu rationem fundamentalem prædicabilitatis, & prædicationis, concedo; denotante

rationem formalem, & proximam, nego. Hæc solutio clarius patet ex dictis.

10 Argum. 4. Totum potentiale dicitur, quod sub se comprehendit plures species: sed ut comprehendit sub se plures species, non prædicatur prædicatione actuali: ergo non prædicatur, ut totum potentiale. Minor probat. Quia non valet dicere: *Homo est animal, ut animal comprehendit sub se hominem, & brutum*: ergo non prædicatur, ut sub se comprehendit plures species. Confirmatur; Quia natura generica, in prædicatione actuali, amittit universalitatem: ergo non prædicatur, ut universalis, seu ut totum potentiale.

11 Respondet. disting. min. Natura generica non prædicatur actualiter, ut sub se comprehendit plures species, ita ut id, quod prædicatur, reduplicativè, ut prædicatur, non dicat plures species, concedo; ita ut comprehendere sub se plures species, non sit ratio proxima, & formalis prædicandi de illis nego, & neg. consequ. Probatio autem minoris solum convincit in primo sensu distinctionis, non tamen in secundo. Ex hoc resp. ad confirmationem, distinguit antecedent. Amittit universalitatem, reduplicativè, ut prædicata, concedo; ita ut ratio proxima, & formalis, qua prædicatur, non sit universalitas, nego, & disting. consequ. Non prædicatur, ut universalis, ita ut id, quod prædicatur, reduplicativè, ut prædicatum, non remaneat universale, concedo; ita ut ratio proxima, & formalis, qua prædicatur, non sit universalitas, nego. Recolantur, quæ diximus disput. anteced. quæst. 6. à num. 8.

12 Arg. 5. Natura, ut fiat universalis debet abstrahi ab inferioribus, & ad illa comparari: sed nequit natura sic abstracta, & comparata, prædicari de inferioribus: ergo non prædicatur de illis, ut universalis, seu ut totum potentiale: Pro. min. Quia, ut aliquid prædicetur de alio, debet actu

esse in illo: sed natura abstracta, & comparata ad inferiora, non est actu in illis: ergo natura sic abstracta, & comparata, nequit prædicari de inferioribus. Confirmatur; Quia ab eo quod res est, vel non est, propositio dicitur vera, vel falsa: sed quando prædicatur natura generica de speciebus, affirmatur, quod sit inclusa in illis tanquam pars: ergo prædicatur, ut pars.

13 Respondet. distinguit. min. nequit natura abstracta, & comparata ad inferiora, prædicari de illis, ita quod id quod prædicatur, prædicetur reduplicativè, ut abstractum, & comparatum, concedo; Quia ut sic prædicaretur de inferioribus ratio universalitatis, seu totius potentialis, quæ provenit naturæ ab abstractione, & comparatione, quod nullatenus evenit, ita quod ratio proxima, & formalis, qua prædicatur, non proveniat naturæ ab abstractione, & comparatione, nego. Similiter disting. conseq. non prædicatur, ut universalis, seu ut totum potentiale, ita ut id, quod prædicatur, sit ratio universalitatis, seu totius potentialis, concedo; ita ut ratio universalitatis, seu totius potentialis non sit ratio proxima, & formalis, qua prædicetur, nego. Distinguit. etiam major. probat. minoris; Vt aliquid prædicetur, debet esse actu in illo de quo prædicatur, absolutè loquendo, concedo; ut dicit statum, ratione cuius, est prædicabile proximè, & prædicatur, nego; disting. etiam min. Natura abstracta, & comparata ad inferiora non est actu in illis, absolutè loquendo, nego; reduplicativè, ut dicit abstractionem, & comparationem, ratione cuius, est proximè prædicabilis, & prædicatur de pluribus, concedo. Etenim, absolutè loquendo natura, quæ abstrahitur, & fit universalis, est in illis, de quibus prædicatur, quod est fundamentum, ut concipiatur, ut prædicabilis de pluribus, seu ut per intellectum fiat universalis,

lis, ut autem dicit hanc universalitatem, non est in pluribus actualiter, nam aliàs quodlibet ipsorum esset universale, haberet enim naturam cum universalitate, quod nullatenus dicendum est; cum autem universalitas tribuat naturæ prædicabilitatem proximam de pluribus, quam non habet natura, ut est actu in inferioribus, nam sicut tantum habet universalitatem remotam, seu fundamentalem, ita tantum habet prædicabilitatem remotam: ideo dicimus, quod licet utrumque requiratur, ut prædicetur de pluribus, tamen actu esse in illis tanquam pars, tantum est ratio fundamentalis, & remota, ut prædicetur, & quod concipiatur, ut universalis, seu ut totum potentiale, est ratio proxima, ut prædicetur.

14 Ex hoc facile resp. ad confirmationem; concessa enim maj. & min. neg.; consequ. verum enim est, quod quando prædicatur natura generica de speciebus, affirmatur, esse in illis tanquam pars; non autem sequitur ex hoc, rationem formalem, & proximam prædicandi de speciebus, esse rationem partis, nam bene stat, quod id, quod prædicatur sit pars, & prædicetur sub ratione totius, modo jam dicto.

### Q U Æ S T I O III.

*Quomodo genus prædicetur de individuis?*

**P**RO intelligentia quæstionis supponendum est, individua esse in duplici differentia, alia dicuntur individua incompleta, & generica, ut sunt rationes genericæ consideratæ, ut contractæ per differentiam individuaalem; absque aliqua differentia specifica, v. gr. *Hoc animal; hoc corpus, &c.* quæ quidem individua, necdantur, necdari possunt à parte rei, sed tantum per considerationem intel-

lectus ; nam quodlibet individuum existens, vel potens existere, est alicujus speciei determinatæ. Alia dicuntur individua completa, & specifica, ut sunt rationes specificæ contractæ per differentias individuales, ut *Petrus, Joannes, &c.* quæ individua dantur, vel possunt dari à parte rei. In utroque sensu prædicatur genus de individuis ; hæ enim prædicationes sunt veræ : *Petrus est animal ; hoc animal est animal*. Nunc autem est difficultas, quomodo prædicetur genus de individuis in prædictis prædicationibus.

2 Dicimus 1. Natura generica prædicatur de individuis genericis, & incompletis immediatè, & prædicatione specifica, non autem generica. Prob. 1. pars ; Quia individuum genericum, & incompletum nullam dicit differentiam mediam inter naturam genericam, & differentiam individualement, ut dictum est : ergo non prædicatur genus de illo media alia prædicatione correspondente speciei, sed immediatè.

3 Probat. 2. pars ; Quia illud prædicatur prædicatione specifica, quod dicit totam essentiam illorum, de quibus prædicatur : sed quando natura generica prædicatur de individuis incompletis, dicit totam essentiam illorum, nam ut dictum est, prædicta individua tantum includunt naturam genericam, quæ est de essentia illorum, & differentiam individualement, quæ non addit novum gradum essentiæ : ergo genus, seu natura generica prædicatur de individuis genericis, & incompletis prædicatione specifica. Facile solves quælibet argumenta, si semper præ oculis habeas, quod talia individua solum habent esse in intellectu, quatenus potest concipere gradum genericum, & individuationem, non conceptis gradibus specificis ; & similiter, quod gradus genericus tantum est indifferens, ut contrahatur per differentias specificas, si secundum se consideretur ; non autem si consideretur, ut contractum per individua.

ductionem, ut consideratur in individuis genericis, & incompletis. Denique, quod quando dicimus, genus prædicari de individuis genericis prædicatione specifica, non intendimus, quod genus sit species; sed quod in tali casu imitetur speciem in prædicabilitate, seu quod habet modum speciei prædicabilis, licet aliquando non habeat modum speciei subiicibilis, ut contingit, quando genus supremum prædicatur de prædictis individuis, ut cum dicimus: *Hæc substantia est substantia*, nam genus supremum non continetur sub aliquo alio genere, & sic non imitatur speciem, ut subiicibilem, neque constat genere, & differentia; quia hoc est proprium speciei, ut subiicibilis.

4 Dicimus 2. Natura generica prædicatur de individuis completis, & specificis mediata, & prædicatione generica. Probat. prima pars, quia illa est prædictio mediata, in qua inter subiectum, & prædicatum mediat aliquid, quod est superius respectu subiecti, & inferius respectu prædicati huiusmodi est prædictio generis de individuis completis, & specificis, nam in hac prædicatione, v.g. *Petrus est animal*, ideo animal prædicatur de Petro, quia mediat homo, qui est inferior, respectu animalis, & de illo animal prædicatur immediate, & est superior respectu Petri, & prædicatur immediate de Petro: ergo natura generica mediata prædicatur de individuis completis, & specificis.

5 Prob. 2. pars, quia illa est prædictio generica, in qua prædicatum dicit partem essentiae illius, de quo prædicatur, & prædicatur *in eo quod quid*: sed genus prædicatur *in eo quod quid* de individuis specificis, & dicit tantum partem essentiae illorum; nam prædicta individua, præter naturam genericam, includunt differentiam specificam, quæ etiam est de illorum essentia: ergo natura generica prædicatur de individuis completis, & specificis prædicatione generica.

6 Arg. contra ; Unum prædicabile tantum habet unicum terminum : sed genus in ratione prædicabilis ; habet species pro termino : ergo non individua specifica , & consequenter non prædicatur de illis prædicatione generica. Resp. disting. maj. Unum prædicabile tantum habet unicum terminum immediatum , concedo ; mediatum , vel immediatum , nego. disting. etiam min. Genus habet species pro termino immediato , concedo ; pro termino adæquato , seu excludente alium terminum , neg. Similiter disting. conseq. genus non habet individua specifica pro termino immediato , concedo ; pro termino mediatum , nego. Aliter potest responderi distinguendo totum argumentum ; unius prædicabilis tantum est unicus terminus , si pluralitas terminorum variet modum prædicandi , concedo , si non variet , nego. Species enim , & individua specifica non variant rationem prædicandi in natura generica , nam de omnibus prædicatur *in eo quod quid* , dicens tantum partem essentiae illorum , licet de speciebus immediatè , & de individuis mediatè prædicetur ; quod in simili diximus disp. præsentis quæst. i. n. 9. scilicet ; quod differentia infima , & subalterna non constituunt nisi unicum prædicabile , quia servant eandem rationem formalem prædicandi , licet una de differentibus numero , & altera de differentibus specie prædicetur , nam hæc differentia per accidens se habet ad rationem prædicabilis.

7 Dubitabis , an genus eadem numero relatione prædicabilitatis respiciat species , & illarum individua. Resp. diversam esse relationem prædicabilitatis , qua genus respicit species , ab illa , qua respicit individua . Probatur , quia nullum majus signum distinctionis , quàm separatio : sed prædicabilitas , qua genus respicit species potest separari à prædicabilitate , qua respicit individua specierum : ergo prædictæ prædicabilitates sunt diversæ , seu distinctæ. Minor

in

in qua est difficultas, non melius potest probari, quam attendendo ad ipsam naturam prædicabilitatis, quæ ut suo loco dictum est, est ens rationis, seu relatio rationis; nunc sic: ex parte entis rationis solum datur, quod habet esse objectivè in intellectu: sed potest habere esse objectivè in intellectu relatio prædicabilitatis, qua genus respicit species, quin habeat esse objectivè in intellectu relatio prædicabilitatis, qua respicit individua specierum: ergo potest una prædicabilitas dari sine alia. Minor videtur certa; nam quis dubitat, posse intellectum comparare naturam genericam ad species, & apprehendere illam, ut prædicabilem de speciebus, quin ipsam comparet ad individua specierum, & quin illam apprehendat prædicabilem de talibus individuis? Eo vel maximè, quod intellectus potest concipere quemcumque gradum metaphysicum, quin alterum concipiat: sed in tali casu haberet esse objectivè in intellectu relatio prædicabilitatis, qua genus prædicatur de speciebus, quin haberet esse objectivè in intellectu relatio prædicabilitatis, qua genus respicit individua specierum: ergo potest una habere esse objectivè in intellectu, quin tale esse habeat altera: ergo prædictæ relationes prædicabilitatis possunt separari, & consequenter sunt relationes, saltem numero distinctæ.

8 Advertendum tamen est, quod relatio prædicabilitatis, quam dicit genus ad individua specierum, supponit relationem prædicabilitatis, quam dicit ad species, eo quod hæc est immediata; & illa mediata, sed hoc nullatenus opponitur dictis.



## Q U Æ S T I O IV.

*Quomodo genus contineat differentias?*

1 **P**RO intelligentia quæstionis norandum est, quod hæc tria: *Esse aliquid*, *contingere aliud*, & *includere aliud*, inter se differunt; nam *esse aliquid* denotat, non esse distinctum ab illo; *contingere aliud* denotat, habere illud, vel in potentia effectiva, ut causa efficiens continet suos effectus, vel in potentia materiali, ut materia continet formas, vel in potestate, ut superius continet inferiora: *Includere aliud* denotat imbibere illud in sua quidditate, seu essentia, ut species includit genus, & differentiam. Hoc notato, & quod genus potest sumi, ut totum, tam potentiale, quam actuale, & ut pars, tam actualis, quam potentialis, ut dictum est quæst. 2. hujus disp. num. 1. non est difficilis resolutio quæstionis. Igitur

2 Dicimus 1. Natura generica, in quocumque sensu sumatur, non includit differentias in suo conceptu formali. Probatur, quia si natura generica includeret differentias in suo conceptu formali, ubicumque inveniretur natura generica, invenirentur etiam omnes differentiae, quas includeret; sed omnes differentiae non inveniuntur ubi invenitur natura generica; ergo non includit illas in suo conceptu formali. Patet major; nam ubicumque aliquid invenitur, invenitur etiam quidquid est de suo conceptu formali. Minor est certa; nam natura generica, v. g. animal invenitur in homine; in quo non inveniuntur differentiae aliarum specierum animalis, aliàs homo esset simul rationale, & irrationale, quod est falsum, unde tenet consequentia.

3 Dicimus 2. Si natura generica consideretur, ut totum actuale, nullatenus continet  
diffe-

differentias. Probatur, quia natura generica, ut totum actuale, tantum dicit sua prædicata essentialia sine aliquo respectu ad differentias: ergo nullatenus illas continet.

4 Dicimus 3. Natura generica, si consideretur, ut totum potentiale, continet differentias potestativè; seu ut superius inferiora, quod intelligendum est, si differentie sumantur in concreto, & pro connotato, non tamen si sumantur in abstracto, & pro formali. Prob. 1. pars, quia differentie sumptæ in concreto, & pro connotato, idem significant, ac species, nam in hoc sensu, idem est dicere, *rationale*, v. g. *ac homo*; unde sicut ista prædicatio est vera: *Homo est animal*, similiter ista: *Rationale est animal*: sed natura generica continet species potestativè, seu ut superius inferiora: ergo similiter continet differentias in prædicto sensu.

5 Prob. 2. pars, quia differentie in abstracto, seu pro formali tantum dicunt rationes contractivas generis, & nullatenus in sua ratione formali includunt genus, ideoque non potest genus de illis prædicari; hæc enim prædicatio est falsa: *Rationalitas est animal*: sed natura generica solum continet potestativè illa, in quibus essentialiter includitur, ideoque de illis potest prædicari, ut contingit in speciebus: ergo natura generica non continet, ut totum potentiale in sua superioritate, seu potestate differentias in hoc sensu sumptas. Adverte tamen, quod natura generica, ut totum potentiale, potest dici, continere differentias in sua potestate, adhuc si sumantur in hoc secundo sensu, si non directè, sed indirectè hoc intelligatur, ut patebit in arbore prædicamentali, in quo differentie sub genere collocantur, sed non in recta linea; sed in directâ.

6 Dicimus 4. Natura generica nullatenus continet differentias in genere causæ efficientis. Probatur, quia continentia in genere cau-

causæ efficientis dicit potentiam ad producendum; sed natura generica nullatenus potest producere differentias: ergo nullatenus illas continet in genere causæ efficientis.

7 Dicimus 5. Si natura generica consideretur, ut pars potentialis, continet differentias ad modum causæ materialis. Probatur, quia materia prima dicitur continere formas; quia est determinabilis per illas ad esse hujus, vel illius compositi: sed natura generica, ut pars potentialis, est determinabilis per differentias ad esse hujus, vel illius speciei: ergo continet illas ad modum causæ materialis.

8 Dicimus 6. Natura generica, ut pars actualis, est idem realiter cum differentia constitutiva speciei, distinguitur tamen formaliter ab illa. Conclusio quoad primam partem est communis in omni schola; nam genus, & differentia, identificantur ratione tertii, quod constituunt: sed natura generica, ut pars actualis, constituit speciem simul cum differentia: ergo ut pars actualis est idem realiter cum differentia. Ex quo sequitur, quod natura generica in nullo alio sensu est idem realiter cum differentia; quia in nullo alio sensu constituit speciem simul cum illa. Sequitur etiam, quod natura generica, ut simul cum una differentia constituit unam speciem, distinguitur realiter ab aliis differentiis constituentibus alias species, licet non ratione sui, sed ratione differentię, cum qua talem speciem constituit. Hoc patet ex dictis loquendo de unitate formali.

9 Secunda pars conclusionis est communis consensus Scotistarum, & manet probata loquendo de distinctione formali. In nullo alio sensu, præter supradictos, est idem, vel includit, vel continet natura generica, quomodocumque sumatur, differentias, ut patebit scrutanti per rationes identitatis inclusionis, & continentię suprapositas.

10 Pro complemento disputationis, dubitabis 1. An natura generica possit conservari in una specie? Resp. Quod genus potest conservari in una specie actuali, dummodo aliæ species sint possibiles, non tamen si repugnent. Hoc manet probatum disp. antec. quæst. 6. à num. 4. Ubi diximus naturam, ut concipiatur tanquam universalis, requirere plura inferiora, ad minus possibilia, eadem enim est ratio hic, & ibi. Adverte tamen, quod natura generica, ut dicitur sua prædicata essentialia, bene possit conservari in una specie, licet aliæ species repugnarent, sed tunc natura non esset genus, neque universalis, adhuc fundamentaliter, quia ut ibi dictum est, solum natura cui non repugnat multiplicitas, potest denominari universalis, seu est fundamentum universalitatis.

11 Dubitabis 2. An compositio metaphysica inter genus, & differentiam sit à parte rei, vel per intellectum: Respond. talem compositionem esse à parte rei, absque aliqua intellectus operatione. Probatio hujus resolutionis desumitur ex quæst. de distinctione formali, inter genus, & differentiam, nam cum compositio sit distinctorum unio, eo modo, quo fuerit distinctio, & unio erit compositio: sed in nostra sententia, ex natura rei distinguuntur formaliter genus, & differentia, & ex natura rei realiter uniuntur, licet non unione physica, sed unione metaphysica: ergo compositio metaphysica illorum est à parte rei, & non per rationem intellectus. Argumenta solum intendunt probare, genus, & differentiam non distinguí ex natura formaliter, sed per intellectum, quæ loquendo de distinctione formali, manent soluta.

12 Dubitabis 3: Quomodo intelligitur illud commune proloquium Philosophorum, *Genus sumitur à materia, differentia verò à forma*? Resp. 1. Non intelligi, ita ut ratio generis sumatur præcisè à materia prima, & ratio differentia

tia

tix à forma substantiali, quia tam ratio generis, quàm differentix desumuntur à tota entitate compositi, secundùm diversas formalitates, nam genus sumitur à formalitatibus potentialibus, contrahibilibus, & differentia à formalitatibus actuantibus, & contrahentibus. Probatur, nam homo, v. gr. non constituitur in ratione generica, scilicet in ratione animalis, quia habet materiam primam: ergo ratio generica non desumitur in homine à materia prima. Prob. anteced. Quia etiam lapis, v. gr. habet materiam primam ejusdem speciei cum materia hominis; sed in lapide non invenitur ratio generica animalis: ergo neque in homine ratio generica animalis desumitur à materia prima.

13 Si autem dicas, non desumi à materia prima, ut sic, sed ut est determinata per formam hominis; nihil contra nos, imò pro nobis; nam materia prima, ut contracta per formam hominis, dicit totam entitatem hominis: ergo non à materia prima, sed à tota entitate hominis desumitur ratio generica animalis. Confirmatur, quia ratio generis invenitur in carentibus materia prima, ut sunt Angeli; nam habent rationem genericam substantix, & spiritus; ergo ratio generis non desumitur à materia prima.

14 Resp. 2. Tale proloquium intelligi similitudinariè; nam sicut materia prima est quid potentiale, & determinabile per formam substantialem, & forma substantialis est quid actuans, & determinans materiam primam, ita ratio generica est quid actuabile, determinabile, & contrahibile per differentiam specificam, & differentia specifica est quid actuans, determinans, & contrahens rationem genericam.

## D I S P. VI.

*De Specie secundo prædicabili.*


**S**pecies est in ordine secundum prædicabile ; quam non solum , ut prædicabilem defini- vit Porphyrius in hoc capite , his verbis : *Species est , quæ prædicatur de pluribus differentibus numero in eo quod quid* ; sed etiam , ut subijcibilem , his verbis ; *Species est id , quod subijcitur generi , & de quo genus in eo quod quid prædicatur*. Prima definitio solum convenit speciei infimæ , quæ propriè constituit hoc prædicabile , secunda verò convenit , tam speciei infimæ , quàm subalternæ.

Ad cognoscendum autem , quænam sit species infima , & quænam subalterna , disposuit Porphyrius coordinationem prædicamentalem in quolibet prædicamento , in qua coordinatione ponitur genus supremum , & est illud , quod supra se non habet aliud genus , & ponitur species infima , & est illa , quæ sub se non habet alias species ; quæ autem ponuntur inter genus supremum , & speciem infimam , habent duos respectus ; unum ad superius , & in hoc sensu dicuntur species , & dicuntur subalterna ; quia possunt dividi in alias species , & alterum ad inferiora , & in hoc sensu dicuntur genera ; quia sunt prædicabilia de differentibus specie in eo quod quid , & omnia genera , præter supremum , & infimum , quod est illud , quod ponitur immediatum speciei , dicuntur genera intermedia ; quia mediant inter genus supremum , & infimum , & dicuntur genera subalterna ; quia possunt dividi in alia genera ; ex quo sequitur , quòd genus supremum tantum habet unum respectum , scilicet ad inferiora , in coordinatione prædicamentali , & quod species infima licet , ut prædicabili de individuis , dicat  
ordi.

ordinem ad illa; tamen, ut collocatur in coordinatione prædicamentali, tantum dicit ordinem ad superiora, quia talis coordinatio solum constat prædicatis essentialibus, & certum est, individua super speciem nullum gradum, seu prædicatum essentialia addere, & licet individuum ponatur in coordinatione prædicamentali, non ponitur, ut quid ad ipsam essentialiter pertinens, sed ut fundamentum illius, eo quod includit omnia prædicata essentialia, & hæc in illo ultimata sistunt, sed hoc reducitur ad questionem de nomine.

Omne quod dictum est invenies in sequenti figura, quæ dicitur, series, coordinatio, seu arbor prædicamentalis; & ponimus exemplum in prædicamento substantiæ, in qua figura tres lineas invenies, in recta, seu media sunt genera, & species à genere supremo usque ad speciem infimam, in dextera sunt propriæ, & positivæ differentiæ, quæ dividunt gradum superiorem, & constituunt inferiorem; in sinistra sunt differentiæ negativæ, quæ ponuntur loco aliarum differentiarum, quæ dividunt gradum superiorem, & constituunt alias species, & repugnant gradui inferiori, qui ponitur in recta linea. Individuum ponitur pro fundamento arboris.

# ARBOR PRÆDICAMENTALIS





## Q U Æ S T I O I.

*Utrum species rectè definiatur à Porphyrio.*

**D**icimus 1. Species prædicabilis rectè definitur à Porphyrio. Probat, & declaratur definitio, sicut definitio generis; nam *ly prædicatur de pluribus* est genus, in quo convenit species cum aliis prædicabilibus. Cæteræ particulae sunt differentiae; nam per *ly de differentibus numero* differt à genere, quod prædicatur de differentibus specie, & per *ly in eo quod quid* differt ab aliis prædicabilibus, ut dictum est loquendo de genere: ergo prædicta definitio constat genere, & differentia, & consequenter est recta. Est etiam essentialis, propter dicta de definitione generis.

2 Plura argumenta huc pertinentia, & similiter ad alia prædicabilia, discussa manent disp. antec. Idioque; neque hic, neque in disputationibus aliorum prædicabilium, illa proponemus, ne quod semel dictum est pluries repetatur.

3 Argues tamen primò specialiter, sicut genus prædicatur, ut pars essentiae de speciebus, ita species prædicatur, ut pars essentiae de individuis, nam sicut species, præter naturam genericam, dicunt differentias específicas, ita individua præter naturam specificam, dicunt differentias numericas; ergo non rectè assignatur differentia inter genus, & speciem, cum dicitur, genus prædicari de speciebus, ut pars essentiae, & species de individuis, ut tota essentia. Resp. neg. antec. quia licet verum sit, ut ibi dicitur, individua dicere differentias individuales, præter naturas específicas, sicut species dicunt naturas específicas, præter naturam genericam, est tamen maxima differentia, scilicet, quod differentiae specificae pertineant ad quidditatem, & essentiam.

essentiam, ideoque ad interrogationem; *quid est?* Resp. per illas, ut si inquiratur, *quid est homo?* Benè resp. *animal rationale*, differentiarum vero individuales non pertinent ad quidditatem, & essentiam, nam non respondetur per illas ad prædictam interrogationem, nam cum inquiritur; *quid est Petrus?* solum resp. *animal rationale*.

4 Ratio autem cur differentiarum individuales non pertinent ad essentiam, est quia solum dicitur de essentia alicujus quod se habet in illo tanquam radix & origo alicujus, specialis passionis; vel operationis, quod non habent differentiarum individuales: nam omnes passionis, & operationis speciales cōveniunt individuīs ratione differentiarum specificarum, differentiarum autem individuales tantū sunt determinationes naturæ specificæ, ut existere, & suas operationes exercere valeat.

5 Arg. 2. Species prædicatur de differentibus specie; ergo non benè definitur per prædicari de differentibus numero. Prob. antec. quia hæc sunt veræ prædicationes; *homo est species: equus est species:* sed in illis prædicatur species de homine, & equo, qui differunt specie: ergo species prædicatur de differentibus specie. Resp. dist. antec. species prædicatur de differentibus specie, si ly *species* sumatur pro natura, quæ est species, nego; si sumatur pro denominatione, speciei, concedo, & neg. conseq. In prædictis autem prædicationibus non prædicatur natura, quæ est, seu denominatur species, v. gr. *homo*; sed tantum prædicatur denominatio speciei, unde prædictæ prædicationes pertinent ad quintum prædicabile, scilicet ad accidens, quia denominatio speciei accidentaliter, & contingenter convenit homini, & equo.

6 Dicimus 2. Definitio speciei subijcibilis tradita à Porphyrio, est exacta. Prob. quia genus, & species subijcibilis sunt correlativa: sed unum correlativum benè definitur in ordine,

ad aliud: ergo benè definitur species subiicibilis per hoc, quod sit, quæ subiicitur generi.

7 Arg. 1. Unum correlativum nequit defini-ri per aliud, sed genus, & species subiicibilis sunt correlativa: ergo nequit species subiicibilis definiri per genus. Prob. maior. quia definitio debet esse clarior, & notior suo definito, sed correlativa sunt æquè nota: nam sunt simul natura cognitione, & definitione; ergo unum correlativum nequit definiri per aliud. Confirmatur, quia in hac definitione, & definitione generis committeretur circulus vitiosus; nam genus definiretur per speciem, & species per genus, quod non est dicendum. Resp. disting. maior. unum correlativum nequit definiri per aliud, tanquam per quid extrinsecè connotatum: nego, tanquam per partem essentialem, conc. Ad prob. dicimus, quod definitio non debet esse clarior suo definito, secundum id, quod dicit de connotato; nam sufficit, quod absolutè sumpta sit aliquomodo clarior, & notior suo definito, quod contingit in omnibus definitionibus relativorum, ut scrutanti patebit; hæc enim definitio, v. gr. *Pater est, qui habet filium*, absolutè sumpta, clarior est suo definito; licet id, quod dicit de connotato, scilicet filius, non sit notior patre, eo quod patet, & filius sunt correlativi. Per quod patet ad confirmationem, nam circulus solum est vitiosus, & vitandus circa id, quod dicunt definitiones, ut quid essentialè: non tamen circa id, quod tantum dicunt de connotato. Ad alia argumenta similia similiter respond.

8 Arg. 2. Individua etiam subiiciuntur generi; ergo non benè definitur species subiicibilis per hoc, quod generi subiiciatur. Resp. disting. antec. individua subiiciuntur generi, ut dicunt naturas universales: nego, ut sunt individua, concedo: est dicere, individua, ut individua, non dicunt naturas universales, quando sub.

subiiciuntur generi ; ut in his prædicationibus ; *Petrus est animal : Joannes est animal*, sed dicunt reduplicativè naturas singularizatas ; unde nego consequ. quia in definitione speciei subiicibilis, ly *quod subiicitur*, denotat naturam universalem, quod non fuit necessarium explicari in definitione, quia sufficienter datur intelligi, ex eo quod Porphyrius, ipsam tradens, solum loquebatur de prædicabilibus, quæ sunt naturæ universales.

6 Quia Porphyrius sic definivit speciem subiicibilem ; *Species est id ; quod subiicitur generi & de quo genus in eo quod quid prædicatur*, insurgit quoddam dubium : an prædictis verbis, unam tantum, vel duas definitiones tradiderit, quarum una sit quidditativa, & altera, descriptiva ; Resolutio unius dubii dependet ex dictis circa essentiam universalis ; nam qui dicunt aptitudinem ad essendum in multis esse essentiam universalis ; aptitudinem vero ad prædicari esse propriam passionem illius ; consequenter hic dicunt, in prædictis verbis contineri duplicem definitionem, alteram essentialem, scilicet : *Species est id, quod subiicitur generi*, & alteram descriptivam, scilicet : *Species est id, de quo genus in eo quod quid prædicatur*, qui autem tenent, essentiam universalis consistere in aptitudine ad prædicari, aptitudinem vero ad essendum esse propriam passionem illius, consequenter dicunt, primam definitionem esse descriptivam, secundam verò quidditativam.

10 Nos verò, cum dixerimus, essentiam universalis consistere, tam in aptitudine ad essendum in multis, quam in aptitudine ad prædicari de illis, & ita definitionem universalis esse unicam, licet diversis verbis tradatur, scilicet, jam per unam, jam per aliam aptitudinem, consequenter dicimus in præsentî, prædictis verbis tantum tradidisse Porphyrium

unicam, & essentialem definitionem speciei subiicibilis, licet diversis verbis; eadem enim est ratio hic, & ibi. Cui resolutioni videtur favere Scotus, dum quæst. 21. *Univerf. Vers. Hoc potest concedi*, circa prædicta verba Porphyrii, inquit: *Hoc potest concedi, & dici, quod tantum ponit unam definitionem in comparatione ad genus.*

## Q U Æ S T I O II.

*De specie prædicabili, & subiicibilis inter se comparatis.*

1 **P**Lura sub hoc titulo in hac quæstione breviter se offerunt examinanda; quæ per sequentes conclusiones proponemus. Igitur, dicimus primò; nomen *species* est æquivocum, sive analogum ad speciem prædicabilem, & subiicibilem. Quòd sit æquivocum, patet ex eo quòd tale nomen est commune utrique speciei; ratio verò significata est diversa in illis, ut ex se patet: ergo nomen *species* est æquivocum respectu speciei subiicibilis, & prædicabilis.

2 Quod etiam possit dici nomen analogum, patet ex eo quòd, licet species subiicibilis, & prædicabilis nullam proportionem dicant inter se, dicunt tamen proportionem ad unum tertium, scilicet, ad speciem, ut significat pulchritudinem physicam, & realem propriè, & inde translatum est ad significandam similitudinariè pulchritudinem Logicam, ut est species tam subiicibilis, quam prædicabilis, respectu inferiorum, & superiorum; ergo nomen *species* est analogum ad speciem prædicabilem, & subiicibilem. Consequentia patet; quia licet *urina*; & *medicina* nullam proportionem dicant inter se, tamen nomen *sanum* dicitur analogicè de illis, eo quòd dicant proportionem ad unum tertium,

tium, scilicet, ad animal, in quo propriè reperitur sanitas.

3 Dicimus 2. Species, ut prædicabilis, est universalis, & constituit hoc secundum prædicabile; non autem, ut subiicibilis. Prima pars conclusionis patet, quia species est universalis, ut dicit ordinem ad plura; sed species, ut prædicabilis, dicit ordinem ad plura: ergo ut prædicabilis est universalis: sed ut est universalis constituit hoc secundum prædicabile: ergo ut prædicabilis constituit illud. Ex quo patet etiam secunda pars, quia species, ut subiicibilis, non respicit plura, sed unum, scilicet genus: ergo ut subiicibilis non est universalis.

4 Arg. 1. Species subiicibilis respicit plura, & prædicatur de illis; ergo species, ut subiicibilis est universalis. Antecedens patet, nam prædicatur de pluribus speciebus subiicibilibus. Resp. disting. antec. Si species subiicibilis sumatur pro natura, quæ est species, nego; nam homo est species subiicibilis, & non prædicatur de pluribus speciebus subiicibilibus, si sumatur pro ratione formali speciei subiicibilis, subdistinguo, prædicatur de pluribus speciebus subiicibilibus, ut species subiicibilis est, id est, ita ut ratio subiicibilitatis sit ratio prædicabilitatis de illis pluribus, nego; prædicatur de pluribus speciebus subiicibilibus ratione secundæ intentionis prædicabilitatis illi de novo accidentaliter applicata, conc. & neg. conseq. Homo enim prædicatur de pluribus individuis, sed non ita, ut ratio essentialis hominis sit ratio talis prædicationis, nam talis ratio solum est secunda intentio prædicabilitatis illi per intellectum applicata, sic similiter in nostro casu. Videantur, quæ diximus disp. 5. quæst. 2.

5 Arg. 2. inferius essentialiter participat rationem superioris; species subiicibilis est inferior respectu universalis; ergo ut subiicibilis est formaliter universalis. Resp. neg. conseq.

Solum enim probat argumentum, speciem subiicibilem esse universalem, non tamen esse universalem, ut subiicibilem.

6 Dices contra, in tantum species est universalis, in quantum participat suum genus: sed participat suum genus, in quantum illud respicit, & ut sic est subiicibilis; ergo ut subiicibilis est universalis. Resp. neg. min. nam potius evenit è contrario, scilicet, quod in tantum respicit suum genus, in quantum illud participat, prius enim est, quod homo participet rationem animalis, quam quod sit formaliter species subiicibilis respectu animalis, ut animal genus, quia fundamentum est prius relatione, & fundamentum, ut homo sit species animalis, & illi subiiciatur, ut generi, est quod participet rationem animalis; similiter contingit in nostro casu, prius enim est, quod species participet suum genus, scilicet universale, quam quod illi subiiciatur, ut generi, nam talis participatio se habet ut fundamentum secundæ intentionis subiicibilitatis.

7 Arg. 3. Species, ut subiicibilis, non est singularis; ergo ut subiicibilis est universalis. Resp. 1. neg. conseq. Quia licet verum sit, speciem, ut subiicibilem, non esse singularem, non inde sequitur, quod ut subiicibilis, sit universalis, quia cum reduplicatio sit ratio formalis, propter quam alicui aliquid convenit, & subiicibilitas non sit ratio formalis, qua species constituitur in esse universalis, hinc est, quod species, ut subiicibilis, non est universalis; licet non sit singularis; neutrum enim convenit illi ratione subiicibilitatis; verum enim est, ut amplius patebit ex dicendis, quod natura, quæ dicitur species subiicibilis præsuppositivè est universalis, saltem fundamentaliter.

8 Secundò potest resp. disting. conseq. species, ut subiicibilis est universalis formaliter, ut

ut talis, nego; fundamentaliter, ita ut possit fundare aliam secundam intentionem prædicabilitatis de pluribus speciebus subiicibilibus, ut dictum est ad primum ad argumentum, concedo:

6 Dicimus 3. Respectus subiicibilitatis, & prædicabilitatis formaliter sumpti non sunt essentialiter connexi in specie. Patet conclusio, quia prædicti respectus sunt relationes rationis dependentes à consideratione intellectus: sed potest intellectus considerare naturam specificam in ordine ad inferiora, quin ipsam consideret in ordine ad superius, & è contra, & tunc tribueret naturæ unum ex prædictis respectibus sine alio: ergo prædicti respectus, formaliter sumpti, non sunt essentialiter connexi. Ex quo sequitur, quod accidentaliter connectuntur in natura specifica; quia accidentaliter, unus vel alius, vel uterque simul illi per intellectum applicatur. Et potest confirmari, quia alias sequeretur, non posse per intellectum constitui primum prædicabile, quin simul, & eodem actu constiueretur secundum, ut benè scrutanti patebit, quod nullatenus est dicendum.

10 Dicimus 4. Rationes subiicibilitatis, & prædicabilitatis in specie absolutè loquendo, adhuc fundamentaliter non sunt essentialiter connexæ. Probatur, quia si essent essentialiter connexi prædicti respectus fundamentaliter sumpti, non posset dari natura communis, quæ non fundaret utrumque respectum: sed dantur plures naturæ, quæ fundant respectum subiicibilitatis specificæ, & nequeunt fundare respectum specificæ prædicabilitatis; ergo prædicti respectus adhuc fundamentaliter sumpti, non sunt essentialiter connexi. Prob. min. Quia omnia genera præter supremum, fundant respectum subiicibilitatis specificæ; nam dicuntur species subiicibiles, respectu generum, quæsupra se habent: sed tamen nequeunt fundare respec-



Etum prædicabilitatis specificæ, quia non sunt prædicabilia de differentibus numero, sed de differentibus specie: ergo dantur naturæ, quæ fundant respectum subiicibilitatis specificæ, & non specificæ prædicabilitatis, & consequenter, absolute loquendo, prædicti respectus, adhuc fundamentaliter, non sunt essentialiter connexi.

11 Dicimus 5. Ratio subiicibilitatis, & prædicabilitatis specificæ, si sumatur fundamentaliter essentialiter connectitur in specie infima. Prob. quia nulla datur species infima, quæ nequeat fundare utramque rationem: ergo fundamentum prædictarum rationum in specie infima est necessario connexum. Contra hoc solum potest obici, quod dicunt aliqui Thomistæ, scilicet, naturam Angelicam esse speciem subiicibilem infimam, & non prædicabilem, eo quod repugnat illi multiplicari in individua, quàm repugnantiam non negamus, ut dicitur in Theologia in materia de Angelis; cujus ratio est pronunc, quia si natura Angelica constet genere, cui subiicitur, & differentia specifica contrahente, non videtur nude oriri talis repugnantia, quia non à gradu generico, ut ex se patet, neque à gradu differentiali; cum talis gradus, adhuc sit communicabilis, cum non sit individualis.

12 Dicimus 6. Respectus subiicibilitatis, fundamentaliter sumptus, convenit naturæ specificæ prius, quàm respectus prædicabilitatis, etiam fundamentaliter sumptus. Probatur, quia prius natura specifica participat naturam genericam, quæ participatio est fundamentum subiicibilitatis, quàm non repugnantiam ad essendum in pluribus, quæ est fundamentum prædicabilitatis: ergo prædictus respectus subiicibilitatis, fundamentaliter sumptus, prius convenit naturæ specificæ, quàm respectus prædicabilitatis, etiam fundamentaliter sumptus. Ex quo sequitur, quod prædicti respectus formali-

maliter sumpti, attenta natura, & exigentiâ rerum, eundem ordinem servant, respectu naturæ specificæ, quia tamen conveniunt naturæ per intellectum, ille erit prior, qui prius illi per intellectum applicatur, sed hoc per accidens se habet.

13 Pro complemento disputationis dubitabis, an genus, & species subijcibilis sint correlativa? Ratio dubitandi est, quia unum correlativum non prædicatur de alio: sed genus prædicatur de specie, ut animal de homine: ergo non sunt correlativa. Deinde quia relativa sunt simul natura: sed genus, v. g. *animal* est prius natura qualibet specie: ergo.

14 His non obstantibus, resp. quòd species subijcibilis, & genus, si sumantur formaliter, sunt correlativa; non verò si materialiter, seu fundamentaliter sumantur. Prima pars probatur, quia genus, & species subijcibilis, formaliter sumpta sunt superius, & inferius formaliter; sed superius, & inferius formaliter sunt correlativa; nam totum suum esse est ad aliud se habere; ergo genus, & species subijcibilis formaliter sumpta sunt correlativa. Et in hoc sensu sunt simul natura, & unum non prædicatur de alio, non enim valet; *Species subijcibilis est genus*. Secunda pars benè probatur in ratione dubitandi, quæ est vera, loquendo de genere, & specie subijcibili materialiter sumptis, non verò sumptis formaliter.

## DISP. VII.

### De Individuo.

**Q**uia diximus, speciem prædicari de individuo, ideò postquam egimus de specie, naturam individui investigamus, quod sumitur primò intentionaliter, ut dicit naturam specificam, & differentiam individualement, & secundò

Y 5 inten-

intentionaliter, ut dicit naturam individuum pro materiali, & pro formali secundam intentionem subiicibilitatis speciei, vel prædicabilitatis de uno tantum. In utroque sensu procedit præsens disputatio.

## Q U Æ S T I O I.

*An individuum rectè definiatur à  
Porphyrio.*

**P**RO intelligentia quæstionis notandum est, quod Porphyrius hic sic definit individuum primo intentionaliter sumptum: *Individuum est, cuius collectio proprietatum alteri convenire non potest.* Secundo verò intentionaliter, ut prædicabile, sic: *Individuum est, quod prædicatur de uno tantum, ut subiicibile verò, sic: Individuum est, quod subiicitur speciei, & de quo species in eo, quod quid prædicatur.* Hoc

2. Dicimus 1. Prædicta definitio individui, primo intentionaliter sumpti, non est essentialis, sed tantum quædam accidentalis descriptio individui. Conclusio est communis, & probatur quoad primam partem, nam definitio essentialis debet dari per conceptum quidditativum, & essentialem definiri: prædicta definitio non datur per conceptum quidditativum, & essentialem individui: ergo non est essentialis. Minor patet, probando secundam partem conclusionis, nam proprietates individui, quas adducit Porphyrius, his verbis continentur: *Forma, figura, locus, tempus, cum nomine, sanguis, Patria, sunt septem, quæ non habet unus, & aliter, accidentaliter conveniunt individuo: ergo prædicta definitio non datur per conceptum quidditativum, sed per proprietates accidentales individui: ergo non est essentialis, sed tantum quædam accidentalis descriptio individui.*

3 Antecedens non melius probari potest, quam explicando prædictas proprietates; etenim, *forma* denotat temperiem qualitatum, quæ dicitur complexio: *figura*, quantitatem, & membrorum dispositionem: *Locus*, & *tempus* locum, & instans nativitatis: *nomen* appellationem: *sanguis* prosapiam, & cognationem: *Patria* Provinciam, seu Regnum in quo natum est individuum: sed hæc omnia, ut ex se patet, possunt pluribus individuis de potentia Dei absoluta convenire, quia in hoc nulla apparet repugnantia, licet regulariter hoc non contingat: ergo prædicta proprietates accidentaliter conveniunt individuo.

4 Dicimus 2. Individuum secundo intentionaliter sumptum benè definitur per prædictam definitionem, ut prædicabile. Patet conclusio, quia per ly *prædicatur* convenit cum universalibus, & per ly *de uno tantum* differt ab illis: ergo prædicta definitio est bona, quippè explicat illud, ut distinctum ab universalibus.

5 Ex quo sequitur, quod ab individuis secundo intentionaliter sumptis potest abstrahi conceptus communis univocus, quod patet, quia omnia individua conveniunt in prædicari de uno tantum: sed a quacumque convenientia aliquorum potest abstrahi conceptus communis illis univocus; ergo ab individuis, ut prædicabilibus, potest abstrahi conceptus communis univocus. Et potest confirmari, quia non minus conveniunt individua in prædicari de uno tantum, quam quinque prædicabilia in prædicari de pluribus; sed ab his abstrahitur ratio communis prædicabilitatis de pluribus illis univoca; ergo ab individuis abstrahitur ratio communis prædicabilitatis de uno tantum univoca illis.

6 Arg. contra; si daretur ratio communis univoca individuis prædicaretur de pluribus; sed individuum tantum prædicatur de uno; ergo

non datur talis ratio communis illis univoca. Resp. concessa majori in sensu, quo loquimur, disting. min. individuum tantum prædicatur de uno, si sumatur materialiter, seu pro re denominativa, concedo, si sumatur formaliter, seu pro ratione formali, scilicet, secunda intentione prædicabilitatis de uno tantum, nego, & neg. consequ. vel illam similiter disting. Etenim ratio, seu secunda intentio prædicabilitatis de uno tantum facit, quod individuum, materialiter sumptum, tantum de uno prædicetur; sicut ratio, seu secunda intentio universalis facit, quod natura, materialiter sumpta, de pluribus sit prædicabilis, & prædicetur, cum tamen sint plures rationes prædicandi de uno tantum, ab illis potest abstrahi ratio communis prædicandi de uno illis univoca, quæ per aliam secundam intentionem denominatur prædicabilis de omnibus illis rationibus prædicandi de uno tantum.

7 Neque ex hoc inferas, dari aliud prædicabile distinctum a quinque enumeratis, nam illa ratio communis prædicandi de uno tantum, vel potest abstrahi a rationibus prædicandi de uno *in eo quod quid* tanquam pars, ut prædicatur in his prædicationibus: *Petrus est hoc animal; Ioannes est hoc animal*, & sic reducitur ad primum prædicabile, scilicet, ad genus, vel a rationibus prædicandi de uno *in eo quod quid*, ut tota essentia, ut in his prædicationibus; *Petrus est hic homo; Ioannes est hic homo*; & sic reducitur ad secundum prædicabile, scilicet, speciem; vel a rationibus prædicandi de uno tantum *in quale quid*, ut in his prædicationibus; *Petrus est hoc rationale; Ioannes est hoc rationale*, & sic reducitur ad tertium prædicabile, scilicet, differentiam; vel a rationibus prædicandi de uno tantum *in quale necessario*, ut in his prædicationibus; *Petrus est hoc risibile; Ioannes est hoc risibile*, & sic reducitur ad quæ-

quartum prædicabile, scilicet, proprium; vel à rationibus prædicandi de uno tantum *in quale contingenter*, ut in his prædicationibus; *Petrus est hoc album: Ioannes est hoc album*, & sic reducitur ad quintum prædicabile, scilicet accidens. Quod debet intelligi; ita ut prædicti modi prædicandi in individuis primò intentionaliter sumptis, ut in prædictis prædicationibus, imitentur modos prædicandi quinque universalium: non tamen ita ut sint prædicationes universalium, nam hæc prædicantur de pluribus, individua autem de uno tantum.

8 Quia tamen rationes, seu secundæ intentiones prædicandi de uno tantum in quolibet ex prædictis modis, sint plures numero distinctæ, sicut sunt plura individua, quibus applicantur, ab illis abstrahitur ratio communis prædicandi de uno, quæ denominatur species; nam prædicatur de pluribus rationibus prædicandi de uno numero distinctis; si autem à quinque rationibus communibus prædicandi de uno correspondentibus quinque supradictis modis, abstrahatur alia ratio communis, erit ratio generica respectu illarum; quia prædictæ quinque rationes communes inter se differunt specie per diversos modo assignatos prædicandi de uno, sicut quinque prædicabilia differunt specie per diversos modos prædicandi de pluribus; unde, sicut his assignatur ratio communis univoca, & generica, scilicet ratio prædicandi de pluribus, seu ratio universalis, ita illis assignatur ratio communis univoca, & generica, scilicet, ratio prædicandi de uno ut sic. En quomodo prædicta ratio communis prædicandi de uno, non constituit aliquod prædicabile distinctum à quinque enumeratis; nam vel est species, vel genus, juxta diversas considerationes.

9 Ex dictis numero antecedenti oritur unum  
du-

dubium, scilicet quomodo quinque prædicabilia in singulari prædicentur de individuo? Resp. prædicari prædicatione formali. Probatur; illa enim est prædictio formalis, in qua prædicatum significatur, ut concernens subiectum, & est formaliter in subiecto: sic se habent quinque prædicabilia in subiectis prædicationibus: ergo sunt prædicationes formales. Minor patet, quia hæc prædictio, v. g. *Petrus est homo* est formalis, quia prædicatum illius, scilicet *homo* concernit subiectum, scilicet *Petrum*: & est formaliter in illo; sed in hac prædicatione, g. v. *Petrus est hic homo*, prædicatum, scilicet *hic homo* concernit subiectum, scilicet *Petrum*, & est formaliter in illo: ergo est prædictio formalis. Idem dices de aliis prædicabilibus in singulari, propter eandem rationem.

10 Arg. contr. quando idem prædicatur de se ipso, prædictio est identica, & non formalis: sed in prædictis prædicationibus idem prædicatur de se ipso: ergo sunt prædicationes identice, & non formales. Resp. dist. mai. si prædicatur idem de se ipso, secundum eundem modum concipiendi, concedo, secundum diversum modum concipiendi, neg. Similiter dist. min. in prædictis prædicationibus prædicatur idem de se ipso, secundum eundem modum concipiendi, neg. secundum diversum modum concipiendi, conc. & neg. conf. Quod patet in simili, nam licet hæc prædictio, v. g. *homo est homo*, sit identica, non tamen hæc: *homo est animal rationale*, nam est prædictio formalis, quia licet idem prædicetur de se ipso, hoc non est secundum eundem modum concipiendi, sed secundum diversum, nam subiectum concipitur implicite, & prædicatum explicitè. Similiter dicendum est in præsentibus.

11 Dices, hoc videtur esse contra Arist. qui cap. de substantia dicit, quod prima substantia,

tia, scilicet individuum, neque in subiecto aliquo est, neque de subiecto aliquo dicitur. Respond. quod Arist. solum intendit, quod individuum primò intentionaliter sumptum, non est in alio, neque de illo dicitur seu prædicatur, tanquam superius de inferiori, unde Arist. non est contra nos.

12 Dicimus 3. Individuum secundo intentionaliter sumptum, ut subiicibile, benè definitur per definitionem supra dictam. Patet conclusio; quia hic loquitur Porphyrius de individuo, ut est correlativum speciei; sed correlativum benè definitur in ordine ad suum correlativum: ergo per supradictam definitionem benè definitur individuum, ut subiicibile. Videantur, quæ diximus de specie subiicibili, disp. 6. q. 1. & 2. & hic applicentur.

13 Intelligitur conclusio rigorosè in sensu Porphyrii loquentis de individuo propriè, & rigorosè sumpto, ut correlativum est speciei; in quo sensu ab omnibus individuis subiicibilibus potest abstrahi ratio communis subiicibilitatis, quæ hic definitur, & se habet, ut species respectu omnium individuorum secundo intentionaliter: quod patet ex sæpè in antecedentibus dictis. Utrum definitio individui subiicibilis sit essentialis, & unica, patet ex dictis de definitione speciei subiicibilis, nam eadem est ratio hic, & ibi.

14 Advertetamen, quod aliter potest sumi individuum subiicibile, scilicet, ut subiicitur individuo prædicabili, ut patet in prædicationibus positis num. 7. & tunc debet definiri per ordinem ad tale individuum prædicabile, eo modo, quo fuerit prædicabile, & sicut ibi, & num. 8. diximus, posse abstrahi rationem communem ab individuis prædicabilibus, ita similiter propter eandem rationem potest abstrahi ratio communis ab individuis subiicibilibus, quæ se habeat, ut species, vel genus, juxta varias



rias considerationes ibi assignatas. Adverte etiam, quòd in individuis; ut prædicabilibus, potest dari prædicatio mediata, & immediata, & similiter in subjeçibilibus, subjeçibilitas mediata, & immediata, ut dictum est de prædicabilitate, generis, & subjeçibilitate, tam speciei, quàm individui respectu illius.

## Q U Æ S T I O II.

*Virum individuum, primò intentionaliter sumptum, possit quidditative definiri?*

1 **D**iximus quæstione antecedenti, definitionem individui, primò intentionaliter sumpti, traditam à Porphyrio, non esse essentialem, sed quandam accidentalem descriptionem individui, quapropter inquirimus in præsentia, an possit individuum essentialiter definiri? Et supponimus, quodlibet individuum essentialiter definiri definitione suæ speciei, sed talis definitio non est propria individui, ut individuum est, sed est propria speciei, ut abstrahit ab individuis, nunc autem loquimur de individuo, ut individuum est. Præsens difficultas pendet ex alia, an scilicet, ab individuis possit abstrahi aliqua ratio communis definibilis essentialiter? Pro qua difficultate, & ut clarius procedamus.

2 Notandum est, individuum primò intentionaliter sumptum esse quoddam concretum dicens pro materiali ipsam naturam individuum, seu determinatam per hæcceitatem, seu principium individuationis ad esse hujus, & pro formali formam illam, à qua prædicta natura individua, seu indivisibilis in plura denominatur, quæ solet appellari modus indivisibiliter existendi, & consistit, vel in negatione repugnantiae divisibilitatis in plura, vel in aliquo mo-

modo positivo, juxta varias sententias. Hoc notato.

3 Dicimus 1. Ab individuis primò intentionaliter sumptis pro materiali nequit abstrahi aliqua ratio communis positiva, quæ de ipsis *in quid* prædicetur. Conclusio est communis inter Scotistas, & deducitur ex Scoto in 1. dist. 23. §. *Item arguo, vers. ad primam istorum*, litt. F. & probatur; quia individuum pro materiali solum dicit naturam specificam, & singularitatem: ergo abstraheretur aliquis conceptus communis positivus proprius individui, ut individuum est, esset ratione singularitatis: hoc est impossibile: ergo nequit abstrahi talis conceptus communis. Minor probatur; quia singularitates sunt differentię ultimò constitutivæ, & distinctivæ: sed ab ultimò constitutivis, & distinctivis nequit abstrahi aliqua ratio communis: ergo à singularitatibus nequit abstrahi aliqua ratio communis. Probatur min. Quia si ab illis abstraheretur aliqua ratio communis, convenirent singularitates in illa, & per aliquid aliud differrent: ergo illud aliud esset ultimò constitutivum, & distinctivum, & non ipsæ singularitates. Deinde, de illo, per quod differrent, potest inquiri, an possit abstrahi ratio communis, vel non? Si potest abstrahi convenirent in illa ratione, & differrent per aliud, & sic in infinitum. Si non potest abstrahi, cur non idem dicendum est de ipsis singularitatibus? ergo absolute dicendum est, quòd non potest abstrahi talis ratio communis ab individuis materialiter sumptis, quæ de ipsis *in quid* dicatur, quippè singularitates, seu hæceitates sunt ultimò constitutivæ, & distinctivæ in linea prædicamentali.

4 Et potest confirmari; quia tota ratio hæceitatis unius individui, ut hæceitas est, est distinctiva illius à quolibet alio individuo: sed ratio distinctiva, ut distinctiva, nequit esse ratio con-

veniendi; ergo individua nullatenus conveniunt in hæcceitate, ut hæcceitas est, & consequenter nequit abstrahi ab individuis ratio hæcceitatis, quæ sit communis ipsis, & de illis dicatur *in quid*.

5 Dicimus 2. Ab individuis primo intentionaliter sumptis potest abstrahi ratio communis, vel positiva, vel negativa, quæ non *in quid*, sed *in quale* dicatur de illis; quæ ratio non est ratio hæcceitatis, seu principi i individuationis, sed ipsa ratio formalis individui, quæ consistit in modo supradicto indivisibiliter existendi, qui consequitur ipsam naturam singularem. Hæc conclusio, quam tenent plures Scotistæ, videtur expressa Scoti, nam loco citato, dicit; *Certum est autem, quod aliqua negatio communis potest abstrahi ab illis ultimis, & hoc unius rationis*. Ecce conceptum communem negativum abstractum ab ultimis constitutivis ex mente Scoti. Deinde, probatur ex ipso Scoto, quia ut aliqua ratio negationis sit communis, non requiritur, quod illud, ratione cuius convenit, sit quid commune, sed quod forma, quæ negatur, sit eiusdem rationis; sed licet singularitates, seu hæcceitates, quarum ratione cōvenit individuis negatio divisibilitatis in plura, seu modus indivisibiliter existendi, non sint quid commune, imò quid distinctum, & diversum, tamen forma, quæ negatur, scilicet divisibilitas in plura, est eiusdem rationis; ergo ratio talis negationis est communis omnibus individuis.

6 Maior patet hoc exemplo; negatio rationalitatis, v. gr. est communis Lapidi, & Leoni, eò quod forma negata, scilicet rationalitas, est eadem, licet principia, à quibus oritur talis negatio, sint diversa in Leone, & Lapide: ergo licet hæcceitates, quæ sunt principia, quorum ratione convenit individuis supradicta negatio, sint diversæ, tamen negatio erit communis,

eo quod forma negata, scilicet divisibilitas in plura, est eadem. Cum quo resp. ad aliqua argumenta.

7 Quod conceptum positivum, inquit Scotus citatus litt. L. *Potest dici, quod ab individuis, non tantum potest abstrahi species, qua dicit quidditatem individuorum, sed etiam aliquid quasi proprium*. Et loquitur de conceptu positivo, ut patet in littera ipsius. Ubi benè advertit Lichetus, quod non loquitur Scotus de conceptu communi, qui dicatur *in quid*, seu essentialiter de individuis, nam species dicit quidditatem individuorum, sed tantum *in quale*, ut denotant illa verba: *quale proprium*, modo quo risibilitas, v.g. convenit individuis naturæ humanæ.

8 Probatur ratione; quia à quacunque convenientia reali aliquorum potest abstrahi ratio communis, & univoca illis: sed omnia individua conveniunt in modo indivisibiliter existendi, sive consistat in negativo, sive in positivo: ergo à tali convenientia potest abstrahi conceptus communis prædicti modi indivisibiliter existendi, licet consistat in positivo, omnibus individuis communi.

9 Argum. contra; si daretur ratio communis modi indivisibiliter existendi, esset quasi propria passio individuorum: sed quælibet propria passio, vel quasi propria, multis communis, supponit aliquod essenziale, à quo dimanet, etiam multis commune: ergo si daretur talis ratio communis, deberet assignari in individuis, ut individua sunt, aliquod commune, à quo dimanaret talis modus indivisibiliter existendi: sed hoc non assignatur, quia prædictus modus sequitur ad differentias individuales, seu hæcceitates; quæ ut dictum est conclusione antecedenti, non dicunt aliquid commune: ergo nequit dari talis conceptus communis indivisibiliter existendi. Resp. disting. min. Si talis pas-

passio, vel quasi propria passio convenit multis ratione alicujus, quod sit ratio conveniendi inter illa, concedo, si convenit ratione alicujus, quod non sit ratio conveniendi, imò potius differendi, nego, & neg. consequ. & deinde, concessa minori subsumpta, neg. ultimam consequ. Ratio hujus est; quia quando id, ratione cuius convenit aliquibus talis modus, seu quasi propria passio, est ratio conveniendi, bene potest esse quid commune illis, quibus talis modus convenit; at verò, quando id, ratione cuius convenit talis modus, non est ratio conveniendi, imò potius est ratio differendi, nullatenus potest esse quid commune illis, quibus convenit talis modus, ut contingit in præsentì.

10 Dices contra; ratio qua convenit Petro, v. g. modus indivisibiliter existendi, ut est principium prædicti modi, est similis rationi, cui convenit Joanni, v. gr. similis modus indivisibiliter existendi, ut etiam est principium prædicti modi, ergo utraque ratio convenit in ratione principii talis modi: sed differentie individuales, ut tales, sunt principia modorum indivisibiliter existendi; ergo vel non conveniunt prædicti modi in conceptu communi, vel differentie individuales, ut tales, similiter conveniunt. Respond. omissis aliis solutionibus, neg. antec. Ratio est, quia ratio, qua convenit Petro modus indivisibiliter existendi, scilicet, differentia individualis ipsius Petri, in tantum est principium modi indivisibiliter existendi, in quantum dicit disconvenientiam respectu rationis, qua convenit Joanni modus indivisibiliter existendi, quæ ratio est differentia individualis ipsius, nam differentie individuales ut tales, sunt rationes differendi, & ut tales, fundant modos indivisibiliter existendi; solum autem possunt prædictæ differentie dici similes in ratione principii, per quamdam convenientiam, non entitati-

vam,

vam, sed proportionalem; scilicet, quòd sicut una fundat modum indivisibiliter existendi, ita & alia, & sicut una est ratio differendi, ita & alia.

11 Ex dictis facillè resolvitur quæstio; igitur, dicimus tertio in ordine: individuum, primò intentionaliter sumptum, licet non possit definiri definitione propria, secundum id, quod dicit pro materiali; benè tamen secundum id, quod dicit pro formali. Hoc patet; quia ut aliquid possit definiri definitione propria, debet dicere aliquid commune: sed individuum sumptum pro materiali non dicit aliquid commune, benè tamen sumptum pro formali: ergo licet sumptum pro materiali nequeat definiri definitione propria, benè tamen sumptum pro formali. Sic ergo potest definiri: *Individuum est, quòd non potest dividi in plura, quorum quodlibet sit ipsum*. Quæ definitio benè explicat rationem communem individui, ut dicit modum indivisibiliter existendi, & ut individuum distinguitur à natura communi. Adverte tamen, quòd hæc definitio non est essentialis, sed descriptiva; quia non datur, respectu alicujus communis, quod essentialiter, & *in quid* dicatur de individuis: sed quod tantum dicatur de illis *in quale*, seu ut quasi propria passio. Unde constat, quòd essentialiter nequit individuum definiri definitione propria, nam nihil essentialiale habet commune, ut individuum est.

12 Ex quo facillè deducitur resolutio cujusdam dubii, scilicet, ad quod prædicabile reducat illa ratio communis individui. Reducitur enim ad quartum prædicabile, scilicet, ad proprium; quia ut dictum est, talis modus indivisibiliter existendi est quasi propria passio individuum, & prædicatur de illis *in quale necessario*; qui modus prædicandi pertinet ad quartum prædicabile, ut ibi dicitur. Tamen

526 *Log. Mag. de Universalibus.*  
men Merinerus disputat. 2. de specie, quæst. 1.  
tenet, ad nullum prædicabile reduci, eo  
quod sit modus intrinsecus entis singula-  
ris, & consequenter modus transcendentalis, &  
certum est, transcendentalia excludi à  
prædicabilibus. Uterque modus dicendi vi-  
detur probabilis, in quo non est multum  
immoderandum, res enim est non magni mo-  
menti.

13 Adverte tamen, quòd ratio commu-  
nis modi indivisibiliter existendi, compa-  
retur, non ad individua, sed ad hunc, &  
illum modum indivisibiliter existendi, potest  
denominari species; sicut ratio communis ri-  
sibilitatis, licet comparata ad individua na-  
turæ humanæ denominetur proprium, tamen  
comparata ad hanc, & illam risibilitatem, de-  
nominatur species, quia ut sic, non *in quale*,  
sed *in eo quod quid* prædicatur, ut tota essentia  
inferiorum.

14 Dices; si modus indivisibiliter existen-  
di esset communis, & prædicaretur *in quid de*  
hoc, & illo modo, necessario contraherentur  
per differentias individuales: sed tales diffe-  
rentiæ etiam fundant modos indivisibili-  
ter existendi; ergo ab illis potest abstrahi ratio  
communis modi indivisibiliter existendi; quæ  
ratio communis etiam contraheretur per alias  
differentias individuales, & sic in infinitum,  
quod non est dicendum. Respond. 1. ex Mastrio  
disput. 5. de Universal. Artic. 4. Quòd ratio  
indivisibiliter existendi primo abstracta erit  
communis omnibus modis indivisibiliter exi-  
stendi, tam fundatis in hæcitatibus, seu  
differentiis individualibus, individuorum,  
quàm in hæcitatibus, seu differentiis indi-  
vidualibus contrahentibus talem rationem ad  
esse hujus, & illius modi indivisibiliter exi-  
stendi, unde ex parte objecti solum daretur  
una, & eadem abstractio, licet in infinitum  
pro-

procederet ex parte intellectus : in quo nulum est inconveniens ; quia non ponit talis processus in infinitum infinitatem obiectorum , sed tantum multiplicationem in infinitum abstractionum , seu præcisionum formalium .

15 Aliter respond. neg. processum in infinitum ; quia ratio communis modi indivisibiliter existendi contraheretur ad esse huius , & illius modi per differentias individuales ipsorum individuorum , quorum sunt modi , nam per illas , & non per alias , sunt à parte rei hic , & ille modus , & sic cessat processus , nam in talibus differentiis sistitur , sicut risibilitas in communi contrahitur ad hanc , & illam risibilitatem per differentias individuales Petri & Pauli . v. g. nam per illas , & non per alias , sunt hæc & illa risibilitas , nisi hoc reducat ad fictionem intellectus .

16 Dubitabis ; quid dicendum sit de individuo vago , v. gr. *Quidam homo* ? Respond. quòd tale individuum non datur à parte rei , ut ex se constat , sed tantum per intellectum , & non dicit naturam communem , quia hæc debet abstrahere à rationibus individualibus quod non habet individuum vagum ; potest tamen dici , quòd aliquomodo est commune tantum per indifferentiam , ita ut si prædicetur de uno , nequeat de alio prædicari , ideoque non constituit universale ; possunt tamen illi applicari secundæ intentiones , tam ut prædicabili ; quam ut subiicibili , modo dicto de individuis determinatis suo modo .



## D I S P. VIII.

*De differentia tertio prædicabili.*

**P**ostquam egimus de prædicabilibus *in quid*, agendum restat de prædicabilibus *in quale*, & quia præcipuum est differentia, nempe prædicatum *in quale quid*, seu essentialiter, ideo prius de illa, quàm de aliis prædicabilibus *in quale* sermonem instituimus ordinem Porphyrii sequentes; potest ergo differentia, sicut & alia prædicabilia sumi primo, & secundo intentionaliter, & in utroque sensu procedit disputatio.

## Q U Æ S T I O I.

*Quid, & quocumque sit differentia primo intentionaliter sumpta?*

**1** **P**ro Intelligentia quæstionis notandum est, quod differentia, primo intentionaliter sumpta, est quoddam concretum dicens pro materiali illam entitatem, quæ facit unum ab alio differre, v. gr. *rationalitatem*, & pro formali munus faciendi differre, quod est forma denominans differentiam prædictæ entitatem, & se habet, ut modus intrinsecus, seu quasi propria passio prædictæ entitatis, ut dictum est de modo indivisibiliter existendi, respectu differentiæ individualis. Hoc notato.

**2** Dicimus 1. Differentia primo intentionaliter sumpta sic definitur à Porphyrio: *Differentia est, qua species excedit genus. Differentia est, qua suapte natura separat ea, qua sub eodem genere collocantur. Differentia, qua differunt singula. Differentias est pars intrinseca constitutiva speciei, & illam separans ab his, qua sub-*  
eo-

*eodem genere collocantur*. Has quatuor definitiones communiter admittunt Philosophi. Circa quas advertendum est, quod respectu differentiarum materialiter sumptarum, non sunt definitiones essentialis; quia definitio essentialis debet constare genere, & differentia: sed differentiarum non datur differentia: ergo non sunt definitiones essentialis. Advertendum, est etiam, quod in ultima definitione continentur aliarum, nam duo sunt munera differentiarum, quarum in prædictis definitionibus explicantur, scilicet constituere speciem simul cum natura generica, & talem speciem ab aliis distinguere: hoc explicatur per ultimam definitionem: ergo in illa cæterarum definitiones continentur.

3 Dicimus 2. Differentia dividitur à Porphyrio in communem, propriam, & propriissimam. Differentia communis dicitur quodlibet accidens separabile; ut albedo in homine, ver. gr. Differentia propria dicitur quodlibet accidens inseparabile, ut nigredo in Corvo. Differentia propriissima est differentia essentialis, & specifica, sive subalterna, ut sensibile in animali, sive infima, ut rationale in homine.

4 Aliter divisit Porphyrius differentiam: alia enim est, quæ facit aliud, id est, diversum in essentia, ut est differentia propriissima, alia est, quæ facit alterum, id est, diversum in accidenti, ut est differentia, tam communis, quam propria. Deinde aliter divisit differentiam inseparabilem, ut est differentia communis, & in inseparabilem, ut est differentia tam propria, quam propriissima. Ulterius divisit differentiam inseparabilem in inseparabilem per se, ut est differentia propriissima, de qua dicit, quod non suscipit magis, & minus, & in inseparabilem per accidens, ut est differentia propria, de qua dicit, quod suscipit magis, & minus. Denique, differentiam inseparabilem per se di-

visit in divisiivam generis, & constitutivam speciei.

5 Circa quas divisiones notandum est, quod tres tantum sunt differentiae, scilicet, communis, propria, & propriissima, quae in prima divisione continentur; quia tamen variis modis possunt considerari; ideo ponuntur ceterae divisiones, quarum ultima non est, proprie divisio, sed potius assignatio utriusque muneris differentiae propriissimae, scilicet, dividere genus, & constituere speciem, quod praestat eadem differentia, v. gr. *rationale*, quae contrahit, & dividit genus, scilicet, *animal*, & constituit speciem; scilicet, *hominem*. Notandum est etiam, solam differentiam propriissimam pertinere ad hoc praedicabile; nam illa tantum potest praedicari *in quale quid*, seu essentialiter; differentia verò communis, & propria, cum sit accidens, vel separabile, vel inseparabile, non praedicatur essentialiter, sed accidentaliter, & sic pertinet ad quintum praedicabile, ut ibi patebit.

6 Ex quo sequitur, Porphyrium solum definisse per praedictas definitiones differentiam propriissimam; quia loquitur de differentia, ut pertinet ad hoc praedicabile, & deinde patet ex ipsis definitionibus, & solum potest esse difficultas de tertia, scilicet; *Differentia est, qua differunt singula*; sed tamen si rectè intelligatur, solum differentiae propriissimae convenit; nam *differre* absolutè prolatum, debet sumi pro maiori differentia, quae excogitari potest, quae quidem est differentia essentialis. Ex dictis oritur sequens difficultas.

## Q U Æ S T I O II.

*An prædicta divisio differentia sit adæquata, & qualis sit?*

**D**icimus 1. Pro primò, quod inquitur quæstio; prædicta divisio differentia in communem, & propriam, & propriissimam, est exacta, & adæquata. Conclusio est communis, & communiter probatur hac unica ratione; nam illa est divisio adæquata, in qua sufficienter enumerantur membra dividenda: hujusmodi est prædicta divisio; ergo est adæquata. Prob. min. Quia, quæ differunt, vel differunt essentialiter, & hoc per differentiam propriissimam, vel accidentaliter, & hoc ratione alicujus accidentis, quod vel est inseparabile, & sic dicitur differentia, propria, vel est separabile, & sic dicitur differentia communis; sed præter hos modos differendi non est assignabilis alius: ergo in prædicta divisione sufficienter enumerantur membra dividenda, & consequenter est adæquata.

2 Arg. 1. Differentia, qua unum prædicamentum differt ab alio, non est accidentalis, ut ex se patet; neque est differentia propriissima, ut assignatur in divisione: ergo datur alia differentia præter supradictas. Antecedens quoad secundam partem, ex eo constat, quia differentia propriissima assignata, est divisiva generis; sed prædicamenta sunt genera suprema; ergo non habent genus supra se, quod per suas differentias dividatur. Confirmatur, quia differentia individualis, non est propriissima, quia non est constitutiva speciei; neque est communis, aut propria, quia non est accidentalis; ergo est differentia distincta à supradictis.

3 Resp. Totum argumentum esse verum, sed

sed non contra nos; quia Porphyrius solum loquitur de differentiis, quæ dividunt illa, quæ ponuntur in prædicamento, quales non sunt differentiæ, quibus unum prædicamentum differt ab alio, cum tantum sint divisivæ entis in communi, quod propter suam transcendentiam excluditur à prædicamento, & hoc, sive tales rationes divisivæ entis sint differentiæ, sive modi intrinseci, de quo alibi. Potest tamen dici, quod prædictæ rationes divisivæ aliquomodo reducuntur ad differentiam propriissimam, quia pertinent ad essentiam illius, quod constituunt, vel in primo, vel in secundo modo dicendi per se, de quo alibi.

4 Ad confirmationem respond. etiam esse veram, sed non contra nos, quia Porphyrius solum loquitur de differentiis, quæ possunt prædicari de pluribus, quales non sunt differentiæ individuales, deinde, potest dici, differentias individuales aliquomodo reduci posse ad differentiam propriissimam; quia & si non sint essentialia, tamen sunt intrinsecæ individuis, sicut differentiæ essentialia, & propriissimæ sunt intrinsecæ speciebus.

5 Argum. 2. In bona divisione unum membrum dividens non includit alia: sed in prædicta divisione unum membrum dividens includit alia: ergo non est bona. Probat. minor. Quia disgregativum visus, v.gr. est differentia propriissima respectu albedinis, & respectu Cicni, est propria, & respectu hominis est communis: ergo unum membrum dividens includit alia. Resp. disting. maior. in bona divisione unum membrum dividens non includit alia entitativè, seu realiter, nego; in suo conceptu formali, concedo. Similiter disting. minor. in prædicta divisione unum membrum dividens includit alia realiter, & entitativè, ut probat exemplum albedinis, concedo.

cædo; in suo conceptu formali, nego, & neg. consequent. Sufficit enim ad bonam divisionem, quod ratio formalis unius membri dividendi non sit ratio formalis alterius; licet alias eidem entitati reali secundum diversas considerationes prædictæ rationes formales conveniant.

6 Arg. 3. Propriæ passiones sunt differentiæ; sed non sunt communes, quia non sunt separabiles a subiecto, neque sunt propriæ, quia hæc ex dictis quæst. antec. cum Porphyrio, recipiunt magis, & minus, & solum sunt inseparabiles per accidens; at vero propriæ passiones non suscipiunt magis, & minus, & sunt inseparabiles per se, neque sunt propriissimæ, quia non sunt essentielles, & specificæ: ergo non continentur in prædicta divisione, & consequenter non est adæquata. Respond. distingu. quoad ultimam partem min. non sunt differentiæ propriissimæ primario, & rigorosè loquendo, concedo, secundario, & reductivè, nego. Etenim propriæ passiones, licet primario non dividant genus, neque constituent speciem, hoc tamen faciunt secundario, quia, necessario consequuntur ad differentias específicas, unde in definitionibus, & divisionibus pluries loco differentiarum essentialium ponuntur propriæ passiones, quod sufficit, ut reductivè, & secundario dicantur differentiæ propriissimæ.

7 Pro secundo, quod inquit quæstio notandum est, quod tam divisum, quam membra dividendi possunt multiplicetur inter se comparari. Primo, ita ut tam divisum, quam membra dividendi materialiter sumantur, & in hoc sensu certum est apud omnes, prædictam divisionem esse æquivoci in æquivocata, nam a prædictis differentiis materialiter sumptis, id est, ab entitatibus, quæ differentiæ denominantur, nequit abstrahi aliqua entitas communis,

quæ hoc nomine *differentia* significetur, & fictalis divisio erit solius nominis communis *differentia* in varias, & diversas entitates, per illud immediatè significatas, sicut divisio huius nominis communis *canis* in canem latrabilem, piscem marinum, & sydus celeste.

8. Secundò, itaut divisum sumatur materialiter, & membra dividendia formaliter. Tertiò: itaut divisum sumatur formaliter, & membra dividendia materialiter, & ut sic, vel est divisio subiecti in diversos modos faciendi differre; vel divisio modi faciendi differre in diversa subiecta. Hoc etiam communiter recipitur, & præcipua difficultas est, si tam divisum, quam membra dividendia sumantur formaliter, hoc est, non pro entitatibus, quæ differentiarum denominantur, sed pro ipsis modis, seu muneribus faciendi differre, in quo sensu.

9. Dicimus 2. in ordine; prædicta divisio differentiarum in communem, propriam, & propriissimam est analogi in analogata, non autem univoci in univocata. Pro hac conclusione solet citari Scotus quæst. 23. Universal. eam tenet major pars Scotistarum, & plures ex aliis. Probatur; quia tunc divisio est analogica, quando ratio significata per nomen commune, propriè, & simpliciter convenit alicui ex membris dividendibus, cæteris verò tantum secundum quid, & per attributionem ad illud, huiusmodi est prædicta divisio: ergo est analogica. Prob. min. Quia nomen *differentia* propriè, & formaliter significat, & denotat, unum ita ab alio differre, ut non sit illud aliud: sed solum differentia propriissima facit, unum non esse aliud, sed quod idem est, esse diversum ab illo essentialiter; differentiarum vero propria, & communis non denotant, unum non esse aliud, sed tantum denotant diver-

verſas alterationes accidentales: ergo ratio differentię ſimpliciter convenit differentię propriiſſimæ, & tantum ſecundum quid, & per ſimilitudinem ad illam, convenit differentię propriæ, & comuni. Patet conſequentia; quia differentia propriiſſima facit differre eſſentialiter, differentia verò propria, & communis ſolum accidentaliter: ſed differre eſſentialiter eſt differre ſimpliciter, & differre accidentaliter eſt differre ſecundum quid: ergo ratio ſignificata per nomen *differentia* ſimpliciter convenit differentię propriiſſimæ, & tantum ſecundum quid differentię propriæ, & comuni, ac per conſequens, &c.

10 Arg. 1. Univoca ſunt, quorum nomen eſt commune, & ratio ſignificata per illud in omnibus eſt eadem; ſed differentię communis, propria, & propriiſſima conveniunt in nomine differentię, & ratio ſignificata per illud in omnibus eſt eadem: ergo ratio differentię eſt univoca illis. Prob. minor. Quia ratio ſignificata per nomen *differentia* eſt facere differre: ſed hoc convenit tribus ſupradictis differentiis; nam omnes faciunt differre: ergo ratio ſignificata per nomen *differentia* in omnibus eſt eadem. Reſp. neg. min. ad cujus prob. dicimus, quod ratio ſignificata per nomen *differentia* eſt facere differre ſimpliciter, quod ſolum convenit differentię propriiſſimæ, differentię autem comuni, & propriæ, tantum ſecundum quid, ut dictum eſt in noſtra ratione, ex quo facile diſtinguitur argumentum.

11 Arg. 2. Ratio univerſalis, ſeu prædicabilis in comuni eſt univoca quinque prædicabilibus: ſed ex illis aliqua eſſentialiter, aliqua accidentaliter prædicantur: ergo ratio differentię eſt univoca differentię comuni, propriæ, & propriiſſimæ, licet hæc eſſentialiter, illæ verò accidentaliter faciant differre. Reſp. conſeſſa mai. & min. neg. conſeq. & paritatem.



Ratio disparitatis est; quia ratio universalis, seu prædicabilis præcisè stat in respectu ad plura per modum superioris, ut suo loco diximus, & certum est, quod prædicabile accidentaliter, tam simpliciter respicit plura per modum superioris, quàm prædicabile essentialiter; at verò ratio differentię stat in facere differe, quod ut dictum est simpliciter convenit differentię propriissimæ; differentię autem proprię, & communi solùm secundum quid: unde prædicari accidentaliter, & essentialiter non variant rationem formalem prædicabilis; benè tamen variant rationem formalem differentię differe essentialiter, & defferre accidentaliter. Hoc dictum est, juxta communioem consensum; tamen si benè attendatur, videtur reduci ad quæstionem de nomine, & sic probabiliter videtur, oppositum posse teneri, pro quo stant aliqui Scotistæ in manuscriptis.

12. Dubitabis, an saltim ratio differentię propriissimæ formaliter sumptæ, & ut constituit hoc tertium prædicabile, sit univoca respectu hujus, & illius differentię propriissimæ, tam formaliter, quàm materialiter sumptæ? Facile resp. Ex dictis de modo indivisibiliter existendi respectu differentiarum individualium, quòd talis ratio differentię est univoca huic, & illi differentię formaliter sumptis, & de illis prædicatur *in quid* tanquam species, & sic reducitur ad secundum prædicabiliter, & similiter, quòd talis ratio differentię est univoca huic, & illi differentię materialiter sumptis, & de illis prædicatur *in quale*, & ut sic potest reduci ad quartum prædicabile, scilicet, ad proprium.

## Q U Æ S T I O III

*Virum differentia includat genus?*

**P**RO intelligentia quæstionis notandum est, quòd loquimur de differentia materialiter sumpta, seu pro illa entitate, quæ differentia denominatur, v. g. *rationale*, & de natura, quæ genus denominatur, & contrahitur per differentiam, v. g. *animal*, & non loquimur de differentia sumpta in concreto; quia ut sic supponit pro specie, & includit genus; sed sumpta in abstracto; Neque loquimur de inclusione reali, quæ idem est, ac identitas realis, nam ut sic certum est, differentiam includere genus, nam realiter identificatur cum illo in constitutione speciei; loquimur autem de inclusione formali, ita ut differentia in suo conceptu formali includat genus quod contrahit. Aliis terminis solet hæc quæstio exagitari; an scilicet, & differentia infima includat differentias subalternas? Eadem enim est ratio circa hoc, ac circa titulum quæstionis.

4 Dicimus ad quæstionem; differentia non includit formaliter, & quidditative genus, quo contrahit, neque differentias subalternas. Hæc conclusio est communis, tam inter Thomistas, quàm Scotistas, quam tenet Scotus 1. Posteriorum quæst. 24. & 7. Metaphys. quæst. 17. & in 4. distin. 11. quæst. 3. §. *Ad rationes*, sub litt. CC. & Arist. 4. Topic. cap. 2. ubi dicit: *Manifestum igitur est, quod non participat genus differentia*. Oppositum tribuitur Nominalibus.

3 Probatur ratione; quia actus formaliter, ut talis non includit in sua ratione formali potentiam, cujus est actus: sed differentia est actus, & genus, quod contrahit, est potentia,

& similiter differentia subalterna, quæ includitur in genere: ergo differentia nequit includere in suo conceptu formali genus, quod contrahit, neque differentiam subalternam.

4 Probatur ab inconvenientibus; nam si differentia includeret genus, quod contrahit, primò sequeretur, quòd definitiones quidditivæ essent nugatorix, id est, idem in illis bis poneretur, quod non est dicendum. Patet sequela; nam in definitionibus quidditativis ponitur genus, & differentia: ergo si differentia includit genus in suo conceptu formali, poneretur genus in definitione semel pro se, & iterum, ut inclusum in differentia.

5 Secundò sequeretur processus in infinitum. Patet; quia si differentix includunt genus, quod contrahunt, conveniunt in illa ratione generis, & necessariò differunt per alias differentias; de illis potest inquiri, an includant genus, vel non? Si non: ergo idem dicendum est de primis, quia eadem est ratio. Si includant, conveniunt in illa ratione, & differunt per alias differentias, & sic in infinitum: ne ergo in infinitum procedatur, dicendum est, differentias non includere genus, quod contrahunt.

6 Arg. 1. Differentiam, v.g. rationalitas, in abstracto sumpta, est substantia; sed non incorporea: ergo corporea, & consequenter corpus: sed non inanimatum. ergo animatum, & consequenter vivens: sed non insensibile: ergo sensibile, & consequenter animal: ergo talis differentia in abstracto sumpta, includit, tam genera, quàm differentias superiores, seu subalternas. Resp. Verum esse, talem differentiam in abstracto esse substantiam, falsum tamen, esse corpoream, aut incorpoream, quia tantum substantia *in quid*, & quæ ponitur in recta linea prædicamentali, dividitur in corpoream, & incorpoream, quia se habet, ut quid contrahibile potentiale, & determinabile, substantia  
verò

verò *in quale* ( ut est prædicta differentia ) non dividitur in corpoream, & in incorpoream, quia non se habet, ut quid contrahibile, potentiale, & determinabile, neque ponitur in recta linea prædicamentali, sed tantum est quid contrahens, actuans, & determinans ipsam substantiam *in quid*, unde neg. conseq.

7 Arg. 2. Hic syllogismus: *Omnis homo est formaliter sensibilis: Omnis homo est formaliter rationalis: ergo aliquod rationale est formaliter sensibile*, est legitimus, & sic tenet illius consequentia: ergo differentia infima, scilicet, *rationale*, includit differentiam subalternam, scilicet, *sensibile*. Resp. Totum esse verum, loquendo de differentia in concreto, ut contingit in præsentia, nam ut sic supponit differentia, vel pro specie, vel pro aliquo inferiori speciei, & certum est, tam speciem, quam inferiora illius includere in suo conceptu formali, tam genus, quam differentias subalternas, falsum autem esse, loquendo de differentia in abstracto, seu secundum suam rationem formalem, præcisè sumpta.

8 Dubitabis, an differentia contractiva generis sit perfectior illo? Resp. Quod communiter differentia est perfectior genere, & solet probari ex eo, quod omnis actus dicitur perfectior sua potentia: sed genus se habet ut potentia, & differentia, ut actus; ergo differentia contractiva generis est perfectior illo. Tamen hæc probatio non est universaliter vera; quia plures potentia sunt substantia, & actus sunt accidentia, ut patet in actibus potentiarum animæ, & in substantia, quæ immediate, ut potentia, recipit aliqua accidentia, ut actus. Unde solum est intelligendum, ita ut totum conflatum ex actu, & potentia dicat aliquam maiorem perfectionem, quam sola potentia, eo quod actus aliquam dicit perfectionem distinctam à perfectione potentiæ, hoc videtur intentum Porphyrii;

cùm dicit : *Differentia est, qua species excedit genus*, nam certum est, totum conflatum ex genere, & differentia, scilicet, speciem dicere maiorem perfectionem, quam genus, eo quod supra genus dicit perfectionem differentia. Entitativè autem loquendo, & facta præcisè comparatione inter genus, & differentiam, communiter dicitur, aliquas differentias excedere genus in perfectione, ut sunt differentia constitutiva nobilium specierum, & genus excedere alias, ut sunt differentia constitutiva specierum ignobilium.

#### Q U Æ S T I O IV.

*De pertinentibus ad differentiam secundo intentionaliter sumptam.*

**P**ORPHYRIUS in hoc capite sic differentiam secundo intentionaliter sumptam definivit : *Differentia est, qua predicatur de pluribus differentibus specie in quale quid*, quæ definitio solum convenit differentia subalternæ, ut omnes fatentur, non autem differentia ultimæ, seu infimæ; hæcenim sic debet definiri : *Est qua predicatur de pluribus differentibus numero in quale quid*. Unde communiter dicitur; quod Porphyrius non definivit differentiam, ut constituit hoc tertium prædicabile, quia hoc continet, tam differentiam subalternam, quam infimam; tamen sufficiens videtur prædicta definitio ad explicationem huius prædicabilis; quia de essentia illius tantum est prædicari *in quale quid*, tanquam pars inferiorum, quod continetur in prædicta definitione; prædicari autem de differentibus specie, vel numero, per accidens se habet ad rationem huius prædicabilis; ideoque diximus tractatu de Universalibus disp. 5. q. 3. nu. 10. differentiam infimam, & subalternam non differre essentialiter, quapropter unum tantum prædicabile

bile constituunt. Videantur ibi dicta, ne quòd semel sufficienter dictum est, iterum repetatur.

2. Dicimustamen, ne à communi via deviemus, differentia, ut comprehendit, tam subalternam, quàm infimam, & ut constituit hoc prædicabile sic potest definiri; *Differentia est id, quod prædicatur de pluribus in quale quid*. Bonitas hujus definitionis, & quòd sit essentialis, & quidditativa, constat ex dictis circa definitionem generis.

3. Dices; definitio essentialis, & quidditativa debet constare genere, & differentia; sed differentia non datur differentia; ergo neque potest dari definitio essentialis. Resp. disting. min. differentia primò intentionaliter sumptæ non datur differentia, concedo, secundò intentionaliter sumptæ, nego. Similiter disting. conseq. differentia primò intentionaliter sumptæ nequit dari definitio essentialis, concedo, (quæ propter diximus quæst. 1. hujus disp. definitiones differentia traditas à Porphyrio, nò esse essentielles respectu differentia sumptæ pro entitate, quæ differentia dicitur) differentia secundò intentionaliter sumptæ nequit dari definitio essentialis, nego, quia ut sic est species universalis in communi, & constat genere, scilicet, *prædicabilitate de pluribus*; & differentia, scilicet, *in quale quid*; per primum convenit cum aliis prædicabilibus, & per secundum differt ab illis.

4. Dubitabis, in ordine ad quæ differentia constituat hoc prædicabile? Hoc dubium surgit ex eo quòd differentia potest prædicari, vel de genere, vel de specie, ut, *animal est sensibilis: homo est rationalis*; vel de inferioribus generis, vel speciei, ut, *homo est sensibilis: equus est sensibilis: Petrus est rationalis; Ioannes est rationalis*. Nunc

5. Resp. ad dubium; quòd differentia subalternæ

terna, non in ordine ad genus, sed in ordine ad inferiora generis, constituit hoc prædicabile, & similiter differentia infima illud constituit, non in ordine ad speciem, sed in ordine ad inferiora speciei. Probatur, quia universale dicit ordinem ad plura: sed differentia subalterna, & infima non dicunt ordinem ad plura, ut comparantur ad genus, vel speciem, benè tamen, ut comparantur ad inferiora generis, vel speciei: ergo non in ordine ad genus, vel speciem, sed in ordine ad inferiora generis, vel speciei, constituit differentia, tam infima, quàm subalterna, distributione accommodata, hoc prædicabile.

6 Dices; universale constituitur per prædicabilitatem immediatam: sed differentia, vel infima, vel subalterna non est prædicabilis immediatè de inferioribus generis, vel speciei; benè tamen de genere, & specie: ergo in ordine ad genus, vel speciem, non tamen in ordine ad inferiora generis, vel speciei, constituit hoc prædicabile. Resp. disting. mai. Universale constituitur per prædicabilitatem immediatam de uno tantum, nego; de pluribus, concedo. Similiter disting. min. differentia non est prædicabilis immediatè de inferioribus generis, vel speciei, benè tamen de genere, & specie, prædicatione de uno tantum, concedo; prædicatione de pluribus, nego, & neg. conseq.

7 Ubi adverte, quòd licet genus, & species contineant virtualiter, seu potentialiter sua inferiora, hoc non sufficit, ut differentia infima, vel subalterna constituat hoc prædicabile in ordine ad speciem, vel genus, nam ad rationem universalis requiritur ordo ad plura formaliter, ut talia. Si autem inquiras, qualis sit prædicatione differentiarum infimarum, vel subalternarum, de specie, vel de genere? Resp. Quòd est prædicatione topica, id est, de subiecto communi convertibili cum prædicato.

## DISP. IX.

*De proprio quarto Pradicabili.*

**I**Nter illa, quæ extra essentialiter prædicantur, primum locum obtinet *proprium*; ideòque postquam egit Porphyrius de illis, quæ essentialiter prædicantur, immediate sermonem instituit de proprio, quod & nos ipsum sequentes facimus.

## QUÆSTIO UNICA

*An proprium rectè definiatur à  
Porphyrio?*

**P**RO intelligentia quæstionis notandum est, quòd Porphyrius quatuor modis accepit proprium. Primò, pro eo quod soli alicui speciei convenit, non tamen omnibus individuis illius, ut esse Medicum respectu hominis; quod debet intelligi in actu; nam in aptitudine omnibus individuis convenit. Secundò, pro eo quod omnibus individuis alicujus speciei convenit, non tamen solis illis, ut esse bipedem, quod convenit omnibus hominibus, non tamen solis illis. Tertiò, pro eo quod convenit omnibus individuis alicujus speciei, & solis illis, sed non semper, ut canescere, quod convenit omnibus & solis hominibus, non tamen semper, sed in senectute. Quartò, pro eo quod convenit omni, soli, & semper, quod dividitur in proprium transcendentale, & est illud, quod consequitur principium transcendentale, ut sunt passionis entis in communi, de hoc non loquimur in præfenti, quia transcendentia excluduntur à prædicabili, & in proprium subalternum, quod consequitur gradum subalternum, seu genericum; ut *nuribile* respectu animalis, quod convenit omni.



omnibus animalibus, solis ipsis, & semper, & in infimum, quod consequitur gradum, seu speciem infimam, ut *visibile* respectu hominis, quod convenit omnibus hominibus, solis ipsis, & semper.

2 Proprium in hoc quarto modo, inquit Porphyrius, est maxime, & verè proprium, quia dicitur ad convertentiam, valet enim; *est homo*; ergo *visibile*, & è contra, ex quo sequitur, quod prædicta divisio in quatuor prædictos modos est analoga. Patet, quia proprium non debet esse commune, nec contingens; sed quod non convenit soli, est commune, & quod non convenit omni, & semper est contingens; ergo quod non convenit omni, soli, & semper, non est proprium simpliciter; ergo ratio proprii simpliciter solum convenit proprio in quarto modo, cæteris autem per similitudinem, & analogiam ad illud, & consequenter prædicta divisio est analoga.

3 Proprium in hoc quarto modo sic definiit Porphyrius; *Proprium dicitur, quod accidit soli alicui speciei, & omni, ac semper*; & certum est, in hac definitione solum comprehendere proprium infimum, seu specificum, non autem proprium genericum, & subalternum, & sic neque proprium in communi, & ut comprehendit infimum, & subalternum, ut constituit hoc prædicabile. Videantur, quæ diximus disp. anteq. 4. n. 1. Nunc est difficultas, an per prædictam definitionem rectè definiatur proprium infimum, seu specificum?

4 Dicimus 1. Per prædictam definitionem rectè definiatur proprium à Porphyrio. Conclusio est communis, & intelligitur, tam de proprio primò, quàm secundò intentionaliter sumpto, ut tenet Scotus quæst. 31. Universal. Probatur conclusio definitionem explicando cum Scoto citato, nam prædicta verba possunt intelligi primò intentionaliter, ita ut *ly accidit* signi-

significet *extra quidditatem* afficere; *ly omni* significet, *omnia individua*, *ly soli* significet *unius tantum speciei*; & *ly semper* significet *inseparabiliter & necessario*, & ita sensus definitionis sit; *Proprium est, quod extra quidditatem afficit omnibus individuis unius tantum speciei inseparabiliter, & necessario*. Quæ definitio, ut ex se patet, rectè explicat naturam proprii primò intentionaliter sumpti, ex qua ad definiendum proprium in communi, prout comprehendit, tam infimum, quàm subalternum, deducitur hæc: *Proprium est ratio extra essentialis dimanans ab essentia, ipsam necessario, & inseparabiliter consequens*.

5 Possunt etiam prædicta verba intelligi secundò intentionaliter, ita ut *ly accidit* significet *predicari in quale*; *ly omni* significet *de omnibus individuis*, *ly soli* significet *unius tantum speciei*, & *ly semper* significet *necessario, & inseparabiliter*, & ita sensus definitionis sit: *Proprium est, quod predicatur in quale de omnibus individuis unius speciei necessario, & inseparabiliter*. seu quod idem est, *proprium est, quod predicatur de pluribus differentibus numero in quale necessario*. Quæ definitio ab omnibus admittitur, quia benè explicat proprium infimum seu specificum, ut pertinet ad hoc prædicabile, & distinguitur ab aliis, nam convenit cum aliis prædicabilibus in *predicari de pluribus*; & per *predicari in quale* differt à genere, & specie, quæ prædicantur in *quid*, & à differentia, quæ prædicatur, non solum in *quale*, sed in *quale quid*, & per *predicari necessario* differt ab accidenti, quod prædicatur *contingenter*. Hæc definitio est essentialis, ut dictum est de definitione generis.

6 Ex prædicta definitione facilè deducitur definitio proprii subalterni, seu generici: *Est enim, quod predicatur de pluribus differentibus specie in quale necessario*, & similiter deducitur defi-

definitio proprii in communi, & ut constituit hoc prædicabile; etenim; *Proprium est, quod prædicatur de pluribus in quale necessario.* Quæ definitiones suppositis dictis circa primam, non indigent explicatione. Adverte tamen, quod proprium infimum, & subalternum tantum accidentaliter differunt in ratione prædicabilis, unde non duo prædicabilia, sed unum tantum prædicabile constituunt; modo dicto de differentia infima, & subalterna, eadem enim est ratio hic, & ibi.

7 Dic. 2. Proprium constituit hoc prædicabile in ordine ad inferiora generis, vel speciei, non tamen in ordine ad genus, vel speciem. Hæc conclusio manet probata in simili de differentia disp. ant. quæst. 4. num. 5. Videantur ibi dicta. Neque Arist. 1. Top. c. 4. dum dicit proprium prædicari convertibiliter, nobis contrariatur; nam ibi loquitur de proprio, ut est prædicatum topicum, & ut sic prædicatur convertibiliter, vel de genere, si est subalternum, vel de specie, si est infimum, non tamen loquitur de proprio, ut est universale, ut sic enim nequit prædicari convertibiliter, non enim valet: *est risibile: ergo est Petrus*; licet valeat e contra. Cujus ratio est; quia de ratione universalis est, quod sit superius, & certum est superius, non converti cum aliquo inferiori; nam dici ad convertentiam propriè, & solùm convenit æqualibus. Alia ad proprium primò intentionaliter pertinentia, in libris de Anima proponuntur.

## D I S P . X.

### *De accidenti quinto prædicabili.*

**U**Niversale, seu prædicabile quintum in ordine est accidens, quippè imperfectius omnibus aliis; ideòque ultimo loco, de illo cum Prophyrio sermonem instituimus.

QUÆ.

## Q U Æ S T I O U N I C.

An rectè a Porphyrio definiatur  
accidens?

1 **P**ro intelligentia quæstionis supponendum est, Porphyrium in hoc capite sic accidens definiisse: *Accidens est, quod inesse, & non inesse eidem potest*; seu quod idem est: *Accidens est, quod potest adesse, & abesse sine subiecti corruptione*. Circa quam definitionem est dubium, an rectè per illam accidens definiatur? Notandum tamen est, quod accidens dupliciter considerari potest; primo, ut est accidens prædicamentale, & distinguitur a substantia, in quo sensu comprehendit novem genera accidentium, de quibus suo loco. Secundò, ut accidens prædicabile, in quo sensu non solum comprehendit novem prædicta genera accidentium, sed etiam omnia illa, quæ licet sint substantiæ, tamen accidentaliter se habent respectu alicuius, seu ita sunt extra rationem illius, quod tam à priori, quam a posteriori salvatur sine illis eius essentia, eo quod nullam necessariam connexionem cum illis habet, ut *rationale*, v. g. respectu animalis.

2 Notandum est etiam, quod illa verba *adesse*, & *abesse* posita in definitione possunt accipi dupliciter, scilicet, vel primo intentionaliter, ita ut sensus sit, quod accidens possit physicè, & realiter inhaerere, & non inhaerere subiecto, vel secundo intentionaliter, ita ut sensus sit, quod accidens potest affirmari, vel negari de aliquo, salva illius essentia.

3 Dicimus 1. Si prædicta verba *adesse* & *abesse* sumantur primò intentionaliter, non bene definitur accidens per prædictam definitionem, seu quod idem est, non definivit Porphyrius per illam accidens prædicamentale. Conclusio est com-

communis inter Scotistas, & plures alios contra Rubium hic quaest. 3. & Torrejon quaest. 1. Eam tenet Scotus quaest. 35. Universal. & etiam citatur pro illa D. Thomas de spiritualibus creaturis Artic. ultim. ad 7. Probatur ratione, quia si praedictae particulae intelligerentur physice, & realiter, seu primo intentionaliter, talis definitio non conveniret omni suo definito: ergo si ita intelligantur, praedicta definitio non est bona. Prob. antec. Quia accidens inseparabile ideo dicitur tale, quia physice, & realiter nequit separari a subiecto sine illius physica, & reali corruptione: ergo illa particula *abesse* physice, & realiter nequit convenire accidenti inseparabili, & consequenter, si physice, & realiter intelligatur, talis definitio non convenit omni suo definito.

4 Dicimus 2. Si praedicta verba intelligantur secundo intentionaliter, bene definitur accidens per praedictam definitionem, seu quod idem est, Porphyrius definivit per illam accidens, ut praedicabile. Conclusio est communis, sicut praecedens. Probatur, quia in hoc sensu convenit definitio omni suo definito: ergo est bona. Antecedens patet, quia tam accidens separabile, quam inseparabile, & etiam quod accidentaliter, modo dicto num. 1. praedicatur de aliquo, licet alias sit substantia, potest affirmari, vel negari de subiecto sine illius corruptione: ergo si praedicta verba intelligantur secundo intentionaliter, bene definitur per illam accidens, & consequenter in hoc sensu debent intelligi, & in illo dicendum est, loqui Porphyrium. Neque obstat, quod Porphyrius divisit accidens in separabile, & in inseparabile, quae divisio debet intelligi de separabilitate, & inseparabilitate physica, nam in diverso sensu loquitur Porphyrius in divisione, quam in definitione supradicta, alias ipse sibi contradiceret, si enim, tam definitio, quam divisio intelli-

geren-

gerentur de separatione, reali, jam quod affirmavit in definitione, scilicet, accidens posse separari, negaret in divisione, cum dicat, dari accidens inseparabile, quod nullatenus est dicendum.

5 Arg. 1. Si prædicta definitio non intelligeretur primo, sed secundo intentionaliter, conveniret aliis à suo definito; ergo ut sic non esset bona definitio. Prob. antec. Quia proprium potest per intellectum adesse, & abesse sine subiecti corruptione; ergo prædicta definitio secundo intentionaliter sumpta conveniret proprio. Pro responsione nota, quod abesse à subiecto per intellectum, dupliciter potest contingere. Primo, per cognitionem præcisivam, quæ dicitur illa, qua unum cognoscitur sine alio: non tamen illud negando. Secundo, per cognitionem negativam, quæ dicitur illa, qua aliquid de alio negatur. Nunc.

6 Resp. neg. antec. & disting. antec. probationis, proprium potest per intellectum abesse absque subiecti corruptione: cognitione pure præcisiva, concedo, cognitione negativa, nego, & neg. consequ. Hæc cognitio negativa est propria accidentis.

7 Replic. Tam falsa est hæc propositio: *Corvus non est niger*; sicut hæc: *homo non est visibilis*; ergo sicut nequit proprium negari de subiecto, ita neque accidens, & consequenter non tenet prædicta solutio. Resp. disting. antec. est enim verum absolutè loquendo, falsum tamen, si attendatur ad principia falsitatis. Pro cuius intelligentia observandum est, quod licet illa propositio; *Corvus non est niger* sit falsa; non tamen est contra essentiam ipsius corvi, quia nigredo non oritur à principiis essentialibus corvi, sed à principiis materialibus, sicut nigredo Æthiopis, licet sit inseparabilis ab illo, oritur à principiis materialibus, scilicet, à tali

à tali dispositione materiæ, & à tali temperamento, non tamen a principiis essentialibus illius, unde licet hæc propositio sit falsa; *Aethiops non est niger*: non tamen est contra illius essentiam, at verò illa propositio; *homo non est risibilis*, non solum est falsa, sed etiam opponitur essentiæ hominis; quia oritur necessario risibilitas à principiis essentialibus hominis. Quod adhuc materialiter loquendo, in via Scotistarum patet, quia proprium, nec de potentia Dei absoluta, potest separari ab essentia, accidens vero inseparabile solum dicitur tale, quia naturaliter nequit à subjecto separari, supernaturaliter tamen ab illo separari potest.

8 Arg. 2. Universale consistit in posse prædicari de pluribus, non autem in posse negari; sed juxta prædictam explicationem, *adesse* denotat prædicari, & *abesse* negari: ergo sic explicata non est bona definitio. Resp. disting. min. quoad secundam partem, *abesse* denotat negari absolute, ita ut pertineat ad rationem universalis, nego; denotat negari, prout negari dicit modum accidentalem prædicandi, qui convenit huic prædicabili, concedo, & neg. consequ. Etenim ratio formalis universalis in communi stat in prædicari de pluribus; ratio autem specialis hujus quinti prædicabilis stat in prædicari contingenter, quod denotatur per illam particulam *abesse*, seu *negari*; unde sensus definitionis est; *accidens est quod potest adesse* ( id est prædicari ) & *abesse* ( id est, ita ut possit abesse per intellectum, seu negari, quod denotat prædicari contingenter ) *sine corruptione subiecti*. Cum quo similiter resp. ad aliud argumentum, scilicet, quod prædicta definitio non est bona, eo quod datur per opposita, scilicet *adesse*, & *abesse*, nam dicimus non esse opposita, sed *abesse*; seu *negari*, esse quasi contractionem, ly *adesse*, seu prædicari ad rationem hujus quinti prædicabilis, nam ut dictum est, ly *abesse* denotat, præ-

prædicationem esse contingentem.

9 Arg. 3. Mors, & existentia sunt accidentia prædicabilia : sed existentia nequit abesse, neque mors adesse, adhuc per intellectum, sine corruptione subjecti ; ergo adesse, & abesse, adhuc per intellectum, non convenit omni accidenti prædicabili. Resp. disting. min. est enim vera loquendo de corruptione subjecti quoad existentiam ; falsa autem de corruptione subjecti quoad essentiam. Unde neg. consequ. quia mors, & existentia tantum sunt accidentia hominis, v. g. quoad essentiam, & hæc salvatur incorrupta, siue homo existat, siue non.

10 Ex dictis facile deducitur, supradictam definitionem coincidere cum alia, quæ communiter datur, huius quinti prædicabilis, scilicet : *Accidens est, quod predicatur de pluribus in quibus contingenter*, quæ suppositis dictis circa definitionem generis, non indiget ampliori explanatione. Alia definitio, quæ adducitur à Porphyrio, scilicet : *Accidens est, quod neque est genus, neque species, neque differentia, neque proprium semper tamen est in subiecto* : tantum est quædam descriptio negativa accidentis, & illud *semper tamen est in subiecto* non debet intelligi actualiter, sed aptitudinaliter, ita ut sensus sit, semper tamen potest accidentaliter prædicari de subiectis, modo supra explicato.

### Dubia incidentia.

11 Pro maiori claritate huius prædicabilis, aliqua dubia resolvenda sunt. Primò ergo dubitatur, an accidens constituat aliquod universale, seu prædicabile ab aliis distinctum ? Resp. affirmativè. Resolutio est communis contra Torreion. cap. de accidenti disp. 9. quæst. 2. Probatur, quia hæc prædicationes : *Paries est albus. Petrus est albus, &c.* sunt prædicationes universalis, quia non tantum non *albus*, sed etiam



etiam ratio significata per illud prædicatur de pluribus: sed prædictæ prædicationes non pertinent ad aliquod ex quatuor antecedentibus prædicabilibus, cum nullum ex illis prædicetur contingenter, ut evenit in prædictis prædicationibus: ergo quod in illis prædicatur, constituit universale, seu prædicabile distinctum à quatuor supradictis.

12 Arg. contra; universale prædicatur de pluribus univocè: sed accidens non prædicatur de subjectis univocè, sed tantum denominativè: ergo accidens non est universale. Resp. disting. min. accidens non prædicatur univocè, prout prædicari univocè dicit prædicari essentialiter, concedo, prout prædicari univocè opponitur prædicari æquivocè, & analogicè, nego; hoc enim sufficit ad rationem universalis, unde neg. conseq. Alia argumenta facillè solvuntur ex dictis circa omnia prædicabilia.

13 Secundò dubitatur, in ordine ad quæ accidens constituat hoc quintum prædicabile? Resp. Illud constituere in ordine ad subjecta: Probatur, quia quintum prædicabile prædicatur contingenter: sed accidens de subjectis prædicatur contingenter: ergo in ordine ad subjecta constituit accidens hoc quintum prædicabile.

14 Ex quo deducitur, quod si accidens in communi comparetur ad plures species inferiores, ut coloratum ad album, & nigrum pertinet ad primum prædicabile, scilicet ad genus, si autem accidens specificum comparetur ad plura individua inferiora, ut album ad hoc, & illud album, pertinet ad secundum prædicabile scilicet ad speciem, quod ex se patet.

15 Deducitur secundò, accidentia in abstracto non constituere hoc quintum prædicabile, sed tantum in concreto, quod patet, quia accidentia solum in concreto, & non in abstracto possunt prædicari de subjectis, in ordine ad quæ hoc prædicabile constituunt.

TRA.

# TRACTATUS

*In librum categoriarum  
Aristotelis .*

**A**D intelligentiam omnium, quæ in hoc tractatu dicenda sunt, aliqua oportet præ oculis habere. Primum hoc nomen *categoria* esse græcum, & idem est, ac latinè *prædicamentum*, & licet ex sua primâ impositione tantum supremum prædicatum, seu genus significet, ex communi tamen consensu dialecticorum extenditur ad significandam totam seriem, seu coordinationem prædicamentalem prædicatorum essentialium, quæ a supermo genere usque ad speciẽ infimam inveniuntur. Unde sequitur, objectum huius tractatus esse categoriam, seu prædicamentum in communi, ut sub se comprehendit omnes categorias, seu omnia prædicamenta.

Secundò, quòd finis Arist. in hoc tractatu fuit adducere facilem, & distinctam cognitionem omnium rerum, illas ad decem classes reducendo, & coordinando secundum rationem subjecti, & prædicati, superioris, & inferioris, quæ sunt termini ad constituendas propositiones in ordine ad syllogismum, qui est objectum totius Logicæ Aristotelis, ut suo loco diximus: unde sequitur.

Tertiò, materiam huius tractatus secundum diversas rationes pertinere ad Metaphysicam, & ad Logicam. Ad Metaphysicam spectat in ratione entis realis, quod est objectum Metaphysicæ: ad Logicam autem, ut potest subesse secundis intentionibus subjecti, prædicati, generis, speciei, &c. in coordinatione prædicamentali. Divisit Arist. hunc tractatum in

*Cursus Philos. Tom. I.*

*Aa — qua.*

quatuordecim capita, quæ in tres partes solent proponi, videlicet, in antepredicamenta, in prædicamenta, & in postprædicamenta, quem ordinem sequentes, similiter in tres partes præsentem tractatum dividemus.

# PARS PRIMA

## De Antepredicamentis.

**P**ER quatuor capita, quæ continentur in hac prima parte, egit Arist. de aliquibus necessariò præmittendis ad intelligentiam prædicamentorum.

### D I S P. I.

#### *De univocis, æquivocis, analogis, & denominativis.*

**I**N primo capite egit Arist. de univocis, æquivocis, & denominativis, quorum definitiones tradidimus 1. parte Sumularum lib. 1. cap. 1. num. 22. & similiter definitionem analogorum, quæ dicuntur æquivoca à consilio, & for. è propter hoc non egit in hoc capite Arist. de analogis in speciali sub hoc nomine, tamen aliis in locis adducuntur ab Arist. præcipuè 1. Ethic. cap. 5. & 4. Metaphysicæ cap. 2. & lib. 7. cap. 4. ubi enumerat aliqua, quæ ut nomine communi significantur, nec sunt univoca, nec æquivoca, strictè sumpta, sed æquivoca ad unum, vel ab uno, aut dicentia comparisonem proportionis inter se, eum autem cognitio analogorum valdè conducatur ad prædicamentorum intelligentiam, hic communiter de illis agitur, & præter dicta in Sumulis loco citato, restant difficultates sequentes.

QUÆ.

## Q U Æ S T I O I.

*De pertinentibus ad univoca, æquivoca,  
& denominativa.*

1 **C**irca definitiones univocorum, & æquivocorum potest dubitari, quid intelligatur per illam particulam *ratio substantia* in illis posita? Resp. Quòd intelligitur, non ita ut univoca, vel æquivoca necessariò sint de prædicamento substantiæ, neque ita ut ratio significata per nomen sit de essentia illorum, quibus est communis, sed ita ut ratio, quæ essentialiter, seu propriè per nomen significatur, sit eadem, vel diversa respectu univocorum, & æquivocorum, unde *ratio substantia* idem est, ac ratio significata per nomen, sive sit, sive non de essentia illorum, quibus nomen est commune.

2 Circa nomen univocum potest dubitari, quotuplex sit? Resp. esse duplex, scilicet, propriissimum, & est, quando ratio significat per nomen est de essentia illorum, quibus est commune, ut animal, v. gr. respectu hominis, & bruti, & minus proprium, est, quando ratio significata per nomen accidentaliter convenit illis, quibus est commune, ut album, v. g. respectu hominis, & parietis. Ubi aliqui notant, quod licet utrumque possit dici univocum prædicatum, solùm tamen univocum propriissimum dicitur univocè prædicari, nam inquirunt, *prædicari univocè* idem est, ac prædicari essentialiter, sed tam hoc, quàm alia infra dicenda, videntur reduci ad quæstionem de nomine. Alia de univocis in Metaphysica traduntur.

3 Circa definitionem æquivocorum est dubium, quia videtur, æquivoca non posse definiri, nam ut inquit Arist. 6. Topic. cap. 2. & 5. & est commune proloquium Philosophorum; *Æquivoca prius sunt dividenda, quam definienda*

& ratio est, quia æquivoca æquivocata, quæ definiuntur, sunt plures res nullam naturam communem habentes: ergo malè assignatur definitio æquivocorum. Hoc tamen non obstante, dicimus, definitionem æquivocorum rectè assignari, quia ex dictis in Sumulis loco citato, benè explicantur æquivoca, ut distincta ab univocis. Unde.

4 Ad rationem dubitandi resp. Quòd æquivoca dupliciter possunt considerari. Primò, materialiter, seu pro ipsis rebus dissimilibus in natura, quæ eodem nomine significantur. Secundò, formaliter, seu pro illa notione communi, quam omnia æquivoca participant. In primo sensu vera est ratio dubitandi, nam sydus cœleste, piscis marinus, & animal latrabile, cùm habeant diversas naturas, nequeunt unica definitione definiri, unde, quando inquiritur, quid sit canis? (hoc enim nomine tria prædicta appellantur) prius est distinguendum, quàm definiendum; nam cùm nomen *canis* tria prædicta æquivocè significet, prius sciendum est, de quonam illorum fiat interrogatio, quàm responsio, & definitio tribuatur.

5 In secundo verò sensu falsa est ratio dubitandi, quia omnia æquivoca conveniunt in notione æquivocorum, & in hoc sensu definiuntur, nam ut sic, non æquivoca materialiter sumptæ, sed ipsa ratio formalis æquivocationis definitur; quod patet hoc exemplo, in definitione universalis, ver. gr. quam omnes admittunt, non definiuntur naturæ, quæ universales demoninantur materialiter sumptæ quia ut sic (ut ex se patet) non dicunt aliquam rationem communem; sed definiuntur formaliter sumptæ in ratione universalis, seu melius, definitur ipsa ratio formalis universalitatis, in qua omnes conveniunt.

6 Circa denominativa potest dubitari, an habeant aliquam divisionem? Pro responsione notandum est, quod in denominativis tria inveniuntur.

niuntur, scilicet, forma, quæ dicitur denomi-  
nans subjectum, quòd dicitur denominatum, &  
conflatum ex subjecto, & forma, & dicitur de-  
nominativum, v.g. in *albo albedo* est forma deno-  
minans subjectum, v.g. *paries*, est denominatum,  
& totum conflatum, scilicet, *album*, est denomi-  
nativum. Ex quo facile intelligitur Arist. cum  
in hoc capite dicit, quòd denominativum solo  
casu differt ab illo, à quo recipit denominationē:  
nam denominativum est concretum, & denomi-  
nans est abstractum, & abstractum & concretum  
solum differunt in hoc, quòd concretum signifi-  
cat formam cum cadentia, seu concernentia ad  
subjectum, & abstractum dicit formam sine tali  
cadentia, aut concernentia.

7 Resp. ad dubium, quòd denominativum,  
ratione forme denominantis, dividitur in deno-  
minativum solum in re, & est illud, quod recipit  
denominationē ab aliqua forma significāte eam-  
dem rem, licet non habente idem nomen, ut *stu-  
diosus* recipit denominationem à *virtute*, quæ  
idem significat, ac *studiosus*, licet diverso nomi-  
ne, & in denominativum solum nomine & voce,  
& est illud, quod recipit denominationem ab ali-  
qua forma habente idem nomen, licet diversam  
significationem, ut *studiosus* recipit denomi-  
nationem ab *studio*, quod habet idem nomen, ac  
*studiosus*, sed diversam significationē, nā *studium*  
significat diligentiam in ediscendis litteris, *stu-  
diosus* verò significat habens virtutem, & in de-  
nominativum re & nomine, & est illud, quod  
recipit denominationem ab aliqua forma idem  
significante, & idem nomen habente, ut *album*  
recipit denominationem ab *albedine*, quæ idem  
nomen habet, & idem significat, ac *album*.

8 Denominativum autem, ratione rei de-  
nominatæ, dividitur in essentialē, & est il-  
lud, quod recipit denominationem ab aliqua  
forma essentiali, ut *rationale* recipit denomi-  
nationem à *rationalitate*; quæ est de essentia

hominis denominati. Huc possunt reduci denominativa a propriis passionibus, ut dictum est de differentia propriissima, & in denominativum accidentale, & est illud, quod recipit denominationem a forma accidentali, ut *album* recipit denominationem ab *albedine*, quæ est forma accidentalis respectu subiecti illam habentis. Aliqui intendunt, quod solum denominativa accidentalia sint propriè denominativa, falso tamen nituntur fundamento, scilicet, quod forma denominans debet realiter distingui a re denominata, quod non facile probatur, nos autem dicimus, quod etiam denominativum essentialè est propriè denominativum, nam ad hoc sufficit, vel distinctio rationis, vel formalis ex natura rei, inter formam dominantem, & rem denominatam.

9 Advertendum tamen est, ad auferendam æquivocationem, & ad solvenda aliqua argumenta, quæ magis apparentiæ, quam realitatis habent, quod univocum differt à denominativo in hoc, quod denominativum tantum dicit recipere denominationem ab aliqua forma, siue ratio significata per illam sit communis pluribus, siue non, unde, si *albedini*, v.g. repugnaret multiplicari in pluribus, adhuc *album* diceretur denominativum, quia reciperet denominationem ab *albedine*; univocum autem, cum sit quid commune pluribus, necessario exigit plura, quibus nomine, & re conveniat, ad minus possibilia.

## Q U Æ S T I O II.

*Quid, & quotuplex sit analogia.*

1 **D**Iximus in Sumulis loco citato in initio huius disp. analogia aliquomodo coincidere cum æquivocis a consilio, nunc autem pro majori illorum intelligentia, aliqua ad ana-

analogiam pertinentia exagitantur, quæ valde lato sermone, qui maximam confusionem adducit, ab aliquibus disputantur, non autem illa plus per modum simplicis recitationis, quam per modum disputationis, brevitate, possibili attingemus, quia judicamus, ferè omnia reduci ad quæstionem de nomine. Igitur.

2 Dicimus 1. pro primo, quod inquit quæstio, *analogia* nomen est græcum, quod latine idem sonat, ac *proportio*, unde sic communiter definitur: *Analogia est proportio aliquorum idem nomen participantium*. Quæ definitio ferè ex terminis patet, & amplius patebit ex dicendis.

3 Dicimus 2. pro secundo, quod inquit quæstio: analogia dividitur in analogiam attributionis, in analogiam proportionis, seu proportionalitatis, & in analogiam inæqualitatis. Analogia attributionis dicitur, quando nomen ita est commune, ut ratio significata per illud, participetur ab analogatis per ordinem unius ad aliud, v. g. hoc nomen *sanum* dicitur analogum analogia attributionis, quia analogata, scilicet, *animal*, *urina*, & *medicina*, ita participant rationem sanitatis significatam per *sanum*, ut propriè conveniat animali, cæteris autem per attributionem ad illud, & hoc intendit Arist. cum dicit, *analogia dici ab uno, & ad unum*.

4 Analogia proportionis, seu proportionalitatis dicitur, quando nomen commune significat aliquam rationem diversam in analogatis, cum aliqua tamen similitudine inter illa, v. g. hoc nomen *risus* dicitur analogum analogia proportionis, seu proportionalitatis, quia analogata, scilicet, *homo*, & *rivulus* habent diversas rationes risus, cum aliqua tamen similitudine inter se.

5 Analogia inæqualitatis dicitur, quando



nomen commune significat aliquam rationem , eandem essentialiter in analogatis , & tantum diversam accidentaliter , ratione inæqualium differentiarum , seu proprietatum , v. g. hoc nomen *animal* dicitur analogum analogia inæqualitatis ; respectu hominis , & bruti , quia tale nomen est commune illis , & ratio significata per illud , essentialiter , & quantum est ex se , est in illis eadem ; & tamen propter differentias inæqualiter existit in illis , nobilius , scilicet , in homine propter rationalitatem , & ignobilius in bruto propter irrationalitatem . Hoc modo potest dici ens analogum Deo , & creaturis , substantiæ , & accidenti , quia perfectiori modo est in Deo , quam in creaturis , & in substantia , quam in accidenti , de quo in *Metaphysica*.

6 Prima , & secunda analogia communiter ab omnibus admittitur , & circa illas notandum est , quod versatur hæc differentia , scilicet , quod analogia attributionis solum exigit duos terminos ; quia cum sit proportio inter rationes diversarum rerum , ut significantur nomine communi , solum pro terminis habebit ipsas rationes diversarum rerum , inter quas est analogia ; analogia autem proportionalitatis exigit quatuor terminos , quia est proportio inter rationes diversarum proportionum , ut significantur nomine communi , & certum est , quamlibet proportionem habere duos terminos ; sicut enim explicatur analogia proportionalitatis : *Sicut se habet risus ad pratum , similiter se habet risus ad hominem*.

7 Advertendum tamen est , quod ratio significata per nomen analogum , propriè , & formaliter reperitur in uno ex analogatis , in aliis vero , impropriè , & metaphoricè , seu per ordinem ad illud , quod patet in omnibus exemplis supra positis , unde inferitur , divisionem analogiæ , traditam ab aliquibus , in propriam , & in

& in impropriam, non videri rectè traditam; impropriam enim appellant, quando ratio significata per nomen analogum, alteri ex analogatis convenit propriè, cæteris verò impropriè; modo dicto: propriam autem appellant, quando ratio significata per nomen propriè convenit omnibus analogatis, ut inquirunt, ratio significata per hoc nomen principium propriè convenit puncto lineæ, & fundamento domus, quæ sunt analogæ proportionalitatis; nam sicut se habet in ratione principii primum punctum ad lineam, ita se habet fundamentum ad domum, hæc tamen explicatio analogiæ non excludit univocationem; nam in ratione principii, punctum lineæ, & fundamentum domus conveniunt univocè, licet materialiter æquivoca sint, ut in simili diximus loquendo de differentiis. Similiter dicendum est de tertia analogia, scilicet, inæqualitatis, quæ, ut patet, non excludit univocationem, sed hoc, ut sæpè dictum est, reducitur ad questionem de nomine, quapropter in illo non amplius est immorandum; solum adverte, quòd communiter dicitur: *Analogum per se sumptum stat pro famosiori significato*, id est pro illo, cui ratio significata propriè convenit, & quòd ab analogatis propriè dictis nequit abstrahi aliqua ratio communis significata per illud nomen; cum in quolibet illorum sit diversa.

### Q U Æ S T I O III.

*In qua aliqua dubia circa analogiam resolvuntur.*

**D** Ubitabis 1. An analogia attributionis, & analogia proportionalitatis differant specie? Communis consensus Scotistarum est, quòd non differunt specie, quod patet et ex eo, quòd ut dictum est, ratio formalis

analogicæ consistit in hoc, quòd unum ex analogatis ita participet rationem significatā per nomen, quòd cætera analogata per ordinem, seu attributionem ad illud illam participant: hoc eodem modo invenitur in analogia attributionis, & proportionalitatis: ergo in ratione analogicæ non differunt specie. Solùm autem differunt materialiter, quatenus una versatur inter res, & sic tantùm exigit duos terminos, altera verò versatur inter proportionem rerum, & sic necessariò quatuor terminos exigit, ut dictum est quæst. antec. & certum est, differentias materiales non facere differre specificè.

2 Dubitabis 2. Utrùm analogum sit medium inter univocum, & æquivocum. Pro responsione notandum est, quòd æquivoca sunt in duplici differentia, alia purè æquivoca, & sunt æquivoca à casu, & dicuntur purè equivoca, quia ita habent naturas diversas, ut nullum ordinem, neque proportionem habeant inter se: alia non purè æquivoca, & sunt æquivoca à consilio, & dicuntur non purè æquivoca, quia licet habeant naturas diversas, habent tamen inter se aliquem ordinem, seu proportionem, ut dictum est in Sumulis.

3 Similiter univoca sunt in duplici differentia, alia purè univoca, & sunt illa, in quibus ratio communis significatā per nomen, est eadem, & idem modus essendi talis rationis in illis, & idem ordo essentialis, ita ut talis ratio non sit prius in uno, quàm in alio, & eadem perfectio essentialis, ita ut talis ratio non sit perfectiori modo in uno, quàm in alio. In hoc sensu solùm dicuntur univoca individua unius speciei.

4 Alia non purè univoca, & sunt illa, quibus deficit aliqua ex prædictis conditionibus ad puram univocationē, & sunt in triplici differentia, alia quibus deficit tantùm quarta conditio, in quo sensu dicuntur univoca species ali-

alicuius generis , nam ratio animalis , v. gr. perfectior est essentialiter in homine propter suam differentiam , quàm in bruto . Alia sunt , quibus deficit tertia , & quarta conditio , in hoc sensu dicuntur univoca species numeri , nam ratio numeri prius , & perfectius est in binario , quàm in ternario . Alia denique sunt , quibus deficiunt secunda , tertia , & quarta conditio , in hoc sensu , ut tenet communis Scotistarum consensus , & dicitur in Metaphysica , ratio entis est univoca Deo , & creaturis , substantiæ , & accidenti , quia eadem est ratio entis in illis , tamen maiorem perfectionem habet in Deo , quam in creaturis , prius est in Deo , quàm in creaturis , & diversum modum essendi habet in Deo quam in creaturis , similiter dicendum est de substantia , respectu accidentis . Prædictos quatuor modos univocationis afferunt , & admittunt omnes Scotistæ , & ultimum dicunt esse imperfectiorem aliis , qui se excedunt per suos gradus .

§ Nunc resp. ad dubium , primò , si fiat comparatio inter purè univoca , & purè æquivoca , analogum , quomodocumque sumatur , potest dici medium inter illa . Probatur , quia illud potest dici medium inter aliqua , quod aliquomodo participat rationem illorum ; sic se habet analogum , quomodocumque sumatur , inter purè univoca , & purè æquivoca : ergo potest dici medium inter illa . Prob. min. Quia tam analogum attributionis , quàm proportionalitatis significat naturas simpliciter diversas , in quo convenit cum purè æquivoco , & tales naturæ sunt idem secundum quid seu per proportionem , & similitudinem , in quo aliquomodo convenit cum purè univocis , deinde analogum inæqualitatis significat eandem naturam in pluribus , in quo convenit cum purè univocis , & talis natura inæqualiter est in illis , scilicet , cum maiori perfectione essentiali in uno , quàm

in alio, in quo convenit cum pure æquivocis ; ergo analogum , quomodocumque sumatur , aliquomodo participat rationem pure univoci , & pure æquivoci , & consequenter est medium inter illa .

6 Resp. 2. Si fiat comparatio inter non pure univoca , & non pure æquivoca , analogum , quomodocumque sumatur , non est medium inter illa . Patet , quia analogum necessario debet esse , vel æquivocum non purum , si est analogum attributionis , vel proportionalitatis , vel debet esse univocum non purum , si est analogum inæqualitatis , quod manifestum est ex dictis de non pure æquivocis , & non pure univocis ; ergo analogum , quomodocumque sumatur , nequit esse medium inter non pure univoca , & non pure æquivoca .

## D I S P. II.

### *-De Prædicamentis in communi.*

**A**Ntequam de prædicamentis in speciali sermonem instituamus, aliqua Arist. sequentes, de prædicamentis in communi præmittimus. Sit ergo.

## Q U Æ S T I O I.

### *An rectè dividatur ens in decem prædicamenta ?*

1 **P**RO intelligentia quæstionis notandum est 1. quod Arist. in 2. cap. tradidit duas divisiones . Prima eorum , quæ dicuntur , in complexa , & in incomplexa . Circa quam divisionem est advertendum , quod complexum dicitur tripliciter . Primò , quando tantum est complexum voce , non autem re , ut *animal rationale* . Secundo , quando tantum est complexum

xumre; non tamen voce; ut *album*. Tertiò, quando est complexum voce, & re; ut *homo albus*. Similiter incomplexum dicitur tripliciter. Primò, quando est incomplexum tantum voce, non autem re; ut *album*. Secundò, quando est incomplexum tantum re, non tamen voce; ut *animal rationale*. Tertiò, quando est incomplexum re, & voce; ut *substantia, accidens*, &c. Ex quo sequitur, quòd idem est complexum voce tantum, ac incomplexum tantum re; & similiter idem est complexum re tantum, ac incomplexum tantum voce. Communiter autem ferè omnes Philosophi intelligunt, Arist. divisisse incomplexum re, & voce in decem prædicamenta, quando talis divisio dicitur divisio incomplexorum.

2 Secunda divisio Aristot. est eorum, quæ sunt; illorum enim, quæ sunt (inquit) quædam de subiecto dicuntur, & in subiecto non sunt, ut substantiæ universales, quæ non sunt in subiecto per inhærentiam; & tamen dicuntur, seu prædicantur de subiectis, & scilicet de individuis, ut superius de inferioribus; quædam autem sunt in subiecto, & de subiecto non dicuntur; ut accidentia singularia, quæ sunt in subiecto per inhærentiam, & de subiecto non dicuntur, quia non prædicantur, ut superius de inferiori, quædam denique neque sunt in subiecto, neque de subiecto dicuntur, ut substantiæ singulares, quæ neque sunt in subiecto per inhærentiam, neque prædicantur, ut superius de inferiori. In hæc tria membra tantum divisit Arist. ea, quæ sunt, per quod datur intelligi, quòd per *dici de subiecto* intelligit Arist. prædicari quidditative, aliàs deberent ponere aliud membrum, scilicet, ea, quæ sunt in subiecto, & de subiecto dicuntur; ut sunt naturæ accidentales in cõmuni, quæ à parte rei sunt in subiecto inhærentiæ, & prædicantur de subiectis, tanquam de aliquomodo inferioribus. Hæc divisio aliquo modo

modo coincidit cum divisione entis in substantiam, & accidens.

3 Notandum est 2. Aristot. in 3. cap. tradere triplicem regulam ad intelligentiam coordinationum prædicamentaliū non parum conducentem. Prima est, quando aliquod prædicatum dicitur de aliquo, tamquam de subiecto, necessario, quæ dicuntur de prædicato, etiam dicuntur de subiecto, v. gr. quia de Petro, tamquam de subiecto; prædicatur homo, quidquid prædicatur de homine, necessario prædicatur de Petro, quod idem est, ac dicere, quòd prædicata, coordinationis prædicamentalis, ita se habent, ut inferiora in recta linea includant in suo conceptu superiora.

4 Secunda regula est, quod diversorum generum, non subalternatim positorum, diversæ sunt essentielles differentię. Tertia est, quod diversorum generum subalternorum, possunt esse eadem essentielles differentię. Pro harum regularum intelligentia advertendum est, quod genera diversa possunt dici subalterna dupliciter. Primo, ita ut unum ponatur sub alio in recta linea prædicamentali, ut *animal*, & *vivens*. Secundo, ita ut utrumque sub aliquo tertio contineatur, ut *corpus*, & *spiritus* continentur sub *substantia*. Similiter genera non subalterna stant dupliciter. Primo, ita ut unum non sit sub alio, licet utrumque sit sub aliquo tertio, ut sunt *corpus*, & *spiritus*. Secundo, ita ut neque unum sit sub alio, neque utrumque sub aliquo tertio, ut sunt *animal*, & *scientia*.

5 Deinde, etiam differentię dupliciter sumuntur, quædam sunt superiores, ut *corporeum* respectu animalis; quædam vero inferiores, ut *rationale* etiam respectu animalis. Similiter, quædam sunt constitutivæ, ut *sensibile*, quod constituit animal, quædam sunt divisivæ, ut *rationale*, & *irrationale*, quæ dividunt idem animal,

mal. Nunc non difficile intelliguntur prædictæ regulæ.

5 In prima regula genera non subalterna sumuntur pro illis, quorum, neque unum est sub alio, neque utrumque sub aliquo tertio; nam prædicta genera, cum pertineant ad diversa prædicamenta, nullam differentiam possunt habere communem, siue differentia sit superior, siue inferior, siue constitutiva, siue divisiva, quod patebit scrutanti quælibet genera non subalterna, in sensu supradicto.

7 In secunda regula pro generibus subalternis, non solum intelliguntur illa, quorum unum est sub alio, sed etiam illa, quæ sub aliquo tertio continentur, licet unum sub alio non sit. De primis patet, nam genus, quod continetur sub alio semper habet differentiam superioris, non solum constitutivam, sed etiam aliquam divisivam, *animal* enim non solum habet differentiam constitutivam corporis, scilicet, *corporeum*, sed etiam aliquam divisivam corporis, scilicet, *animatum*: quas differentias etiam habet *vivens*, & sic sunt differentiæ communes animali, & viventi, quæ sunt genera subalternata, respectu corporis, quia sub illo continentur.

8 De secundis generibus etiam patet, quod aliquando habent easdem differentias communes, nam *quantitas continua*, & *discreta*, v.g. quæ sunt genera subalternata, quia continentur sub *quantitate in communi*, tamquam in tertio, habent differentiam constitutivam quantitatis, & etiam differentias divisivas, ut sunt *successiva*, & *permanens*; & dicitur *aliquando*, quia non semper prædicta genera habent differentias communes, præcipue loquendo de differentia divisiva nam *corpus*, & *spiritus* nullam differentiam habent ipsis communem ex differentiis divisivis substantiæ, quæ est genus, sub quo continentur, quod etiam exemplificari potest



test in pluribus aliis generibus; & hoc fuit intentum Arist. quia non dixit, quod genera subalterna in prædicto sensu semper habent differentias easdem, sed tantum dixit: *Subalternorum generum nihil prohibet, easdem esse differentias.*

9 Notandum est 3. Arist. in 4. lib. divisisse ens in complexum in decem prædicamenta, scilicet, in *substantiam, quantitatem, ad aliquid,* seu relationem, *qualitatem, ubi quando situm, habere,* seu habitum, *agere,* seu actionem, & *pati,* seu passionem. Circa hanc divisionem est difficultas, an rectè, & adæquatè sit tradita?

10 Dicimus ergo: divisio entis incomplexi in decem prædicamenta numerata, est exacta, & adæquata. Hæc conclusio est communior Philosophorum consensus; eam tenet Scotus in 4. dist. 10. quæst. 1. §. *Quantum ergo, vers. Et si omnino arguas,* litt. K. & dist. 13. quæst. 1. §. *Ad huius, vers. c. Vltorius,* litt. C. Conveniunt tamen omnes, non posse demonstrari à priori; à posteriori verò diversis rationibus solet probari; unam tantum proponemus; quæ magis propositum videtur ostendere, præcipuè inter Scotistas, qui tenent, sex ultima prædicamenta consistere in respectu extrinsecus adveniente, ut suo loco dicimus; ratio autem talis est.

11 Præter prædicamentum substantiæ, quod omnes fatètur esse unicum tantum possunt assignari novem prædicamenta accidentium: ergo talis divisio est adæquata. Prob. antec. quia accidentia differunt inter se per diversos modos afficiendi substantiam: sed tantum possunt assignari novem modi afficiendi substantiam: ergo tantum possunt assignari novem prædicamenta accidentium. Prob. minor, quia, val accidens afficit substantiam absolutè, id est, in ordine ad se, vel respectivè, id est, in

in ordine ad aliud? Si absolute, vel ut extendat substantiam, quod solet dici, afficere ratione materiæ, & sic est *quantitas*: vel ut illam qualificet, quod solet dici, afficere ratione formæ, & sic est *qualitas*. Si respectivè; vel ut respectus intrinsecus adveniens, & sic est *ad aliquid*, seu *relatio*; vel ut respectus extrinsecus adveniens; & hoc, vel ratione causalitatis activæ, & sic est *actio*; vel ratione causalitatis passivæ, & sic est *passio*; vel ratione mensuræ quantitatis permanentis, & sic est *ubi*: vel ratione mensuræ quantitatis successivæ, & sic est *quando*; vel ratione ordinis totius, & sic est *habitus*: vel ratione ordinis partium; & sic est *situs*; sed præter hos modos afficiendi substantiam, non est assignabilis alius: ergo tantum sunt novem modi afficiendi substantiam; & consequenter tantum sunt novem prædicamenta accidentium; & sic prædicta divisio entis in decem prædicamenta, est adæquata.

12. Aliqui intendunt, tantum dari unicum prædicamentum, scilicet, ens in communi, eo quod prædicamentum constet genere supremo, ita ut supra se nullum genus habeat: sed quælibet genera, quæ possunt assignari, habent supra se ens, quod est genus respectu illorum, & ens non habet supra se aliud genus: ergo tantum ens est genus supremum: & consequenter tantum datur unicum prædicamentum. Alii autem intendunt, tantum dari duo prædicamenta, scilicet, prædicamentum substantiæ, & prædicamentum accidentis in communi, eo quod novem genera accidentium assignata habent supra se accidens in communi, quod est genus respectu illorum, & accidens nullum genus habet supra se: quia ens non est genus respectu substantiæ, & accidentis: ergo tantum substantia, & accidens in communi sunt genera supremæ: & consequenter tantum dantur hæc duo prædicamenta. Respond.

spond. pro nunc negando, quod ens sit genus respectu substantiæ, & accidentis, & similiter negando, quod accidens in communi sit genus respectu novem generum accidentium; cuius negationis ratio latè assignatur in *Metaphysica*. Adverte tamen, quod divisio entis in decem prædicamenta, non est immediata, de quo etiam in *Metaphysica*, ut in proprio loco.

## Q U Æ S T I O II.

*Quanam sint, quæ in prædicamento collocantur?*

**P**RO intelligentia quæstionis notandum est sex conditiones requiri ad hoc, ut aliqua in prædicamento collocentur, quæ his versiculis ab aliquibus explicantur.

*Ens per se, non mentis opus, cui terminus, atque*

*Completum, univocum, cuius sit notio simplex.*

id est, ens prædicamentale debet esse ens per se, ens reale, ens finitum, ens completum, ens univocum, & ens simplex, seu incomplexum. Juxta quas conditiones.

1. Dicimus 1. Ens per accidens non collocatur in prædicamento. Probat, quia quod collocatur in prædicamento debet habere unicam essentiam: sed ens per accidens, non unicam, sed plures essentias includit: ergo ens per accidens non collocatur in prædicamento. Major patet; quia Arist. instituit prædicamenta, ut quælibet res possit per suos gradus quidditative definiri: sed solum quod habet unicam essentiam potest quidditative definiri: ergo quod collocatur in prædicamento debet habere unicam essentiam, & consequenter tantum ens per se,

se, non verò ens per accidens, collocatur in prædicamento:

3 Dicimus 2. Ens rationis non collocatur in prædicamento. Probatur, quia Aristot. divisit ens reale in decem prædicamenta: ergo solum quod participat rationem entis realis collocatur in prædicamento, & consequenter ens rationis in illo non collocatur.

4 Dicimus 3. Ens infinitum non collocatur in prædicamento. Probatur: quia quod ponitur in prædicamento debet habere rationem generis, & differentię: sed hoc repugnat enti infinito; quia ratio generis dicit imperfectionem, scilicet, potentialitatem, quæ repugnat enti infinito: ergo solum ens finitum, non verò infinitum, collocatur in prædicamento. Propter hoc, inquit Scotus in 1. dist. 8. qu. 3. §. *Teneo opinionem meam*, litt. G. *Deus non ponitur in prædicamento*.

5 Dicimus 4. Complexum nullatenus ponitur in prædicamento, etiam si tantum sit complexum voce, & incomplexum re, ut *animal rationale*. Conclusio patet ex Arist. qui solum incomplexum divisit in decem prædicamenta. Deinde probatur ratione; quia illa solum ponuntur in prædicamento; a quibus abstrahi potest aliqua ratio communis, quæ de ipsis dicatur *in quid*: sed a genere, & differentia, quibus constat prædictum complexum, nequit abstrahi aliqua ratio communis, quæ de ipsis dicatur *in quid*, & se habeat, ut genus respectu illorum, cum differentia non includat genus: ergo prædictum complexum non ponitur in prædicamento. Neque obstat, quod definitio, & definitum idem sint; nam licet hoc sit verum ex parte rei, non tamen ex parte modi significandi, nam definitio significat clarè, & complexè, quod definitum significat incomplexè, & confusè; quod sufficit ad hoc, ut definitum ponatur in prædicamento; non verò definitio. Sed

hæc

hæc conclusio videtur reduci ad quæstionem de nomine, tamen, sic ponitur, ut à communi consensu non deviemus.

6 Dicimus 5. Tantum univoca, non verò æquivoca, & analogia, collocantur in prædicamento. Probat; quia solum illa collocantur in prædicamento, à quibus potest abstrahi aliqua ratio communis, quæ de ipsis prædicetur *in quid*: constat, quod talis ratio communis solum potest abstrahi ab univocis; non verò ab æquivocis, & analogis: ergo tantum univoca, non verò æquivoca, & analogia, collocantur in prædicamento.

7 Prosequentibus notandum est, quòd aliquid potest collocari in prædicamento, vel per se, vel reductivè; vel in recta linea, vel in indirecta, seu ad latus. Deindè, aliæ sunt partes metaphysicæ, ut genus, & differentia; aliæ sunt partes physicæ, & hæ, vel essentielles, ut materia, & forma; vel integrales, & hæ, vel homogeneæ, seu ejusdem rationis, ut partes aquæ; vel eterogeneæ, seu diversæ rationis, ut caro, ossa, pes, manus, &c. Nunc

8 Dicimus 6. in ordine; partes metaphysicæ, scilicet, genus, & differentia collocantur in prædicamento; genus in recta linea, differentia verò tantum in indirecta, seu ad latus. Patet conclusio; quia in recta linea prædicamentali collocantur, quæ directè, & *in quid* de inferioribus prædicantur; in indirecta autem, seu ad latus, rationes divisivæ gradus superioris, & constitutivæ gradus inferioris: sed genus directè prædicatur *in quid* de inferioribus; differentia autem est divisiva gradus superioris, & constitutiva inferioris, ut patet in arbore prædicamentali: ergo partes metaphysicæ modo dicto ponuntur in prædicamento.

9 Dicimus 7. Partes physicæ essentielles, ut sunt materia, & forma, non collocantur per se in recta linea prædicamentali totius, quod consti-

stituunt, sed tantum reductivè. Probatur; quia coordinatio prædicamentalis constat prædicatis, quæ possunt denominari species, & genera completa; sed prædicata, quæ possunt abstrahi à prædictis partibus, nequeunt denominari species, & genera completa; ergo prædictæ partes non collocantur in recta linea prædicamentali totius, quod constituunt per se. Quod autem reductivè collocentur, ex eo patet; quia omnia, quæ includuntur in composito; ipsum necessario sequuntur; partes essentielles includuntur in composito; ergo ipsum necessario sequuntur: & consequenter ubi illud per se collocatur, illæ collocantur reductivè. Hæc conclusio etiam debet intelligi de partibus physicis integralibus etærogeneis, ut sunt caro, ossa, pes, manus, &c. propter eandem rationem.

10 Dicimus 8. Partes physice integrales homogeneæ, ut partes aquæ, collocantur in recta linea prædicamentali, si considerentur secundum se. Probatur; quia licet prædictæ partes, ut tales sint entia incompleta physice, respectu totius; tamen secundum se consideratæ, habent rationem totius completi, & à qualibet possunt abstrahi eadem prædicata metaphysice completa, quæ possunt abstrahi à toto composito, ergo prædictæ partes secundum se consideratæ collocantur in recta linea prædicamentali.

11 Dicimus 9. Individuum collocatur in recta linea prædicamentali, ut fundamentum illius. Patet; quia omnia prædicata essentialia, quæ collocantur in recta linea prædicamentali, prædicantur directe de individuo; ergo individuum est fundamentum totius rectæ lineæ prædicamentalis. Neque obstat, quod Porphyrius dixerit cap. de specie, speciem infimam esse terminum rectæ lineæ prædicamentalis; nam solum loquitur Porphyrius de

naturis, quæ possunt denominari universales, quod non competit individuo.

12 Advertendum tamen est, ad auferendas aliquas æquivocationes, quod benè potest ab intellectu disponi prædicamentum, seu coordinatio prædicamentalis entium rationis per similitudinem ad coordinationem prædicamentalem entium realium, & similiter potest disponi coordinatio prædicamentalis negationum, entium per accidens, & entium incompletorum; sed hoc non præjudicat nostris conclusionibus, quia solùm loquimur juxta Arist. de coordinatione prædicamentali decem generum, quæ debent esse entia positiva realia per se, & completa.

13 Dubitabis, an entia collocentur in prædicamento sumpta in concreto, vel in abstracto? Resp. quòd loquendo de prædicamento substantiæ, collocantur in prædicamento entia in concreto, v. gr. *homo*; non verò in abstracto, v. gr. *humanitas*. Probat, quia quæ collocantur in prædicamento, possunt denominari genera, aut species, & formaliter prædicari de inferioribus; hoc convenit naturis substantialibus in concreto, non verò in abstracto; ergo non in abstracto, sed in concreto collocantur in prædicamento. Minor patet ex dictis de prædicationibus, nam ad prædicationem formalem requiritur, quod prædicatum concernat subiectum.

14 Loquendo autem de prædicamentis accidentium, non collocantur in prædicamento entia in abstracto ultima abstractione, v. gr. *albedinitas*; neque in concreto rigorosè loquendo, ver gr. *album*; collocantur autem in abstracto non ultima abstractione, v. gr. *albedo*. Prima pars patet ex dictis de prædicamento substantiæ. Secunda pars etiam patet ex prima conclusione huius quæst. quia concreta accidentalia sunt entia per accidens. Tertia pars  
pro-

probatur ; quia accidentia abstracta non ultima abstractione possunt denominari genera, & species, respectu suorum inferiorum, & prædicari de illis formaliter ; quia licet, ut sic non concernant subiecta ; concernunt tamen sua inferiora, ut dictum est loquendo de prædicationibus : ergo accidentibus abstractis non ultima abstractione nihil deficit, ut in prædicamento collocentur.

15 Dices contra, prædicamenta accidentium distinguuntur ex diverso modo afficiendi subiectum ; sed in concreto, & non in abstracto, afficiunt subiectum ; ergo in concreto, & non in abstracto, collocantur in prædicamento. Resp. neg. conseq. Quia etiam si diversitas prædicamentorum accidentium desumatur ex diverso modo afficiendi subiectum ; tamen omnia accidentia, quæ ad unum prædicamentum pertinent, eo quod eodem modo afficiant subiectum, non collocantur in prædicamento, seu in coordinatione prædicamentali, quatenus subiectum afficiunt, sed quatenus unum de alio essentialiter prædicatur, & unum alteri essentialiter subiicitur, quæ ut ex se patet, conveniunt accidentibus abstractis non ultima abstractione.

### Q U Æ S T I O III.

*Quomodo distinguantur inter se prædicamenta?*

I C Onveniunt omnes, prædicamenta inter se aliquomodo distingui, quod patet ex eo quod illa, quæ diversis definitionibus explicantur, & diversis conceptibus apprehenduntur, aliquomodo inter se differunt ; sed omnia prædicamenta diversis definitionibus explicantur, & diversis conceptibus apprehenduntur ; ergo omnia prædicamenta aliquomodo



do inter se distinguuntur. Solum autem est difficultas, an talis distinctio sit realis?

2 Dicimus: omnia prædicamenta realiter inter se distinguuntur. Hæc conclusio est communior inter Scotistas, quam tenet Scotus 5. Metaphysicæ, q. 6. Probatur 1. quia illa distinguuntur realiter, quæ genere, specie, & numero distinguuntur; sed omnia prædicamenta distinguuntur genere, specie, & numero; ergo omnia prædicamenta realiter distinguuntur. Minor quoad primam partem apud omnes est certa; nam decem prædicamenta sunt decem genera diversa. Quoad secundam partem etiam patet; quia illa possunt dici differre specie, quæ in nullo principio essentiali constitutivo conveniunt: ( non loquimur de distinctione specifica propriè dicta: hæcenim tantum invenitur inter illa, quæ sub aliquo genere continentur, qualia non sunt prædicamenta, cum sint genera suprema ) sed decem prædicamenta non conveniunt in aliquo principio essentiali constitutivo: ergo possunt dici differre specie.

3 Prob. min. quoad tertiam partem: quia quæ habent diversas singularitates, distinguuntur numero: sed omnia prædicamenta habent diversas singularitates: ergo distinguuntur numero. Prob. min. Quia individuum cujuscumque ordinis prædicamentalis habet singularitatem propriam illius ordinis; sed singularitas propria unius ordinis prædicamentalis nequit esse propria alterius ordinis prædicamentalis: ergo omnia prædicamenta habent diversas singularitates, & consequenter distinguuntur numero. Minor patet à paritate; quia sicut se habet differentia specifica ad naturam genericam, ita se habet differentia numerica ad naturam specificam: sed repugnat, eandem differentiam specificam contrahere plures naturas genericas oppositas: ergo repugnat, eandem  
dif.

differentiam numericam contrahere plures naturas específicas oppositas; ergo cuilibet speciei, & cuilibet generi debent assignari diversæ differentiæ numericæ: ergo omnia genera distinguuntur numero, & consequenter realiter.

4 Secundo probatur conclusio ex Scoto citato, nam si aliqua prædicamenta non distinguerentur realiter, maximè, quæ ab aliquibus assignantur, scilicet *quantitas*, & *substantia*: *relatio*, & *extrema*; *actio*, & *passio*; *ubi*, & *situs*; sed hæc omnia inter se realiter distinguuntur, ut patebit loquendo de prædicamentis in speciali; ergo omnia prædicamenta inter se realiter distinguuntur.

5 Arg. 1: Prædicamenta accidentium differunt ex diverso modo afficiendi substantiam; sed idem accidens secundum diversas rationes potest diversimodè afficere substantiam: ergo idem accidens potest pertinere ad diversa prædicamenta. Prob. min. quia superficies terminata lineis pertinet ad prædicamentum quantitatis, & etiam pertinet ad prædicamentum qualitatis, ut importat terminationem linearum, nam ut sic dicitur *figura*, quæ est species qualitatis. Resp. neg. min. ad probationem dicimus, quòd *figura* duo realiter distincta continet; primum superficiem terminatam lineis, & ut sic pertinet ad prædicamentum quantitatis: secundum distributionem, seu dispositionem linearum, & ut sic pertinet ad prædicamentum qualitatis; hæc autem duo inter se realiter distinguuntur.

6 Arg. 2. Relatio dependentiæ, quam dicit creatura ad Deum creatorem, identificatur realiter cum illa: sed talis relatio pertinet ad prædicamentum ad aliquid; creatura autem potest esse substantia: ergo prædicamenta non necessario distinguuntur realiter. Resp. neg. minor. nam prædicta relatio, non est prædicamentalis,

sed transcendentalis , & pertinet reductivè ad prædicamentum illius, cum quo identificatur , unde neg. conseq.

7 Arg. 3. ex Scoto in 2. dist. 1. quæst. 4. vel 5. §. *Ad argumenta* , vers. *Ad secundam* , litt. P. ubi in responsione ad quoddam argumentum videtur tenere, posse concedi, relationem non distingui à fundamento, nisi tantum formaliter. Sed resp. Scotum in tali responsione non loqui ex propria mente, sed ex aliorum opinione: quod patet ex eo quod in eadem quæstione pluribus rationibus probat, relationem distingui realiter à suo fundamento, & si postea ex propria mente oppositum assereret, sibi ipsi contradiceret, quod non est dicendum. Deinde, etiam colligitur ex eo, quod aliam solutionem adducit Scotus loco citato, in qua clarè videtur ipsum non sentire, relationem prædicamentalem esse idem realiter cum fundamento: sed hoc tantum competere relationi transcendentali.

## PARS SECUNDA

### De Prædicamentis in speciali.

**I**N hac secunda parte egit Aristot. per sex capita de prædicamentis in speciali, de quibus nos, ipsum sequentes, similiter agemus.

D I S P. I.

*De Substantia primo prædicamento.*

**I**Nter omnia prædicamenta primum locum obtinet substantia, ideòque prius de illa, quàm de prædicamentis accidentium, sermo instituitur.

Q U Æ S T I O I.

*Quænam sit ratio formalis substantia.*

**1** **P**Ro intelligentia quæstionis notandum est, quòd substantia potest sumi latè, & strictè. Latè sumitur pro essentia cujuscunque rei: in quo sensu loquitur de substantia Arist. in definitionibus univocorum, & æquivocorum, & non pertinet ad hoc prædicamentum, sed per omnia prædicamenta divagatur; nam omnia prædicamenta habent suas essentias. Strictè sumitur prout distinguitur ab accidente, in hoc sensu loquimur de substantia, quia ut sic pertinet ab hoc prædicamentum.

**2** Notandum est secundò, quòd cum *esse per se*, & *esse in alio* sint opposita, quot modis dicitur unum, etiam dicitur & aliud. Tripliciter autem potest dici *esse in alio*. Primò, tanquam in supposito sustentante: in quo sensu humanitas Christi Domini dicitur esse in supposito Verbi Divini, unde *esset per se* dicitur primò, ut opponitur *esse in alio*, tanquam in supposito, in quo sensu omnes naturæ completè substantes dicuntur *esse per se*. Secundo, dicitur aliquid *esse in alio*, tanquam in subiecto informationis, in quo sensu forma substantialis est in materia prima, unde *esse per se* dicitur secundò, ut opponitur *esse in alio* per informatio-

nem; in quo sensu naturæ substantiales completæ, & materia prima dicuntur *esse per se*. Tertiò, dicitur aliquid *esse in alio*, tamquam in subiecto inhæſionis, seu, quod idem est, tamquam in subiecto, cum quo unum per accidens constituit; in quo sensu omnia accidentia dicuntur *esse in alio*; unde *esse per se* dicitur tertiò, ut opponitur *esse in alio*, tamquam in subiecto inhæſionis; in quo sensu omnes substantiæ, tam completæ, quàm incompletæ, dicuntur *esse per se*.

3 Notandum est tertiò, quòd, cùm pro hoc statu multæ rerum essentiæ sint nobis ignotæ, solùm intendimus inquirere proprietates intimiores nobis notas; huiusmodi est essentia substantiæ; ideòque, cùm in præſenti inquiremus, quænam sit ratio formalis constitutiva substantiæ? Tantùm loquimur de proprietate intimiori nobis nota. Et omissis pluribus sententiis, quæ magis confusionis, quàm realitatis præſeferunt iam communiter ad duas sententias reducitur præſens quæſtio; altera, tenens, *substare accidentibus* esse primum conceptum substantiæ nobis notum; altera verò, *esse per se*, ut opponitur *esse in alio per inheren- tiam*, esse talem primum conceptum.

4 Dicimus 1. *Substare accidentibus* non est primus conceptus, seu prima proprietas substantiæ. Probatur; quia prius est, quòd aliquid sit in se, quàm quòd aliquomodo ordinetur ad aliud: sed *substare accidentibus* in substantia est ordo ad aliud: ergo prius intelligitur substantia in se, quàm intelligatur *substare accidentibus*.

5 Dicimus 2. *Esse per se*, prout opponitur *esse in alio per inheren- tiam*, est primus conceptus substantiæ nobis notus. Hæc conclusio est communior, quam tenet Scotus quæſt. 3 quodlibetica, §. *Respondeo*, vers. *Respondeo secundum Avicenam*, litt. S. & D. Thomas 1. part.

part. quæst. 3. art. 5. ad primum, & aliis in locis. Probatur; quia prius concipitur in substantia, *esse per se*, prout opponitur *esse in alio per inhærentiam*, quam *substare accidentibus*: ergo primus conceptus substantiæ nobis notus est *esse per se*. Antecedens patet ex conclusione antecedenti. Confirmatur; quia substantia, ut hic sumitur, opponitur accidenti; sed quod prius concipitur in substantia, ut opponitur accidenti est *esse per se*; nam accidens explicatur per *esse in alio*: ergo prima proprietas substantiæ; ut a nobis concipitur, est *esse per se*.

6 Arg. contra; nomen *substantia* desumitur a *substare*; ergo quod primo concipitur in substantia, est *substare accidentibus*. Confirmatur; quia *esse per se* potest convenire accidentibus, ut contingit in accidentibus Eucharistiæ, quæ existunt sine inhærentia in subiecto: ergo *esse per se* nequit esse de ratione substantiæ. Respond. concessio antecedenti, neg. consequ., quia non benè ex etymologia nominum deducitur essentia rerum; lapis enim dicitur a lædendo pedem, & tamen lædere pedem non est constitutivum lapidis. Similiter, licet substantia dicatur a *substare*; tamen *substare* non est constitutivum substantiæ. Ad confirmationem resp. dist. antec. *esse per se* potest convenire accidentibus, cum repugnantia *ad esse in alio per inhærentiam*, nego: sine tali repugnantia, imo cum aptitudine; & exigentia ad inhærendum; concedo; & neg. consequ. quia *esse per se*, quod dicimus, esse primum conceptum substantiæ, habet annexam repugnantiam *ad esse in alio per inhærentiam*.

7 Alia argumenta facile solvuntur ex dictis in 2. notabili; ideoque illa omittimus. Advertet tamen, quod *esse per se*, prout opponitur *esse in alio per inhærentiam*, si sumatur radicaliter, id est, pro radice, a qua dimanat ipsum formale *esse per se*, seu quæ modificatur per ip-

sumesse per se, est ratio formalis nobis ignota, constitutiva substantiæ; sicut radix risibilitatis, scilicet, *rationalitas*, est ratio formalis constitutiva hominis.

## Q U Æ S T I O II.

*Qualis sit divisio substantia in primam, & secundam?*

1 **P**RO intelligentia quæstionis notandum est quod Aristot. in hoc cap. divisit substantiam in primam, & secundam. *Prima est, quæ neque de subiecto aliquo dicitur, neque in subiecto aliquo est*: quæ definitio sic communiter explicatur; non est in aliquo subiecto per inhærentiam, in quo differt ab accidente, & convenit cum secunda substantia, neque dicitur de aliquo subiecto, tanquam superius de inferiori, in quo differt a secunda substantia. Unde per primam substantiam intelligitur substantia singularis, v.g. *Petrus*. Secunda substantia ex eodem Arist. est, *quæ de subiecto dicitur, in subiecto autem non est*. Quæ similiter sic explicatur, non est in subiecto inhærentis, in quo convenit cum prima, & differt ab accidente; de subiecto autem dicitur id est prædicatur ut superius de inferiori. Unde secunda substantia idem est, ac substantia universalis. Inquit etiam Aristot. quod prima substantia est maximè substantia. Nunc est dubium, qualis sit prædicta divisio? Et similiter quare prima substantia dicatur maximè substantia.

3 Omissis variis modis dicendi ad auferendam æquivocationem, pro primo, quod inquit quæstio, dicimus primo: hæc divisio potest dici generis in species, si tam divisum, quam membra dividenda sumantur secundo intentionaliter. Probatur quia substantia secundo intentionaliter sumpta dicit ordinabilitatem in prædicamento in communi, & prima substantia

op.

ordinabilitatem per modum inferioris, secunda verò per modum superioris; sed ordinabilitas in prædicamento in communi potest dici genus, respectu ordinabilitatis per modum inferioris, & per modum superioris; ergo si tam divisum, quam membra dividendia sumantur secundò intentionaliter, prædicta divisio potest dici generis in species.

3 Dicimus 2. Prædicta divisio potest dici analogi in analogata, si tam divisum, quam membra dividendia sumantur primo intentionaliter ratione substandi accidentibus. Probatur, quia illa dicitur divisio analogi in analogata, in qua ratio communis uni ex membris dividendibus convenit primò; & per se, alteri verò secundò, & ratione illius primi: sed substare accidentibus primò; & per se convenit primæ substantiæ, scilicet singulari; secundæ verò substantiæ, scilicet naturæ communi, convenit secundò, & ratione primæ; ideò enim homo est albus quia Petrus est albus, non verò è contra: ergo prædicta divisio in hoc sensu potest dici analogi in analogata.

4 Dicimus 3. Hæc divisio potest dici subjecti in accidentia rationis, si divisum sumatur primò intentionaliter, & membra dividendia secundò intentionaliter, Probatur, quia hæc est divisio substantiæ in secundas intentiones particularis, & universalis, sed hæc secundæ intentiones sunt accidentia rationis, respectu substantiæ primò intentionaliter sumptæ; ergo in hoc sensu talis divisio est subjecti in accidentia rationis.

5 Ubi advertendum est, quod in hoc ultimo sensu communiter intelligitur Arist. & ratio est quia talis divisio est propria prædicamenti substantiæ secundum suam coordinationem; sed si divisum non esset substantia primo intentionaliter sumpta, talis divisio non esset propria, & specialis huius prædicamenti, nam quodlibet



accidens secundò intentionaliter sumptum; potest dividi in universale, & particulare; ergo in prædicta divisione debet sumi divisum primò intentionaliter, & hoc etiam intendit Scotus, dum quæst. 12. prædicamentali, in fine, dicit: *Nota, quod divisio substantia in primam, & secundam non est divisio generalissimi in species, sed subiecti in accidentia: quia substantia secundum quòd intelligitur (secundum quam considerationem pertinet ad logicum) dividitur in intentiones sibi accidentes.*

6 Dicimus 4. pro secundo, quod dubitatur, ex eo Arist. dixit, primam substantiam esse maximè substantiam, quia si sumatur primò intentionaliter, proprius, & immediatius substat accidentibus, quam secunda, accidentia enim immediatè subnectantur in individuo, & ratione illius in natura communi: si autem sumatur secundò intentionaliter, magis subiicitur in prædicatione, quam secunda; individuum enim subiicitur omnibus gradibus communibus, non verò natura communis. Unde inter naturas communes non potest dici maximè substantia, quæ magis subiicitur gradibus communibus.

### Q U Æ S T I O III.

*Quanam sint proprietates substantia?*

1 **D**icimus; sex sunt proprietates substantiæ, quas in hoc capite enumerat Arist. Prima est, *non esse in subiecto*, & intelligitur, ut sæpè dictum est, de subiecto in hæssionis. Hæc proprietas convenit primæ, & secundæ substantiæ.

2 Secunda proprietas est, *prædicari univocè de subiecto*; circa quam proprietatem observandum est, quod per ly *subiecto* intelligitur prima substantia, & per ly *prædicari univocè* intelligitur, prædicari essentialiter directè, & formaliter.

liter. Hæc proprietas solum convenit secundæ substantiæ.

3 Tertia proprietas est, quod prima substantia significat *hoc aliquid*; secunda verò substantia significat *quale quid*. Pro cuius intelligentia observandum est; quod qualitas habet duas quasi proprietates. Prima est, ita afficere subiectum, ut ad interrogationem; quale sit subiectum? Benè respondetur per illam. Per similitudinem hujus proprietatis dixit Porphyrius, differentiam, non autem genus, & speciem, prædicari *in quale*; quia sola differentia, ita afficit speciem, ut ad interrogationem; qualis sit species essentialiter? Benè respondetur per differentiam; Secunda proprietas qualitatis est, quod aliquomodo determinetur à subiecto, quantum ad actualem inhærentiam, & per similitudinem hujus proprietatis, dicit Arist. in præsentī, secundam substantiā, & non primam, assimilari qualitati, seu significare *quale quid*, quia secunda substantia determinatur per primam ad actualem subsistentiam, & individuationem, unde *quale quid* idem sonat, ac determinabile; & *hoc aliquid* idem, ac determinativum ad esse singularis.

4 Quarta proprietas est, *non habere contrarium*. Circa quam observandum est, quod intelligitur de contrarietate propriè, & rigorosè sumpta, in quo sensu contraria sunt, quæ sub eodem genere maximè distant, & ab eodem subiecto mutuo se expellunt; quæ contrarietas solum invenitur inter qualitates oppositas, ut sunt *calor*, & *frigus*, quæ inhærent subiecto, à quo gradatim mutuo se expellunt, quod nullatenus convenit substantiis cum non inhæreant subiectis, & licet formæ substantiales sint in subiecto informationis, scilicet in materia prima, à qua mutuo se expellunt, hoc non est divisibiliter, seu gradatim, sed indivisibiliter. Non tamen intelligitur hæc proprietas de contrarietate latè

sumpta, scilicet, pro quacumque oppositione; nam in hoc sensu substantia habet contrarium; nam privatio opponitur formæ substantiali. Hæc proprietas convenit, tam primæ, quam secundæ substantiæ.

5 Quinta proprietas est, *non suscipere magis & minus*; quod debet intelligi secundum intensionem, & remissionem per oppositum ad qualitatem, quæ recipit magis, & minus secundum intensionem, & remissionem, non autem intelligitur secundum extensionem, nam optimè potest una substantia esse magis, vel minus extensa, quam alia; licet hoc non conveniat ei ratione sui; sed de hoc amplius propriis locis. Hæc proprietas convenit, tam primæ, quam secundæ substantiæ.

6 Sexta proprietas est, *quod substantia eadem numero manens sit susceptiva contrariorum*: Circa quam proprietatem advertendum est, quod contraria non sumuntur hic propriè; & rigorosè, sed latè, scilicet pro illis, quæ habent aliquam oppositionem, & sic hæc proprietas convenit etiam substantiis incorruptibilibus (non loquimur de Deo) ut sunt Angeli, qui recipiunt contraria in intellectu, scilicet, veritatem, & falsitatem, & in voluntate amorem, & odium; & cœli, qui recipiunt motus contrarios, scilicet motum ab oriente in occidentem, & è contra. Deinde intelligitur proprietas de ultimo subjecto receptivo contrariorum, à quo omnia accidentia dependent, quod subjectum solum est substantia; non verò quantitas, nam licet hæc recipiat contraria, sed non ultimè, nam etiam ipsa quantitas dependet à substantia, tanquam à subjecto; seu ut aliqui dicunt, intelligitur de subjecto *quod*; non autem de subjecto *quo*, ut est quantitas.

QUÆSTIO IV.

*Quanam sint , quæ in hoc prædicamento collocantur?*

1 **S**upponitur tanquam certum, omnes substantias finitas , & corruptibiles collocari in hoc prædicamento, similiter dicendum est de substantiis incorruptibilibus finitis, ut sunt Angeli, & corpora cælestia, ut jam communiter circumfertur inter Philosophos, licet aliqui ex antiquis oppositum tenuerint nixi auctoritate Arist. 10. Met. cap. ultimo, ubi dicit: corruptibile, & incorruptibile genere differre. Ratio autem pro communiore consensu est; quia illa, à quibus potest abstrahi ratio generis, & differentiae, ponuntur in prædicamento: sed ab omnibus substantiis finitis potest abstrahi talis ratio, ut ex se patet: ergo collocantur in hoc prædicamento. Auctoritas Aristot. non intelligitur de genere logico, ut hic loquimur; sed de genere physico; in quo sensu solum illa dicuntur ejusdem generis, quæ sunt ad invicem transmutabilia; qualia non sunt incorruptibilia; sed hoc non obstat, ut sub eodem genere logico, & sub eodem prædicamento collocantur. Unde difficultas solum est de substantia infinita, ut est solus Deus, & de Christo Domino.

2 Dicimus 1. Deus non ponitur in prædicamento substantiæ. Hæc conclusio est communio, tam inter Philosophos, quam inter Sanctos Patres, quorum plures citantur à recentioribus, & possunt videri apud Merin. cap. 5. categori. disp. unica de subst. q. 4. Eam tenet Scotus citatus 1. p. hujus tract. disp. 2. quæst. 2. num. 4. ubi etiam manet probata. Videantur ibi dicta, ne semel dictum, iterum repetatur. Etiam tenet eam Angelicus Præceptor 1. p.

quæst. 13. art. 1. & 3. contragentes cap. 25. Sed contra illam.

3 Arg. 1. ex D. August. serm. 1. de Ephiphania, & 5. de Trinit. cap. 8. ubi dicit, substantiam, & relationem esse in Deo propriè, & formaliter, alia autem prædicamenta tantum metaphoricè: ergo ex mente D. Aug. Deus ponitur in prædicamento substantiæ. Resp. neg. consequ. quia D. Aug. tantum intendit, substantiam, & relationem verè, & propriè inveniri in Deo, ex hoc tamen minimè colligitur, Deum collocari in prædicamento substantiæ, imò oppositum docuit ipse D. Aug. lib. de cognitione veræ vitæ cap. 3. & 7. de Trinit. cap. 5. aliàs 32.

4 Arg. 2. Ratio substantiæ in communi, prout abstrahit à finita, & infinita, est genus: ergo sicut substantia finita ponitur in prædicamento, ita substantia infinita. Confirmatur, quia si daretur linea infinita, collocaretur in prædicamento quantitatis: ergo licet Deus sit substantia infinita, collocatur in prædicamento substantiæ. Resp. neg. antec. quia substantia, ut abstrahit à finita, & infinita, est conceptus transcendentalis, non verò genericus; quia ab ente infinito, propter suam perfectionem, nequit abstrahi aliqua ratio potentialis, ut requiritur ad rationem generis, de quo amplius in metaphysica. Ad confirmationem resp. neg. consequ. & paritat. quia non quælibet infinitas obstat, ut aliquid in prædicamento collocetur, sed tantum infinitas simpliciter, cui repugnat compositio ex actu, & potentia, & tantum convenit Deo; infinitas verò secundum quid, ut esset in hypothese infinitas lineæ, compatitur cum compositione actus, & potentiæ, quia compatitur cum finitate simpliciter, seu essentialiter.

5 Dicimus 2. Christus Dominus, secundum naturam humanam, collocatur in prædicamento.

mento substantiæ. Conclusio est communis, & patet ex eo quòd juxta fidem, Christus est verus homo: ergo secundum hanc rationem ponitur in prædicamento substantiæ, sicut ceteri homines.

6 Dices, ex hoc sequitur, quòd deus ponatur in prædicamento, quod est contra conclusionem præcedentem, Prob. seq. quia Christus ponitur in prædicamento substantiæ: Christus est Deus: ergo Deus ponitur in prædicamento substantiæ. Resp. neg. seq. Ad probationem dicimus, deficere syllogismum, variatur enim suppositio, seu appellatio; nam *poni in prædicamento* appellat in majori supra Christum, ratione naturæ humanæ, & in consequentia appellat supra ipsum ratione naturæ Divinæ, & sic non tenet consequentia.

7 Ex dictis facilè deducitur quomodo coordinetur hoc prædicamentum, etenim substantia finita, & completa est genus supremum, & dividitur per corporeum, & incorporeum in corpus, & spiritum. Deinde *corpus* per corruptibile, & incorruptibile, in cœleste, & sublunare. *Sublunare* in vivens, & non virens, & deinde, ut in arbore prædicamentali.

## D I S P. II.

### *De accidenti prædicamentali in communi.*

**Q**Uia in sequentibus capitibus egit Arist. de novem generibus accidentis, ad illorum majorem intelligentiam, in hac disputatione naturam accidentis in communi investigamus,

## Q U Æ S T I O I.

*Quenam sit ratio formalis accidentis.*

1 **P**RO intelligentia quæstionis notandum est, accidens esse quoddam concretum, dicens pro materiali entitatem, quæ denominatur accidens, seu inhærens, quæ entitas, vel est absoluta, ut *quantitas*, & *qualitas*, vel est respectiva, ut sunt cætera prædicamenta, & pro formali ipsam rationem accidentiæ, seu inhærentiæ, respectu subjecti, quæ inhærentia potest sumi tripliciter. Primò, actualiter, scilicet pro ipsa actuali unionem accidentis cum subjecto. Secundò aptitudinaliter, scilicet pro respectu, seu aptitudine ad inhærendum. Tertiò radicaliter, scilicet pro radice, à qua dimanat prædicta aptitudo. Nunc est difficultas, quomodo inhærentia conveniat accidenti, tam absoluto, quàm relativo? Ut cognoscatur ratio accidentis in communi.

2 Et ut certa ab incertis separemus; conveniunt omnes, quòd si accidens sumatur pro formali, & per se significato, inhærentia est de essentia accidentis distributione accommodata, hoc est, inhærentia actualis est de essentia accidentis actualiter inhærentis, & inhærentia aptitudinalis est de essentia accidentis aptitudinaliter inhærentis. Et ratio est, quia per se significatum concreti est de essentia illius formaliter sumpti: inhærentia est formale significatum hujus concreti *accidens*: ergo est de essentia illius formaliter sumpti distributione accommodata.

3 Similiter, est communis consensus, quòd actualis inhærentia non est de essentia accidentis absoluti materialiter sumpti; inhærentia verò aptitudinalis ad minus est propria passio accidentis in communi. Ratio primi est, quia nihil potest existere sine illo, quod est de essentia illius:

lius ; accidens absolutum potest existere sine actuali inhærentia, ut contingit in Eucharistia; ergo actualis inhærentia non est de essentia accidentis absoluti. Propter eandem rationem inhærentia actualis nequit dici propria passio accidentis absoluti. Ratio secundi est, quia illud dicitur propria passio alicuius, sine quo nequit existere, neque intelligi sub opposito illius; accidens nequit existere sine aptitudine ad inhærendum, neque intelligi sub opposito talis aptitudinis; ergo inhærentia aptitudinalis ad minus est propria passio accidentis in communi. His tanquam certis, præmissis, quæ ad controversiam reducuntur, per sequentes conclusiones proponemus. Igitur.

4 Dicimus 1. Inhærentia aptitudinalis non est de essentia accidentis in communi. Hæc conclusio est communis inter Scotistas contra Thomistas communiter, quam tenet subtilis Doctor in 4. dist. 12. quæst. 1. Probatur ratione deducta ex ipso Scoto, nulla relatio est de conceptu essentiali, & quidditativo alicujus absoluti, alias, idem secundum eandem rationem, esset ad se, & ad aliud, quod est impossibile; sed inhærentia aptitudinalis est relatio; ergo nequit esse de essentia accidentis absoluti. Confirmatur, quia omnis aptitudo formalis præsupponit aliquid, ratione cuius competat rei, cuius est aptitudo, sicut aptitudo ad ridendum in homine præsupponit rationalitatem, à qua dimanat, & ratione cuius convenit homini talis aptitudo; ergo aptitudo ad inhærendum in accidente absoluto, præsupponit in illo aliquid, à quo dimanet, & ratione cuius illi conveniat, & consequenter talis aptitudo nequit esse ratio essentialis accidentis absoluti, quippè non est primum, quod illi convenit.

5 Neque obstat, quod aliqui respondent, scilicet, respectum transcendentalem benè posse esse de ratione essentiali absoluti, licet non respectum



pectum prædicamentalem, aptitudinalis autem in hærentiam est respectus transcendentalis, non autem prædicamentalis. Hoc, inquam, non obstat, quia sicut est de ratione respectus prædicamentalis ordinare unum ad aliud, ita est de ratione respectus transcendentalis: ergo sicut est inconueniens, quòd respectus prædicamentalis sit de essentia absoluti, similiter est incòueniens, quòd sit de essentia absoluti respectus transcendentalis. Pater consequentia, quia idem, quod sequeretur ex primo, sequeretur etiam ex secundo, scilicet, quòd secundum idem esset ad se, & ad aliud, quòd est inconueniens.

6 Arg. 1. Accidens secundum Arist. 7. Met. cap. 3. nequit definiri sine ordine ad substantiam; ergo aptitudinalis in hærentia, per quam dicit ordinem ad substantiam, est de essentia accidentis. Confirmatur ex ipso Arist. 1. Physic. dicente: *Intellectus querens segregationem accidentis à subjecto, querit impossibile*: ergo nequit concipi accidens sine ordine ad subjectum, & consequenter talis ordo, seu in hærentia aptitudinalis, est de essentia accidentis.

7 Resp. neg. conseq. aliud enim est, quòd accidens non possit definiri sine ordine ad substantiam, & aliud, quòd talis ordo sit de essentia accidentis, primum enim est verum, sed oritur ex nostro imperfecto modo concipiendi, nam cum essentias rerum non cognoscamus, non possumus quidditative illas definire, quapropter per proprias passiones, seu proprietates illas explicamus, ideoque dixit Aristot. accidens non posse definiri sine ordine ad substantiam. Ex quo non sequitur secundum, scilicet, quòd in hærentia aptitudinalis, seu ordo ad substantiam sit de essentia accidentis, sed tantum sequitur, quòd sit proprietas, seu quasi propria passio illius. Ex quo similiter resp. ad confirmationem.

8 Dices contra; materia prima est quid absolutum, & similiter forma substantialis, sed de essentia materiæ primæ est ordo ad formas, & de essentia formæ substantialis est ordo ad materiam; ergo benè potest esse de essentia accidentis absoluti ordo ad subjectum, seu inhærentia aptitudinalis. Respond. neg. min. quia ordo materiæ primæ ad formas, non est de essentia illius, sed tantum propria passio, & similiter ordo formæ substantialis ad materiam primam, dicuntur tamen, tam materia, quam forma, entitates partiales, seu incompletæ, quia ad entitates absolutas illarum necessario sequitur prædictus ordo ad constitutionem totius completi. De quo amplius in Physica, ut in proprio loco.

9 Arg. 2. *Esse per se* est de essentia substantiæ: sed accidens opponitur substantiæ: ergo *esse in alio*, ut opponitur *esse per se*, est de essentia accidentis. Resp. ex Scoto citato, §. *Ad argumenta*, quod accipiendo *esse per se*, & *esse in alio* uniformiter, ita ut *esse per se* neget aptitudinem inhærendi, quam dicit *esse in alio*, ita convenit *esse per se* substantiæ, sicut *esse in alio* accidenti, unde solum sequitur, quod sicut *esse per se*, ut dicit repugnantiam ad inhærendum, est proprietas substantiæ, ita *esse in alio*, ut dicit aptitudinem ad inhærendum, est proprietas accidentis, & sicut *esse per se*, radicaliter sumptum, id est, pro radice, a qua dimanat repugnantia ad inhærendum, est de essentia substantiæ, ita *esse in alio*, radicaliter sumptum, id est, pro radice, a qua dimanat aptitudo ad inhærendum, est de essentia accidentis. Unde nihil contra nostram conclusionem concludit argumentum.

10 Dicimus 2. Inhærentia actualis non est de essentia relationis, ut relatio est neque ejus propria passio, loquendo de inhærentia respectu subiecti. Probatur, quia dantur aliquæ relationes, quæ nullatenus inhærent subiecto, ut  
sunt

sunt relationes Divinæ; ergo inhærere subiecto actualiter non est de essentia, neque propria passio relationis, ut relatio est. Idem dicendum est de inhærentia aptitudinali, & radicali, propter eandem rationem.

11 Dicimus 3. Inhærentia actualis respectu fundamenti, seu esse in alio, tanquam in fundamento, est de essentia relationis, ut relatio est. Probat, quia tam de ratione relationis est ordo actualis ad terminum, quam ad fundamentum: sed ordo ad terminum est de essentia relationis; ergo etiam ordo ad fundamentum. Hæc conclusio est expressa Scoti in 4. dist. 12. quæst. 1. §. *Ad questionem, Vers. Secunda conclusio*, sub litt. D. ubi dicit: *Respectus est essentialiter habitudo inter duo extrema, & ideo sicut tollere terminum ad quem est respectus, est tollere, vel destruere respectum, ita tollere illud, cuius est respectus, est tollere respectum, & destruere rationem respectus, non ergo quia accidens respectivum est accidens, ideo requirit subiectum, vel fundamentum, sed quia respectus est respectus, ideo requirit cuius sit, & ad quod sit etiam in Divinis.* Et quæst. 2. §. *Ad argumenta, Vers. Respondeo*, litt. M. ubi dicit; *Dependentia relationis ad fundamentum est essentialissima, ita quod sine ea non potest esse ratio relationis.*

12 Dic. 4. Inhærentia actualis, in ordine ad subiectum, non est de essentia relationis creatæ, ut talis est. Tamen est quasi propria passio illius, quippè cum illa realiter identificatur. Prima pars probatur, quia secundum D. Aug. 7. de Trin. c. 2. & 3. *Quod relativè dicitur est aliquid, excepta relatione*; sed accidens relativum, v. gr. *paternitas* relativè dicitur ad subiectum per inhærentiam, qua illi inhæret; ergo accidens relativum est aliquid, excepta inhærentia, & consequenter ipsa actuali inhærentia non est de essentia, seu de conceptu quidditativo accidentis relativi.

13 Secunda pars probatur, quia in communi Scotistarum sententia, quando fundamentum est talis naturæ, quod nequeat esse sine relatione, relatio identificatur realiter cum illo, sed accidens relativum, quod est fundamentum relationis actualis inhærentiæ, est talis naturæ, quod nequit esse sine tali relatione actualis inhærentiæ: ergo actualis inhærentia est idem realiter cum accidenti relativo. Prob. min. quia ex dictis conclusionibus antecedenti cum Scoto, relatio, ut relatio, necessario est in fundamento: sed relatio accidentalis est in fundamento tanquam in subiecto inhærentiæ: ergo relatio accidentalis, seu accidens relativum est fundamentum talis naturæ, quod nequeat esse sine relatione actualis inhærentiæ: ergo non distinguitur realiter ab illa, & consequenter actualis inhærentia est quasi propria passio accidentis relativi.

14 Aliqui intendunt, disputationis gratia, posse defendi, accidens relativum posse dari sine actuali inhærentia respectu fundamenti, vel subiecti, dicentes, accidens relativum distinguatur ab absoluto in hoc, quod absolutum afficit subiectum in ordine ad se, & relativum afficit subiectum illud ad aliud ordinando, & sicut accidens absolutum potest de potentia Dei absoluta esse sine subiecto, licet dicat aptitudinem ad esse in illo, illud afficiendo in ordine ad se, ita accidens relativum potest de potentia Dei absoluta esse sine subiecto, seu fundamento, licet dicat aptitudinem ad esse in illo, illud afficiendo in ordine ad aliud. Utrum autem hoc possit defendi? Quisque videat. Certum enim, quod Scotus expressè tenet oppositum, ut patet in locis supra citatis, & similiter tenent omnes Philosophi.

15 Dicimus 5. Inhærentia radicalis, id est, illa ratio nobis ignota, a qua dimanat, seu quam sequitur inhærentia formalis, est de essentia accidentis.

cidentis in communi. Hæc conclusio est communis inter Scotistas, & deducitur ex dictis, nam talis inhærentia radicalis convenit, tam accidenti absoluto, quam relativo pariformiter, ut accidentia sunt.

16 Ex dictis facile deducitur, quod accidens, in communi sic potest definiri: *Accidens est, quod natum est, inherere.* Quæ definitio est descriptiva, quia datur per inhærentiam aptitudinalem, quæ est propria passio accidentis in communi, sicut definitio substantiæ, scilicet, *est ens per se* dicitur descriptiva, quia datur per modum perfectitatis, qui est quasi propria passio substantiæ.

## Q U Æ S T I O II.

*Utrum inhærentia actualis pertineat ad aliquod determinatum pradicamentum?*

1 **H**anc quæstionem in terminis proponit Scotus citatus quæstione antecedenti, §. *Ad quæstionem, Vers. Et si quæras*, litt. C. his verbis: *Et si quæras, ad quod genus pertineas illud, quod per se significat, hoc, quod est accidens, vel inherens?* Ad quod respondet his verbis: *Respondeo, ad genus aliquod respectus extrinsecus advenientis, patet enim, quod dicit respectum, quia non potest intelligi ratio eius ad se. Non autem dicit respectum intrinsecus advenientem, quia non necessario consequentem positionem extremorum, quia sicut patebit in ultima conclusione, fundamentum eius, & terminus possunt manere sine isto respectu. Si quæras, ad quod genus: Vide si forte ad genus passionis, ut sic passio dicat non tantum respectum passi ad agens, sed ad formam, vel si forte ad genus actionis; ut sic actio dicat non tantum respectum agentis ad patientem, sed formæ informantis ad illud, quod informatur, sed utroque modo erit respectus extrinsecus*

*Pars 2. Disp. 10. Quest. unic: 597*  
*secus adveniens. Hæc Scotus, ex cuius verbis*  
*facile deducitur, qui sit respondendum. Igitur*  
*claritatis gratia.*

2 Dicimus 1. Inhærentia accidentis absoluti est accidens, ut *quo*, & ut *quod*, ut *quo* respectu subiecti accidentis absoluti, siquidem est ratio formalis, qua accidens absolutum inhæret subiecto, & in hoc sensu non pertinet ad aliquod prædicamentum determinatum, sed est quid commune omnibus accidentibus, & eiusdem rationis cum inhærentia accidentis relativi in modo denominandi accidens, ut *quod* respectu ipsius accidentis absoluti, & in hoc sensu pertinet ad prædicamentum actionis. Hæc conclusio quoad primam partem à nemine negatur, quoad secundam verò deducitur ex supradictis verbis Scoti, & quòd loquatur de inhærentia accidentis absoluti, patet ex illis verbis: *Quia sicut patebit in ultima conclusione, fundamentum eius, & terminus possunt manere sine isto respectu*, quæ verba solum possunt intelligi de accidenti absoluto, & illius subiecto, quæ possunt esse sine actuali inhærentia, de quibus loquitur Scotus in ultima conclusione ab ipso citata.

5 Et deinde colligitur ex ipso Scoto citato, *Vers. ad rationem illam*, litt. I. ubi dicit: *Dico, quod inhærentia inhæret albedini alioquin albedo non esset formaliter inhærens illa inhærentia.* En quomodo loquitur de inhærentia accidentis absoluti, ut est albedo: sed inhærentia non inhæret albedini, ut *quo*, quia non est ratio formalis, qua aliquid inhæret albedini, sed qua albedo inhæret subiecto: ergo inhæret albedini, ut *quod*.

4 Deinde probatur ratione, quia tam accidentalis est albedini inhærentia, sicut est albedo subiecto: sed albedo inhæret, ut *quod* subiecto; ergo inhærentia inhæret, ut *quod* albedini. Prob. mai. quia sicut potest esse subiectum  
sine

sine albedine, ita albedo sine inhærentia; sed ex eo quod subiectum potest esse sine albedine, cognoscitur, albedinem convenire illi accidentaliter: ergo tamen accidentaliter convenit inhærentia albedini, sicut albedo subiecto: sed quolibet accidens ut *quod* pertinens ad aliquod determinatum prædicamentum: ergo inhærentia accidentis absoluti, sumpta ut *quod*, pertinet ad aliquod determinatum prædicamentum. Hoc prædicamentum est actio, vel passio, juxta verba Scoti, si sumatur inhærentia ex parte accidentis, pertinet ad prædicamentum actionis, si autem sumatur ex parte subiecti, ad prædicamentum passionis.

5 Arg. 1. Illud, quod est determinati generis, non potest competere pluribus generibus: sed inhærentia convenit novem generibus accidentis; ergo non pertinet ad aliquod determinatum genus. Resp. ex Scoto disting. mai. quod est determinati generis, nequit cōvenire pluribus generibus, quidditative, concedo, denominativè, nego. Similiter disting. min. inhærentia convenit novem generibus accidentis, quidditative, nego, denominativè, concedo, & neg. conseq. Aliis terminis respondetur infra.

6 Arg. contra, *esse in* non constituit aliquod speciale genus, quia unum *esse in* est omnium novem generum. Resp. ex Scoto similiter, quod vel *esse in* accipitur denominativè, & sic circuit omnia genera accidentium, sicut hoc, quod est inherere, vel accipere, vel accipitur pro ipsa habitudine per se significata per *esse in*, & hoc modo accipitur aliquod genus ab *esse in*, quia est specie determinata in uno genere. Hæc Scotus. Videatur loco citato, *Vers. Sed si contra hoc, quod* sub litt. D. ubi clarè prosequitur pro nostra conclusione.

7 Arg. 2. Si inhærentia accidentis absoluti, v. g. albedini, est accidens, ut *quod*, ergo inhæret

hæret albedini per aliam inhærentiam. De illa alia inhærentia inquirō, an inhæreat per aliam inhærentiam primæ inhærentiæ; vel non? Si non inhæret, ergo hæc secunda inhærentia non est accidens primæ inhærentiæ: ergo similiter dicendum est de prima, quod non est accidens albedinis, neque illi inhæret per aliam inhærentiam. Si secunda inhærentia inhæret primæ per aliam, idem inquiram de illa tertia, & sic in infinitum. Ne ergo in infinitum abeamus, dicendum est, inhærentiam accidentis absoluti non esse accidens, ut quod.

8 Ad hoc argumentum respondetur ex Scoto citato, *Verf. ad rationem illam*, litt. I. & quia littera Scoti est clara, tam pro responsione hujus argumenti, quam pro nostra conclusione, verbis illius respondetur, inquit enim: *Ad rationem illam dico, quod inhærentia inheret albedini, alioquin albedo non esset formaliter inherens illa inhærentia, & cum quæris de illa inhærentia, qua inheret albedinis inheret albedini, dico, quod illa est eadem inhærentia albedinis. & tantum ibi est status. Ratio hujus patet lib. 2. dist. 1. quæst. 5. Quia illa relatio est idem fundamentum, sine qua fundamentum esse includit contradictionem: huiusmodi est ista inhærentia inhærentia, quia contradictio est, inhærentiam albedinis ad superficiem esse actu, & non inherere actu, vel non habere inhærentiam, sed propter rationem oppositam nulla inhærentia forma absoluta est sibi eadem, quia non est simpliciter repugnantia, illam formam simpliciter esse, & non inesse. Hæc Scotus.*

9 Ecce quomodo cessat processus in infinitum; nam inhærentia, qua inhærentia albedinis inhæret albedini, nō distinguitur realiter ab illa, & sic non indiget alia inhærentia, qua inheret inhærentiæ albedinis, nam solum accidens, quod realiter distinguitur à subiecto, indiget inhærentia, ut tali subiecto inhæreat.

Quid



Quid autem sit dicendum de illa inhærentia secunda, respectu primæ colligitur ex dictis quæst. antec. loquendo de inhærentia respectu accidentis relativi. Videantur ibi dicta, quia eadem est ratio hic, & ibi.

10 Arg. contra, si daretur secunda inhærentia identificata realiter cum prima, sequeretur, quod idem respectus esset intrinsecus, & extrinsecus adveniens. Patet sequela, nam illa inhærentia secunda esset respectus intrinsecus adveniens, si quidem necessariò esset, posito fundamento, & termino, & deinde illa secunda inhærentia esset respectus extrinsecus adveniens, si quidem prima inhærentia, cum qua identificaretur, est respectus extrinsecus adveniens. Resp. 1. quod illa secunda inhærentia, secundum se, neque est respectus intrinsecus, nec extrinsecus adveniens, quia solum ille respectus dicitur intrinsecus, vel extrinsecus adveniens, qui distinguitur realiter à suo fundamento, qualis non est illa secunda inhærentia, cum identificetur realiter cum prima, quæ est fundamentum illius.

11 Secundò potest responderi, quod illa secunda inhærentia, secundum se, & formaliter est respectus intrinsecus adveniens, identicè tamen est respectus extrinsecus adveniens, quod nullum est inconueniens. Adverte tamen, quod illa secunda inhærentia, secundum se non pertinet ad aliquod prædicamentum, quia hoc solum convenit respectibus realiter distinctis, fundamento, pertinet autem seductivè ad prædicamentum actionis, ad quod per se pertinet, ut dictum est prima inhærentia, cum qua realiter identificatur, quod universim evenit in omnibus, quæ identificantur cum aliquo, quod per se pertinet ad aliquod prædicamentum, illa enim pertinet ad aliquod prædicamentum illius, cum quo identificantur.

12 Arg. 3. Inhærentia actualis accidentis absoluti est ipsum actualiter inhære, seu ratio for-

formalis inhærendi actualiter : ergo tantum est accidens ut *quo*, & consequenter non pertinet ad aliquod determinatum prædicamentum. Prob. consequ. quia eo modo aliquid est accidens quomodo inhæret; sed inhærentia accidentis absoluti solum inhæret ut *quo*: ergo solum est accidens ut *quo*. Resp. neg; consequ. & distingu. min. probationis, inhærentia accidentis absoluti solum inhæret ut *quo*, respectu subiecti ipsius accidentis absoluti, concedo, respectu ipsius accidentis, nego, & nego consequ. Etenim verum est, inhærentiam accidentis absoluti esse rationem formalem, quia accidens inhæret subiecto, & in hoc sensu tantum est accidens ut *quo*, & non pertinet ad aliquod determinatum prædicamentum, tamen non est ratio formalis, quia ipsa inhæret accidenti absoluto, sed est accidens ut *quod* ipsius accidentis absoluti, & illi inhæret per aliam inhærentiam, quæ licet non realiter, formaliter tamen distinguitur ab ipsa inhærentia accidentis absoluti, & in hoc sensu pertinet ad prædicamentum actionis, & hoc intendit Scotus, cum dicit, quod inhærentia accidentis absoluti inhæret ipsi accidenti, quia alias ipsum accidens non posset inhære subiecto.

13 Arg. 4. Accidens in communi definitur per ordinem ad inhærentiam: ergo inhærentia non est accidens. Patet consequentia, quia connotatum definitionis non est res definita, neque participat essentialiter definitionem. Resp. distingu. antec. accidens definitur per ordinem ad inhærentiam sumptam ut *quo*, concedo, sumptam ut *quod*, nego. Similiter distingu. consequ. inhærentia non est accidens (intellige prædicamentale) sumpta ut *quo*, concedo, sumpta, ut *quod*, nego. Eodem modo disting. prob. connotatum definitionis non est definitum, eo modo, quo est connotatum concedo; alio modo, nego. Accidens enim prædicamentale definitur per ordinem

adinherentiam, sumptam ut *quo*, & in hoc sensu inherens est connotatum in definitione accidentis, & ita non est definitum in tali definitione, quia ut sic non participat rationem accidentis in communi, non autem definitur accidens per ordinem ad inherentiam sumptam ut *quod*, neque in hoc sensu inherens est connotatum in definitione accidentis, & ut sic dicimus, esse propriè accidens prædicamentale, & participare rationem accidentis in communi.

14. Dicimus 2. Inherentia actualis accidentis relativi tantum est accidens ut *quo*, & in hoc convenit cum inherentia accidentis absoluti, non tamen est accidens ut *quod*, in quo differt ab inherentia accidentis absoluti, & sic non pertinet ad aliquod determinatum prædicamentum, sed reducitur ad prædicamentum illius, cuius est inherens. Probatur, quia inherens accidentis relativi non distinguitur realiter ab illo, ut dictum est quæst. antec. sed quod non distinguitur realiter ab aliquo, non est accidens respectu illius, neque pertinet ad aliquod prædicamentum per se, sed tantum reductivè ad prædicamentum illius, cum quo identificatur; ergo inherens accidentis relativi non pertinet ad aliquod determinatum prædicamentum per se, sed tantum reductivè ad prædicamentum ipsius accidentis relativi, & tantum est accidens, quo accidens relativum inheret subiecto, non tamen est accidens quod inheret accidenti relativo.

15. Pro aliis argumentis observa, quod quando communiter dicitur, *inherentia non datur inherentia*, sic debet intelligi, quod inherens sumpta ut *quo*, non datur inherentia, quia ut sic non inheret, sed tantum est ratio formalis inherendi: non tamen intelligitur de inherens sumpta ut *quod*, quia ut sic non est ratio formalis inherendi, sed est quid inherens, & sic datur alia inherentia media, qua inheret, quæ

quæ ut dictum est, non distinguitur realiter, sed tantum formaliter ab illa, & in hoc sensu etiam potest dici, quod inhærentiæ non datur inhærentia realiter ab illa distincta.

## D I S P. III.

### *De quantitate secundo prædicamento.*

**P**ostquam egit Arist; de substantia, immediate cap. 6. sermonem instituit de quantitate, quia hæc est accidens proximum substantiæ inter omnia alia accidentia, quippè immediate recipitur in substantia, & media illa, recipiuntur alia accidentalia.

## Q U Æ S T I O I.

### *Quanam sit ratio formalis quantitatis?*

**1** **P**ro intelligentia quæstionis notandum est primo cum Scoto in 1. dist. 19. qu. 1. §. *Ad argumenta* litt. F. quantitatem esse in duplici differentia. Altera dicitur quantitas virtutis, & est perfectio rei, secundum quam res dicitur magna, vel parva, seu constituta in magno, vel parvo gradu perfectionis. De quantitate in hoc sensu non loquimur in præsentī, quia non pertinet ad aliquod determinatum prædicamentum, sed est quid transcendens per omnia prædicamenta, & etiam convenit Deo, qui in nullo prædicamento collocatur, propter quod dicitur Psalm. 47. *Magnus Dominus*. Altera dicitur quantitas molis, & est quoddam accidens absolutum, ratione cuius substantia materialis, & corporea est divisibilis, impenetrabilis, & extensa, & in hoc sensu loquimur de quantitate in præsentī.

**2** Notandum est secundò, quod quantitas potest sumi in concreto, & in abstracto. In

concreto sic eam definivit Arist. 5. Met. cap. 13. *Quantum est divisibile in ea, qua insunt, quorum utrumque, vel unumquodque, unumquid, & hoc aliquid aptum est esse.* Quæ definitio, seu proprius descriptio sic communiter explicatur ab Scotistis ex Scoto 5. Met. cap. 12. In illa præsupponunt omnes, *accidens*, seu aliquid accidentale, in quo convenit cum aliis accidentibus, & differt a substantia. Dicitur *divisibile*, per quod differt a punctis, & aliis indivisibilibus. Dicitur, *in ea, qua insunt*, per quod differt, ut aliqui dicunt cum Scoto citato, a divisione mixti, nam licet dividatur in elementa, non dividitur in ea, quæ insunt, id est, quæ sunt formaliter in illo, nam elementa, non formaliter, sed tantum virtualiter manent in mixto, ut suo loco dicitur, partes autem, in quas dividitur quantum, sunt formaliter in illo. Alii autem dicunt, quod illa verba: *In ea, qua insunt*, ita intelliguntur, ut quantum sit divisibile in partes extensas, quæ per se, & ex natura sua exigunt esse extra se invicem in ordine ad locum physicè, & naturaliter, per quod differt quantum a substantia, quæ licet sit divisibilis, non tamen divisione physica, & naturali, de quo alibi. Dicitur, *quorum utrumque, &c.* id est, quod quælibet pars ex his, in quas dividitur quantum, nata est esse per se singularis, ac eiusdem rationis cum ipso toto diviso, per quod differt a toto physico, cuius partes, scilicet materia, & forma, non sunt eiusdem rationis cum ipso toto. Et deinde non sunt natæ per se existere extra totum physicum, sicut sunt natæ existere per se partes quanti.

3 Ex hoc sequitur quod quantitas in abstracto sic potest definiri: *Est accidens absolutum ratione cuius, quantum est divisibile in ea, qua insunt, &c.* Ubi advertendum est, quod quantum potest dupliciter sumi. Primo accidentaliter, & est concretum ex quantitate tanquam forma,

ma, & ex substantia tamquam subiecto. Secundo essentialiter, & igitur ipsa quantitas in concreto, quia hoc est peculiare quantitatis, quod non tantum est principium *quo*, sed etiam principium *quod*, id est, non solum est ratio divisibilitatis extensionis, &c. substantiæ, sed etiam ipsa est divisibilis, & extensa, &c. Utrumque quantum comprehenditur in definitione Arist. distributione accommodata, quæ definitio rigorosè sumpta, tantum convenit quanto homogeneo, ut patebit scrutanti.

4 Notandum est 3. plura esse, de quibus potest dubitari, an sint rationes constitutivæ quantitatis scilicet rationem mensuræ, divisionem, impenetrabilitatem, & extensionem? Mensura nihil aliud est, secundum Philosophum 10. Met. cap. 1. nisi id, quo quantum cognoscitur, seu id, quo de magnitudine quanti certificamur, hoc intelligitur de mensura activa, unde mensura passiva nihil aliud erit, nisi id, de cuius magnitudine certificamur. Divisibilitas intelligitur modo dicto in explanatione definitionis quati. Impenetrabilitas est incopossibilitas unius partis cū alia in eodē loco. Extensio potest sumi, vel in ordine ad se, ita ut una pars nō sit entitativa alia, seu sit ab alia realiter distincta, vel in ordine ad locum, ita ut una pars exigit occupare diversū locum, ac alia, quæ extensio coïncidit cum impenetrabilitate.

5. Ubi advertendū est, quod spatiū est triplex, scilicet spatium loci, in quo sensu dicitur aliquid esse in spatio unius palmi, spatium durationis, in quo sensu dicitur aliquid durare per spatiū unius horæ, & spatiū discretionis, in quo sensu dicitur, in spatio centenarii esse quinquaginta binarios, unde extensio partium potest dici tripliciter, scilicet, vel in ordine ad spatiū loci, vel ad spatium durationis, vel ad spatium discretionis, & similiter tripliciter potest dici impenetrabilitas. His suppositis, & quod omnia supradicta possunt accipi, vel actualiter, vel aptitudinaliter, vel

radicaliter, pro quolibet ex dictis sunt sententiae affirmantes, in illis stare rationem formalem quantitatis, quæ sententiae possunt videri apud recentiores; nos autem brevitatis gratia Authores pro illis non adducimus, & quid videatur tenendum per sequentes conclusiones proponemus. Igitur.

6 Dicimus 1. Ratio formalis quantitatis non consistit in mensura actuali, neque in divisione actuali, neque in actuali extensione in ordine ad locum, seu in actuali impenetratione. Conclusio est communis inter catholicos, & fundatur in Sacrosancto Eucharistiae Mysterio, nam quod est de essentia alicujus, nequit ab illo separari: sed quantitas Corporis Christi Domini in Eucharistia nequit mensurari, neque dividi actualiter, neque actualiter est extensa in ordine ad locum, & consequenter neque actualiter impenetrata: ergo tenet conclusio. Propter eandem rationem dicendum est omnia prædicta, actualiter sumpta, non esse proprias passiones quantitatis, quia propriae passiones nequeunt separari ab illo, cujus sunt, sicut separantur à quantitate omnia supradicta.

7 Dicimus 2. Omnia supradicta, aptitudinaliter sumpta, non sunt de ratione formali, seu de essentia quantitatis. Probatur generaliter de omnibus, nam omnia supradicta, aptitudinaliter sumpta, dicunt respectum, seu relationem, sed respectus nequit esse de essentia, seu de ratione formali absoluti, ut est quantitas; ergo omnia supradicta, aptitudinaliter sumpta, nequeunt esse de essentia, seu de ratione formali quantitatis.

8 Probatur specialiter de divisibilitate, quia divisibilitas supponit partium extensionem, nam ideo quantitas potest dividi divisione quantitativa, quia habet partes extensas: ergo talis divisibilitas nequit esse de ratione formali quantitatis, siquidem non est, quod primò quantitati

titati convenit. Neque obstat, quòd Arist. defini-  
erit quantitatem per divisibilitatem, nam ta-  
lis definitio nō est essentialis, seu tradita per ra-  
tionem formalem, sed descriptiva, & tradita  
per propriam passionem, quod expressè dixit  
Scotus cit. n. 2. his verbis : *Contra auctoritates  
probant, quòd divisibilitas est proprium quanti-  
tatis, sed non quòd, sit de essentia eius, quia di-  
visibilitas est respectus, respectus non est de essentia  
absoluti*. Similiter probatur de mensurabilita-  
te tam activa, quàm passiva.

9 Probatur de extensione aptitudinali in or-  
dine ad locum, quia prius est quantitatem ha-  
bere partes in se., quàm prædictas partes habere  
aptitudinem, ut extendantur in ordine ad lo-  
cum : ergo aptitudinalis extēsiō in ordine ad lo-  
cum non est prima ratio quantitatis. Similiter  
probatur de impenetrabilitate aptitudinali,  
quæ coincidit cum aptitudinali extensione in  
ordine ad locum.

3 Dicimus 3. Omnia prædicta, radicaliter  
sumpta sunt de ratione formali quantitatis, id  
est, illud à quo omnia prædicta dimanant, est  
ratio formalis constitutiva quantitatis. Proba-  
tur, quia radix omnium proprietatum alicuius  
rei, est essentia illius: sed omnia supradicta sunt  
proprietates quantitatis: ergo radix omnium  
prædictorum est ratio formalis, & essentialis  
quantitatis. Hæc conclusio sic proposita est ferè  
communis consensus, si rectè intelligatur, &  
solum est difficultas in assignanda ratione for-  
mali talis radice, & aliqui dicunt, stare in hoc,  
quod quantitas habet partes in ordine ad se, seu  
realiter distinctas, sed cum hoc etiam conveniat  
substantiæ materiali, ut quæstione 3 dicemus  
nequit in hoc poni ratio formalis quantitatis,  
sed in aliquo nobis ignoto, ratione cuius partes  
quantitatis exigunt occupare locum, seu esse in  
loco absque penetratione, ita ut dicamus ratio-  
nem quantitatis esse habere partes in ordine ad



se, ita ut dicant ordinem ad spatium occupandum, vel loci, vel durationis, vel discretionis, distributione accommoda, cum impenetratione inter se, in quo sensu debet explicari Scotus, dum in 4. diff. 10. q. 1. dicit rationem quantitatis stare in habere partes in ordine ad se, nam alias sibi ipsi contradiceret, cum dicat, etiam substantiam materalem habere partes in ordine ad se, & solum potest esse distinctio inter quantitatem, & substantiam, quod partes substantię non sunt impenetrabiles, seu extensę in ordine ad locum per se, sicut partes quantitatis.

11 Aliqui autem valde fatigantur in inquisitione primę proprietatis, seu passionis quantitatis, an scilicet, sit mensurabilitas? An diuisibilitas? An impenetrabilitas? An verò exigentia ad extensionem in ordine ad locum? Ad quod breviter potest dici, (nè multum in re parvi momenti immoremur) quod prima proprietas quantitatis est exigentia extensionis in ordine ad locum, quod ex actibus correspondentibus prædictis proprietatibus potest deduci, nam eo ordine, quo naturaliter conveniunt actus, conveniunt etiam aptitudines: sed prius est, quod quantitas sit actu extensa in ordine ad locum, quam quod actualiter dividatur, seu mensuretur: ergo prius convenit quantitati naturaliter exigentia extensionis in ordine ad locum, quam mensurabilitas, & diuisibilitas. Circa impenetrabilitatem videtur dicendum, idem esse, ac exigentia extensionis in ordine ad locum, nam hæc exigentia nihil aliud est quam partes quantitatis petere, esse unam extra aliam, seu unam quantitatem extra aliam in ordine ad spatium, seu unam occupare diversum spatium, ac aliam, quid aliud est impenetrabilitas? Nihil certe aliud apparet esse, vel assignetur. Neque apparet, quid contra nostras conclusiones possit obijci, quod non sufficienter solvatur ex dictis, & amplius ex dicendis quaest. 3.

QUÆ

Q U Æ S T I O . I I

*Quanam sint proprietates quantitatis?*

1 **A** Rist. in hoc capite tres enumeravit proprietates quantitatis. Prima est, *non habere contrarium*, quæ proprietas intelligitur de contrarietate propriè dicta, ut dictum est loquendo de proprietatibus substantiæ disp. 1. quæst. 3. num. 4. non autem intelligitur de contrarietate latè sumpta, scilicet, pro quacumque oppositione, nam hoc modo plures contradictiones possunt inveniri in quantitate, nam motus sursum, & deorsum contrariatur, & similiter quantitas continua, & discretæ, &c. Secunda proprietas est; *Non suscipere magis, & minus*, quæ proprietas intelligitur quoad intensiorem, non vero quoad extensionem, nam una quantitas potest esse magis extensa, quam alia. Hæ duæ proprietates non conveniunt quantitati in quarto modo, siquidem etiam conveniunt substantiæ.

2 Tertia proprietas est *aqualitas*, vel *inæqualitas*, quæ proprietas debet intelligi de æqualitate, vel inæqualitate propriè dicta, ut est illa, quæ oritur ex extensione quantitativa partium. Et non debet intelligi de æqualitate, vel inæqualitate metaphoricè dicta, ut est, quæ resultat ex quantitate virtutis, nam hæc convenit alijs à quantitate.

3 Pro majori huius proprietatis intelligentiæ & pro aliquorum argumentorum solutione, observandum est, quod æqualitas, & inæqualitas, sumptæ formaliter, pertinent ad prædicamentum relationis, & ut sic non sunt proprietates quantitatis, sed tantum sunt proprietates quantitatis sumptæ fundamentaliter, id est, pro fundamento prædictarum relationum, & hoc non ita, quod quantitas necessario actualiter sit fundamentum illarum, sed tantum aptitudinaliter, nam si tantum esset

una quantitas in rerum natura, non esset actualiter fundamentum relationis æqualitatis, vel in æqualitatis, benè tamen aptitudinaliter. Hæc proprietas sic explicata convenit quantitati in quarto modo, nam convenit omni quantitati, illi soli, & semper.

4 Præter has proprietates, aliæ tres solent assignari ab Authoribus. Prima est: *Divisibilitas in partes extensas quantitativè*, quæ proprietas, si tantum intelligatur de divisibilitate physica, solum convenit quantitati continuæ, non verò quantitati discretæ, nam solum id, cujus partes sunt unitæ, potest dividi, & certum est, partes quantitatis discretæ, non esse unitas. Si autem prædicta proprietas intelligatur de divisibilitate, prout abstrahit à physica, & per assignationem, etiam convenit quantitati discretæ, nam numerus centenarius, v. gr. est divisibilis per assignationem, & actu dividitur, cum eius unitates numerantur. Hæc proprietas convenit quantitati in quarto modo.

5 Secunda proprietas est, *esse finitam, & infinitam*, quæ proprietas debet intelligi, ita ut quantitas naturaliter exigit, esse finitam in actu, & infinitam in potentia, quia naturaliter nequit dari aliqua quantitas, quæ actualiter non sit finita, & cui ex natura sua non possit addi magis, & magis sine termino.

6 Tertia proprietas est, *esse mensuram*, quæ proprietas intelligitur de mensura, tam activa, quam passiva, de mensura passiva est communis consensus, de mensura autem activa (non intelligas de actuali, sed de aptitudinali) patet, quia aptitudo ad mensurandum nihil aliud est, quam quod aliquid possit assumi ut instrumentum ad nos certificandū de magnitudine alterius, quod absque dubio, soli quantitati convenit. Ubi advertendum est, quod hæc proprietas solum convenit quantitati finitæ, nam quantitas infinita, neque potest mensurari, neque mensurare,

nam

nam tam mensura, quàm mansuratum debet esse quid certum, & determinatum, & nihil magis incertum, & indeterminatum, quàm infinitum.

### Q U Æ S T I O III.

*Verùm substantia materialis habeat partes realiter distinctas, seclusa quantitate?*

1 **P**RO intelligentia questionis supponendum est tamquam certum, substantiam realiter distinguà quantitate, quod ferè omnes Philosophi, & Theologi tenent contra Nominales, & fundatur in Sacrosancto Eucharistiæ Mystério, in quo fatentur omnes Catholici permanere quantitatem sine substantia panis, & vini, quo nullum majus signum distinctionis realis potest excogitari.

2 Neque valet, quod respondent Nominales, scilicet, quòd in Eucharistia, destructa substantia panis, destruitur etiam quantitas identificata cum illa, & remanere quantitatem identificatam cum aliis accidentibus. Hoc, inquam, non valet, nam ex hoc sequeretur, quòd in quocumque composito materiali, essent plures quantitates realiter distinctæ, altera correspondens substantiæ, & cæteræ correspondentes accidentibus, quod est impossibile.

3 Patet sequelæ impossibilitas, quia quantitas est naturaliter impenetrabilis; ergo naturaliter sunt impossibiles plures quantitates in eodem loco, & consequenter in eodem composito; ergo nequit in eodem composito dari quantitas correspondens substantiæ, & quantitas correspondens accidentibus. Quòd autem illæ quantitates, si darentur, essent naturaliter penetratæ, patet; quia accidentia Eucharistiæ non minus loci occupant, ut sunt sine substantia panis, ac quando erant tali substantiæ unita; ergo

si haberent quantitatem distinctam à quantitate substantiæ, tales quantitates naturaliter essent penetratæ, quod est impossibile, quippe est contra rationem quantitatis; ergo dicendum est, quòd substantia non habet quantitatem distinctam à quantitate accidentium, sed hæc quantitas manet in Eucharistia sine substantia panis; ergo distinguitur realiter ab illa. Hoc supposito.

4 Circa præsentem difficultatē varii sunt modi dicendi, nam aliqui absolutè negant, substantiam, sclusa quantitate, habere partes realiter; & entitativè distinctas, quorum aliqui asserunt, substantiā, adhuc sub quā titate existentē, nullas habere partes substantiales distinctas, sed esse substantialiter incōpositam, & simplicem, & consequenter totā substantiā esse sub tota quantitate, & totam sub qualibet parte quātitatis. Alii autē, licet cōcedant, substantiā habere partes realiter, seu ētitativè distinctas, ut subest quātitati, negāt tamē prædictas partes habere antecedenter, & independentē à quantitate. Per oppositum tamen tenent alii, substantiā antecedēter ad quantitatem habere partes entitativè distinctas, quorū aliqui dicunt prædictas partes independentē à quantitate nullatenus esse extensas, neque in ordine ad se, neque in ordine ad locū. Alii autē judicāt partes substantiæ independentē à quantitate posse esse extensas tam in ordine ad se, quàm in ordine ad locum. Quid videatur tenendum in tanta varietate, per sequentes conclusiones proponemus.

5 Dicimus 1. Substantia, ut subest quantitati, habet partes entitativè distinctas, ita ut nō sit tota substantia sub tota quantitate, & tota sub qualibet parte quantitatis, sed potius tota substantia sub tota quātitate, & pars sub parte quantitatis. Probatur 1. quia in homine v.g. substantia capitis non est substantia pedis; ergo distincta ab illa & consequenter substantia hominis, ut subest quantitati, habet partes entitativè distinctas.

6 Oppositum tenentes, respondent, quòd substantia-

stantia capitis non distinguitur à substantia pedis; sed tantum est distinguibilis ab illa; quia actu non est ab illa separata, sed tantum separabilis.

7 Pluribus rationibus impugnant hanc responsionem ferè omnes Philosophi, ex quibus aliquas proponemus. Contra igitur primò, quia repugnat omninò idem realiter à se ipso separari; ergo sufficit, quòd aliqua possint separari, ut dicantur actualiter distincta. Confirmatur, quia quod non habet partes actualiter distinctas, est indivisibile: sed quod potest habere partes separatas, non est indivisibile; ergo quod potest habere partes separatas, necessariò habet partes realiter distinctas; sed juxta prædictam responsionem, substantia, ut subest quantitati, potest dividi in partes; ergo ut est sub quantitate habet partes realiter distinctas.

8. Contra secundò; quia repugnat unitati, ut unitas est, divisio in plures unitates; nam unus homo nequit dividi in plures homines; ergo si substantia capitis, & pedis, ut est sub quantitate, est una indistincta, repugnat, quòd dividatur in plures partes substantiæ habentes unitates realiter distinctas; sed hoc non repugnat, juxta responsionem; ergo ideò est, quia substantia pedis, & capitis, ut est sub quantitate, non unicam, sed plures habet unitates realiter distinctas. Confirmatur, quia repugnat extrema realiter distincta realiter identificari; ergo similiter repugnat, unicam, atque indistinctam unitatem fieri plures inter se realiter distinctas. Patet consequentia; quia oppositorum eadem est ratio. Antecedens videtur evidens; quia non apparet, quomodo quæ distinguuntur, possint realiter identificari, nam semper secum habent rationem distinguendi.

9 Prob. 2. conclusio: quia nulla major ratio distinctionis, quàm destructio unius sine destructione alterius; sed potest destrui substantia pedis, nò

destructa substantia capitis: ergo signum evidens est realis distinctionis substantiæ pedis à substantia capitis, & consequenter substantia, ut subest quantitati, habet partes realiter, & entitativè distinctas. Confirmatur totum, quod dictum est, & simul absolutè impugnatur supradicta responsio ad primam rationem: quantitas, in omnium sententia, habet partes realiter distinctas, licet non sint actu divisæ, sed tantum divisibiles in potentia: ergo licet substantia, ut subest quantitati, solum sit divisibilis in potentia, non verò in actu, habet partes realiter, & entitativè distinctas.

10 Dicimus 2. Prædictæ partes substantiæ conveniunt illi pro priori ad quantitatem, & independenter ab illa. Conclusio est communis inter Scotistas, quam tenet Scotus in 2. distin. 12. quæst. 2. §. *Respondeo, vers. Si quæras*, litt. D. his verbis: *Si quæras etiam an habeat partes?* (loquitur de materia prima) *dico, quid partes substantiales habet, illas enim non habet per quantitatem*. Tenant etiam eam plures Thomistæ citantes D. Thomam 1. 2. quæst. 27. art. 4.

11 Probatur 1. conclusio, quia distinctio partium substantiæ est substantialis: ergo nequit provenire à quantitate, quæ est accidens. Patet consequentia, tum quia nihil accidentale potest ingredi in ratione substantiali. Tum etiam quia nihil posterius potest esse causa unitatis, vel distinctionis prioris: substantia est prior quantitate: ergo nequit distinguere ratione quantitatis. Tum quia quod aliquid sit entitativè ab alio distinctum, nequit illi provenire ab aliquo, quod est extra rationem illius; quantitas est extra rationem substantiæ; ergo distinctio substantiæ nequit provenire à quantitate. Major patet; quia idem est principium constitutivum, & distinctivum; sed principium constitutivum alicujus nequit esse, quod non est

est de ratione formali illius, ergo principium distinctivum alicuius nequit esse extra rationem illius, & consequenter quantitas nequit esse ratio distinctiva substantiæ.

12 Probatur 2. quia si Deus auferret quantitatem à substantia, tunc vel partes substantiæ, quæ erant distinctæ, quando substantia erat affecta quantitate, conservarent illam distinctionem, vel non? Si non: ergo quæ prius erant realiter distincta, jam realiter identificarentur, & deinde, si postea ipsa substantia afficeretur quantitate, iterum partes illius distinguerentur; utrumque videtur absurdum: ergo dicendum est, quod illæ partes substantiæ conservarent distinctionem, quam habebant, dum erant sub quantitate: ergo talis distinctio nequit illis provenire à quantitate.

13 Confirmatur, quia si à corpore abscinderetur brachium v. gr. & postea Deus auferret quantitatem, tam à substantia corporis, quam à substantia brachii abscisi; tunc illæ substantiæ realiter distinguerentur; quis hoc neget? Sed talis distinctio non proveniret à quantitate quia tunc non esset: ergo prædictæ substantiæ per se ipsas distinguerentur & consequenter substantia independenter à quantitate habet partes realiter distinctas.

14 Probatur 3. si Sacerdos tantum consecraret dimidium hostiæ sibi propositæ, tunc una pars substantiæ prædictæ hostiæ separaretur ab alia, nam desineret esse, remanente alia, & tamen tota quantitas remaneret indivisa, & inseparata: sed quando aliquid dividitur, & separatur, alio non diviso, & separato, tunc ex se habet distinctionem, & separationem, & non dependenter ab alio, quod non est divisum, & separatum: ergo partes substantiæ prædictæ hostiæ habent divisionem, & separationem, & consequenter distinctionem, independenter à quantitate.



15 Argues 2. Nulla datur compositio partium in substantia independenter à quantitate : ergo non habet partes distinctas independenter à quantitate . Prob. anteced. quia talis compositio ; neque esset per se , neque per accidens , non per se , quia non esset ex actu , & potentia per se ; nam una pars non se haberet ut actus , & altera ut potentia per se , neque per accidens , quia nulla datur compositio per accidens ante quantitatem : sed nulla alia compositio potest assignari : ergo nulla datur compositio partium in substantia independenter à quantitate , Resp. neg. antec. & maiorem probationis quoad primam partem ; datur enim in substantia independenter à quantitate compositio per se integralis ; quia licet una pars non se habeat ut per se actus , respectu alterius , & altera ut per se potentia ; tamen quælibet pars se habet ut per se potentia , respectu indivisibilis , medio , quo tales partes uniuntur , quod quidem indivisibile se habet tanquam per se actus , respectu partium , De quo amplius in Physica.

16 Arg. 2. si substantia haberet partes independenter à quantitate , materia prima esset composita : sed hoc est falsum ; ergo substantia non habet partes independenter à quantitate . Prob. min. primò , quia materia prima est primū principium compositi naturalis : sed prima principia sunt simplicia , non verò composita : ergo materia prima non est composita . Secundò probatur eadem minor , quia si materia prima esset composita , sequeretur , quod compositio totius physici substantialis ex materia , & forma , non esset prima , sed hoc est contra Philosophum 8. Met. cap. 3. ergo materia prima non est composita , & consequenter substantia non habet partes independenter à quantitate . Resp. neg. min. ad primam prob. disting. min. prima principia sunt simplicia ; id est , non composita ex aliis principis , tanquam ex materia , & forma , concedo ;  
id

id est, non composita ex partibus integralibus, nego, & neg. conseq. Ad secundam prob. disting. mai. non esset compositio totius prima, absolute loquendo, admitto; comparatione ad compositionem accidentalem, nego; & in hoc sensu loquitur Philosophus, cum dicit, compositionem totius ex materia, & forma esse primam; nam loquitur de compositionibus, in quibus una pars se habet tamquam actus, & altera tamquam potentia, & sic certum est, compositionem ex actu, & potentia per se esse primam, ut est compositio ex materia, & forma, & compositionem ex actu, & potentiam per accidens esse secundam, ut est compositio ex substantia, & quantitate v.g.

17 Dicimus 3. substantia materialis organica independentem à quantitate habet partes extensas, seu ordinatas in ordine ad se. Probat, quia talis ordinatio partium in ordine ad se, est quædam connexio illarum, ratione, cujus una pars exigit uniri immediate uni, & non alteri, v.g. pars substantiæ capitis exigit uniri parti substantiæ colli, non verò pedis, & sic de aliis; sed substantia organica habet partes, quæ tali ordine postulant inter se uniri independentem à quantitate; ergo independentem à quantitate substantia organica habet partes extensas, seu ordinatas in ordine ad se. Minor patet; quia in hoc distinguitur substantia organica à non organica; quia cum partes substantiæ organiciæ sint diversæ rationis; partes verò substantiæ non organiciæ sint ejusdem rationis, v. partes substantiæ aquæ, illæ postulant prædictum ordinem, non verò istæ, & difficile assignabitur alia differentia inter prædictas partes. Ex quo sequitur, quod partes substantiæ non organiciæ non sunt ordinatæ in ordine de se; nam sicut quælibet unitur uni parti potest alteri uniri, cum omnes sint ejusdem rationis.

18 Hoc potest confirmari ex dicendis in Physica, scilicet, quod partes eterogenæ substantiæ

stantiæ organicæ sunt inter se diversæ rationis ,  
& speciei substantialiter , & non ratione acci-  
dentium .

19 Dicimus 4. Probabile est, substantiam  
materiam posse habere extensionem partium  
in ordine ad locum. Probatur, quia si Deus au-  
ferret quantitatem à substantia materiali; tunc  
partes illius substantiæ corresponderent loco,  
eo ordine, quo correspondebant cum quanti-  
tate: sed hoc est habere extensionem partium  
in ordine ad locum: ergo substantia materialis  
independenter à quantitate potest habere par-  
tes extensas in ordine ad locum.

20 Aliqui respondent, quòd in tali hypote-  
si prædictæ partes substantiæ reducerentur ad  
punctum, & sic nullam haberent extensionem  
in ordine ad locum. Sed contra est, quia nequit  
ex cogitari, quomodo prædictæ partes substan-  
tiæ, quæ antea erant extensæ, reducantur ad  
punctum, nisi per motum localem illarum: sed  
talis motus localis nequit fieri naturaliter in  
instanti, in quo Deus auferret quantitatem, er-  
go nequit dici, quòd prædictæ partes reduce-  
rentur ad punctum, & consequenter remane-  
rent extensæ in ordine ad locum, eo ordine, quo  
prius erant extensæ.

21 Alii respondent, quòd in tali casu prædi-  
ctæ partes substantiæ remanerent in eodem spa-  
tio, sed non, eo ordine, quo antea erant, sed  
diversimodè, scilicèt ita ut tota substantia esset  
in toto loco, & tota in qualibet parte, quodam  
modo definitivo; quam responsionem videtur  
tenere Scotus in 2. dist. 12. qu. 2. §. *Respondeo,*  
*vers. & si quæras*, litt. D. Sed contra est; quia  
talis modus essendi in loco nequit convenire  
substantiæ, quæ antea erat extensa per quan-  
tatem circumscriptivè, id est, ita ut tota sub-  
stantia esset in toto loco, & pars in parte, nisi  
per aliquem motum localem ipsarum partium,  
ita ut quælibet pars constitueretur in omnibus lo-  
lo.

locis partialibus, in quibus sunt ex terzæ partes, quòd difficiliùs videtur, quam quòd tota substantia reduceretur ad punctum, ut dictum est in prima responsione; ergo similiter est impossibile, quòd talis motus fiat in instanti naturaliter, & consequenter nequit substantia, ablata quantitate, remanere in loco modo dicto definitivè. Scotus autem intelligitur, non deesse in loco definitivè, modo dicto; sed quatenus esse definitivè in loco negat esse in loco circumscriptivè necessariò; nam esse in loco circumscriptivè rigorosè sumptum, dicit, ita esse, quòd totum corresponsdeat toti loco, & pars parti loci ita necessariò, ut nullatenus totum locatum possit naturaliter esse in qualibet parte loci, eo quòd ex natura sua est impenetrabile, quòd solum convenit rebus affectis quantitate. Etenim potest dici, quòd modus essendi in loco, quem haberet substantia materialis separata à quantitate, esset medius inter esse in loco circumscriptivè, & definitivè, nam esset tota substantia in toto loco, & pars substantiæ in parte loci, in quo conveniret cum esse in loco circumscriptivè, & ita esset in tali loco, ut tota substantia posset esse in qualibet parte loci, & hoc tam naturaliter, quam primo modo, eo quòd substantia non est impenetrabilis, in quo conveniret cum modo essendi in loco definitivè.

22. Pro majori claritate notandum est, quòd loquendo miraculosè, seu de potentia Dei absoluta, benè potest dici, quòd substantia, si ab ea auferretur quantitas, vel reduceretur ad punctum loci, ut tenet prima responsio, vel quòd esset in loco definitivè, ut tenet secunda, quòd non est peculiare substantiæ materialis, nam etiam miraculosè loquendo, hoc potest, quantitati convenire, imò de facto convenit quantitati corporis Christi Domini in Eucharistia; tamen in miraculo esset maxima differentia,

ria, scilicet, quod quando substantia, quæ prius erat sub quantitate, illa ablata, reduceretur ad punctum, miraculum staret in hoc, quod hoc fieret in illo instanti, non autem in hoc, quod omnes partes substantiæ essent penetratæ, nam cum non sint impenetrabiles, status penetrationis est illis naturalis, secundum se consideratis; at verò miraculum quantitatis corporis Christi in Eucharistia etiam stat in penetratione partium quantitatis, seu in ablatione extensionis illarum in ordine ad locum; quia sunt naturaliter impenetrabiles, & naturaliter exigunt determinatè extensionem in ordine ad locum. Nos autem in præsentì tantum loquimur de modo, quo naturaliter esset in loco substantia materialis, quæ prius erat sub quantitate, si talis quantitas ab illa miraculosè laufferetur.

23 Arg. 1. Extensio partium in ordine ad locum est effectus formalis quantitatis; ergo ablata quantitate, substantia nequit habere partes extensas in ordine ad locum. Patet consequentia, nam ablata forma, aufertur effectus formalis. Resp. disting. anteced. extensio partium in ordine ad locum est effectus formalis quantitatis, si sit extensio necessaria, quæ necessario habet secum impenetrabilitatem, concedo, extensio non necessaria, seu quæ secum non habet necessario impenetrabilitatem, nego, & disting. consequ. substantia, ablata quantitate, non habet partes extensas in ordine ad locum necessario, seu cum impenetrabilitate, concedo; non necessario, seu sine impenetrabilitate; nego. Etenim, extensio, quæ provenit à quantitate in ordine ad locum, ita est necessaria, seu conjuncta cum impenetrabilitate, quod naturaliter nequit esse, quod extenditur per quantitatem, sine tali extensione, seu actualiter penetratum, tam secundum suas partes, quam secundum quodlibet aliud extrinsecum; at verò

rò extensio in ordine ad locum, quam haberet substantia, seclusa quantitate, non esset ita necessaria, seu coniuncta cum impenetrabilitate, quod naturaliter non posset esse sine tali extensione; seu cum actuali penetratione, imo tam naturaliter esset substantia sine illa extensione, seu actualiter penetrata, tam secundum suas partes, quam cum quolibet alio extrinseco, quam cum tali extensione, seu actualiter impenetrata, cum quo tamen componitur, quod semper naturaliter exigit extensionem in ordine ad locum cum impenetrabilitate, eo quod naturaliter exigit quantitatem.

24 Arg. contra; substantia, ablata quantitate, non habet partes impenetrabiles: ergo neque extensas in ordine ad locum. Patet consequentia; quia partes extensæ in ordine ad locum resistunt penetrationi: sed hoc est, esse impenetrabiles: ergo si substantia non habet partes impenetrabiles, non habet partes extensas in ordine ad locum. Prob. mai. quia partes extensæ in ordine ad locum, sunt partes non se totis unitæ, sed unitæ secundum extremitates: sed partes unitæ, secundum extremitates, resistunt penetrationi: ergo partes extensæ in ordine ad locum, resistunt penetrationi. Prob. min. partes unitæ, secundum extremitates, habent impedimentum, ut una pars sit intra aliam, scilicet, extremitates, nam extremitas est id, quo una pars expellit aliam a proprio loco: ergo partes unitæ secundum extremitates resistunt penetrationi.

25 Respond. neg. consequ. & maiorem prob. & minorem syllogismi, quo probatur, & similiter negando maiorem probationis prædictæ minoris; & distinguendo probationem illius ibi inclusam; extremitas est id, quo una pars expellit aliam a proprio loco, absolute loquendo, concedo; necessario, & neg.

con.

consequ. Etenim, verum est, partes substantiæ uniti inter se secundum extremitates, mediis indivisibilibus, ad modum, quo uniuntur inter se partes quantitatis; ideoque dicimus, posse esse extensas in ordine ad locum partes substantiæ, sicut sunt extensæ partes quantitatis, & certum est, quod in tali hypothese, prædictæ partes substantiæ non essent actualiter penetratæ, sed una extra aliam in ordine ad locum, eo quod tunc tantum secundum extremitates se ad invicem tangerent; propter quod dicimus, quod absolute loquendo, extremitas est id, quo una pars expellit aliam a proprio loco, id est, semper quod partes tantum secundum extremitates ad invicem se tangunt, sunt extensæ in ordine ad locum, id est una extra aliam, & sic actualiter impenetratæ; cum tamen, tam partes substantiæ, quam extremitates illarum, & indivisibilia, quibus uniuntur, non sint impenetrabilia, imo naturaliter penetrabilia, non indigent, seu exigunt necessario prædictæ partes esse ita extensæ, & impenetratæ, imò tam naturale est illis penetratio actualis, quam actualis extensio in ordine ad locum, seu actualis impenetratio; ideoque dicimus; quod extremitates, ratione quarum aliqua uniuntur, non necessario sunt rationes expellendi unam partem ab alia a proprio loco, nam bene componitur, quod partes sint unitæ secundum extremitates, & ratione istius unionis tantum secundum extremitates se tangerent ad invicem, & quod simul sint penetratæ, & totaliter se tangerent ratione penetrationis; ut contingit in partibus quantitatis penetratis inter se, quæ ratione penetrationis, totaliter se tangunt, & cum non amittant unionem, quam antea habebant, scilicet secundum extremitates, ratione illius tantum secundum extremitates se tangunt.

¶ *Verfatur autem hoc discrimen inter partes*

tes substantiæ, & partes quantitatis, scilicet, quod partibus substantiæ, tam naturale est se tangere secundum extremitates ratione unionis quam se tangere totaliter ratione penetrationis, partibus verò quantitatis, solum est naturale, se tangere secundum extremitates ratione unionis; at verò, se tangere totaliter ratione penetrationis, est illis supernaturale, eo quod naturaliter exigunt determinatè tantum uniri secundum extremitates, & idem est, hoc determinatè exigere, ac determinatè exigere extraneitatem partis a parte in ordine ad locum, quæ exigentia est impenetrabilitas, ideoque actualis penetratio est illis supernaturalis: partes autem substantiæ non exigunt determinatè prædictam extensionem in ordine ad locum, seu extraneitatem partis a parte, sed sunt indifferentes ad talem extensionem, & ad oppositum illius, scilicet ad actualem penetrationem, licet ut alibi dictum est, exigant naturaliter quantitatem, ratione cuius fiant impenetrabiles, & exigant determinatè solam unionem secundum extraneitates, & consequenter extraneitatem partis a parte, seu extensionem in ordine ad locum. Ex quibus facile cognoscitur, quomodo partes substantiæ uniantur secundum extremitates, absque eo quod prædictæ extremitates sint necessariò rationes expellendi unam partem a loco alterius, & quomodo extremitates, secundum quas uniantur partes quantitatis, sint rationes necessariò expellendi unam partem a loco alterius.

27 Arg. 2. Si substantia haberet partes extensas in ordine ad locum, esset divisibilis: hæc est proprietas quantitatis: ergo substantia non habet partes extensas in ordine ad locum. Communiter respondetur, quod tunc substantia esset divisibilis actione supernaturali: non autem actione naturali, seu per virtutem agentis naturalis, & in hoc secundo sensu divisibilitas



tas est dāssio quantitatis, non vero in primo: Licet autem sufficiat hæc responsio, tamen consequenter ad dicta potest responderi disting. mai. substantia esset divisibilis necessario, ita ut naturaliter nequeat esse non divisibilis, nego; esset divisibilis non necessario, concedo. Etenim, verum est, quod substantia, in tali hypothesis, esset aliquomodo divisibilis ratione illius extensionis; tamen cum ut dictum est, possit naturaliter esse sine tali extensione, seu penetrata secundum suas partes, & ut sic, esse modo non divisibili, hinc est, quod non necessario haberet divisibilitatem, sicut non necessario haberet talem extensionem; proprietas autem quantitatis est, naturaliter habere necessario talem divisibilitatem, unde substantia non haberet proprietatem quantitatis. Eodem modo respondetur ad alia argumenta, scilicet, quod substantia haberet situm, æqualitatem, & inæqualitatem; nam licet hæc omnia haberet substantia, hoc tamen non esset necessitate naturali ut illa habet quantitas.

28 Dicimus 5. Probabile est, substantiam materiale non posse habere partes extensas in ordine ad locum, seclusa quantitate. Hoc videtur insinuare Scotus loco citato numer. 21. huius quæstionis, & in 4. dist. 49. quæst. 16. ubi dicit, quod ratio situs sumitur à quantitate: sed si substantia, seclusa quantitate, haberet partes extensas in ordine ad locum, non posset ei situs denegari: ergo jam ratio situs non desumeretur à quantitate.

29 Deinde probatur ratione; quia sicut se habet albedo, v. gr. in ratione dealbandi, sic se habet quantitas in ratione extendendi substantiam in ordine ad locum: sed impossibile est, subiectum esse album sine albedine: ergo etiam est impossibile, substantiam esse extensam in ordine ad locum sine quantitate.

30 Unde dici potest, quod substantia seclusa quantitate esset in loco quodammodo peculiari: nam non esset in loco circumscriptivè, ita ut tota substantia corresponderet toti loco, & pars substantiæ parti loci, nam hoc dicit extensionem partium in ordine ad locum, quam supponimus non habere sine quantitate, neque esset in loco, sicut esset aliquod positivum indivisibile, nam hoc nullas habet partes, ut supponimus habere substantiam: sed tantum esset in loco inextensa, & indivisibilis negativè, id est, non extensa, & divisibilis, eo quod deficeret illi quantitas, quæ est forma ipsam substantiam extensam, & divisibilem constituens, sicut si à subiecto auferretur albedo, diceretur negativè non album, eo quod deficeret albedo, quæ est forma ipsum subiectum album constituens & sicut si auferretur frigiditas ab aqua sine introductione caloris, diceretur negativè non frigida, eo quod deficeret frigiditas, quæ est forma aquam frigidam constituens.

31 Advertendum tamen est, quod sicut aquæ est naturalis frigiditas, prout naturale opponitur violento, & sic sine frigiditate diceretur aqua violenta, seu esse in statu violento, saltem negativè; sic quantitas, ratione cuius convenit substantiæ extensio in ordine ad locum, potest dici naturalis ipsi substantiæ, prout naturale aliquomodo opponitur supernaturali, & sic sine quantitate, & sine extensione in ordine ad locum, posset dici substantia esse in statu supernaturali; unde sicut de aqua, in tali statu violento, non posset inquiri, quomodo esset naturaliter? Prout naturale opponitur violento? Quia tunc nullatenus esset naturaliter; ita similiter de substantia in statu separationis à quantitate, non posset inquiri, quomodo esset in loco naturaliter, prout esse in loco naturaliter, opponitur esse in loco supernaturaliter? Quia tunc nullatenus esset in loco na-

*turaliter*, & sic videtur inquisitio falsæ suppositionis. Utraque conclusio est probabilis, & sic quælibet potest defendi, & ex dictis in ista, potest responderi ad rationes antecedentis.

## QUÆSTIO IV.

### *Quomodo quantitas dividatur?*

1 **A**rist. in hoc capite adducit duas divisiones quantitatis. Prima est in continuam, & discretam, quantitas continua dicitur illa, cuius partes copulantur termino communi, ut linea, quæ copulatur punctis, quæ sunt indivisibilia versus omnem dimensionem, & superficies, cuius partes copulantur lineis, quæ licet sint divisibiles versus longitudinem, sunt tamen indivisibiles versus latitudinem, & profunditatem, & corpus cuius partes copulantur superficiebus, quæ licet sint divisibiles versus longitudinem, & latitudinem, sunt tamen indivisibiles versus profunditatem. Quantitas discreta est illa, cuius partes non copulantur termino communi, ut numerus.

2 Secunda divisio quantitatis est in eam, quæ habet partes cum positione situati, ita ut una sit sursum, altera deorsum, una dextera, altera sinistra, &c. quod contingit in linea, superficie corpore, & loco, & in eam, quæ non habet talem positionem, quod contingit in tempore, numero, & oratione.

3 Alia divisio quantitatis in communi deducitur ex pluribus locis Arist. ut patebit in Physica, scilicet in successivam, & permanentem. Quantitas permanens est illa, cuius partes sunt simul in aliquo tempore, ut linea, superficies, corpus, locus, & numerus. Quantitas successiva est illa, cuius partes non sunt simul

in

in aliqua duratione, sed successivè fluunt, ut tempus, & oratio. Hæ sunt divisiones quantitatis in communi.

4 Circa primam divisionem notandum est, quod non est infima, sed subalterna, nam subdividitur quantitas continua in lineam, superficiem, corpus, tempus, & locum. Similiter subdividitur quantitas discreta in numerum, & orationem.

5 Circa secundam divisionem etiam est notandum primo, quod non est infima, sed subalterna; nam quantitas, quæ habet partes cum positione situâli, subdividitur in lineam, superficiem, corpus, & locum. Similiter quantitas, quæ non habet positionem situalem, subdividitur in tempus, numerum, & orationem. Secundò notandum est, quod quantitas, ut dicatur habere positionem situalem partium, requirit duas conditiones. Prima est, quod sit continua, defectu cuius, numerus, & oratio non dicuntur habere talem positionem. Secunda est, quod sit permanens, defectu cuius, tempus non dicitur habere prædictam positionem. Hæc omnia sunt communia, & solum est difficultas, & controversia inter Authores circa qualitatem prædictarum divisionum. Pro qua sit.

## Q U Æ S T I O V.

*Quales sint divisiones quantitatis?*

1 **U**T certa ab incertis separemus, & ne quæ communia sunt, ad controversiam reducamus, supponendum est primò, divisionem quantitatis in eam, quæ habet partes cum positione situâli, & quæ non habet partes cum tali positione, posse dupliciter intelligi. Primo, ita ut talis positio sumatur formaliter, in quo sensu pertinet ad prædicamentum

*situs*, ut suo loco dicetur, & fictalis positio est accidens respectu quantitatis, & conveniunt omnes, prædictam divisionem esse subiecti in accidentia. Secundò, ita ut talis positio sumatur fundamentaliter, scilicet, pro capacitate, quam habet quantitas, ut partes ejus taliter disponantur, seu ad fundandam relationem situs; in quo sensu est ferè communis consensus, prædictam divisionem esse generis in species per differentias materiales, sicut quando dividitur corpus in corruptibile, & in incorruptibile per materiales differentias, quod insinuat Scotus q. 17. prædicamentali.

2. Supponendum est secundò, divisionem quantitatis in successivam, & permanentem esse generis in species etiam per differentias materiales; quod expressè tenet Scotus in 2. dist. 2. quæst. 4. §. *Contra conclusionem, vers. Quod dicitur*, ante litt. A. Circa quod ferè nemo est, qui dissentiat. Unde solum remanet difficultas circa divisionem quantitatis in continuam, & discretam, & circa huius divisionis subdivisiones. Pro quibus, claritatis gratia, fit.

## S E C T I O I.

*Qualis sit divisio quantitatis in continuam, & discretam?*

**D**icimus: divisio quantitatis in continuam, & discretam est generis in species. Pro hac conclusione stat major pars Philosophorum, licet plures, & non parvi momenti, oppositum acerrimè defendant. Prob. tamen, quia illa dicitur divisio generis in species in qua divisum est talis naturæ, quod prædicetur in eo quod quid, ut pars essentiae, de membris dividendis; sic prædicatur quantitas in communi de quantitate continua, & discreta: ergo

ergo talis divisio est generis in species. Probat. min. quia ratio quantitatis est de essentia, tam quantitatis continuæ, quam discretæ, deinde non dicit totam essentiam illarum, nam differunt inter se essentialiter per rationem continuationis, & discretionis: ergo ratio quantitatis prædicatur in eo quod quid de continua, & discreta, ut pars essentiae.

4 Arg. 1. Nequit una species fieri ex alia: quantitas discreta fit ex continua: ergo non sunt diversæ species quantitatis. Respond. dist. mai. una species non fit ex alia formaliter sumpta, concedo; non fit ex alia materialiter sumpta, nego. Similiter disting. minor. & neg. consequ. Ex materia enim ligni fit ignis, licet non fiat ex forma ligni.

5 Argum. 2. Una species non est prior alia: quantitas continua est prior quantitate discreta cum hæc fiat ex illa: ergo non sunt diversæ species. Resp. disting. maior. una species non est prior alia in essendo, nego; in participando genus, concedo. Disting. etiam minor. quantitas continua est prior quantitate discreta in essendo, admitto: in participando genus, scilicet, rationem communem quantitatis, nego, & nego consequ.

6 Argum. 3. Una species non prædicatur de alia: quantitas discreta prædicatur de continua, nam hæc est bona prædicatio: *Corpora sunt tria, vel quatuor, &c.* ergo quantitas continua, & discreta non sunt species diversæ. Resp. dist. mai. una species non prædicatur de alia essentialiter, & quidditative, concedo; accidentaliter, & denominative, nego. In hoc secundo sensu est vera minor: falsa autem in primo, unde nego consequ.

7 Arg. 4. Species quantitatis debet esse unum per se: sed quantitas discreta non est unum per se: ergo quantitas discreta non est species quantitatis. prob. min. quia si daretur aliqua

*species* quantitatis discretæ, maxime numerus: sed numerus non est unum per se: ergo quantitas discreta non est unum per se. Minor, in qua est tota difficultas sectionis, prob. primo ex Arist. 3. *Physic.* cap. 7. ubi dicit, numerum esse plures unitates, & 8. *Met.* cap. 3. ubi dicit, numerum non esse unum; sed sicut cumulum. Secundo probat. eadem min. ratione; nam ex pluribus entibus in actu, quorum unum non se habet, ut per se actus, & aliud, ut per se potentia, nequit fieri unum per se, sed numerus constat pluribus entibus in actu, quorum unum non se habet, ut per se actus, & aliud ut per se potentia, scilicet pluribus unitatibus; nam non est maior ratio, cur una sit potius per se actus, & alia per se potentia, quam è contra: ergo numerus non est unum per se. Confirmatur; quia unum per se dicit unionem partium: sed partes numeri non sunt unitæ, imò necessario sunt non unitæ, seu discretæ: ergo numerus non est unum per se.

8 Ad huius argumenti solutionem, necessario debet examinari, an numerus sit unum per se? Et quomodo? Et circa primum, maior pars Philosophorum tenet, numerum esse unum per se; pro quo citatur Scotus in *Met.* lib. 8. text. 10. & lib. 5. quæst. 9. & in 3. dist. 22. §. *Ad primum argumentum, vers. Modo ad propositum*, litt. L. ubi dicit: *Nec quinarium est unitates quinque; sed est illud totum quod resultat ex quinque unitatibus, aliter si esset illa quinque unitates, esset unum sicut acervus.* Deinde, probatur, ratione, quia obiectum scientiæ est unum per se, numerus est obiectum Arithmetici: ergo est unum per se.

9 Quoad secundum verò aliqui dicunt, ideo numerum esse unum per se; quia licet pro materiali, & denominato dicat unitates quantitativas separatas; pro formali tamen, & pro per se significato dicit ordinem prioris, & postea.

terioris, prædictis unitatibus per intellectum numerantem attributum. Sed licet hoc verum sit; quia sicut intellectus dicitur numerus numerans, sic unitates, ut dispositæ per intellectum in ratione prioris, & posterioris, dicuntur numerus numeratus, & ut sic pro formali dicunt unum per se; tamen hoc non est ad intentum, quia ut sic certum est, numerum esse denominationem extrinsecam provenientem ab actu intellectus, & sic non unum per se reale, in quo sensu loquimur in præsentī, sed tantum unum per se rationis, quod non collocatur in prædicamento.

10 Alii dicunt, ideo numerum esse unum per se, quia priores unitates se habent tanquam materia, seu potentia per se, & ultima tanquam forma, & per se actus. Sed neque hic modus constituendi numerum unum per se videtur satisfacere, nam contra est: quia vel priores unitates dicuntur quasi materia, & potentia, & ultima quasi forma, & actus, quatenus sunt unitates, vel quatenus sunt priores, & posteriores? Sed neutrum potest esse: ergo non bene explicatur hoc modo unitas per se numeri. Prob. min. quia non primum: nam unitates, ut unitates, sunt ejusdem rationis: ergo non apparet ratio, cur aliqua dicantur quasi materiam, & potentia, & aliqua dicatur quasi forma, & actus quàm è contra. Neque secundum, quia ratio prioris, & posterioris in prædictis unitatibus provenit ab intellectu numerante, & tantum est, ut supra diximus, quædam denominatio extrinseca rationis: ergo prædictæ unitates ex parte rei non se habent, ut actus, & potentia, in ratione prioris, & posterioris.

11 Dicendum ergo videtur, ideò numerum esse unum per se, quia etiam si pro materiali, & denominato dicat unitates separatas, & consequenter, ut sic unum per se non constituen-



res, tamen pro formali, & pro per se significato dicit discretionem prædictarum unitatum, quæ est forma, ratione cujus prædictæ unitates sunt numerabiles, quæ discretio convenit unitatibus à parte rei, & est forma per se una composita ex genere, & differentia; sicut albedo, quam pro formali dicit hoc concretum *album*, & similiter formæ aliorum concretorum accidentalium.

12 Nunc respond. ad argumentum positum numer. 7. neg. min. & min. prob. & ad illius primam prob. quæ desumpta est ex Arist. dicimus, ipsum loqui de numero sumpto pro materiali; scilicet, pro unitatibus separatis præcisè; non verò pro formali, & per se significato; id est prout dicit rationem formalem discretionis, quæ ut dictum est, est per se una. Ad secundam prob. min. & similiter ad confirm. resp. tantum esse, contra illos, quia asserunt, numerum esse unum per se, sumptum pro materiali, seu ratione unitatum se habentium, ut actus, & potentia, seu quasi materia, & forma; non autem contra nos, quia talem modum dicendi non admittimus; sed tantum dicimus, numerum sumptum pro formali, & per se significato, esse unum per se. Alia de numero dicuntur sectione 3.

## S E C T I O II.

### *De divisione quantitatis continua.*

13 **I**Am diximus num. 1. quæst. antec. lineam esse extensam secundum longitudinem, & continuari punctis; superficiem esse extensam secundum latitudinem, & continuari lineis, & corpus esse extensum secundum profunditatem, & continuari superficiebus: ex quo sequitur, quòd linea tantum includit unam di-

dimensionem, scilicet longitudinem, & sic esse indivisibilem versus latitudinem, & profunditatem; superficies verò includit duas dimensiones, unam pro formali, scilicet latitudinem, & alteram præsuppositivè, scilicet longitudinem; & sic esse indivisibilem versus profunditatem; corpus autem includit tres dimensiones, unam pro formali, scilicet, profunditatem, & duas præsuppositivè, scilicet latitudinem, & longitudinem, & sic nullatenus esse indivisibile. Unde, sic communiter definitur linea: *Est quantitas continuata punctis*. Sic verò superficies: *Est quantitas continua lineis*. Sic autem corpus; *Est quantitas continuata superficiebus*. Nunc.

14 Dicimus: divisio quantitatis continuæ in lineam, superficiem, & corpus, est generis in species. Conclusio est communior consensu Philosophorum, quam tenet Scotus quæst. 20. prædicamentali. Probatur; quia illa divisio est generis in species, in qua divisum prædicatur *in quid* de membris dividendis, & illa inter se essentialiter differunt: sed ratio quantitatis continuæ prædicatur *in quid* de tribus supradictis, & illa inter se essentialiter differunt: ergo prædicta divisio est generis in species. Prob. prima pars minoris; quia ratio quantitatis continuæ est, habere partes copulatas, & occupativas loci, seu impenetrabiles: sed hæc ratio convenit essentialiter lineæ superficiæ & corpori; ergo prædicatur de illis *in quid*. Porro 2. pars minoris; quia extensio lineæ est versus longitudinem; extensio superficiæ versus latitudinem; & extensio corporis versus profunditatem; hæ sunt diversæ essentialiter extensiones; ergo linea, superficies, & corpus differunt essentialiter in ratione quantitatis; & consequenter prædicta divisio est generis in species.

15 Confirmatur, quia ubi est diversa es-

essentialiter continuatio; est diversa essentialiter ratio quantitatis continuæ: sed in linea, superficie, & corpore est diversa essentialiter continuatio: ergo est diversa essentialiter ratio quantitatis continuæ. Minor patet, quia rationes continuativæ, scilicet punctum, linea, & superficies, sunt essentialiter diversæ: ergo in linea, superficie, & corpore est diversa essentialiter continuatio.

16 Arg. 1. Nequit una species ordinari ad aliam constituendam, neque in illa includi: sed linea, & superficies ordinantur ad componendum corpus, & in illo includuntur: ergo linea, & superficies non sunt species quantitatis à corpore distinctæ. Resp. disting. ma: una species non ordinatur ad componendum aliam, sumpta secundum suam rationem formalem, concedo; materialiter, nego. Similiter disting. min. linea, & superficies ordinantur ad componendum corpus, sumptæ materialiter, concedo; formaliter, nego, & neg. conseq. Idem dicendum est de inclusione. Aliis terminis potest distingui minor argumenti, linea, & superficies ordinantur ad componendum corpus, ut sunt indivisibiles, concedo; ut fictamen non sunt species quantitatis, sed indivisibilia copulativa partium ordinantur, ut sunt divisibile, nego, in quo sensu sunt species quantitatis.

17 Arg. contra, linea, & superficies dependent à corpore in suo esse: ergo in suo esse, ordinantur ad componendum corpus. Resp. disting. antec. linea, & superficies dependent à corpore in suo esse existentiali, seu physico, admitto; in suo esse metaphysico, seu in participando rationem quantitatis continuæ, nego, & nego conseq. Verum est, quod linea nequit existere sine superficie, nec superficies sine corpore, & sic aliquomodo in suo esse dependent à corpore; sed hoc non obstat, ut quæ-

libet sit vera species quantitatis: nam quælibet secundum suam dimensionem verè participat rationem quantitatis: quod aliquomodo etiam contingit in ipso corpore, quod necessariò debet habere lineas, & superficies, ita ut de potentia Dei absoluta nequeat esse sine illis, & hoc non obstat ad hoc ut sit, secundum suam dimensionem, vera species quantitatis.

18 Dices adhuc, si linea, & superficies non pertinent formaliter ad rationem corporis; ergo corpus per potentiam Dei absolutam poterit esse sine illis; sed hoc est impossibile; ergo ideò est, quia linea, & superficies formaliter pertinent ad rationem corporis. Respond. neg. consequent. ad hoc enim, quod corpus nequeat esse, adhuc de potentia Dei absoluta, sine linea, & superficie, non requiritur, quod secundum suas rationes formales pertineant ad corpus, sed sufficit, quod aliquomodo ad constitutionem illius sint necessariæ: cum enim corpus sit quoddam continuum, necessariò partes illius debent esse unitæ, mediis divisibilibus, quæ quidem indivisibilia sunt superficies, & sic sunt necessariæ ad constitutionem corporis, non ut extensæ versus latitudinem, in quo sensu sunt species quantitatis, & tantum materialiter includuntur in corpore; sed quatenus sunt inextensæ, seu indivisibiles versus profunditatem. Idem dicendum est suo modo de lineis, respectu superficiei.

19 Argum. 2. Quantitas est impenetrabilis; sed linea, & superficies non sunt impenetrabiles: ergo non sunt species quantitatis. Prob. minor, quia si super unum corpus perfectè planum ponatur aliud æquale, ultima superficies unius tangeret omnes partes superficiei alterius; sed hoc est penetrari; ergo superficies non est impenetrabilis. Idem potest dici de li-

*nea.* Communiter respondetur neg. minor. & min. prob. non enim sufficit ad penetrationem, quod partes unius quantitatis tangant omnes partes alterius, nam hoc potest contingere per contiguitatem, ut in exemplo posito; sed amplius est necessarium, quod partes unius, & alterius quantitatis sint simul in eodem loco, quod non contingit in exemplo, cum una ex prædictis superficiebus sit locus alterius, quod amplius patebit ex dicendis in Physica.

20 Dices; eo præcisè, quod duo corpora se tangant secundum omnes suas partes, dicuntur esse penetrata; ergo similiter superficies. Resp. neg. conseq. quia licet verum sit, quod quando duo corpora se tangunt secundum omnes suas partes, sint & dicantur penetrata; hoc tamen, contingit quando se tangunt superficies modo supradicto; cujus ratio est, quia cum corpus sit extensum, & divisibile, secundum omnem dimensionem, necessariò se tangunt, ut extensa, duo corpora, & sic datur intromissio unius corporis in aliud circa idem spatium, quod propriè est penetratio; at verò, cum superficies nullam habeant extensionem versus profunditatem, circa quam sit contactus corporum in exemplo posito, nulla datur penetratio inter ipsas superficies.

21 Aliter resp ad arg. disting. minor. superficies non sunt impenetrabiles, ut extensæ sunt, nego, ut indivisibiles sunt, admitt o, & neg. conseq. nam solum superficies, ut extensa, est species quantitatis, non verò ut indivisibilis; unde non obstat, ut sit species quantitatis, quod non sit impenetrabilis, ut indivisibilis est, & sufficit, quod sit impenetrabilis, ut extensa est. Idem similiter dicendum est de linea.

Dubia incidentia .

22 Dubitabis 1. An prædictæ species quantitatis sint ipsimæ, vel subalternæ? Resp. esse species infimas, patet quia licet corpus dividatur in planum, & rotundum, &c. superficies in concavam, & convexam, & linea in rectam, & obliquam, hæ divisiones tantum sunt accidentales, ut ex se patet, & nullæ aliæ assignantur; ergo corpus, superficies, linea sunt species infimæ quantitatis continuæ.

23 Dubitabis 2. An locus sit species quantitatis distincta à superficie? Resolutio hujus dubii pendet ex dicendis de loco in Physica, nunc breviter resp. negativè. Probatur, quia locus pro materiali dicit superficiem continentem; pro formali verò, rationem continentiam, quæ non ad prædicamentum quantitatis, sed ad prædicamentum *ubi* pertinet; ergo locus nihil addit supra superficiem, quod pertineat ad prædicamentum quantitatis.

24 Dubitabis 3. An motus sit species quantitatis continuæ? Pro responsione nota ex dicendis in Physica, motum pro materiali dicere ipsam formam, quæ acquiritur, seu produetur per motum, ut est in fieri, & in esse imperfecto, tendens in suam perfectionem, pro formali autem dicere ipsum fluxum, à quo forma, quæ fluit, quandiu est in fieri, fluens denominatur, qui fluxus nihil aliud est, quam illa mora seu duratio successiva, quæ in fieri talis formæ consumitur. Nunc

25 Resp. motum pro materiali non esse speciem quantitatis continuæ, benè tamen pro formali. Prima pars patet, nam motus pro materiali est forma, quæ fit, sed talis forma, vel potest esse accidens, vel substantia; ergo motus pro materiali non est species quantitatis continuæ. Probatur secunda pars, illud dicitur

spe-

*species* quantitatis continuæ, quod per se habet partes exigentes diversum spatium, seu impenetrabiles in ordine ad aliquod spatium, & copulatas termino communi; sed motus sumptus pro formali habet partes exigentes diversum spatium durationis, & impenetrabiles in ordine ad tale spatium, scilicet partiales fluxus, seu moras successivas copulatas terminis communibus, qui sunt quædam indivisibilia, quæ dicuntur *mutata* esse: ergo motus sumptus pro formali est *species* quantitatis continuæ. Jam diximus, divisionem quantitatis in successivam, & permanentem esse per differentias específicas materiales, quod hic debet applicari, ne aliqua oriatur æqui vocatio.

26 Dubitabis 4. An tempus sit *species* quantitatis continuæ distincta à motu? Idem dicendum est ad hoc dubium, quod in simili dictum est ad secundum, nam tempus pro materiali dicit motum; & pro formali rationem mensuræ, quæ non ad prædicamentum quantitatis, sed ad prædicamentum *quando* pertinet; ergo dicendum est, tempus non esse *speciem* quantitatis continuæ distinctam à motu. Intelligentia hujus dubii, & duorum prædicamentum multum pendet ex dicendis in *Physica*, & etiam solutio argumentorum, nam principiis physicis inniuntur, & principiis physicis respondetur ad illa.

### S E C T I O III.

#### *De divisione quantitatis discreta.*

27 **D**ivisio quantitatis discretæ est in numerum, & orationem, & ut cognoscatur, qualis sit? Prius examinandum est, an numerus, & oratio sint *species* quantitatis discretæ: Pro cujus decisione recolenda sunt, quæ diximus de numero sectione 1.

28 Deinde notandum est, orationem in præ-  
senti sumi pro quacumque voce articulata plu-  
ribus syllabis constituta, sive sit significativa,  
sive non, sive proferatur ore, sive quocumque  
alio instrumento. In oratione autem hoc modo  
sumpta plura inveniuntur. Primò plures sylla-  
bæ, seu soni. Secundò motus, seu prolationes  
syllabarum, qui motus sunt discontinui aliqua  
quiete, quæ propter parvitatem ejus, pluries  
est imperceptibilis sensibus. Tertiò plures du-  
rationes etiam discontinuæ, quibus mensuran-  
tur prædicti motus, quæ licet aliquæ sint lon-  
giores aliis, juxta exigentiam syllabarum, omnes  
tamen ita sunt parvæ, ut propter suam parvita-  
tem morulæ nuncupentur. Quartò armonia,  
seu sonoritas quædam, ratione cujus omnes syl-  
labæ, & omnes motus, & morulæ coordinantur  
ad artificiosè orationem componendam.

29 Ex quo deducitur, quòd sicut numerus  
formaliter sumptus est quoddam concretum di-  
cens pro formali denominationem extrinsecam  
provenientem ab intellectu numerante, & pro  
materiali unitates discretas, ita oratio formali-  
ter sumpta est quoddam concretum dicens pro  
formali armoniam, sonoritatem, seu concen-  
tum, & pro materiali syllabas, seu motus dis-  
continuos. Similiter, sicut numerus, sumptus  
pro materiali, est etiam quoddam concretum  
dicens pro formali discretionem unitatum, &  
pro materiali ipsas unitates, ita oratio, sumpta  
pro materiali, est quoddam concretum dicens  
pro formali discretionem motuum, seu syllaba-  
rum, & pro materiali ipso motus, seu syllabas.  
His suppositis.

30 Dicimus, Numerus, & oratio, si suman-  
tur formaliter, non sunt species quantitatis dis-  
cretæ. Hæc conclusio in terminis, & in re est  
communis, licet sic non proponatur. De nume-  
ro patet, quia pro formali dicit denominatio-  
nem extrinsecam proveniente ab actu intelle-  
ctus,



ctus, quæ nullatenus pertinet ad prædicamentum quantitatis. Similiter patet de oratione, quia armonia; quam dicit pro formali, non apparet quomodo ad prædicamentum quantitatis pertineat, cum tantum sit quidam modus, quasi resultans ex tali, vel tali dispositione syllabarum, quæ inter se ordinantur, vel ab arte, vel à natura; qui ordo potius est respectus, quàm aliquod absolutum: ergo numerus, & oratio, si formaliter sumantur, non sunt species quantitatis discretæ.

31 Dicimus 2. Numerus, & oratio, si sumantur materialiter, sunt species quantitatis discretæ. De numero pater, quia habet partes exigentes occupare diversum spatium discretum loci, seu partes impenetrabiles in ordine ad spatium discretum loci: ergo numerus in hoc sensu est species quantitatis discretæ. De oratione probatur similiter, quia habet partes, scilicet syllabas discretas exigentes occupare diversum spatium discretum durationis, seu partes impenetrabiles in ordine ad spatium durationis discretum: ergo oratio in hoc sensu est species quantitatis discretæ. Neque obstat, quòd tam numerus, quàm oratio habeant partes non se habentes ut actus, & potentia per se, & non unitas, nam hoc se habet pro materiali, tamen per se dicunt rationem discretionis, quæ est unum quid reale per se. Videantur quæ diximus loquendo de numero sectione 1.

32 Dicimus 3. Numerus, & oratio non differunt in ratione quantitatis discretæ per differentias formales, sed tantum per differentias materiales. Probatur, quia numerus, & oratio conveniunt in habere partes discretas, & differunt in hoc, quod partes numeri sunt ordinabiles per intellectum in ratione prioris, & posterioris, & partes orationis dicunt ordinem ad concentum, & armoniam, quod per addens

cidens se habet ad rationem quantitatis, & solum provenit à materia partium: ergo non differunt formaliter, sed tantum materialiter.

33 Deinde numerus, & oratio etiam differunt in eo, quod partes numeri sunt permanentes, (licet etiam possint esse successivæ; nam partes orationis etiam sunt numerabiles) & partes orationis sunt successivæ: sed permanentes, & successivum sunt differentia materiales quantitatis, licet intrinsicæ: ergo numerus, & oratio materialiter differunt in ratione quantitatis.

34 Ex quibus facile deducitur, quid sit respondendum ad difficultatem: dicimus ergo 4. in ordine: divisio quantitatis discrete potest dici generis in species per differentias específicas materiales. Patet; nam ut dictum est, differunt in ratione permanentis, & successivi, quæ sunt differentia intrinsicæ, & específicas, non formales, sed materiales quantitatis. Diximus; *potest dici*, quia non necessario numerus, & oratio differunt in ratione successivi, & permanentis, nam certum est, numerum posse habere rationem successivi, possunt enim numerari partes orationis, scilicet syllabæ, seu motus; quæ sunt successivæ.

35 Dicimus 5. Numerus est species infima quantitatis. Probatur; quia numeri tantum differunt inter se per magis, & minus, quæ ut fert commune proloquium, non varians speciem, sed tantum sunt differentia accidentales: ergo numerus est species infima quantitatis. Confirmatur à paritate, quia linea bicubita, v.g. non differt essentialiter, sed tantum accidentaliter in ratione quantitatis continuæ à tricubita, licet sint inæquales: ergo similiter dicendum est de numeris in ratione quantitatis discretæ. Idem dicendum est de oratione propter eandem rationem; nam tantum differt una  
ora -

oratio ab aliam in longitudine, & brevitate, quæ sunt accidentale differentie in ratione quantitatis.

36 Neque obstat proloquium desumptum ex Arist. scilicet: *species sunt sicut numeri*; nam hoc intelligitur ita quod sicut addito, vel ablato aliquo prædicato essentiali, variatur species, ita addita, vel ablata aliqua unitate, variatur numerus, licet non essentialiter, saltem accidentaliter: In quo tenet paritas.

37 Dubitabis, ex quibus unitatibus componatur numerus, qui pertinet ad prædicamentum quantitatis? Resp. numerum ad prædicamentum quantitatis pertinentem, constitui ex unitatibus quantitativis, v.g. tribus, vel quatuor lineis, corporibus, &c. non verò ex quibuscunque unitatibus, v.g. tribus substantiis; tribus qualitatibus, &c. Probatur, quia sicut se habet continuatio ad quantitatem continuam, ita se habet discretio ad quantitatem discretam: sed in omnium sententia, solum continuatio partium quantitatis pertinet ad prædicamentum quantitatis, non verò continuatio partium substantiæ, & qualitatis: ergo solum discretio partium quantitatis pertinet ad prædicamentum quantitatis, non verò discretio partium substantiæ & qualitatis, & cujuslibet alterius entis. Unde communiter numerus constans unitatibus quantitativis, dicitur prædicamentalis, constans autem aliis unitatibus, dicitur numerus transcendentalis, quia potest constare unitatibus cujuslibet prædicamenti, & sic per omnia prædicamenta divagari.

38 Ex dictis in tota disputatione facile deducitur coordinatio hujus prædicamenti. Etenim genus supremum est quantitas in communi, quæ dividitur per differentias formales in continuam, & discretam, & postea continua in lineam, superficiem, & corpus: Hæ tantum sunt divisiones formales quantitatis, nam ut dictum est,

est, prædictæ species, scilicet linea, superficies, & corpus, sunt infimæ. Aliæ divisiones sunt per differentias materiales, vel infimas, vel subalternas, ut patet ex dictis in tota quæstione, unde non pertinent ad coordinationem prædicamentalem, nam hæc tantum constat generibus, speciebus, & differentiis formalibus, suo autem modo, & similitudinariè, potest etiam fieri coordinatio, ratione differentiarum materialium.

## D I S P. IV.

### *De relatione tertio prædicamento.*

**S**Eptimo capite egit Arist. de prædicamento *ad aliquid*, sive relatione, non quia relatio sit perfectior qualitate, nam imo è contra evenit sed quia magis conducit ad cognitionem quantitatis, de qua egerat immediatè, & hoc videtur postulare ordo doctrinæ.

## Q U Æ S T I O I.

### *An dentur relationes reales?*

**P**RO intelligentia quæstionis notandum est, quod per relationem ut sic, nihil aliud intelligitur, nisi quidam ordo, respectus, seu habitudo unius ad aliud, sic dicitur patrem v. gr. habere respectum, ordinem, seu habitudinem ad filium, & è contra. Unde relatio in communi sic potest explicari: *est ordo, seu habitudo unius ad aliud*; quæ descriptio convenit, tam relationibus rationis, quam realibus, tam creatis, quam increatis. Hoc notato, non vertitur in dubium, an dentur relationes reales in creatæ, nam hoc ita se habere fides catholica docet in Mysterio Sanctissimæ Trinitatis. Solum autem est difficultas de relationibus creatis.

2. Dicimus; dantur relationes reales creatæ independenter ab omni consideratione intellectus. Conclusio sic proposita est ferè omnium Philosophorum contra Nominales, & alios, ex quibus aliqui dicunt, omnes relationes creatas esse rationis, alii autem esse denominationes extrinsecas. Pro hac conclusione pluribus in locis citantur utriusque scholæ Principes, & Magistri. De subtili Doctore patebit in tota disputatione. Tam accepta est jam nunc temporis nostra conclusio, ut ferè in controversiam non reducat, ideoque videtur probatione non indigere, tamen breviter aliqua fundamenta proponemus, ex quibus Authores plures rationes conficiunt.

3. Probatur igitur 1. a parte sumpta de relationibus divinis, nam ideo in divinis datur relatio paternitatis, & filiationis, quia Pater æternus verè generat filium, ut principium productivum illius: sed in creatis Pater verè generat filium, ut principium productivum illius; ergo in creatis verè, & realiter dantur relationis paternitatis, & filiationis.

4. Probatur 2. Quia unitas universi datur à parte rei, secundum Aristot. 12. Met. talis unitas consistit in ordine partium inter se, & ad primum ens, scilicet Deum: sed talis ordo est relatio: ergo realiter dantur relationes creatæ.

5. Probatur tertio; quia independenter à consideratione intellectus duæ quantitates sunt æquales, seu dicitur inter se ordinem æqualitatis, & duæ albedines ordinem similitudinis: ergo independenter à consideratione intellectus dantur prædicti ordines in creatis: sed ut dictum est, relatio nihil aliud est quam ordo, seu habitudo unius ad aliud: ergo independenter à consideratione intellectus dantur in creatis prædictæ relationes.

6 Neque valet, si dicant tales relationes non esse formas intrinsecas in rebus denominatis, sed tantum extrinsecas denominationes. Nam contra est primò, quia denominatio extrinseca provenit à forma existente in alieno subiecto ut denominatio visi in pariete provenit à forma, scilicet à visione existente in potentia visiva: sed denominatio similis in pariete albo, nequit provenire à forma existente in alieno subiecto, nam tale subiectum non assignatur, neque potest assignari: ergo provenit à forma existente in ipso pariete albo. Contra secundò, quia licet denominatio similitudinis, v.gr. in pariete albo esset extrinseca (quod non admittimus) deberet provenire à forma reali intrinsecè existente in alieno subiecto, quodcumque illud sit, sed prædicta forma realis debet esse relativa, nam denominatio relativa nequit provenire à forma absoluta: ergo necessariò dicendum est, quod datur forma realis relativa intrinsecè existens in aliquo subiecto.

7 Arg. 1. Omne ens creatum debet habere causam productivam illius: relatio non habet causam productivam illius: ergo non est ens reale. Prob. min. 1. quia, si existente aliquo albo, v.gr. producat aliud album in quacunque distantia, in albo præexistente statim datur similitudo, respectu albi de novo producti, cuius similitudinis non est causa agens de novo producens album, videtur enim impossibile, quod agens producens album Romæ, producat similitudinem in albo existente Martiti, deinde neque potest esse causa prædictæ similitudinis agens, quod prius produxerat album præexistens, potest enim contingere, quod tale agens jam non existat: sed nulla alia causa potest assignari: ergo relatio similitudinis nullam habet causam, & consequenter non est ens reale. Prob. min. ex Arist.

quis. *Physic.* ait, ad relationem non dari per se motum, & consequenter non datur causa relationis.

8 *Resp. neg. min.* Ad probationem dicimus, quod causa relationis, tam albi præexistentis, quam de novo producti, est agens de novo producens album, quod non debet intelligi de causa per se, sed tantum de causa per accidens, nam relationis tantum causa per accidens datur, non tamen causa per se, ideoque non est impossibile, quod talis relatio causetur in tanta distantia; nam approximatio solum est conditio necessaria ad per se causandum. Clarius agens, quod de novo producit album, dicitur causa per accidens relationis similitudinis, tam albi præexistentis, quam albi de novo producti, quia per se non concurrat ad prædictas relationes, sed tantum ponit unum extremum illarum, quod necessario requiritur ad resultantiam relationum, quæ resultant ex fundamento, & termino, ad quod non obstat, quod sint in maxima distantia, quia sphaera ad resultantiam relationis est totum universum, & solum requiritur, quod existant extrema, unde etiam potest dici, quod agens, quod prius produxerat album præexistens, est etiam causa per accidens prædictarum relationum, licet contingat, quod tunc non existat; nam existentia solum requiritur ad per se causandum, non autem ad causandum per accidens modo dicto. Ad *Arist.* dicimus, quod loquitur de per se motu, & de per se causa, non autem de causa per accidens. Vel quod loquitur de motu, seu actione per se terminata ad relationem, non autem de resultantia illius, posito fundamento, & termino.

9 *Arg. 2.* Positis in rerum natura duobus albis, v. gr. secluso quocumque alio, sunt prædicta alba inter se similia: ergo relatio non est aliquid reale de novo adveniens, sed tantum denominatio extrinseca desumpta à coexistentia illo.

illorum. Resp. disting. antec. in tali hypothefi illa duo alba erunt similia, &c. fundamentaliter, concedo, formaliter, nego. Formalis enim similitudo est relatio realis superaddita.

## Q U Æ S T I O II.

*Quid, & quotuplex sit relatio realis?*

**P**ro intelligentia quæstionis notandum est, quod Arist. in hoc capite divisit relativa in relativa secundum esse, & in relativa secundum dici. Relativa secundum esse dicuntur illa, quæ sunt essentialiter relativa, ita ut eorum essentia sit ad aliud se habere, seu quæ de primo conceptu dicunt relationem, ut *pater, simile, &c.* Relativa secundum dici dicuntur illa, quæ tantum accidentaliter, & denominativè sunt relativa, seu quæ de primo conceptu dicunt entitates absolutas, explicantur tamen per modum habitudinis unius ad aliud, ut *manus, caput, scientia, sensus, intellectus, &c.* nam hæc, & alia similia dicunt primariò entitates absolutas, explicantur tamen aliqua in ordine ad totum, & aliqua in ordine ad objectum. Advertit tamen Scotus qu. 13. quodlibetica, §. *Ad argumentum principale*; quod ad hoc, ut aliqua dicantur relativa secundum dici, necessarium est, quod sub eodem nomine importent absolutum primariò, & relationem secundariò, *scientia* enim, v. gr. primariò significat qualitatem absolutam, & secundariò, relationem ad objectum scibile. Unde non omnia absolute possunt dici relativa secundum dici, licet alias fundent relationem, sed tantum illa, quæ nomine non purè absoluto significantur, ut sunt supradicta, & alia similia.

2 Ex quo aliqua sequuntur. Primò, quod advertit Scotus quæst. 26. prædicamentali, scilicet, relativa secundum dici tantum æquivoce esse



esse relativa, & sic prædictam divisionem esse æquivoci in æquivocata.

3. Secundò, quod relativa secundum esse non debent confundi cum relativis realibus, neque relativa secundum dici cum relativis rationis, nam relativa secundum esse possunt esse relativa rationis, nam *genus*, v. gr. primò, & per se importat relationem rationis genere itatis, & secundò naturam denominatam, quod est proprium relativorum secundum esse. Similiter relativa secundum dici possunt esse realia, ut patet in exemplis supra positis.

4. Tertiò, quod prædicta divisio non convenit relationibus in abstracto, sed tantum in concreto, nam relatio in abstracto, vel est relatio secundum esse, vel non est relatio, ut ex se patet.

5. Deinde notandum est, quod Arist. in hoc capite sic relativa secundum esse in concreto definit; *Relativa sunt, quorum totum suum esse est referri ad aliud*. In qua definitione necessario juxta mentem Arist. debent subintelligi hæc verba; *Accidentia realia*. Patet, quia Arist. loquebatur de divisione entis realis, & de divisione accidentis, & certum est, quod prædicta definitio seclusis his verbis, convenit, tam relativis rationis, quam relativis substantialibus, ut sunt personæ Divinæ, & plura relativa transcendentalia, ut patebit ex dicendis: hoc communiter admittitur, & sic explicatur definitio. Dicitur, *accidentia realia*, in quo conveniunt relativa cum accidentibus absolutis, & differunt à relativis divinis, transcendentalibus, & rationis. Dicitur; *Quorum totum suum esse*, &c. In quo differunt relativa secundum esse à relativis secundum dici, ut patet ex supradictis. Quia tamen accidentia in concreto non collocantur in prædicamento, sed in abstracto, ideo in hac questione inquirimus, quid sit, & quomodo dividatur relatio realis in abstracto? Ut cognoscamus,

mus, quænam relationes in hoc prædicamento collocentur, & supponitur generalis divisio relationis in realem, quæ datur à parte rei independenter à consideratione intellectus, de qua loquimur in præsentì, & in relationem rationis, quæ non datur in rebus, nisi per operationem intellectus, de qua hic non agimus; quia non collocatur in prædicamento, ut suo loco diximus.

6 Dicimus 1. Relatio creata secundum esse sic potest in abstracto definiri: *est accidens reale, ratione cuius unum ordinatur ad aliud*: vel sic: *Est ordo, seu habitudo realis accidentalis inter duo extrema*. Quæ definitiones communiter admittuntur, & explicantur à simili de definitione relativorum in concreto, & si ab illis auferantur illa verba: *Accidens, accidentalis*, conveniunt relationi in communi, prout comprehendit relationem prædicamentalem, tam intrinsecus, quàm extrinsecus advenientem, & relationem transcendentalem, ut clarè patebit ex dicendis.

7 Dicimus 2. Relatio realis creata dividitur in prædicamentalem, & transcendentalem: Prædicamentalis est, quæ pertinet ad aliquod determinatum prædicamentum, ut *paternitas, similitudo, &c.* transcendentalis est, quæ non pertinet ad aliquod determinatum prædicamentum, sed divagatur per aliqua, vel per omnia prædicamenta, ut relatio dependentiæ, quam dicit creatura ad Deum. Sic communiter explicatur relatio transcendentalis, ut distincta à prædicamentali. Tamen Maffrius disput. 8. de prædicamentis quæst. 1. sic illam explicat, relatio enim, inquit, prædicamentalis est, quæ accidit fundamento, & sic ab eo est separabilis; unde per oppositum relatio transcendentalis est illa, quæ non accidit fundamento, sed est idem realiter cum illo, & sic ab eo inseparabilis. Ex quo,  
*Cursus Philos. Tom. I. Ee in.*

inquit, sequitur, quare prima relatio dicatur prædicamentalis; nam cum accidentaliter conveniat fundamento, necessario debet esse accidens alicuius generis, & prædicamenti, & similiter quare secunda relatio dicatur transcendentalis; nam cum identificetur realiter cum fundamento, quod potest esse substantia, vel accidens, pertinet reductivè ad prædicamentum illius. & sic non ad aliquod determinatum prædicamentum.

8 Dicimus 3. Relatio prædicamentalis subdividitur in relationem intrinsecus advenientem, & extrinsecus advenientem. Relatio intrinsecus adveniens est illa, quæ necessario resultat positis fundamento, & termino. Relatio extrinsecus adveniens dicitur illa, quod non necessario resultat posito fundamento, & termino, sed adhuc postulat aliquid aliud extrinsecum, ut ex fundamento, & termino resultet. *Similitudo*, v. g. dicitur relatio intrinsecus adveniens; nam positis duobus albis, ut fundamento, & termino statim resultat. *Actio* verò dicitur relatio extrinsecus adveniens, quia positis in rerum natura agente, & passio, non statim resultat, sed ulterius requiritur approximatio inter agens, & passum, tanquam conditio necessaria, ut ex illis resultet. Idem dicendum est de *passione*, *ubi*, *situ*, *quando*, & *habitu*; nam hæc omnia sunt relationes extrinsecus advenientes, ut suo loco dicemus. Hæc divisio est familiaris inter Scotistas.

9 Ubi advertendum est, quod relatio extrinsecus adveniens, solum dicitur talis propter supradicta, non autem, quia extrinsecè denominet subiectum; nam quantum ad hoc, tam intrinseca est, quam relatio intrinsecus adveniens, utraque enim intrinsecè afficit subiectum & sic intrinsecè illud denominat.

10 Dicimus 4. Relatio in communi adhuc dividitur in mutuam, & non mutuam. Mutua dici.

dicitur illa, cui in termino correspondet alia relatio, quod adhuc dupliciter potest evenire. Primo, ita ut relatio correspondens, sit eiusdem nominis, & rationis, ut relationes similitudinis inter duo alba, quæ communiter dicuntur relationes mutuae æquiparantiae. Secundo, ita ut relatio correspondens, sit diversi nominis, & rationis, ut relationes paternitates, & filiationis; actionis, & passionis, quæ dicuntur relationes mutuae disquiparantiae. Relatio non mutua dicitur illa, cui in termino non correspondet alia relatio, ut relatio scientiæ ad obiectum, quæ dicitur relatio mensurabilis ad mensuram; nam licet scientia dicat relationem ad obiectum, non tamen obiectum ad scientiam. Sed de his amplius suo loco.

11 Ex dictis facile deducitur, quod tantum, pertinet ad hoc prædicamentum relatio prædicamentalis intrinsecus adveniens, nam relationes transcendentales, ut dictum est, non pertinent ad aliquod determinatum prædicamentum, sed reducuntur ad prædicamentum sui fundamenti, & similiter relationes extrinsecus advenientes habent sua propria prædicamenta ab hoc tertio prædicamento distincta.

12 Deinde quod colligitur ex conditionibus; quæ communiter assignantur ad hoc, ut relationes in hoc prædicamento collocentur. Prima est, quod ratione fundamenti sunt finitæ, & limitatæ, per quam conditionem excluduntur relationes divinæ. Secunda est, quod sint reales, ad quod, inquit Scotus in 1. distinct. 31. §. *Ad questionem*, tria sufficiunt. Primo, quod fundamentum sit reale, & terminus realis. Secundo, quod extremorum sit distinctio realis. Tertio, quod ex natura extremorum, scilicet fundamenti, & termini, sequatur ipsa talis relatio, absque opere alterius potentiae comparantis unum extremum alteri, & ratione

huius conditionis excluduntur ab hoc prædicamento relationes rationis. Tertia conditio est, ut non possint in alio prædicamento adhuc reductivè collocari, & ratione huius conditionis excluduntur relationes transcendentales ab hoc prædicamento. Quarta denique conditio est, ut resultent posito fundamento, & termino, absque eo quod expectent aliquam conditionem, adhuc realem, ratione cuius conditiones excluduntur ab hoc prædicamento relationis extrinsecus advenientes. Nunc restat divisio relationis finitæ realis intrinsecus advenientis, quæ est genus supremum huius prædicamenti, quæ divisio commodius explicabitur quæstione sequenti.

### Q U Æ S T I O III.

#### *De relationis intrinsecus advenientis divisione.*

**P**RO intelligentia quæstionis notandum est, quod in relatione plura inveniuntur ad ipsam aliquomodo pertinentia. Primo invenitur relativum, & est extremum, quod infertur ad aliud ratione relationis, v. gr. *paries similis*. Secundo correlativum in relationibus mutuis, & est aliud extremum, v. g. *alius paries similis*. Tertio subiectum relationis, v. gr. ipse paries, in quo subiectatur *albedo*, v. gr. ratione cuius convenit parieti relatio similitudinis. Quartò fundamentum remotum, & est ratio remota propter quam aliqua referuntur, ut *albedo inherens parieti*. Quinto fundamentum proximum, & est ratio proxima fundandi relationem, qua aliqua referuntur, ut unitas, seu convenientia in albedine, quam dicunt duo parietes albi. Sexto, terminus, & est id, ad quod aliquid refertur, seu terminatur, ut paries albus, ad quem refertur alter paries albus,

bus, ex quibus licet aliqua in re idem sint, habent tamen diversa nomina propter diversa munera assignata.

2 Dicimus 1. Relatio realis intrinsecus adveni-  
ens dividitur in tria genera, seu in tres species subalternas, quas enumeravit Aristot. 5. Met. cap. 15. assumens divisionem ex parte fundamenti: nam cum relatio sit minutissima entitas, facilius cognoscitur in fundamento, quam in se ipsa. Relationes primi generis sunt, quæ fundantur in unitate, & numero, relationes secundi generis sunt, quæ fundantur in actione, & passione, tertii verò generis sunt, quæ fundantur in mensura, & mensurabili. Suffici-  
entia hujus divisionis patet ex eò quòd non potest assignari aliud fundamentum relationis intrinsecus advenientis. Nunc restat, prædictas relationes cum suis divisionibus sigillatim explicare, quod claritatis gratia, per sequentes sectiones intendemus.

## S E C T I O I.

### *De relationibus primi generis.*

3 **N**Otandum est, quod cum Aristot. dicit, relationes primi generis fundari in unitate, & numero, pro unitate non intelligitur unitas numerica, nec pro numero multitudo numerica, sed intelligitur pro unitate, convenientia extremorum, in aliqua ratione, & pro numero, disconvenientia in tali ratione, ita ut illa extrema dicantur habere unitatem, quæ secundum aliquam rationem possunt unico conceptu intelligi, & illa extrema dicantur habere numerum, quæ secundum aliquam rationem nequeunt unico conceptu intelligi. Nunc.

4 Dicimus: relatio hujus generis dividitur in sex species, scilicet in relationem iden-

ritatis, quæ iuxta Arist. fundatur in unitate, seu convenientia substantiæ, ubi pro substantia intelligit essentiam cuiuscunque rei. Hoc modo dicuntur habere relationem identitatis Petrus, & Paulus, quia habent unitatem, seu convenientiam in natura specifica, & similiter duæ quantitates, duæ qualitates, & quælibet alia accidentia ejusdem speciei. In relationem diversitatis, quæ fundatur in numero, seu disconvenientia in ratione essentiali. Hoc modo dicuntur habere relationem diversitatis Petrus, & equus; quia non conveniunt in essentia specifica, & similiter duæ qualitates, quantitates, & quælibet alia accidentia diversæ speciei.

5 In relationem æqualitatis, quæ fundatur in unitate seu convenientia dimensionis quantitativæ. Hoc modo dicuntur habere relationem æqualitatis duæ lineæ palmares, & alia hujusmodi. Et in relationem inæqualitatis, quæ fundatur in numero, seu disconvenientia dimensionis quantitativæ. Hoc modo dicuntur habere relationem inæqualitatis duæ lineæ, quarum una sit palmaris, & altera bipalmaris.

6 In relationem similitudinis, quæ fundatur in unitate, seu convenientia in intensiōe qualitatis. Hoc modo dicuntur habere relationem similitudinis, duo alba ut quatuor, & his similia. Et in relationem dissimilitudinis, quæ fundatur in numero, seu disconvenientia in intensiōe qualitatis. Hoc modo dicuntur habere relationem dissimilitudinis duo alba, quorum unum habeat quatuor, alterum verò quinque gradus albedinis.

7 Ex quo sequitur, quod aliqua extrema secundum diversas rationes possunt fundare diversas relationes, duo enim alba, v. gr. fundant relationem identitatis, ratione unitatis essentialis albedinis, & fundant relationem similitudinis, ratione unitatis intensiōis gradualis ipsius albedinis. Ubi advertendum est, quod  
inter

inter album, & nigrum non datur relatio dissimilitudinis, quia hæc debet supponere unitatem specificam, tantum enim datur inter alia relatio diversitatis propter numerum, seu disconvenientiam in essentia specifica, vel identitatis propter unitatem, seu convenientiam in essentia generica. Idem dicendum est de duabus quantitibus diversæ speciei, scilicet, quod non fundant relationem inæqualitatis, sed vel relationem identitatis, vel diversitatis modo dicto.

8 Arg. 1. Relationes hujus prædicamenti sunt reales; ergo fundamentum illarum debet esse reale; sed unitas, in qua fundantur prædictæ relationes, non est realis, sed rationis; ergo prædictæ relationes non sunt reales, & consequenter non collocantur in hoc prædicamento. Resp. concesso primo enthymemate, neg. min. subsumptam. Unitas enim, in qua fundantur prædictæ relationes, est unitas formalis communis negativè, quæ ut suo loco latè dictum est, datur à parte rei independentè à consideratione.

9 Arg. 2. Relatio identitatis, & diversitatis fundatur in unitate, vel numero essentiæ; sed hoc, ut supradictum est, invenitur in quocumque prædicamento; ergo talis relatio non pertinet determinatè ad hoc prædicamentum. Patet consequentia: nam quod determinatè pertinet ad aliquod prædicamentum, nequit ad alia prædicamenta pertinere. Resp. disting. min. relatio identitatis invenitur in quolibet prædicamento, denominativè, id est, ita ut denominet eadem illa, quæ pertinent ad quælibet prædicamenta, concedo; essentialiter, seu ita ut ratio formalis talis relationis pertineat secundum suam essentiam ad quodlibet prædicamentum, nego, & nego conseq. ad cuius probationem respondetur sicut ad minorem. Videantur, quæ diximus loquendo de inhærentia.



10 Observa pro aliquibus argumentis, quod licet secundum ordinem naturæ prædictæ relationes fundentur in unitate specifica; seu generica; quia naturaliter non dantur aliquæ duo extrema, quæ participant unitatem numericam, tamen si darentur, ut possunt dari de potentia Dei absoluta, ut si eadem numero albedo poneretur in diversis subjectis, tunc prædicta subiecta dicerentur similia ratione unitatis numericæ albedinis; non enim requiritur, quod ratio fundandi relationem sit realiter distincta in extremis, sed sufficit, quod extrema sint realiter distincta, ut cum Scoti tenent omnes Scotistæ loquendo de relationibus identitatis, æqualitatis, & similitudinis inter divinas personas; quarum fundamentum non est realiter distinctum in extremis. De quo in materia de Trinitate.

## S E C T I O II.

### *De relationibus secundi generis.*

11 **D**icimus; relatio secundi generis dividitur in duas species, juxta illarum fundamenta, scilicet, in relationem causæ ad effectum, quæ fundatur in actione, seu in potentia activa, ut relatio Patris ad Filium; & in relationem effectus ad causam, quæ fundatur in passione, seu potentia passiva, ut relatio filii ad patrem. Hæc divisio communiter admittitur à Philosophis, licet aliqui intendant, contra communem consensum, non dari prædictas relationes, quorum argumenta infra videmus, & ex dicendis patebit, dari prædictas relationes ex mente Scoti. Est autem aliqua controversia, an fundamentum prædictarum relationum sit constituendum in ipsa actione, & passione? An verò in potentia activa, & passiva, ut subsunt actioni, & passioni? Pro quo.

12 Dicimus; prædictæ relationes fundantur in potentia activa, & passiva, actio verò, & passio tantum sunt conditiones necessario requisitæ ad resultantiam prædictarum relationum. Conclusio est communis inter Scotistas, quam expressè tenet Scotus in 4. dist. 5. qu. 10. §. Sed restat, Vers. Respondeo, litt. I. ubi dicit: Respondeo, fundamentum proximum est ipsa potentia generativa; non loquendo de respectu, quem de se dicit potentia, sed de isto absoluto, quod denominatur à potentia. Et dist. 13. quæst. 1. §. Ad argumenta, Vers. Ad quintum principale, litt. V. ubi dicit: Nulla relatio secundi modi fundatur super actionem, & passionem, ut dictum est libro 1. dist. 17. sed tantum super potentiam activam, & passivam, quia illæ relationes, quæ videntur fundari super actionem, & passionem non insunt, quando actio, & passio est, insunt etiam, quando actio, & passio non sunt. Hoc patet, quando enim aliquis in creaturis generat, tunc non est Pater, licet postea quando proles formata est, sicut illa proles incipit esse filius; ita incipit, qui genuit, esse pater, tamen non est aliqua eius actio, posset enim tunc, vel non esse, vel non omnino agere aliqua actione nova, præter illam primam; relatio autem non potest esse, nisi dum est fundamentum, & si sit fundamentum completum, & hoc ex utraque parte, simul erit & relatio; actiones ergo illa possunt habere se tantum ad relationes, sicut prævia dispositiones ad tales relationes: Hæc Scotus. Videant aliqui Scotistæ, quomodo negent ex mente Scoti, dari prædictas relationes? Ex quibus verbis deducitur hæc ratio pro nostra conclusionem.

14 Nequit dari relatio, quin detur fundamentum; sed transacta actione, & passione, & permanente potentia activa, & passiva, dantur prædictæ relationes: ergo fundamentum illarum constituendum est in potentia

activa, & passiva, non verò in actione, & passione, actio enim & passio tantum se habet, ut conditiones præviæ necessariò requisitæ, si enim illæ præcederent, non resultarent tales relationes.

14 Arg. contra ex Arist. in hoc capite dicente, prædictas relationes fondari in actione, & passione. Confirmatur: quia ex eo dicitur, actionem, & passionem non esse fundamenta prædictarum relationum, quia relationes manent deficientibus actione, & passione: sed similiter potest perseverare relatio paternitatis, v. g. deficiente potentia generativa in parte; nam hæc potest deperdi in senectute: ergo non est ratio, cur potius dicatur, talem potentiam esse fundamentum relationis paternitatis, quàm esse actionem. Respond. Aristot. intelligi in sensu explicato, scilicet, quòd actio, & passio sunt conditiones necessariò requisitæ ad resultantiam prædictarum relationum, non autem intelligitur de fundamento propriè dicto. Ad confirmationem resp. neg. min. nam potentia generativa est idem realiter cum patre, & sic nunquam potest deficere, illo non deficiente; solum autem potest in senectute deficere aliqua conditio requisita ad actum tali potentia.

15 Intendentes probare, non dari prædictas relationes, arguunt 1. Si aliqua esset necessitas prædictarum relationum, maximè quia transacta generatione, remanent denominationes patris, & filii, v. g. sed ad hoc nulla est necessitas prædictarum relationum; nam sufficit, quòd aliquando pater genuerit, & filius fuerit genitus: ergo non sunt admittendæ prædictæ relationes. Resp. neg. min. quia cùm denominatio patris, & filii, v. g. sit denominatio actualis, necessariò debet provenire à forma actuali, qualis forma nequit esse actio, vel passio, cùm hæ, ut fatentur sic arguentes, jam præterierint, unde

unde necessariò assignanda est aliqua forma actualis, a qua proveniat prædicta denominatio, quæ forma nequit esse alia aptior, quam relatio paternitatis in patre, & relatio filiationis in filio.

16 Arg. 2. Non potest aliter explicari quid sit Pater, nisi dicendo, esse illum, qui genuit filium: ergo paternitas nihil aliud est, quàm actualis generatio filii. Resp. quòd licet benè explicetur pater modo dicto, non inde sequitur, paternitatem non esse aliquam relationem distinctam ab actuali generatione; sed solùm sequitur, benè explicari prædictam relationem in ordine ad potentiam generativam patris, ut fundamentum talis relationis, quatenus talis potentia subest actuali generationi, quæ est conditio prævia ad resultantiam relationis paternitatis, quod non est peculiare in his relationibus, nam benè explicatur *simile*, v. g. dicendo, esse quod habet albedinem eiusdem intensiõis gradualis cum alia albedine existente in altero subiecto, & tamen omnes concedunt similitudinem esse relationem distinctam à convenientia in tali intensiõne gradualis albedinis. Unde neg. conseq.

17 Arg. 3. In divinis paternitas est ipsa generatio activa filii; ergo similiter in creatis, & consequenter non est admittenda relatio paternitatis. Respond. neg. conseq. & paritatem, disparitas stat in hoc, quod relatio paternitatis in divinis non distinguitur realiter à fundamento, cùm sit substantialis, & realiter ipse Deus, at verò relatio paternitatis in creatis, cùm sit accidens, necessariò debet esse distincta à suo fundamento, & licet actio, seu generatio actualis sit etiam accidens in creatis, tamen non est idem realiter cum paternitate, quia transacta actione, adhuc homo est, & denominatur Pater, in divinis autem ipsa generatio actualis semper perseverat, & sic sem-

per potest denominare patrem, seu generans. His fundamentis negatis aliqui dari prædictas relationes in creatis distinctas ab actione, & passione; non autem est ratio; cur propter illa à communiori, & receptissima via recedamus.

### S E C T I O III.

#### *De relationibus tertii generis.*

18 **D**icimus: relatio tertii generis fundatur, juxta Arist. in mensura, & mensurabili, ubi non sumitur mensura pro mensura propriè dicta, ut est quantitativa; sed pro commensuratione, seu specificatione unius ab alio; hoc modo scientia dicit relationem ad obiectum, quia cum illo commensuratur, & ab illo specificatur, & similiter omnes actus vitales dicunt relationem ad sua obiecta, quia hæc sunt quasi mensura actuum. Adverte tamen, quòd, sicut diximus de relationibus secundi generis, quòd nō fundantur in actione, & passione, sed in potentia activa, & passiva, sic nunc dicimus, relationem hujus generis non fundari in actuali mensuratione, sed in mensurabilitate connotant mensurationem activam tanquam conditionem requisitam, ex quo patet, quòd hæc relatio est diversa à relationibus primi, & secundi generis propter diversitatem fundamenti.

19 Arg. 1. Relatio scientiæ ad obiectum est relatio effectus ad causam, ab objecto enim scientia causatur: sed relatio effectus ad causam pertinet ad secundum genus relationis: ergo non datur relatio tertii generis distincta ab aliis. Resp. neg. conseq. nam licet verum sit, quòd scientia dicat relationem effectus ad causam ad obiectum, ut ab illo causatur; tamen aliter refertur ad illud, tanquam ad mensuram.

& in

& in hoc sensu non dicit relationem effectus ad causam, sed relationem mensurabilis ad mensuram, quæ constituit hoc tertium genus relationis distinctum à duobus antecedentibus.

20 Arg. 2. Relatio scientiæ ad objectum est relatio transcendentalis: ergo non prædicamentalis, & consequenter non pertinet ad hoc prædicamentum. Resp. disting. antec. relatio scientiæ ad objectum, ut scibile, est transcendentalis, concedo; relatio scientiæ ad objectum, ut actu scitum, nego, & similiter distinguendum est consequens, & juxta sensum distinctionis neganda est ultima consequentia.

12 Circa divisionem hujus relationis communiter tenent Philosophi, non inveniri, sed absolutè esse speciem infimam, & similiter, esse relationem non mutuam; nam licet scientia dicat relationem mensurabilis ad objectum; objectum tamen in hoc sensu nullam relationem dicit ad scientiam, & similiter dicendum est de potentiis respectu suorum objectorum, & communiter pro ratione huius, dicitur, hoc provenire ex eo, quod est specialis modus specificationis, & commensurationis scientiæ, & aliorum habituum, potentiarum, & actuum à suis objectis; specificantur enim ab illis, & illis commensurantur per tendentiam, & respectum ad ipsa objecta, ipsis objectis nihil agentibus, præter hoc, quod est extrinsecè terminare predictam tendentiam, & respectum, unde licet in habitibus, in potentiis, in actibus illarum detur relatio realis ad sua objecta; tamen in objectis nulla datur relatio ad habitus, ad potentias, & ad actus illarum, sed tantum est in illis quædam denominatio extrinseca proveniens à tendentia ipsorum habituum, potentiarum, & actuum.

22 Licet autem hoc, juxta communem consensum teneatur, & videatur expressum  
Sco,

Scoti 5. Met. cap. 15. & quæst. 11. num. 8. tamen inquit Claudius Meron. disp. de prædicam. q. 2. de relatione, assertionem 5. nō præjudicando tantæ authoritati, & stando solum rationi, potest defendi, prædictam relationem esse mutuam, quod sic ostendit.

23 Eadem ratione, qua probatur, rem mensuratam realiter referri ad rem mensurantem, probatur etiam, rem mensurantem realiter referri ad rem mensuratam: ergo sicut conceditur relatio realis rei mensuratæ ad rem mensurantem, ita debet concedi relatio realis rei mensurantis ad rem mensuratam. Prob. antec. quia ideò datur relatio realis rei mensuratæ ad rem mensurantem, quia actu verè, & realiter suam specificationem accipit à re mensurante; sed etiam actu, verè, & realiter res mensurans specificat, & mensurat rem mensuratam; ergo propter eandem rationem, qua conceditur relatio realis rei mensuratæ ad rem mensurantem, debet concedi relatio realis rei mensurantis ad rem mensuratam.

24 Et confirmat; quia res mensurans habet omnes conditiones requisitas ad resultantiam relationis; ergo non debet negari talis relatio. Antec. patet, quia extrema sunt realia, realiter distincta, & ex ipsa natura extremorum potest resultare talis relatio, nam ratio mensuræ, tam activa, quàm passiva datur independentè à consideratione intellectus; ergo res mensurans habet omnes conditiones requisitas, ut in illa possit admitti ratio intrinsecus advenièns. Ex quibus dicit, quòd relatio hujus generis non est species infima, sed propriè genus, & species subalterna, quæ dividitur in duas species infimas, scilicet in relationem mensurantis ad rem mensuratam, & rei mensuratæ ad mensurans.

25 Si autem illi obiiciatur, quòd eodem modo est loquendum de qualibet re mensurante,

ac de objecto, scito, & cognito, respectu scientiæ, & cognitionis: sed objectum, ut scitum, & cognitum, non dicit relationem realem ad scientiam, & cognitionem, sed tantum denominationes extrinsecas sciti, & cogniti; ergo nulla res mensurans dicit relationem realem ad rem mensuratam. Respond. negando minorem, inquit enim, quod objectum cognitum habet duas denominationes, unam extrinsecam, & absolutam proveniente à forma absoluta existente in alio, scilicet ab actu intellectus existente in ipso intellectu, qui quidem actus est qualitas, & forma absoluta, & aliam intrinsecam, & relativam, quæ provenit à relatione intrinsecus adveniente mensurantis ad rem mensuratam, quæ intrinsecè est in objecto tanquam in mensura, & terminatur ad actum, tanquam ad rem mensuratam; quod idem potest applicari cuilibet mensuræ. Unde patet, quòd attenda tantum ratione, & sine præiudicio tantæ autoritatis pro communi sententia, potest disputationis gratia, hic modus dicendi sustineri.

16 Ex dictis in hac quæstione facilè cognoscitur, quomodo hoc prædicamentum sit ordinandum; etenim genus supremum est relatio realis secundum esse intrinsecus adveniens, quæ immediatè dividitur in tria prædicta genera, & hæc in suas species modo supradicto. Ubi adverte, quod relationes similitudinis, quæ dantur inter duo alba, & inter duo nigra, non sunt diversæ, sed ejusdem speciei, eo quod licet extrema, & fundamenta remota sint diversæ speciei, tamen fundamenta proxima, scilicet unitas, seu convenientia in albedine, vel nigredine, sunt ejusdem rationis. Idem dicendum est de quibuscumque aliis relationibus, in quibus ratio proxima fundandi est ejusdem rationis, licet extrema, & fundamenta remota sint diversæ rationis. Unde deducitur, quòd rela-



tio tertii generis, juxta communem sententiam, nequit propriè dici genus, sed species infima; nam licet dentur plures relationes, omnes tamen sunt ejusdem rationis, cum fundentur in ratione mensuræ, quæ licet extrema sint diversæ rationis, ejusdem rationis est in omnibus.

## Q U Æ S T I O IV.

*An relatio pradicamentalis distinguatur realiter à suo fundamento?*

**R** Diximus in titulo quæstionis *relatio pradicamentalis*; quia circa relationem transcendentalem nulla videtur esse controversia; omnes enim conveniunt, non distingui realiter à fundamento; quia quando unum non dependet ab alio, inseparabilitas ipsius ab illo, est signum identitatis realis inter illa; nam ex duplici tantum capite potest provenire, quod unum sit ab alio inseparabile, vel quia dependet ab illo, vel quia est idem realiter cum illo: sed fundamentum relationis non dependet à relatione, cum sit prius natura illa, & quod est prius natura alio, non dependet ab illo: ergo inseparabilitas fundamenti à relatione transcendentali, quam inseparabilitatem omnes fatentur, est signum identitatis realis relationis transcendentalis cum suo fundamento. Solùm adverte, quod in sententia Scotistarum relatio transcendentalis distinguitur ex natura rei formaliter à suo fundamento, & quia omne, quod refertur est aliquid, excepta relatione, & quia respectus nequit esse de conceptu formali absoluto, ut est pluries fundamentum relationis transcendentalis.

<sup>2</sup> Dices: ex hoc sequitur, quod creatura non est essentialiter dependens à Deo, quod videtur absurdum. Resp. disting. sequelam; est enim  
ve.

vera, si intelligatur, quod dependentia, seu relatio transcendentalis dependentiæ non est de conceptu formali, seu de essentia creaturæ: falsa autem, si intelligatur, quod essentia creaturæ non dependet à Deo, primum non est absurdum, secundum autem esse absurdum. Dependet enim essentia creaturæ à Deo, non, quia talis dependentia sit prædicatum essentialle, & quidditativum creaturæ; sed quia prædicata essentialia, creaturæ necessario fundant prædictam relationem dependentiæ. Nunc.

3 Dicimus; relatioprædicamentalis realiter distinguitur à suo fundamento. Hæc conclusio est communis inter Scotistas, & Thomistas, tam contra Nominales, quam contra aliquos Jesuitas. Tenet eam Scotus in 2. dist. 1. qu. 4. vel 5. & in 3. dist. 1. quæst. 1. & aliis in locis, & D. Thomas pluribus in locis citatis à Thomistis recentioribus, probatur; quia nullum majus signum distinctionis realis inter aliqua, quam posse unum existere sine alio; sed fundamentum relationis prædicamentalis, v.g. paries albus, potest existere sine relatione: ergo realiter distinguitur ab alia:

4 Respondent 1. disting. min. fundamentum potest esse sine relatione, quoad esse reale, & entitativum relationis, negant; quoad denominationem relativam, concedunt. Inquiunt enim, quod deficiente termino, ex parte fundamenti nihil deficit entitativè, sed tantum deficit connotatio ad terminum, & sic denominatio relativa. Sed contra est, quia denominatio relativa debet provenire ab aliqua forma intrinsecè afficiente fundamentum: ergo deficiente denominatione relativa, deficit forma, à qua provenit talis denominatio: ergo deficiente denominatione relativa, deficit aliquid entitativè ex parte fundamenti denominati. Probatur prima consequentia; quia aliquid denominari rela-

ri; unde existentia unius sine alio, & separatio unius ab alio non est mutua, quod requiritur ad inferendam distinctionem realem. Sed hæc responsio, ut patet, est nimis voluntaria, nam inter humanitatem, & subsistentiam omnes admittunt distinctionem realem, & tamen non datur mutua separabilitas; licet enim humanitas possit esse sine propria subsistentia, ut patet in humanitate Christi, non verò subsistentia potest esse sine humanitate. Deinde separabilitas non mutua sufficit, ut de aliquibus verificentur hæc duo contradictoria *esse*, & *non esse*: ergo similiter sufficit ad inferendam distinctionem realem inter esse illorum, & consequenter relatio distinguitur realiter à fundamento, licet non mutuo possint separari.

7 Deinde potest probari conclusio hac ratione communi, prædicamenta inter se realiter distinguuntur: sed relatio realis intrinsecus adveniens constituit speciale prædicamentum: ergo realiter distinguitur ab aliis prædicamentis: sed fundamentum relationis iam est substantia, jam quantitas &c. ergo relatio realiter distinguitur à suo fundamento.

8 Arguunt 1. argumento posito quæst. 1. huius disputationis num. 9. Ad quod argumentum respondetur sicut ibi, & similiter respond. ad plura alia argumenta, quæ contra nostram conclusionem solent obiici, tantum enim sunt vera in sensu fundamentalis, non autem in sensu formali, duo enim alba, seclusa relatione, tantum fundamentaliter sunt similia, non verò formaliter, quod similiter contingit in quibuscumque extremis alicuius relationis.

9 Arg. 2. Si relatio distingueretur realiter à fundamento, posito fundamento, & termino, posset saltem de potentia Dei absoluta, non poni relatio: sed posito fundamento, & termino, implicat, quod non ponatur relatio: ergo hæc

hæc non distinguitur realiter à fundamento . Aliqui respondent negando minorem : quia nullatenus repugnat , adhuc posito fundamento , & termino , quòd non ponatur relatio ; quia , inquit , in essentialiter ordinatis , & realiter distinctis , potest Deus conservare prius sine posteriori ; & cùm fundamentum , & terminus sint prius natura relatione , potest Deus conservare fundamentum , & terminum sine relatione .

10 Hæc tamen responsio impugnatur ab aliquibus ; quia solum potest impediri à Deo id , circa quod datur aliqua actio immediatè terminata : sed juxta Arist. 5. Phys. non datur aliqua actio immediatè terminata ad relationem : ergo posito fundamento , & termino nequit impediri à Deo resultantia relationis . Ex quo respondent ad rationem supradictæ responsionis , illam esse veram quando datur aliqua actio immediatè terminata ad posterius , supposito priori ; falsam tamen quando non datur talis actio immediatè ad posterius terminata , ut contingit in præsentī : nam posito fundamento , & termino , non datur actio immediatè terminata ad relationem , sed hæc per naturalem emanationem resultat , posito fundamento , & termino .

11 Propter hoc non desunt , qui dicant , ad relationem dari actionem immediatè terminatam , ita quòd posito fundamento , & termino , ipsum fundamentum per veram actionem cum concursu Dei producat relationem ; & licet necessariò naturaliter sequatur talis actio , posito fundamento , & termino ; tamen supernaturaliter potest Deus illam impedire per suspensionem sui concursus , & in tali casu remanerent fundamentum , & terminus sine relatione . Quando autem Aristot. dicit , ad relationem non dari per se motum , seu actionem , debet intelligi , inquit , ita quòd ad relationem non detur aliqua actio extrinseca , seu alicujus agentis extrinseci , præter actionem funda-  
da.

damenti ad differentiam ubi, ad quod datur motus, seu actio extrinseca immediate terminata, & similiter ad omnia ultima prædicamenta, propter quod dicuntur respectus, non intrinsecus, sed extrinsecus advenientes.

12 Aliter respondent alii ad argumentum negando sequelam; non enim inquit, est universaliter verum, quod omnia, quæ realiter distinguuntur, possunt separari; sed solum est verum quando non adest aliquod impedimentum ad separationem, ut contingit in fundamento, & termino, respectu relationis; nam fundamentum, & terminus aliquomodo se habent, ut causa actualiter causans relationem, & certum est, quod causa actualiter causans, nec de potentia absoluta potest esse sine effectu, & tamen ab illo realiter distinguitur. Utraque responsio videtur, posset teneri: tamen potest aliter responderi, quod ad distinctionem realem aliquorum sufficit, quod unum aliquomodo possit esse sine alio, quod contingit in fundamento, quod potest esse sine relatione, modo dicto in probatione conclusionis.

13 Hic solet dubitari, an una relatio possit esse fundamentum alterius? Resp. affirmative cum Scoto in 4. dist. 6. quæst. 10. §. *Hic dicitur, vers. Secunda ratio*, litt. D. & aliis in locis; quem sequuntur omnes Scotistæ contra Thomistas communiter. Probatur; quia ex eo inter Petrum, & Paulum, v. gr. datur relatio identitatis, quia conveniunt specificè in prædicatis essentialibus: sed duæ relationes paternitatis, v. gr. habent convenientiam specificam in prædicatis essentialibus: ergo datur inter illa relatio identitatis.

14 Respondent, prædictas relationes paternitatis non indigere relatione identitatis superaddita, sed referri se ipsis, eo quod cum sint rationes referendi, non indigēt alio, ut referantur. Sed contra est, quia relatio paternitatis  
non

non est ratio referendi, nisi patrem ad filium: ergo ut ipsa paternitas referatur in alio genere referendi, ut est genus identitatis, indiget aliquo superaddito, ut referatur. Patet consequentia; quia nihil potest suum pertransire genus: sed relatio paternitatis pertinet ad secundum genus relationis: ergo nequit esse ratio referendi se ipsam in primo genere relationis; ut est genus identitatis. Aliis terminis solet impugnari prædicta responsio ab Scotistis, sed coïncidunt cum præcedenti impugnatione.

15 Plura argumenta solent confici contra nostram resolutionem, quæ omnia ad hæc possunt reduci. Primo arguunt: relatio est ratio formalis referendi, seu forma, qua alia referuntur; ergo nequit esse fundamentum alterius relationis realiter distinctæ. Conseq. patet; quia sicut juxta commune proloquium Philosophorum, actionis non datur actio; unionis non datur unio; inhærentiæ non datur inhærentia; quia hæc omnia sunt formæ, quibus alia uniuntur fiunt, & inhærent; sic similiter relationis non dabitur relatio, ut referatur, eo quod est forma, quia alia referuntur. Resp. neg. consequ. quia licet verum sit relationem, v. gr. paternitatis non indigere alia ratione paternitatis, ut referatur ad filium, eo quod ipsa est ratio formalis referendi ad filium, & ut sic non est ratio, *quod* refertur, sed tantum est, *quo* pater refertur, tamen ipsa paternitas, ut referatur ad aliam paternitatem, indiget alia relatione ab ipsa realiter distincta, & accidentaliter illi conveniente, v. g. relatione identitatis, eo quod paternitas non est ratio referendi, seu *quo* aliquid refertur relatione identitatis; sed potius est, *quod* relatione identitatis refertur. Paritas de actione non tenet, quia actio semper se habet ut *quo*, nunquam tamen, ut *quod*, & sic non indiget alia ratione. Neque tenet paritas de inhærentiæ; nam juxta aliquos, tantum se habet, ut

ut *quo*, & licet in nostra sententia etiam se habeat, ut *quod* non indiget inhærentia realiter distincta, sed tantum formaliter, quia non convenit illi accidentaliter inhærere, ut suo loco diximus. Idem dicendum est de unione propter eandem rationem.

16 Arg. 2. Si una relatio posset super aliam fundari, sequeretur processus in infinitum, nam si duæ paternitates fundarent relationes identitatis, eo quod conveniant in prædicatis essentialibus, tunc illæ relationes identitatis fundarent alias relationes identitatis, cum similiter convenirent in prædicatis essentialibus, & propter eandem rationem illæ secundæ relationes identitatis fundarent alias, & sic in infinitum. Resp. neg. sequelam, quia ut tenet Scotus in 2. dist. 1. qu. 4. §. *Ad questionem istam*, litt. M. quando fundamentum est talis naturæ, cui repugnet esse sine relatione, tunc non distinguitur realiter a relatione. Unde sequitur, quod sistendum est in secundis relationibus; nam cum relationes identitatis, quæ fundantur in paternitatibus, sint simul natura, nequit una esse sine alia, & consequenter utraque nequit esse, quin referatur relatione identitatis, & sic relationes identitatis quibus primæ relationes identitatis referuntur inter se, non distinguuntur realiter a fundamentis, sed ad summum formaliter, & sic cessat processus in infinitum.

17 Arg. 3. Secundum Philosophorum relatio identitatis fundatur in unitate substantiæ: sed relationes non sunt substantiæ, sed accidentia: ergo non possunt fundare relationes identitatis. Resp. quod Arist. per *ly substantia* non intelligit prædicamentum substantiæ, sed quidditatem seu essentiam cuiuscumque rei, unde relatio identitatis potest fundari in unitate essentiæ rerum cuiuscumque prædicamenti.

## Q U Æ S T I O V.

*An relatio terminetur ad absolutum, vel  
respectivum.*

1 **P**RO intelligentia quæstionis notandum est, quod in termino relationis tria inveniuntur. Primum, quædam denominatio extrinsecè, per quam actu terminus extrinsecè denominatur, quæ provenit a relatione intrinsecè existente in fundamento, sicut *esse visum* in pariete est denominatio extrinseca proveniens à visione intrinsecè existente in potentia visiva. Secundum, ratio propterquam habet rationem talis termini, potius quam alia res: sicut color est ratio, propterquam paries, potius quam alia res denominatur visus. Tertium, quædam res, quæ se habet ut subiectum talis rationis, ut paries respectu coloris.

2 Conveniunt omnes in hoc, quod prædicta denominatio extrinseca non habet rationem formalem termini relationis; quia ratio termini debet esse quid intrinsecum in illo. Similiter conveniunt in hoc, quod id, quod se habet ut subiectum, non est formaliter terminus relationis, sed tantum materialiter. Solum autem est controversia circa rationem; propterquam convenit termino, quod possit terminus denominari, an scilicet, sit aliqua ratio absoluta ex parte ipsius termini, an vero aliqua relatio?

3 Circa hanc difficultatem triplex invenitur sententia. Prima asserit, terminum formalem relationis esse quid respectivum, tam in relationibus mutuis, quam non mutuis, cum hac tamen differentia, quod in relationibus mutuis terminus est relatio correspondens verè, & realiter, v. g. terminus relationis paternitatis est relatio realis filiationis, in relationibus verò  
non



non mutuus terminus est relatio rationis correspondens ex parte termini relationi reali, quæ se habet ex parte fundamenti. Secunda tenet, terminum relationis mutux esse quid respectivum modo dicto, terminum verò relationis non mutux esse quid absolutum, non verò relationem rationis. Pro his sententiis plures Aulhores adducit Mastrius in Logica disp. 8. qu. 6. art. 3. Tertia denique sententia tenet, terminum, tam relationis mutux, quam non mutux, esse quid absolutum. Sic expressè Scotus pluribus in locis, præcipuè in 1. dist. 26. q. unica & dist. 28. qu. 3. & dist. 30. q. 2. Quem sequuntur omnes Scotistæ. Pro qua.

4 Dicimus 1. In relationibus non mutuis terminus formalis est quid absolutum, non verò relatio rationis. Probatur primò, quia in relationibus non mutuis non correspondet aliqua relatio relatis, in hoc enim consistit, quod relatio sit non mutua: ergo terminus necessario debet esse realiter aliquid absolutum.

5. Secundò probatur, quod non sit relatio rationis; quia relationes non mutux sunt relationes reales: ergo tam fundamentum, quam terminus debent esse quid reale: ergo nequit esse relatio rationis. Confirmatur; quia relatio rationis tantum datur per intellectum cogitantem relationem ubi non est relatio: sed relationes non mutux dantur à parte rei independenter à qualibet intellectus consideratione quippè sunt relationes reales: ergo independenter à consideratione intellectus datur terminus formalis prædictarum relationum, eo vel maximè, quia non potest dari formaliter relatio, quin formaliter detur fundamentum, & terminus.

6 Aliqui respondent, terminum relationis non mutux non esse relationem rationis formaliter sumptam, sed tantum fundamentaliter, quod idem est, ac dicere, denominationem

extrinsecam proveniente in termino à relatione intrinsecè existente in fundamento ( ut talis denominatio præbet fundamentum intellectui, ut ipsam consideret, ut relationem terminatam ad aliam relationem realem, à qua provenit talis denominatio ) esse terminum relationis non mutux. Hæc responsio variè impugnatur, breviter tamen contra illam est primò, quod talis denominatio est quasi effectus relationis realis intrinsecè existentis in fundamento: ergo est aliquomodo posterior ipsa relatione; sed terminus formalis relationis nequit esse effectus, neque quid posterius relatione: ergo talis denominatio nequit esse terminus formalis relationis non mutux.

7 Secundò, quia in pariete, v. g. ratio formalis terminandi visionem, non est denominatio extrinseca *visi*, proveniens à visione intrinsecè existente in potentia visiva, sed quid prius ipsa denominatione, scilicet color: ergo similiter terminus formalis relationis non mutux, non est denominatio extrinseca proveniens à relatione, sed quid prius ipsa denominatione, scilicet entitas absoluta ipsius rei, quæ dicitur terminus. Tertiò, quia talis denominatio extrinseca tantum in re denotat rationem terminandi, non tamen rationem referendi terminum ad fundamentum ( licet ad hoc considerandum præbeat fundamentum intellectui ) ergo licet concederetur, prædictam denominationem extrinsecam esse rationem formalem terminandi, non inde sequeretur, relationem non mutuam terminari ad respectivum.

8 Dicimus 2. in relationibus mutuis terminus formalis non est quid respectivum, seu relatio correspondens in termino, sed est illud absolutum, quod est fundamentum talis relationis existentis in termino. Probatur primò; quia si relatio mutua exigeret terminum respectivum, vel esset, ut relatio, vel ut relatio mutua;

tua: sed nullo modo: ergo non exigit terminum respectivum. Probatur prima pars min. quia sit ut relatio exigeret terminum respectivum, nulla prorsus esset relatio, quæ non haberet terminum respectivum: sed datur aliqua relatio, scilicet non mutua, quæ non habet terminum respectivum, ut dictum est conclusione antecedenti: ergo relatio mutua, ut relatio est, non exigit terminum respectivum. Probatur secunda pars min. quia relatio mutua nihil addit relationi, ut sic, nisi quod terminus illius referatur ad fundamentum, sicut fundamentum refertur ad terminum: sed ad hoc sufficit, quod terminus formalis possit fundare relationem; non autem requiritur, quod ipse terminus sit relatio: ergo relatio, ut mutua non exigit terminum respectivum.

9 Probatur 2. quia, quod aliquo modo præsupponitur ad respectivum, nequit esse formaliter respectivum: sed terminus relationis mutux aliquomodo præsupponitur ad respectivum: ergo non est formaliter respectivus. Minor probatur, quia quod est causa, vel quasi causa, a qua dimanat relatio, præsupponitur ad relationem, saltem prioritate naturæ: sed fundamentum simul cum termino se habet, ut causa, a qua dimanat relatio, nam relatio resultat posito fundamento, & termino: ergo terminus in ratione termini præsupponitur ad relationem mutua: sed una relatio non præsupponitur ad correlationem, cum sint simul natura: ergo una relatio nequit esse terminus alterius relationis, & consequenter terminus relationis mutux est quid absolutum.

20 Respondent, argumentum esse verum, de termino materiali, non verò de termino formali. Sed contra est primo; quia relatio nequit intelligi sine suo termino formali: sed relatio potest intelligi sine correlatione; non autem sine entitate absoluta termini: ergo non cor-

relatio, sed entitas absoluta termini habet rationem formalem termini relationis mutuae. Prob. min. nam si intellectus, v. gr. non intelligeret, filium referri ad patrem, sed tantum patrem referri ad filium, rectè intelligeret rationem formalem, & essentialem relationis paternitatis: sed tunc non conciperet correlationem filiationis; sed tantum entitatem absolutam filii productam a patre: ergo relatio potest intelligi sine correlatione, non autem sine entitate absoluta termini; & consequenter, non correlatio, sed entitas absoluta termini habet rationem formalem termini relationis mutuae.

11 Contra 2. Quia in relatione paternitatis, v. g. illud est formaliter terminus, quod dependet a patre, tamquam effectus a causa: sed entitas absoluta filii dependet a patre, tamquam effectus a causa; non vero relatio filiationis: ergo non correlatio filiationis, sed entitas absoluta filii habet rationem formalem termini.

12 Contra 3. Quia in relationibus mutuis, quod est ratio formalis fundandi unam relationem, est ratio formalis terminandi aliam: sed ratio formalis fundandi relationem filiationis, v. gr. est entitas absoluta filii, seu potentia passiva generativa illius: ergo hæc ipsa, & non relatio filiationis, est ratio formalis terminandi relationem paternitatis. Probatur maior; quia ratio formalis terminandi relationem mutuum, est ratio, propter quam res est talis naturæ, ut ad ipsam res altera referatur; sed talis ratio est, id quod in altero extremo est ratio fundandi correlationem; ergo in relationibus mutuis, quod est ratio formalis fundandi unam relationem, est ratio formalis terminandi aliam. Prob. min. quia ex eo filius, v. gr. est talis entitas, ad quam referatur pater, quia est productus a patre: sed hæc ratio est fundamentum relationis filiationis: ergo eadem est ratio, qua aliquid est talis

talisentitas, ut ad ipsam altera referatur, & ratio, qua talisentitas est fundamentum correlationis; sed hæc, ut omnes concedunt, est entitas absoluta termini, non verò correlatio: ergo ratio termini formalis relationis mutæ, non est correlatio, sed entitas absoluta termini.

13 Prob. 3. conclusio: si terminus sub ratione absoluti non esset terminus relationis, sed sub ratione respectivi, v. gr. si album sub ratione albi non esset terminus relationis similitudinis alterius albi, sed sub ratione similis, eo esset, quia albedo potest existere, quin sit respectiva, & non potest concipi, ut terminus, quin intelligatur, ut relativa; sed hæc ratio non urget; ergo. Minor probatur; nam si urgeret prædicta ratio, sequeretur, tam fundamentum relationis esse respectivum, quam terminum, quod Adversarii non admittunt. Pater sequela; nam fundamentum potest esse in rerum natura sine relatione, & non potest concipi ut fundans relationem, quin intelligatur formaliter relativum; ergo eadem est in utroque ratio; & consequenter si talis ratio non sufficit, ut fundamentum sit formaliter relativum, neque sufficit ad hoc, ut terminus sit relativus formaliter.

14 Arg. 1. Relativa sunt simul natura cognitione, & definitione; sed nequeunt esse simul natura, cognitione, & definitione, nisi relativum terminetur ad suum correlativum, formaliter, ut tale; ergo relatio terminatur ad respectivum. Probatur prima pars minoris; quia si pater, v. gr. ut pater, non terminaretur ad filium, ut est filius relativè, sed, ut est hic homo ab illo genitus: ergo pater, ut pater, non est simul natura cum filio, ut filius est; sed tantum, ut est hic homo genitus ab illo; siquidem in priori naturæ antecedente emanationem, filiationis in filio, pater, ut pater (& consequen-

ter paternitas) sit, & terminetur ad potentiam generandi passivam, in qua prioritate nondum est filiatio. Deinde, quia relatio, ut relatio, tantum pendet a fundamento, & termino; ergo si relatio non terminatur ad correlationem, non pendet ab illa, & consequenter est prior natura, quam illa.

15 Probatz 2. pars minoris; nam relatio perfecte cognoscitur, cognitio tantum fundamento, & termino; ergo si terminus formalis relationis non est correlatio, non pendet cognitio relationis a cognitione correlationis, & consequenter relativa non sunt simul cognitione. Unde patet tertia pars minoris; nam in definitione relativi tantum ponitur terminus formalis; ergo si terminus formalis relationis non est correlatio, poterit definiri relativum sine correlativo, & consequenter correlativa non sunt simul definitione.

16 Pro responsione notandum est, quod correlativa, v. g. causa, & effectus possunt accipi, vel in actu primo, vel in actu secundo. In actu primo accipiuntur, quatenus sunt principium, & quasi causa relationum, & ut sic, utrumque, scilicet fundamentum, & terminus, præcedunt, natura utramque relationem mutuam, & non dicuntur formaliter relativa, sed tantum fundamentaliter. In actu secundo accipiuntur, ut sunt affecta relationibus mutuus. Deinde, advertendum est, correlativum dupliciter accipi posse. Primo, sub ratione formali correlativi, ita ut non solum intelligatur, ut terminans relationem rei, quæ ad ipsum refertur, sed etiam, ut continens relationem, quia ipsum refertur ad fundamentum alterius relationis. Secundo, sub præcisa ratione termini, ita ut tantum dicat rationem formalem terminandi relationem, quæ est in fundamento, Nunc

17 Resp. ad argumentum negando min. & con-

conseq. probationis primæ, scilicet, quod pater, ut pater, non sit simul natura cum filio, ut filius est, sed ut est hic homo genitus, si pater, ut pater, non referatur ad filium, ut filius est, sed ut est hic homo genitus. Etenim, sicut hic homo, ut genitus, est prius natura, quam hic homo, ut filius: ita etiam hic homo, ut genitus, est prius natura, quam pater, ut pater: ideoque, licet pater, ut pater, terminetur ad hunc hominem, ut à se genitum, tamen non prius uatura terminatur ad ipsum, quam in ipso sit filiatio; non quia terminetur formaliter ad filiationem, sed quia paternitas, & filiatio necessariò se se concomitantur: quamvis autem hic homo, ut genitus sit prius natura, quam ut filius, tamen in illo priori nondum intelligitur in patre paternitas, imò rectè dicitur, prius natura esse hunc hominem, ut genitum, quam in patre sit paternitas quia ut sic est aliquomodo principium, ac veluti causa ipsius paternitatis.

18 Ad aliud resp. concessio enthymemate, neg. ultimam cons. quia prioritas, & posterioritas naturæ communiter desumuntur à dependentia unius ab alio: Ideoque dicimus, fundamentum, & terminum esse prius natura relatione, quia hæc dependet ab illis: unde ergo inferitur, quod una relatio sit prius natura alia, cum argumentum ostendat, unam ab alia non dependere?

39 Ad 2. probationem min. resp. ex dictis num. 16. quod si relativa, scilicet, fundamentum, & terminus comparentur in actu primo, sunt simul cognitione in actu primo; quia nequit cognosci fundamentum, ut fundamentum in actu primo, nisi per ordinem ad terminum in actu primo, nec terminus, ut terminus, in actu primo, nisi cum habitudine ad fundamentum in actu primo. Similiter, si comparentur in actu secundo, nequit cognosci

fundamentum, nisi simul cum termino actualiter terminante relationem; neque terminus potest cognosci, nisi simul cum fundamento, ut actu fundans relationem.

20 Ex hac doctrina facile deducitur, quid tam ad hoc argumentum, quàm ad alia similia, responderi possit in forma. Respond. igitur disting. antec. relatio perfecte cognoscitur, cognito fundamento, & termino, ut relatio est, concedo; ut mutua est, nego. Similiter disting. conseq. si terminus relationis non est correlatio, non pendet cognitio relationis à cognitione correlationis, ut relatio est, concedo: ut mutua est, nego, & nego ultimam consequentiam.

21 Etenim relatio, ut dicit conceptum essentialem relationis, tantum includit ordinem ad terminum in ratione puri termini, unde sufficit cognitio fundamenti, & termini in ratione puri termini, ut quidditative cognoscatur relatio; at verò relatio, ut mutua est, non solum dicit ordinem ad terminum, sed etiam exigit, quod terminus formalis illius sit talis naturæ, quod necessario sit fundamentum alterius relationis, ratione, cujus ipse terminus simul referatur ad fundamentum, unde nequit cognosci relatio, ut mutua, cognitis præcisè fundamento, & termino formali illius; sed etiam requiritur cognitio relationis fundatæ in ipso termino. Relatio enim paternitatis, v. gr. benè cognoscitur, cognita entitate absoluta patris, ut fundamentum est, & entitate absoluta filii, ut terminus formalis illius est; adhuc tamen non cognoscitur talis relatio, ut mutua, sed ad hoc ulterius requiritur cognitio correlationis, scilicet, relationis filiationis fundatæ in entitate absoluta filii, quæ quidem correlatio est extra rationem formalem termini relationis paternitatis; sicut ratio mu-  
tuæ



tuæ est extra rationem formalem relationis.

22 Neque ex hoc sequitur, quòd relata, non sint simul natura, & cognitione, nam relata possunt dupliciter sumi. Primò, ut relata, seu relativa præcisè, & in hoc sensu dicuntur relata fundamentum, & terminus in ratione puri termini, & sunt simul cognitione, tam in actu primo, quàm in actu secundo; nequit enim unum sine alio concipi, ut dictum est numer. 19. quod provenit illis à relatione, ut relatio est. Secundò, non ut relata, seu relativa præcisè, sed ut correlata, seu correlativa, & in hoc sensu non dicuntur relata fundamentum, & terminus in ratione puri termini, sed quatenus terminus est fundamentum alterius relationis; quòd non convenit illis à relatione, ut relatio est, sed ut mutua est; & ut sic, etiam sunt simul natura; nequit enim concipi fundamentum fundans relationem, ut mutuam, quin simul concipiatur terminus etiam ut fundans alteram relationem.

23 Hinc facilè respondetur ad tertiam probationem min. argumenti, quòd relata, ut purè relata, sicut sunt simul natura, sunt simul definitione, ita ut nequeat fundamentum, ut tale; definiri, nisi in ordine ad terminum in ratione puri termini, neque terminus, nisi cum habitudine passiva respectu fundamenti. Similiter relata, non ut purè relata, sed ut correlata, sunt simul definitione, & necessario unum definitur cum habitudine, respectu alterius; primum convenit relatis ratione relationis; secundum verò convenit correlatis, non ratione relationis præcisè, sed ratione relationis, ut mutue, ut supra dictum est.

24 Arg. 2. Relatio causæ terminatur ad effectum, ut effectus est; sed effectus ut effectus,

Ff § est

est relativus formaliter: ergo terminus relationis est formaliter relativus. Resp. disting. min. effectus, ut effectus præcisè, est formaliter relativus, nego; effectus, ut correlativus, concedo. Etenim effectus, ut effectus præcisè, tantum dicit, esse à causa, & in hoc sensu non est formaliter relativus, quippè nullum ordinem dicit ad causam, sed tantum terminat relationem causæ ad se ipsum, ita ut si nulla esset relatio effectus ad causam, adhuc haberet propriam rationem effectus simpliciter, & sic propriam rationem termini formalis relationis causæ ad ipsum. Effectus verò, ut correlativus, dicit respectum ad causam, sed in hoc sensu, ut dictum est, non habet rationem formalem termini relationis causæ ad ipsum.

25 Replicabis, causa respicit effectum, ut sibi oppositum relativè: sed effectus, ut oppositus relativè suæ causæ, est formaliter relativus, ergo causa respicit suum effectum, ut formaliter relativum. Resp. disting. min. effectus, ut oppositus relativè suæ causæ, est formaliter relativus, ut oppositus relativè præcisè, nego; ut oppositus correlativè, concedo; & nego conseq. Etenim effectus, & causa opponuntur relativè præcisè, eo quòd causa referatur ad effectum, & effectus terminet relationem causæ, in ratione puri termini, absque eo, quòd correferatur ad causam: quod semper contingit in extremis relationis non mutux, quæ sunt relata præcisè, & opponuntur relativè, licet terminus non correferatur ad fundamentum: at verò effectus, & causa opponuntur, non relativè præcisè, sed correlativè, quatenus terminus, scilicet effectus, correferatur ad fundamentum, scilicet, ad causam; sed in hoc sensu, ut sæpè dictum est, non dicit effectus rationem formalem termini relationis causæ, eo vel maximè, quòd ratio puri termini tantum dicit, quòd aliquid sit

fit ad ipsum, non autem, quod ipse fit ad aliud,

26 Arg. 3. Relatio paternitatis in divinis terminatur ad respectivum, nam pater, & filius ad invicem referuntur, & terminant suos respectus per ipsas relationes paternitatis, & filiationis: ergo similiter relatio paternitatis in creatis terminatur ad respectivum. Patet consequentia, quia in hoc quod est, respicere filium, eodem modo se habent pater in divinis, & pater in creatis: cum in utroque paternitas sit verus respectus ad filium, & consequenter eadem debeat esse ratio terminandi in filios, tam in creatis, quam in divinis. Antecedens probatur, nam pater respicit filium, ut à se distinctum: sed filius in divinis per solam filiationem distinguitur à patre: ergo Pater in divinis refertur ad filium, ut formaliter est filius, seu relativus.

27 Resp. cum Meron disp. de prædicamentis, cap. 1. de relatione, quæst. 5. assertionem 2. disting. anteced. relatio paternitatis in divinis terminatur ad respectivum, ut respectivum formaliter, nego; terminatur ad respectivum entitativè, quasi materialiter sumptum, concedo; & neg. conseq. Etenim relatio filiationis in divinis dupliciter potest considerari: Primò, quatenus relatio formaliter est, & formaliter refert filium ad patrem, & in hoc sensu non terminat relationem paternitatis. Secundò, ut tantum est relatio entitativè, & quasi materialiter, & ut sic non refert filium ad patrem; sed tantum terminat relationem paternitatis. Unde relatio paternitatis in divinis non terminatur ad filium, ut formaliter correlativum, sed tantum ut relativum materialiter: quod similiter contingit, quando in creatis fundatur aliqua relatio super aliam, & ad aliam terminatur; v. g. quando super relationem paternitatis fundatur relatio identitatis ad aliam relatio-

nem paternitatis ; tunc enim, licet relatio paternitatis terminet relationem identitatis , hoc munus non exercet , ut relatio formaliter est , seu ut refert patrem ad filium ; sed ut relatio est entitativè , seu materialiter : quia sub hoc munere non respicit suum terminum , scilicet filium ; imò ipsa respicitur , ut terminus relationis identitatis.

28 Neque ex hoc sequitur, quòd terminus relationis paternitatis in creatis sit filius, ut relativus materialiter, licet non formaliter, seu quòd relatio filiationis terminet relationem paternitatis, ut relatio est entitativè, seu quasi materialiter, sicut dictum est de relatione filiationis in divinis: quamvis enim prædictæ relationes in creatis, & in divinis in aliquibus conveniant, in aliis tamen differunt, conveniunt enim & in ratione formali relationis, & in eo quòd fundantur in generatione activa, & passiva, & in distinctione reali extremorum; differunt tamen in eo quòd prædictæ relationes in creatis supponunt extrema realiter distincta, scilicet, totam entitatem absolutam patris, & totam entitatem absolutam filii, quibus positis, resultant prædictæ relationes; cum sint accidentales, & prædicamentales intrinsecus advenientes; at verò in divinis prædictæ relationes non supponunt extrema realiter distincta, scilicet entitatem patris, & entitatem filii; imò relatio paternitatis, sicut est constitutiva patris, ita est distinctiva illius à filio similiter relatio filiationis, sicut est cōstitutiva filii, ita est distinctiva illius à patre; idem enim est principium constitutivum, & distinctivum. Unde benè potest relatio paternitatis in creatis terminari ad entitatem absolutam filii, cum illam supponat, licet relatio paternitatis in divinis necessario terminetur ad entitatem relativam filii, cum filius nullam aliam supponat, neque habeat entitatem. Hoc amplius patet in materia de Trinitate.

Arg.

29 Arg. 4. Nequit cognosci relatio, quin cognoscatur entitativè terminus illius; ergo terminus nequit esse entitas absoluta. Patet consequentia, quia aliàs non posset cognosci relatio dependentiæ ad Deum in creatura, quin cognosceretur entitativè Deus. Hoc argumentum non minus pugnat contra adversarios, quàm contra nos, quia non minus implicat, cognosci terminum relationis, si sit relativus, quin cognoscatur entitas absoluta, ad quam terminatur relatio, quàm cognosci terminum, si sit absolutus; ergo si ad cognitionem relationis requiritur necessariò cognitio termini, neque ad relativum poterit terminari relatio. Prob. antec. quia nequit cognosci, unam correlationem in termino esse essentialiter diversam ab alia correlatione in alio termino, nisi recurrendo ad entitatem absolutam utriusque extremi, v.g. nequit cognosci, similitudinem unius parietis, quæ juxta adversarios, est terminus formalis similitudinis alterius parietis, esse essentialiter diversam à dissimilitudine, seu diversitate, quæ est in altero pariete, nisi recurrendo ad differentiam albedinis, & nigredinis, quæ sunt entitates absolutæ, in quibus fundantur prædictæ relationes similitudinis, & dissimilitudinis, seu diversitatis; ergo non minus implicat, cognosci terminum relationis, si sit relativus, quin cognoscatur entitas absoluta, ad quam terminatur relatio, quàm cognosci terminum, si sit absolutus, & consequenter æquè militat argumentum contra adversarios, ac contra nos.

30 Resp. Directè ad argumentum distinguendo antec. nequit cognosci relatio, quin cognoscatur terminus clarè, & distinctè, seu quoad essentiam, nego, quin cognoscatur confusè sub ratione, sub qua terminat, concedo, & neg. consequ. Etenim, ut cognoscatur relatio creaturæ ad Deum, non requiritur cognitio clara, &

686 *Log. Mag. de Pradicamentis.*  
distincta Dei, se sufficit, cognoscere, dari in  
Deo omnipotentiam, quæ est vis infinita edu-  
cens ex nihilo omne ens creatum.

## Q U Æ S T I O VI.

*Verum multiplicatis terminis, multiplicentur re-  
lationes in eodem fundamento?*

1 **S**upponitur tanquam certum, relationes  
multiplicari in eodem fundamento ad  
multiplicationem terminorum diversæ ratio-  
nis, in homine enim albo, v. g. & est relatio  
paternitatis in ordine ad filium, & relatio simi-  
litudinis in ordine ad parietem album. Simili-  
ter in pariete albo, ut quatuor, est relatio simi-  
litudinis ordine ad alterum parietem album,  
ut quatuor, & relatio dissimilitudinis in ordine  
ad alterum parietem album, ut quinque. Unde  
solum est difficultas, quando termini sunt ejus-  
dem rationis, v. g. an multiplicatis filiis, mul-  
tiplicentur relationes paternitatis in eodem pa-  
tre? Et similiter, an multiplicatis albis, ut qua-  
tuor, multiplicentur relationes similitudinis in  
altero albo, ut quatuor?

2 Circa quam difficultatem duplex est oppo-  
sita sententia. Prima asserit, non multiplicari  
relationes in eodem fundamento, multiplicatis  
terminis. Sic communiter Thomistæ cum  
suo Angelico Præceptore 3. p. quæst. 35. art. 5.  
& quodlib. 1. art. 2. Secunda tenet, relationes  
multiplicari in eodem fundamento, multipli-  
catis terminis. Sic omnes Scotistæ cum suo sub-  
tiliss. Magistro in 3. dist. 8. quæst. unica, §. *Con-  
tra istam positionem*. Pro qua

3 Dicimus: relationes multiplicantur in eo-  
dem fundamento ad multiplicationem termi-  
norum, etiam ejusdem rationis. Probatur 1.  
quia ubicumque sunt plura numero fundamenta  
proxima relationum, ibi sunt plures numero rela-  
rela-

relationes: sed in Patre, v.g. qui plures genuit filios, plura numero sunt fundamenta proxima relationum: ergo sunt plures numero relationes, nempe paternitates. Maior est constans, quia ubicumque sunt plures numero causæ totales, ibi & sunt plures numero effectus; sed fundamentum proximum est causa totalis, seu veluti causa totalis relationis, ut supra manet dictum; ergo ubi sunt plura numero fundamenta proxima, sunt plures numero relationes. Minor probatur: nam fundamentum proximum paternitati in patre (& præsertim in sententia Adversariorum) est generatio activa; sed multiplicatis filiis, multiplicantur generationes activæ, ut per se patet; ergo in patre, qui plures genuit filios, sunt plura numero fundamenta proxima relationum, ac per consequens, &c.

4 Probatur 2. Ubi est multiplex numero dependentia totalis relationis, ibi debet esse multiplex numero relatio; sed ubi sunt plures numero termini totales relationis, ibi est multiplex numero dependentia relationis; ergo ubi sunt plures numero termini totales relationis, ibi sunt plures numero relationes. Maior patet, quia repugnat, aliquid totaliter dependere ab aliquo, & ab illo totaliter non dependere: sed hoc contingeret, si ubi est multiplex numero dependentia totalis relationis, non esse multiplex numero, relatio, ut se patet; ergo ubi est multiplex numero dependentia totalis relationis, ibi debet esse multiplex numero relatio. Minor verò probatur; quia dum pater produxit primum filium, v.g. resultat in ipso relatio paternitatis, quæ essentialiter dependet à primo filio, ut à termino, & hoc dependentia totali; quia nisi dependeret ab eo dependentia totali, sed etiam partialiter dependeret ab alio succedente filio, non posset existere prædicta relatio paternitatis, nisi existeret ille secundus filius;

filius: nihil enim existere potest, quin existat illud omne, à quo essentialiter actu dependet: ergo ubi sunt plures termini totales relationis, ibi est multiplex numero dependentia relationis, & consequenter multiplex numero relatio.

§ Resdondent, argumentum esse verum loquendo de multiplicatione termini totali formalis, non verò loquendo de multiplicatione termini totalis materialis: plures enim filii, inquit, sunt termini totales materiales, sed tantum sunt unus terminus totalis formalis, quia terminus formalis paternitatis est filiatio, ut filiatio est, & consequenter nisi multiplicetur filiatio in ratione formali filiationis (quod nequit evenire) non multiplicabitur terminus formalis formaliter, licet multiplicetur materialiter. Sed (quidquid sit de termino formali filiationis, de quo quæst. antec.) contra est: quia licet non multiplicetur terminus formalis formaliter, seu specificè, tamen multiplicatur numero, in quolibet enim filio est diversa numero ratio formalis terminandi paternitatem: sed ad multiplicationem numericam termini formalis debet multiplicari numero relatio: ergo licet terminus non multiplicetur formaliter, seu specificè, cum tamen numero multiplicetur, multiplicatur relatio in fundamento. Prob. min. quia ad multiplicationem specificam termini formalis, multiplicatur specificè relatio; in eodem enim pariete albo datur duplex relatio specie distincta, scilicet relatio similitudinis ad alterum parietem album, & relatio dissimilitudinis, seu diversitatis ad parietem nigrum, eo quòd terminus formalis multiplicatur specificè, albedo enim & nigredo specificè differunt: ergo similiter ad multiplicationem numericam termini formalis, multiplicatur numero relatio in fundamento. Paritas videtur

tunc.



tenere, nam servata proportionem, ita se debet habere fundamentum ad terminum formalem numericum, sicut ad terminum formalem specificum.

6 Probatur 3. Correlativa sunt simul natura, ita quod destructo uno, destruitur & alterum: ergo destructa hac filiatione, v. gr. in hoc filio, destruitur hæc paternitas in hoc patre: sed manet pater respectu alterius filii, & hoc per paternitatem: ergo per diversam paternitatem ab illa, quæ terminabatur ad primum filium. Patet consequentia, quia illa paternitas tunc non est, quia fuit destructa cum destructione filii.

7 Respondent negando, quod destructa hac filiatione, destruat hęc paternitas entitativè, tantum enim, inquit, restringitur, seu limitatur, ita ut pater, qui antea terminabatur per illam ad duos filios, iam tantum ad unum terminetur: sicut paternitas, per quam dicitur pater, respectu primi filii, per generationem secundi extenditur, seu ampliatur ad illum, quin entitativè de novo alia relatio paternitatis resultet. Sed contra est primò, quia ideò necessariò requiritur prima relatio, quia homo, qui denominatur pater, aliter de novo intrinsecus se habet, respectu primi filii, quam antea se habebat; sed etiam se habet aliter de novo intrinsecus, respectu secundi filii, ac antea se habebat: ergo sicut resultat relatio paternitatis producto primo filio, ita resultat alia relatio paternitatis producto secundo filio, & consequenter destructo uno filio, destruitur entitativè relatio paternitatis, quæ ad ipsum terminabatur.

8 Contra 2. Quia illa extensio relationis ad secundum filium, vel est respectus rationis, vel respectus realis; quia nequit esse tantum connotatio termini, omnes enim fatentur, relatione vera fundamentum referri ad terminum

minum : sed talis respectus nequit esse rationis : ergo necessario est respectus realis : sed prædicta extensio non remanet, destructo aliquo filio : ergo necessario destruitur entitativè aliquis respectus realis.

5 Contra 4. Quia effectus formalis cujuscunque relationis est referre subjectum ad terminum, ad quem per se ordinatur : sed si posset unica relatio extendere fundamentum ad plures terminos, effectus formalis illius non esset referre fundamentum ad terminum, ad quem per se ordinatur : ergo nequit unica relatio sic extendere fundamentum ad plures terminos. Minor probatur, quia ad illum terminum relatio per se ordinatur, quo posito existit, & quo destructo, destruitur : sed posita prædicta extensione, non destruitur ; relatio etiam destructo termino, juxta Adversarios : ergo posita tali extensione, non esset effectus formalis relationis referre fundamentum ad terminum, ad quem per se ordinatur.

10 Arguunt 1. Nulla est necessitas multiplicandi relationes ejusdem speciei in eodem fundamento ad multiplicationem terminorum, ergo. Probatur antec. his instantis ; prima, genus, v. g. unica relatione refertur ad omnes species. Secunda, eadem numero potentia generativa respicit plures filios, Tertia, idem numero habitus, & eadem numero potentia vitalis respiciunt plures numero actus ; ergo eadem numero relatio plures numero terminos respicere potest. Resp. negando antec. Et ad instantias quibus illud probant, dicimus esse disparem rationem. Ad primam igitur resp. quod genus respicit omnes species unica relatione : quia omnes se habent, ut unus terminus illius ; neque enim genus potest terminari ad unam tantum speciem, sed necessario ad plures, at verò relatio, de qua loquimur, non necessario respicit plures terminos, sed unum tantum. Ad secundum.

cundam resp. quod potentia generativa, cum non depēdeat essentialiter in suo esse ab aliquo filio, imo possit existere nullo filio existente, potest eadem numero plures numero respicere, filios; at vero relatio, cum dependeat essentialiter in suo esse, & conservari a suo termino, necessario destruitur, suo destructo termino; unde nequit simul eadem numero plures numero terminos respicere, ut ex supradictis constat. Ad tertiam eodem modo respond. quia eadem est illius, ac præcedentis ratio. Deinde si huiusmodi paritas teneat, etiam probaret, fundamentum unica relatione referri ad plures terminos specie distinctos, quod neque adversarii admittunt. Patet sequela; nam eadem potentia, potest respicere plures actus, seu plura obiecta specie distincta, sicut respicit plures actus, seu plura obiecta distincta numero.

11 Argum. 2. Si in eodem fundamento essent plures relationes, v. gr. in homine plures paternitates, non diceretur unus, sed plures patres; hoc non admittitur; ergo neque debet admitti, quod in homine multipliciter paternitates ad multiplicationem filiorum. Resp. neg. mai. quia non multiplicantur concreta ad multiplicationem formarum accidentalium; sed etiam requiritur multiplicatio subiectorum; licet enim idem homo habeat plures habitus scientificos, non dicitur plures scientes, sed unus sciens; sic similiter in nostro casu, licet homo habeat plures paternitates, non dicitur plures patres, sed unus pater. Hoc tamen, si rectè intelligatur, videtur reduci ad quæstionem de nomine.

12 Argum. 3. Plura accidentia eiusdem rationis, solum numero distincta, nequeunt naturaliter simul esse in eodem subiecto; ergo plures paternitates, solum numero distinctæ nequeunt naturaliter esse simul in eodem homine. Resp. disting. antecedens; plura accidentia eiusdem ratio-

rationis, solum numero distincta, nequeunt naturaliter esse simul in eodem subiecto, si sint accidentia absoluta, admitto pro nunc, quia adhuc in hoc sensu, est dubium antecedens, de quo in Physica; si sint accidentia relativa, nego, & neg; conseq. Disparitas stat in hoc, quod accidentia absoluta, cum respiciant subiectum in se, eundem effectum formalem præstant, v. gr. albedo, ut quatuor, constituit subiectum formaliter album, ut quatuor, unde posito uno albo, ut quatuor superfluit aliud album, ut quatuor, ad talem effectum præstandum, & cum natura superfluum abhorreat, nequeunt simul naturaliter duo alba, ut quatuor, informare idem subiectum; at vero accidentia relativa non respiciunt fundamentum in se præcisè, sed in ordine ad terminum, unde multiplicatis terminis numero, possunt numero multiplicari relationes in eodem fundamento, quia non ad unum, sed ad plures effectus formales præstandos ordinantur.

## Q U Æ S T I O VII.

*Unde sumatur unitas, & distinctio relationum?*

1 **P**RO intelligentia quæstionis notandum est primo, unitatem prout ad præsens attinet, esse genericam, specificam, & numericam, ut dictum est loquendo de unitate formali, & similiter distinctionem esse genericam, specificam, & numericam oppositam prædictæ triplici unitati.

2 Notandum est 2. quod loquendo, tam de unitate, quam de distinctione intrinsecè, hæc desumuntur in relationibus ab ipsis entitatibus illarum, sicut in quolibet alio ente, eadem enim ratione, qua aliquid est ens, est unum, & distinctum a quolibet alio, quocumque genere uni-

unitatis, & distinctionis. Unde solum est difficultas de extrinsecis connotatis relationis, scilicet, fundamento, & termino; tam proximo, quam remoto, & sic sensus quæstionis erit, à quonam illorum, quoad nostrum modum concipiendi, desumatur unitas, vel distinctio relationum? His notatis, claritatis gratia.

3 Dicimus 1. Unitas, vel distinctio generica relationis desumitur, tam ex parte fundamenti, quam ex parte termini. Probatur prima pars; nam ubicumque est fundamentum genere diversum, ibi est relatio genere diversa: ut patet in tribus generibus relationis supra positis: ergo distinctio generica relationis desumitur ex parte fundamenti. Idem dicendum est suo modo de unitate. Secunda pars probatur similiter, quia sicut fundamenta prædictorum trium generum relationis differunt genere, ita similiter differunt termini: ergo etiam desumitur distinctio generica relationis ex parte termini.

4 Dicimus 2. Unitas, vel distinctio specifica relationis potest desumi, vel à fundamento remoto tantum, vel à termino remoto tantum, vel à fundamento, & termino remotis simul. Probantur prima, & secunda pars, quia in eodem fundamento remoto possunt fundari relationes specie diversæ, nam in unico pariete albo, ut quatuor, v. g. fundatur relatio similitudinis ad alterum parietem album, ut quatuor, & relatio dissimilitudinis, vel diversitatis ad parietem nigrum, & similiter in pariete albo, & nigro fundantur relationes specie diversæ, scilicet, similitudinis & dissimilitudinis, vel diversitatis, terminatæ ad unicum parietem album: ergo distinctio specifica relationis aliquando potest desumi à diversitate specifica solius fundamenti remoti, & aliquando à diversitate specifica solius termini remoti.

Pro-

Probatur tertia pars: nam in duabus relationibus, v. gr. quarum una sit identitatis, & altera æqualitatis, tam fundamenta remota, quam termini remoti, specie differunt: ergo diversitas specifica relationum potest desumi à diversitate fundamenti remoti, & termini remoti simul.

5 Ubi advertendum est, quod non semper colligitur distinctio essentialis, & specifica relationum ex diversitate essentiali, & specifica fundamenti remoti tantum, vel termini remoti tantum, vel fundamenti remoti, & termini remoti simul. Hoc patet, quia benè possunt fundari relationes ejusdem speciei in diversis specie fundamentis remotis, & terminari ad diversos specie terminos remotos, relationes enim similitudinis inter duo alba, vel duo nigra sunt ejusdem speciei, & tamen, tam fundamenta remota, quam termini remoti specie distinguuntur. Similiter benè possunt fundari relationes ejusdem speciei in eodem fundamento remoto, & terminari ad diversos specie terminos remotos; relationes enim diversitatis, quæ fundantur in homine, & terminantur ad equum, & leonem, sunt ejusdem speciei, & tamen termini remoti illarum sunt specie diversi item benè possunt fundari relationes ejusdem speciei in diversis specie fundamentis remotis, & terminari ad eundem terminum remotum: relationes enim diversitatis, quæ fundantur in leone, & equo, & terminantur ad hominem, sunt ejusdem speciei, & tamen fundamenta illarum specie differunt.

6 Dicimus 3. Unitas, vel distinctio specifica relationum semper desumitur ex parte fundamenti proximi. Hæc conclusio est communis consensus Philosophorum. Probatur quia quotiescumque fundamentum proximum relationum est specie diversum, toties relationes sunt specie diversæ; & similiter, quotiescumque fun-

fundamentum proximum est ejusdem speciei , toties relationes sunt ejusdem speciei , ut patebit discurrenti per omnia genera relationum : ergo unitas , vel diversitas specifica relationum semper desumitur ex unitate , vel diversitate fundamenti proximi. Idem dicendum est de unitate , vel distinctione generica.

7 Ubi advertendum est , quod sicut distinctio , vel unitas specifica relationum desumitur ab unitate , vel diversitate specifica fundamenti proximi , ita etiam desumitur ab unitate , & diversitate specifica termini proximi , quia nequeunt fundari diversæ relationes specie in diversis specie fundamentis proximis , quin simul terminentur ad plures specie terminos proximos , ut patebit discurrenti per quaslibet relationes . Versatur tamen hæc differentia inter fundamentum , & terminum , quod a fundamento specificatur relatio Initiativè radicaliter , & quasi in genere causæ materialis , à termino verò completivè , & quasi in genere causæ formalis.

8 Dicimus 4. Distinctio numerica relationis desumitur , tam ex parte fundamenti proximi , quam ex parte termini proximi simul sumptis , non tamen ex parte cujuslibet seorsim . Idem dicendum est de unitate numerica . Probatur ; quia quotiescumque fundamentum proximum , & terminus proximus sunt eadem numero , toties relatio est eadem numero , & è contra , quotiescumque fundamentum proximum , & terminus proximus sunt numero distincta à fundamentis proximis , & terminis proximis aliarum relationum , toties relationes sunt numero distinctæ . Deinde in eodem fundamento proximo possunt fundari plures numero relationes , ut dictum est quæst. antec. Denique unus numero terminus proximus potest terminare plures numero relationes , ut constat etiam ex dictis quæstione antecedenti ; nam sicut in poten-

tia

ria generativa patris una numero fundantur plures numero relationes paternitatis ad plures filios, ita in pluribus filiis fundantur plures numero filiationes terminatæ ad potentiam generativam patris : ergo unitas, vel distinctio numerica relationum desumitur ex unitate, vel distinctione numerica fundamenti, & termini proximi simul, non verò ex unitate, vel distinctione numerica fundamenti, vel termini proximi seorsim.

9 Dubitabis, an relatio accipiat suum esse à solo fundamento, an verò à fundamento, & termino simul? Respondetur relationem accipere suum esse à solo fundamento. Probatur, nam relatio habet esse per resultantiam: sed solum resultat à fundamento: ergo à solo fundamento recipit suum esse. Neque obstat, si dicas: relationem non minus dependere à termino, quam à fundamento, & sic ab utroque habere suum esse: nam dicimus, quod licet ab utroque dependeat, dependet tamen diversimodè; a fundamento enim deēpdet dependentia *à quo*, quia fundamentum est, à quo resultat relatio, à termino verò dependet dependentia *ad quem*; quia terminus est ad quem ordinatur relatio, unde solum à fundamento habet suum esse.

## QUÆSTIO VIII.

*Quanam sint proprietates relationis?*

1 **A** Rist. in hoc capite quatuor assignavit proprietates relationum, seu relativorum. Prima est, habere contrarium. Secunda, suscipere magis, & minus. Tertia, dici ad convertentiam. Quarta, esse simul natura, cognitione, & definitione. Circa quas proprietates aliquæ difficultates excitantur ab Authoribus, quæ & quia plus confusionis, quam utilitatis afferunt, & quia non sunt magni momenti, bre-



brevitate possibili discutiendæ a nobis sunt .  
Igitur

2 Circa primam proprietatem potest dubitari, an conveniat, non solum relationibus, seu potius relativis secundum dici, sed etiam relationibus, seu relativis secundum esse conveniat? Aliqui dicunt, solum convenire relativis secundum dici, nam inquit, non loquebatur Arist. ex propria mente, sed ex mente aliquorum definientium relationem, seu relativum secundum dici, ut sunt *virtus*, & *vitium*, *error*, & *scientia*; imò ipse Arist. cap. de quant. dicit, relationi nihil esse contrarium, & intelligitur de relatione secundum esse.

3 Alii autem dicunt, prædictam proprietatem etiam convenire relationibus secundum esse, licet non ratione sui, saltem ratione fundamenti, quod aliquando est qualitas, quæ propriè habet contrarium, sed hoc nihil aliud est, quam dicere, quod aliquando fundamentum relationis potest habere contrarium, quod cum non conveniat fundamento, scilicet, qualitati, ratione relationis, adhuc fundamentaliter, seu quatenus est fundamentum relationis, sed ratione sui, præscindendo ab hoc, quod sit, vel non sit fundamentum relationis, nihil conducit ad contrarietatem relationum. Unde

4 Videtur dicendum, quod rigorosè, & loquendo de contrarietate propriè dicta, non convenit relationibus secundum esse habere contrarium, quia contraria, propriè dicta, ab eodem subiecto mutuo se expellunt, ut patet in calore, & frigiditate, sed relationes non se mutuo expellunt ex natura sua ab eodem subiecto; ergo relationes non possunt dici contrariæ contrarietate propriè dicta. Probat. min. quia si relationes aliquando nequeunt esse simul in eodem subiecto, hoc non provenit ex ratione formali relationum, sed ex impossibilitate fundamentorum, nam relatio identitatis

quæ fundatur in uno individuo humanitatis, respectu alterius, & relatio diversitatis, quæ fundatur in equo, respectu hominis, ideò non possunt esse simul in eodem subiecto, quia fundamenta illarum sunt impossibilia; non verò, quia ipsæ relationes secundum se sunt impossibiles, nam in unico individuo humanitatis possunt simul esse relatio identitatis, respectu alterius individui humanitatis, & relatio diversitatis, respectu equi; ergo relationes ex natura sua non se mutuò expellunt, seu non sunt impossibiles in eodem subiecto, sed hoc tantum convenit illis propter impossibilitatem fundamentorum, & consequenter relationes non possunt dici contrariæ contrarietate propriè dicta.

5 Possunt tamen dici relationes contrariæ, contrarietate, latè sumpta, id est sumpta pro aliqua oppositione: quod non est intelligendum, ita ut relationes semper aliquomodo opponantur, sed ita ut semper, quod sint impossibiles modo dicto ratione fundamentorum, possint dici aliquomodo contrariæ. Ubi advertendum est, quod licet relationes ex natura sua opponerentur, adhuc non dicerentur contrariæ, contrarietate propriè dicta, quia talis contrarietas tantum datur inter illa, quæ sunt divisibilia ratione intensificationis, relationes autem non sunt sic divisibiles, ut infra patebit.

6 Circa secundum proprietatem est simile dubium, an scilicet, suscipere magis, & minus conveniat, tam relativis secundum esse, quam secundum dici? Aliqui similiter dicunt, tantum convenire relativis secundum dici, propter eandem rationem, ac primam proprietatem. Similiter alii dicunt, convenire etiam relationibus secundum esse ratione fundamenti, eo quod aliquando est qualitas, quæ recipit magis, & minus, sed hoc, ut dictum est

est circa primam proprietatem, nihil conducit ad relationem.

7 Diversimodè tamen alii explicant, hanc proprietatem convenire relationibus secundum esse ratione fundamenti, quia scilicet, intenso, vel remisso fundamento, potest intendi, vel remitti relatio; naminquiunt, album ut quatuor, est simile alteri albo, ut quatuor, si autem remittatur fundamentum, ita ut auferatur ab illo, v. gr. unus gradus albedinis, ut tantum remaneat album, ut tria, adhuc est simile albo, ut quatuor: sed jam est minus simile, quam antea erat: ergo relatio similitudinis recipit magis, & minus, eo quod magis, & minus recipit fundamentum.

8 Dicendum tamen videtur, relationes secundum esse nullatenus recipere magis, & minus. Probatur, quia si aliquando relationes reciperent magis, & minus, maximè in casu supra posito, & aliis similibus, sed non in tali casu; ergo. Prob. min. quia relatio similitudinis fundatur in unitate graduali qualitatis, sed in supradicto casu, ablato uno gradu ab albo, ut quatuor, non datur inter illa duo alba unitas gradualis; nam hæc solum datur inter æquales gradus; ergo ablato illo gradu, non remanet relatio similitudinis inter illa duo alba, & consequenter relatio similitudinis non recipit magis, & minus. Unde.

9 Resp. ad fundamentum oppositæ sententiæ, nego mai. quia, ut dictum est in nostra ratione, album, ut tria non dicit relationem similitudinis ad album, ut quatuor, imo dicit relationem dissimilitudinis, propter defectum unitatis gradualis, videantur quæ diximus loquendo de relationibus secundi generis.

10 Advertendum tamen est, quod relationes, quæ fundantur in qualitate possunt dici, recipere magis, & minus ratione fundamenti,

& termini in hoc sensu, scilicet, quod relatio similitudinis inter duo alba, ut quatuor, v. gr. est major similitudo, seu similitudo qualitatum majoris intensiōis, quam relatio similitudinis, quæ fundatur inter duo alba, ut duo, & sic debet intelligi Scotus, quando quæst. 26. prædicamentali dicit, quod relationes fundatæ in qualitate, recipiunt magis, & minus ratione fundamenti.

11 Tertia proprietas, scilicet, dici ad convertentiam, convenit relationibus in concreto, & sic debet intelligi, quod una relatio in obliquo enuntietur de alia, & è converso, v. g. *pater alicuius filii est pater: filius alicuius patris est filius.*

12 Quarta proprietas, scilicet esse simul natura cognitione, & definitione, convenit relationibus in concreto. Patet, quia illa dicuntur simul natura, quorum unum non est principium alterius, nec latius altero patet, sine illo tamen existere non potest. Deinde illa dicuntur simul cognitione, quorum unum nequit cognosci sine alio. Denique illa dicuntur simul definitione, quorum unum definitur per aliud, & è converso: hæc omnia conveniunt relationibus in concreto, ut ex se patet: ergo prædicta proprietas convenit relationibus in concreto. Videantur, quæ diximus quæst. 5. huius disp. a n. 16. usque ad 19. Hæc duæ proprietates conveniunt in quarto modo relationibus.

## D I S P. V.

### *De qualitate quarto prædicamento.*

**P**ostquam cap. 7. egit Arist. de prædicamento ad aliquid consequenter cap. 8. agit de prædicamento qualitatis, de quo & nos ipsum sequentes in præsentia agimus: Sit ergo

QUÆ.

# Q U Æ S T I O I.

*Quid sit qualitas, seu quomodo definiatur?*

1 **P**RO intelligentia questionis notandum est, qualitatem tripliciter accipi posse. Primò, prout dicit differentiam essentialem cujuscunque rei, ideòque dicitur, differentiam prædicari in quale quid. Secundò, prout significat quodcumque accidens, quo sensu similiter dicitur, accidens in quale convenire, seu prædicari. Tertiò, prout significat quoddam accidens peculiare constitutivum huius prædicamenti, ut ab aliis distincti, quod accidens sic Arist. definivit: *Qualitas est, qua quales esse dicimur*. Circa quam definitionem est difficultas, an rectè per illam qualitas definiatur? Pro qua.

2 Supponitur tanquam certum, essentiam qualitatis esse nobis ignotam, unde quæcumque qualitatis definitio tantum est quædam descriptio, seu explicatio qualitatis, vel secundum aliquam proprietatem, vel secundum aliquem effectum nobis notum. Nunc.

3 Dicimus; per prædicta verba Arist. sufficienter explicatur, seu describitur qualitas. Hæc conclusio est communis inter Philosophos, licet aliqui oppositum tenere videantur. Probatur; quia per prædicta verba explicatur effectus primarius formalis qualitatis, in quo distinguitur à differentia essentiali, quæ non dicit *quale* tantum, sed quale quid, similiter differt ab aliis accidentibus, à quibus subiectum non propriè, & strictè *quale*, sed *quantum*, vel *relatum* denominatur: ergo per prædicta verba sufficienter explicatur, seu describitur qualitas. Ubi advertendum est, quod in prædictis verbis Arist. subintelligitur *accidens* seu *entitas accidentalis*; ita ut sensus illarum sit:

*Qualitas est accidens, quo quales esse dicimur.* Neque propter hoc processit Arist. diminutè, nam dum loquebatur de qualitate, supponebat, esse membrum dividens accidens in communi.

4 Arg. contra, primò; quia per prædicta verba describitur ignotum per æquè ignotum, scilicet, *qualitas per quale*; ergo non est bona descriptio. Resp. neg. ant. nam *quale* notius est quoad nos, quam *qualitas*; concretum enim, notius est abstracto, experientia quidem patet, & tenet Arist. 7. Met. c. 1. quod notior est nobis sapiens: aut iustus, quem ex operibus deprehendimus, quam ipsa sapientia, & iustitia, quam sola mente apprehendimus. Unde qui definitionem propriè sumptam, albedinis ignoraret, non male explicaret albedinem, dicendo, esse formam, qua subiectum est album. Similiter dicendum est de qualitate in communi:

5 Arg. 2. Arist. definivit *quale* per ordinem ad qualitatem; ergo non benè definitur *qualitas* per ordinem ad *quale*, nam committitur circulus vitiosus. Resp. neg. conseq. quia Arist. definivit *quale* in ordine ad qualitatem, postquam supposita explicatione specierum qualitatis, ipsam qualitatem reddit notiozem, unde non committitur circulus vitiosus, quia definivit qualitatem ignotam per effectum formalem illius magis notum quoad nos; *quale* verò definivit per qualitatem, quæ est notior natura, & supposita explicatione suarum specierum, aliquomodo nobis notior; circulus tamen vitiosus solum datur, quando non intervenit aliqua variatio in definitione, & definito.

6 Arg. 3. Si per prædicta verba rectè describeretur, seu explicaretur *qualitas*, etiam *quantitas* rectè describeretur, seu explicaretur per hæc verba: *Quantitas est qua quanti esse dicimur*, quod non debet admitti. Resp. conced. sequel. & neg. quòd hoc non debeat ad-

admitti, nam sicut benè explicatur qualitas per prædicta verba, eo quod reddere quale est effectus formalis illius, ita benè explicatur quantitas modo dicto, eo quod reddere, quantum est effectus formalis illius. Tamen aliter suo loco quantitas describitur quia sunt aliquæ proprietates quantitatis nobis notæ, per quas ipsam quantitatem possumus explicare, sed hoc non impedit, quod per prædicta verba, tanquam per effectum formalem, rectè describatur quantitas. Similiter, licet possint adduci aliæ descriptiones qualitatis, juxta aliquas proprietates illius, de quibus infra, hoc non impedit, ut etiam rectè describatur per prædicta verba, tanquam per effectum formalem.

7 Plures definitiones, seu descriptiones qualitatis solent adduci ab Authoribus, juxta proprietates qualitatis, sed quia solet esse molesta controversia circa proprietates, & consequenter circa descriptiones qualitatis, quæ traduntur per illas, quæ controversia parum utilitatis, & multum confusionis adducit plures descriptiones qualitatis omittimus videndas apud recentiores, præcipuè apud nostrum Mer. disp. de prædicam. cap. 1. q. unic. Nos autem aliquid breviter dicemus loquendo de proprietatibus qualitatis.

## Q U Æ S T I O II.

### *Quomodo qualitas dividatur?*

1 **A**RIST. in hoc capite in quatuor membra divisit qualitatem, scilicet, in habitum, & dispositionem, in potentiam, & in impotentiam; in passionem, & passibilem qualitatem, & in formam, & figuram. Circa quam divisionem est dubium, an sit generis in species? Sed quia ad resolutionem illius necessaria est cognitio membrorum dividendium; ideo præ-

sentem quæstionem in duas sectiones dividemus, in quarum prima de prædictis membris . tam quoad sensum Arist. quam quoad intelligentiam aliquorum Philosophorum, agemus , & in secunda dubium resolvemus .

## S E C T I O I.

### *De membris dividendis qualitatem.*

1 **U**T claritate possibili procedamus , sigillatim de quolibet ex prædictis membris sermonem instituimus.

### De habitu , & dispositione .

3 Per habitum intelligit Arist. illas qualitates, quæ difficulter à subjecto moveri possunt ex quocumque capite proveniat talis difficultas, ut sunt scientiæ, v. g. in gradu intenso . Per dispositionem intelligit qualitates, quæ faciliè à subjecto moveri possunt ex quocumque capite proveniat hæc facilitas, ut sunt, juxta ipsum Arist. calor, frigus, morbus, sanitas, &c. In hoc sensu, dicunt aliqui, scientias habituales in gradu remisso non dici propriè habitus, sed dispositiones, & licet omnes actus potentiarum communiter reducantur ad dispositionem, tamen si quando contingat, quod ex aliquo capite sint difficilè mobiles à subiecto, ut contingit in actibus beatificis, tunc non dispositiones, sed habitus nuncupantur.

4 In sensu verò rigoroso, in quo accipiuntur prædicta membra à pluribus Philosophis : *Habitus est qualitas insensibilis potentia naturalis superveniens, ab ea difficilè mobilis, & eam determinans circa suum obiectum* . Unde ( inquiunt ) ad rationem habitus requiritur, quòd non sit qualitas sensibilis, in quo differt à tertio, & quarto membrò divisionis, quæ sunt qualitates

tes



test sensibiles. Requiritur etiam, quòd superveniat potentia naturali, id est, quod non oriatur ex principiis intrinsecis nature, sed quod proveniat ab extrinseco, in quo differt à secundo membro. Similiter requiritur, quòd sit difficile mobilis à subiecto, quæ difficultas debet provenire ex ipsa natura qualitatis, non tamen ab aliquo extrinseco, seu debet convenire per se qualitati, & non per accidens. Denique requiritur, quòd determinet potentiam circa suum objectum, nam habitus datur ad operationem circa objectum determinatum. Huiusmodi sunt omnes habitus scientifici, & habitus virtutum, & vitiorum, etiam in gradibus remissis, nam licet actualiter sint facile mobiles à subiecto tamen ex natura sua exigunt, esse difficile mobiles ab illo.

5 Similiter dispositio rigorose sumpta est *qualitas insensibilis facile mobilis à subiecto, potentia naturali superveniens, & eam determinans circa suum objectum*. Unde sequitur, idem requiri ad dispositionem, quod requiritur ad habitum, præter hoc, quod habitus sit difficile mobilis, dispositio verò facile mobilis à subiecto, quæ facilitas (sicut dictum est de difficultate habitus) debet provenire ex ipsa natura qualitatis, non tamen per accidens, seu ab extrinseco. Huiusmodi sunt species, tam impressæ, quàm expressæ, & actus potentiarum, licet aliquando ab extrinseco sint difficile mobiles à subiecto.

6 Unde deducitur; habitum, & dispositionem in sensu Aristot., solùm accidentaliter differre; in sensu verò riguroso differre essentialiter, & specificè. Prima pars patet, quia in primo sensu solùm differunt habitus, & dispositio per magis, & minus, nam scientia in gradu intenso dicitur habitus, & in gradu remisso dicitur dispositio, & certum est, magis, & minus non variare speciem. Similiter patet secunda pars; quia qualitas, quæ ex natura sua exigit facile à

subiecto moveri, nequit esse ejusdem rationis essentialis, cum qualitate, quæ ex natura sunt exigit, difficile moveri à subiecto; sed habitus ex natura sua exigit, difficile moveri à subiecto, dispositio verò exigit, facile à subiecto moveri; ergo habitus nequit esse ejusdem rationis, & speciei, ac dispositio. Major patet, quia quod ex intrinseca natura sua exigit aliquid, quod aliud non exigit, necessario habet aliquod prædicatum intrinsecum, quod non habet illud aliud, sed quod habet aliquod prædicatum intrinsecum, quod non habet aliud, essentialiter distinguitur ab illo; ergo.

### De potentia, & impotentia.

7 Per potentiam naturalem intelligit Arist. illas qualitates, quibus faciliter aliquid agimus, aut quibus fortiter contrariis resistimus, ut sunt, agilitas ad currendum, durities ad resistendum. Per impotentiam intelligit, non negationem potentiae, sed imbecillitatem, seu potentiam in gradu remisso ad agendum, seu resistendum contrariis, ut est durities, in ordine ad agendum, & mollities in ordine ad resistendum. In sensu autem rigoroso Philosophorum; *Naturalis potentia est qualitas insensibilis ex intimis principiis naturæ promanans, facultatem naturalem determinans ad facile operandum, vel patiendum.* Per hoc, quod sit qualitas insensibilis, convenit cum habitu, & dispositione, & differt à duobus sequentibus membris. Per hoc, quod dimanet ex intimis principiis naturæ, differt ab habitu, & dispositione. Per hoc, quod determinet facultatem naturalem ad facile operandum, vel patiendum, differt ab ipsa naturali facultate. Huiusmodi est in ordine ad agendum, agilitas ad currendum, nam est qualitas insensibilis  
orta

orta ex principiis naturæ, & determinans potentiam cursum ad facile currendum, & in ordine ad patiendum quædam complexio corporis, qua quis redditur facilis, seu proculivis ad infirmitatem. *Impotentia verò est qualitas insensibilis ex intimis principiis. natura permanens facultatem naturalem determinans ad difficile operandum, vel patiendum.* Unde constat, idem inveniri in potentia, ac in impotentia præter hoc, quòd potentia ad facile, impotentia vero ad difficile operandum, vel patiendum. Huiusmodi est in ordine ad agendum, tarditas ad currendum, hebetudo ingenii ad discurrendum, & eadem hebetudo ingenii, & imbecillitas memoriæ ad recipiendas, & conservandas species.

8 Unde constat, quòd neque in sensu Arist. neque in sensu rigoroso potentia, & impotentia essentialiter distinguunt, sed tantum accidentaliter. Prima pars patet, & simul secunda, quia eadem vis ad videndum; v. g. in homine, si comparatur cum debilitate videndi Bubonis, dicitur potentia, si autem comparatur cum acutissima vi videndi Lincei, dicitur impotentia, seu imbecillitas. Similiter eadem complexio, ut proclivis ad infirmitatem, dicitur potentia patiendi, & imbecillis ad resistendum contrariis, dicitur impotentia. Deinde absolute loquendo, potentia, & impotentia solum distinguuntur in hoc, quòd potentia dicit vim intensam agendi, vel patiendi, impotentia verò dicit vim remissam, seu debilem, & certum est, quòd magis, & minus non variant speciem; ergo in quocumque sensu potentia, & impotentia non distinguuntur essentialiter, seu specificè, sed ad summum accidentaliter.

## De passione, & passibili qualitate.

9 Per passibilem qualitatem intelligit Arist: qualitates, quæ vel passionem efficiunt, vel efficiuntur à passione, & sunt difficile mobiles à subiecto, ut est dulcedo in mele, v. g. albedo in Cygno. Per passionem verò intelligit ipsas qualitates, ut sunt facile mobiles à subiecto, v. g. pallor ex metu, rubor ex verecundia. In eodem sensu accipiuntur communiter à Philosophis passio, & passibilis qualitas, unde sic communiter definiuntur: *Passio est qualitas sensu externo primò perceptibilis facile mobilis à subiecto*. Per hoc, quòd sit sensu externo perceptibilis, differt à duobus præcedentibus membris qualitatis. Per hoc, quòd sit primò sensibilis, differt à quarto membro; *Passibilis qualitas est sensu externo perceptibilis primò difficile mobilis à subiecto*. Ex quo cognoscitur, idem inveniri in passione, ac in passibili qualitate, præter hoc, quòd una sit facile, altera verò difficile mobilis à subiecto.

10 Hic solet dubitari, an qualitas hoc membrum constituens, nomen passionis, vel passibilis qualitatis recipiat à passione, quàm causat, vel à passione, qua causatur? Ad quod breviter respondetur, quòd tale nomen accipit à passione, quam causat in potentia, cujus est objectum. Cuius ratio videtur, quòd omnes qualitates ad hoc membrum pertinentes, causant passionem in sensibus, licet non physicam, sed intentionalem, at verò non omnes causantur ab aliqua passione, nam licet rubor aliquando causetur à verecundia, tamen rubor in lapide, v. g. non causatur ab aliqua passione; ergo tale nomen accipit qualitas, ut constituit hoc membrum, non à passione, à qua causatur, sed à passione, quam causat in sensibus;

Et

Et hoc videtur expressum, tam juxta mentem Arist. qui in hoc capite dicit; *Qualitates passivæ dicuntur, non idèò quòd ea qua suscepunt passivæ, aliud sunt: sed quia qualibet qualitas insensibilis est efficax*, quàm juxta mentem Angelici Doctoris, qui 3. part. quæst. 63. art. 2. ad 2. dicit: *In tertia specie qualitatis non sunt nisi sensibiles passionēs, & sensibiles qualitates*. Et etiam juxta mentem subtilis Doctoris, qui quæst. 36. prædicam. §. *Ad omnes istas quæstiones*, dicit differentiam, seu modum, per quem ista species constituitur, & distinguitur ab aliis, consistere in hoc quod est, esse primò sensibilem.

11 Unde constat, passionem, & passibilem qualitarem, non essentialiter, sed tantùm accidentaliter differre, nam tantùm per facilitè, vel difficilè moveri à subiecto, quod est quid accidentale, distinguuntur; eadem enim qualitas, v. g. pallor, potest esse color naturalis, & ut sic diù permanens, & difficilè mobilis à subiecto, & potest esse color citò transiens, & facilè mobilis à subiecto, ut cùm oritur ex verecundia; ergo passio, & passibilis qualitas, non essentialiter, & tantùm accidentaliter differunt.

## De forma, & figura.

12 Per formam intelligit Arist. varias dispositiones corporum, secundùm quas alia dicuntur formosa, alia difformia. Per figuram intelligit dimensiones mathematicas quantitatis, hoc vel illo modo dispositas. In eodem sensu communiter accipiuntur à Philosophis, & sic describuntur; *Forma est qualitas externa proveniens ex varia terminatione quantitatis in materia, vel in composito considerata*. Per hoc, quòd sit qualitas externa, differt à primo.

&

& secundo membro qualitatis, & per hoc, quod proveniat ex terminatione quantitatis, differt à tertio membro, nam ex hoc sequitur, quod non sit primò sensibilis sed ad summum, secundo sensibilis, quippè non est objectum proprium alicujus sensus, licet objecta propria sensuum supponat: *Figura est qualitas externa proveniens ex varia terminatione quantitatis secundum se considerata.* Ex quo patet, quod forma, & figura solùm differunt in hoc, quod forma supponit quantitatem affectam accidentibus sensibilibus; figura verò tantum respicit quantitatem secundum se ab accidentibus sensibilibus abstrahentem. Aliter solet ab aliquibus explicari forma, & figura, sed coincidit cum præcedenti explicatione.

13 Unde constat, formam, & figuram, non essentialiter, sed tantum accidentaliter differre in ratione qualitatis. Ratio est, quia solùm differunt in hoc quod forma respiciat quantitatem, ut affectam accidentibus sensibilibus; figura verò respiciat quantitatem à prædictis accidentibus abstrahentem, quod ut ex se patet, tantum est accidentaliter differentia ad rationem qualitatis.

14 Circa formam, & figuram solet dubitari, an constituent veram speciem qualitatis? Scotus videtur tenere partem negativam; inquit enim in i. dist. 17. quæst. 2. §. *Quantum ad istum articulum*, sub litt. O *Pulchritudo non est aliqua qualitas absoluta in corpore pulchro; sed est aggregatio omnium convenientium tali corpori, puta magnitudinis, figura, & coloris, & aggregatio omnium respectuum, qui sunt istorum ad corpus, & ad se invicem.* Deinde potest probari hac ratione; forma, & figura possunt considerari materialiter, & formaliter; sed neutro modo sunt species determinata qualitatis: ergo. Prob. min. quia materiale figuræ est dimensio quantitativa, quæ pertinet ad prædicamen-

mentum quantitatis; formale verò est habitudo, seu ordo partium talismensuræ; quæ habitudo, si consideretur in ordine ad locum, pertinet ad prædicamentum *ubi*, si autem consideratur in ordine ad se, pertinet ad prædicamentum *Situs*. Similiter, materiale formæ est prædicta dimensio quantitatis affecta accidentibus sensibilibus, & sic partium pertinet ad prædicamentum quantitatis, & partim ad prædicamentum qualitatis, prout constituit tertium membrum supradictum; formale verò est ordo, seu habitudo prædictarum partium quantitatis affectæ prædictis accidentibus, quæ habitudo, ex parte quantitatis, pertinet, vel ad prædicamentum *ubi*, vel *situs*, ut supradictum est, & ex parte accidentium sensibilium, ad prædicamentum *ad aliquid*; ergo nihil invenitur ex parte formæ, & figuræ, quod constituat determinatam speciem qualitatis. Aliqui Scotistæ explicant supradicta verba Scoti, intendentes, formam, & figuram constituere determinatam speciem qualitatis. Sed in hoc non amplius immoramur, & quia non magni momenti, & ut à prolixitate, & confusione deviemus. Videatur tamen noster Merinero cap. 8. categ. disp. unica de qualitate, quæst. 4. sect. 4. Nunc præcipua difficultas est, an qualitatis divisio in tria membra, supra assignata, sit generis in species? Pro qua sit.

## S E C T I O    II.

*An prædicta divisio sit generis in species?*

15 **D**icimus; prædicta divisio, in sensu Arist. non est essentialis, seu generis in species, sed tantum accidentalis, seu modalis; in sensu verò, in quo communiter accipiuntur à Philosophis membra dividentia, est  
ef,

essentialis, & generis in species. Hæc conclusio, quoad utramque partem, videtur esse Scoti; nam in 4. dist. 6. quæst. 10. §. *Ad questionem*, vers. *Sed hoc*, litt. N. dicit: *Secundum veritatem illa divisio qualitatis in quatuor species, non est propriè generis in species, sed est tantum secundum quosdam modos diversos convenientes diversis qualitatibus*. Deinde Arist. in hoc capite prædictas qualitates vocat modos, & non species, nam, inquit; *Fortassis autem, & quidem alius qualitatis modus esse videbitur*. En quomodo ex mente Arist. tenet Scotus, prædictam divisionem non esse generis in species.

16 Et ratio deducitur, tam ex ipso Arist. qui confundit cum habitu, & dispositione passionem, & passibilem qualitatem (enumerat enim inter habitum, & dispositionem calorem, & frigus; & similiter inter passionem, & passibiles qualitates) quam ex ipso Scoto, qui loco citato, sic prosequitur: *Et forte eidem qualitati in se secundum essentiam possent competere plures modi, qui ponuntur in diversis qualitatibus*: sed eadem essentialis differentia nequit competere pluribus speciebus: ergo iuxta prædictum sensum Arist. prædicta divisio non est generis in species.

16 Confirmatur claritatis gratia: nam calor, v. g. nequit pertinere ad plures species qualitatis; sed iuxta sensum Arist. potest pertinere ad tria prædicta membra: ergo signum est, quod illa membra, ut ab Arist. assignantur, non sunt species diversæ qualitatis. Minor pater; nam calor, ut est difficile mobilis ab igne, potest dici *habitus*; & ut est facile mobilis ab aqua, potest dici *dispositio*: ut autem est virtus ad operandum in igne, potest dici potentia naturalis. ut verò est qualitas primo sensibilis, potest dici *passio*, vel *passibilis qualitas*: ergo calor, iuxta sensum Arist. potest pertinere ad tria prædicta membra; & consequenter talis di-



divisio non est generis in species.

18 Deinde Scotus quæst. 30. prædicamentali, inquit : *Dicendum est ; concedendo has differentias esse accidentales , quæ hic assignantur ; tamen forma , quas ista differentia consequuntur , tamquam proprietates earum , sunt essentialiter qualitates* . En quomodo ex mente Scoti , in aliquo sensu potest dici prædicta divisio generis in species . Ubi advertendum est , quod , licet Scotus in eodem loco dicat ; primam speciem qualitatis non videri sumi pro aliqua differentia positiva distincta à differentiis aliarum specierum ; hoc non dicit , ut benè advertit Meron disp. de prædicam. cap. 2. de qualitat. quæst. 6. assert. 2. eo quod neget absolutè , habitum habere veram differentiam essentialem ; sed quia talis differentia est admodum ignota , iuxta sensum Arist. qui tantum loquitur de habitu , ut est difficilè mobilis à subiecto ; quod etiam convenit passibili qualitati .

19 Probatur ratione : quia omnes prædictæ qualitates participant rationem qualitatis in communi , & differunt per differentias essentielles : sed hoc tantum requiritur ad divisionem generis in species : ergo prædicta divisio est generis in species . Major , quoad secundam partem , probatur ; quia qualitas , quæ ex natura sua exigit , esse innatam rei , cui inhæret , & oriri à principiis ejus intrinsecis , distinguitur essentialiter à qualitate , quæ ex natura sua exigit , non esse innatam , nec oriri à principiis intrinsecis rei , cui inhæret , sed tantum provenire illi ab extrinseco . Deinde qualitas , quæ ex natura sua exigit , esse insensibilis sensu externo , distinguitur essentialiter à qualitate , quæ ex natura sua exigit , esse sensibilis sensu externo : sed habitus , & dispositio exigunt ex natura sua non esse qualitates innatas rei , cui , inhærent , neque oriri à principiis ejus intrinsecis , imò exigunt , illi provenire ab extrinseco ; at verò

naturalis potentia, & impotentia exigunt, esse qualitates innatas rei, cui inhærent, & oriri à principiis intrinsecis illius: ergo naturalis potentia, & impotentia essentialiter, & specificè distinguuntur ab habitu, & dispositione. Deinde, qualitates per se sensibiles essentialiter distinguuntur à qualitatibus per se insensibilibus sed prædictæ qualitates sunt per se insensibiles; passio verò, & passibilis qualitas sunt per se sensibiles: ergo essentialiter, & specificè distinguuntur, & consequenter prædicta divisio, in hoc sensu; est generis in species.

20 Hic solet dubitari, an prædicta divisio sit adæquata? Resp. affirmativè cum communi consensu Philosophorum. Probatur; quia qualitas, vel est interna, aut externa? Si interna: aut est innata rei, cui inhæret, & oritur ex principiis intrinsecis illius, & sic est potentia, seu impotentia naturalis. Aut non est innata, nec oritur ex principiis intrinsecis rei, sed provenit illi ab extrinseco, & sic est habitus, & dispositio. Si est externa, erit passio, & passibilis qualitas; quia hæ sunt qualitates sensibiles. Ubi adverte, quod si forma, & figura sint qualitates, sunt qualitates externæ, & distinguuntur à passione, & passibili qualitate; quia forma, & figura ad summum sunt secundò sensibiles, non autem primò sensibiles, ut sunt passio, & passibilis qualitas: sed præter has qualitates nulla alia est assignabilis: ergo prædicta divisio est adæquata. Minor patebit discurrenti per omnes qualitates, quas valdè molestum esset recensere.

21 Neque obstat, Arist. in hoc capite dixisse: *Fortassis autem quidam alius qualitatis modus esse videbitur*; nam ut communiter tenent Philosophi, hoc non dixit, quasi judicaverit, prædictam divisionem non esse adæquatam, sed qua genus qualitatis amplissimum est, & ipse non tradiderat, nec fortè invenerat sufficientem.

cientiam prædictæ divisionis; si enim iudicaret, prædictam divisionem non esse adæquatam, eò esset, quia alias qualitates invenisset, cum tamen de nulla alia qualitate, præter supradictas, sermonem instituatur, videtur, nullam aliam invenisse. Unde ex verbis Arist. non rectè deducitur, prædictam divisionem non esse adæquatam ex mente illius.

22 Advertendum tamen est, quod prædicta divisio non est immediata, nec infima, nam, immediatè dividitur qualitas in internam, & externam, seu in sensibilem, & insensibilem. Deinde interna, seu insensibilis dividitur in habitum, & dispositionem, in potentiam, & in impotentiam. Similiter externa, seu sensibilis fortè dividitur in primò sensibilem, scilicet in passionem, & passibilem qualitatem, & in secundo sensibilem, scilicet in formam, & figuram. Ex quo constat, supradictam divisionem non esse immediatam. Ulterius, quælibet ex prædictis subdividitur in serè innumeras species. Unde constat, prædictam divisionem non esse ultimam, seu infimam, sed dicendam esse generis in species subalternas. Coordinatio huius prædicamenti constat ex dictis.

### QUÆSTIO III.

*Quanam sint proprietates qualitatis?*

1 **A**rist. in hoc capite tres assignavit proprietates qualitatis, scilicet, *habere contrarium, suscipere magis, & minus secundum intensiorem; & reddere simile, vel dissimile.* Pro quarum intelligentia.

2 Dicimus 1. Prima proprietas, scilicet, *habere contrarium*, sumpta contrarietate rigorosè, modo explicato disp. de substantia, quæst.

quæst. 3. num. 4. soli qualitati, non tamen omni convenit. Quod conveniat qualitati, patet; nam calor, & frigus, v.gr. sub eodem genere maximè distant, & ab eodem subiecto gradatim mutuò se expellunt, quod est proprium contrarietatis propriè dictæ. Quod conveniat soli qualitati, patet etiam: quia neque substantiæ, neque quantitati, neque relationi, ut tali formaliter, convenit, ut dictum est loquendo de proprietatibus illarum; neque convenit sex ultimis prædicamentis, ut omnes fatentur. Quod autem non conveniat omni qualitati, similiter patet; quia lux, & figura non habent propriè contrarium neque colores intermedii, ut hic notat Arist. nam non maximè distant sub eodem genere. Idem dicendum videtur de speciebus intentionalibus, & de habitibus infusis supernaturalibus.

3 Dicimus 2. Secunda proprietas, scilicet, *suscipere magis, & minus secundum intensiorem*, similiter convenit soli, sed non omni qualitati. Quod conveniat soli qualitati, patet, sicut de proprietate antecedenti, dictum est. Quod non conveniat omni qualitati, etiam patet, quia figura, & aliæ qualitates ab aliquibus assignatæ, non suscipiunt magis, & minus secundum intensiorem. Unde constat, duas prædictas proprietates tantum in primo modo convenire qualitati. Et similiter constat, non benè describi qualitatem per aliquam ex prædictis proprietatibus, quia similis descriptionequit omni qualitati convenire.

4 Dices: hæ proprietates conveniunt relativis, & etiam actioni, nam Arist. eas numeravit inter proprietates actionis, & relativorum: ergo non conveniunt soli qualitati. Resp. prædictas proprietates solum convenire relativis secundum dici, quæ pluries sunt.

sunt qualitates: & si fortè conveniunt relativis secundum esse, hoc tantum provenit ratione fundamenti, ut suo loco dictum est. Similiter tantum conveniunt actioni, ratione termini; ideò enim calefactio, & frigefactio dicuntur actiones contrariæ, & suscipere magis, & minus: quia termini illarum, scilicet, calor, & frigus sunt qualitates contrariæ, & recipiunt magis, & minus, & hoc solum est intentum Arist.

5 Tertia proprietas est, *reddere simile, vel dissimile*: quod debet intelligi, non formaliter, sed fundamentaliter, non actu, sed potentia. Hæc proprietas convenit omni qualitati soli illi, & semper, alia enim prædicamenta possunt reddere simile, vel dissimile tantum metaphoricè, & per similitudinem ad qualitatem. Unde constat, hanc proprietatem convenire qualitati in quarto modo. Similiter constat, benè posse describi qualitatem per istam proprietatem, dicendo: *Est accidens absolutum reddens simile, vel dissimile*.

6 Aliam proprietatem assignant aliqui, ut qualitatem a quantitate distinguant, scilicet, *non esse impenetrabilem*, & per illā hoc modo qualitatem describunt; *Est accidens absolutum non impenetrabile*. Sed licet verum sit, quod hæc proprietas conveniat qualitati, licet non in quarto modo; quia etiam convenit substantiæ; tamen prædicta descriptio a pluribus non admittitur, quia non datur per aliquid proprium positivum qualitatis, sed tantum per negationem gradus proprii quantitatis.

## D I S P. VI.

*De sex ultimis prædicamentis.*

**A**rist. cap. 9. & 10. huius tractatus breviter egit de sex ultimis prædicamentis; id eo-que Gilbertus Porretaneus ad maiorem illorum intelligentiam tractatum scripsit, quem de sex principiis appellavit. Nos autem Arist. originem sequentes, in hac disputatione, quæ communiter de sex ultimis prædicamentis exagitantur, proponemus. Sit ergo

## Q U Æ S T I O I.

*Quid pro formali importent sex ultima prædicamenta?*

**P**ræsens difficultas latè ab aliquibus controvertitur, Præcipuè a nostro Meron, qui varios modos dicendi circa illam enumerat, & Authores pro illis adducit cap. 1. de relatione extrinsecus adveniente. Aliqui enim dicunt, sex ultima prædicamenta esse denominationes extrinsecas. Alii autem, esse quasdam minutissimas entitates absolutas, quas modos vocant, & quia nequeunt explicari, nisi per ordinem ad alia, posse dici, respectus *secundum di-*  
*gi.* Alii vero, esse quid mixtum ex absoluto, & respectivo. Scotistæ verò asserunt cum Scoto in 3. dist. 1. quæst. 1. §. *Ad aliqua*, litt. K. loquendo de unione, & in 4. dist. 13. quæst. 1. §. *Ad huius*; *vers.* *Uterius*, litt. C. & aliis in locis, sex ultima prædicamenta formaliter consistere in respectu, non intrinsecus, sed extrinsecus adveniente. Discrimen inter prædictos respectus assignat Scotus, loco citato in 4. & nos assignavimus in hac 2. part. disp. 4. quæst. 2. num. 8. &

8. & 9. Videantur ibi dicta. Nunc autem clari-  
tatis gratia.

2 Dicimus 1. Sex ultima prædicamenta non dicunt formaliter solam denominationem extrinsecam. Conclusio est communis, & potest probari primo ex dictis loquendo de relatione in simili. Deinde probatur secundo: quia vel oppositum intelligitur, ita ut quodlibet prædicamentum sit purè denominatio extrinseca, desumpta a forma reali; vel ita quod sit ipsa forma realis, ut extrinsecè aliquod subiectum denominans: neutrum potest dici: ergo. Prob. min. quia non primum; nam cum denominatio extrinseca non sit aliquod ens verum, & reale non rectè salvaretur divisio entis realis in decem prædicamenta. Neque secundum; quia forma denominans, ut se tenet ex parte subiecti, quod intrinsecè denominat, jam supponitur, esse in suo prædicamento; visio enim, v. gr. ut est actus potentiae visivæ, est in prædicamento qualitatis, neque, ex hoc, quod alius extrinsecè denominet, ponitur in alio prædicamento: ergo neutro ex prædictis modis constituuntur hæc prædicamenta per denominationem extrinsecam.

3 Dicimus 2. Hæc prædicamenta non sunt formaliter quid absolutum. Probat; quia quod nequit concipi sine ordine, & habitudine ad aliud, non est quid absolutum; sed hæc prædicamenta nequeunt concipi sine ordine, seu habitudine ad aliud, ut patebit per omnia discurrenti: ergo non sunt formaliter quid absolutum.

4 Neque valet, si dicant; esse quid absolutum, secundum esse, quid verò respectivum secundum dici. Nam contra est primò, quia relativa secundum dici non sunt verè relativa, sed simpliciter absoluta: ergo dicere, quod prædicta prædicamenta sunt relativa secundum dici, non extrahit illa ab hoc, quod sint simpliciter  
ab.

absoluta: sed hoc non admittunt sic respondentes; ergo neque debent dicere, quod sint relativa *secundum dici*. Secundo, quia relativa secundum dici, licet communiter explicentur in ordine ad aliud; tamen absolute possunt concipi, & explicari sine tali ordine, secundum suas entitates absolutas; sed hæc prædicamenta nulatenus possunt concipi, seu explicari sine ordine ad aliud; ergo nequeunt dici absoluta *secundum esse*, & relativa *secundum dici*.

5 Dicimus 3. Hæc prædicamenta non sunt quid mixtum ex absoluto, & respectivo. Probatur; quia ens prædicamentale debet esse unum per se; sed ex absoluto, & respectivo nequit fieri unum per se; ergo. Prob. min. quia absolutum, & respectivum sunt opposita; nam absolutum est ad se, & respectivum est ad aliud; sed hæc duo nequeunt in unicam per se essentiam coire; ergo ex absoluto, & respectivo nequit constitui unum per se, modo requisito ad prædicamentum.

6 Neque valet si dicant, hæc prædicamenta non esse æquè in recto quid absolutum, & respectivum; sed unum dicere in recto, & aliud in obliquo. Nam contra est; quia vel dicunt in recto quid absolutum, & in obliquo quid respectivum? Et hoc idem est, ac dicere, quod formaliter, & per se sunt quid absolutum, nam quod in aliquo tantum secundariò, seu de connotato reperitur, est extra essentiam illius, & sic idem erit, ac dicere, quod hæc prædicamenta consistunt in aliquo absoluto, quod supra manet impugnatum. Vel dicunt in recto aliquid respectivum, & in obliquo aliquid absolutum? Et hoc idem est, ac dicere, quod pro formali dicunt aliquid respectivum; sed respectivum formale nequit esse principium alicuius absoluti; ergo ut sic nequeunt dicere de connotato aliquid absolutum; nisi dicant, hoc abso-  
lu-



lutum esse fundamentum; sed hoc nihil est, & quia hoc solum convenit respectivo in concreto; non verò in abstracto, & secundum se, ut loquimur in præsentia de prædicamentis, & quia hoc etiam convenit relationi intrinsecus advenienti.

7 Dicimus 4. Sex ultima prædicamenta formaliter consistunt in respectu extrinsecus adveniente. Hæc conclusio est communis consensus Scotistarum cum Scot. cit. Quod consistant in respectu, non melius probari potest, quàm ex dictis in conclusionibus antecedentibus. Quod autem talis respectus sit extrinsecus adveniens, patet ex eo, quod hæc prædicamenta distinguuntur à prædicamento *ad aliquid*: sed nihil aliud potest assignari, per quod ab illo differant, nisi quod dicant respectum extrinsecus advenientem, nam prædicamentum *ad aliquid* dicit respectum intrinsecus advenientem: ergo sex ultima prædicamenta dicunt respectum extrinsecus advenientem.

8 Arg. 1. intentantes probare, nullatenus dari relationes extrinsecus advenientes: quando Scotus dicit, relationes extrinsecus advenientes esse illas, quæ non necessariò resultant positæ fundamento, & termino, vel loquitur de fundamento proximo, vel remoto? Si de remoto, idem contingit in relatione intrinsecus adveniente, nam sicut positæ igne, & ligno, non resultat relatio actionis quoad usque ponatur approximatio, ita similiter, positæ duobus parietibus, non resultat relatio similitudinis, quoad usque ponatur unitas albedinis. Si loquitur de fundamento proximo, nulla est relatio, quæ non resultet, illo posito, nam sicut posita unitate albedinis, ut fundamento proximo, relatio similitudinis inter duos parietes resultat, ita resultat relatio actionis inter agens, & passum, po-

sita approximatione, ut fundamento proximo; ergo nulla est differentia inter relationes intrinsecus, & extrinsecus advenientes, ac per consequens, &c.

9 Respondetur, quod Scotus per fundamentum, & terminum intelligit extrema, quæ immediate referuntur, ut sunt duo alba: agens, & passum. Unde constat differentia inter prædictas relationes, videmus enim, quod positis actu in rerum natura agente, & passio, igne, & ligno, v. gr. quæ sunt extrema actionis, non resultat necessario relatio actionis; at verò, positis actu in rerum natura duobus albis, necessario resultat relatio similitudinis inter illa. Quod autem dicunt de approximatione, non videtur ad propositum, quia adhuc approximatione posita, non necessario resultat relatio actionis inter agens, & passum; sed adhuc requiritur transmutatio passi ab agente, quod patet, nam si talis transmutatio impediretur à Deo, adhuc posita approximatione, non resultaret talis relatio, ut contigit in furno Babylonis. Similiter non videtur ad propositum æquiparantia; quæ sit inter duos parietes, respectu relationis similitudinis, & agens ad passum, respectu relationis actionis, nam duo parietes non sunt extrema, inter quæ immediate versatur relatio similitudinis, sicut agens, & passum sunt extrema, inter quæ immediate versatur relatio actionis.

10 Arg. 2. datur aliquod ex sex ultimis prædicamentis, quod non dicat respectum extrinsecus advenientem: ergo. Prob. antec. nam prædicamentum *quando* dicit respectum intrinsecus advenientem, positum enim in rerum natura tempore, & re temporanea, necessario resultat in hac relatio *quando*, quæ explicatur *per esse in tempore*: ergo. Propter hoc argumentum Mæstrius hic tenet, prædicamentum *quando* non consistere in relatione reali extrinse-

secus adveniente . Meron autem hic adducit aliquas responsiones ex mente aliorum , dicens , quemcumque pro suo libito posse ex illis eligere , quam voluerit , eo quod quælibet videtur illi sufficiens ad argumentum . Videantur , si placet .

11 Alia fortè aptior solutio deducitur ex Merinero hic; ex quo in forma respondetur, neg. antec.& antecedens probationis, quatenus dicit prædicamentum *quando* dicere respectum intrinsecus advenientem , nam licet verum sit , quod posito tempore , & re temporali , detur relatio *quando* , seu *esse in tempore* , hoc non provenit ex eo quod talis relatio resultet ex positione fundamenti , & termini , quod necessario requiritur ad respectum intrinsecus advenientem : sed ex eo quod talis relatio provenit ab agente , producente ipsum fundamentum , ita ut talis actio agentis æquivalet actioni , qua producit fundamentum , vel terminus relationis intrinsecus advenientis , & pullulationi , seu emanationi ipsius relationis ab extremis , quod sufficit ut relatio *quando* dicatur extrinsecus adveniens quia non oritur ab extremis , sed provenit illis ab agente extrinseco producente , seu adducente extrema : ad differentiam relationis intrinsecus advenientis , quæ ex ipsis terminis oritur Idem potest responderi ad similia argumenta , quæ possunt fieri circa *ubi* , & *situm* ; quia quando Arist. dixit , ad relationem non dari per se motum , loquebatur de relatione intrinsecus advenientem , non verò de relatione extrinsecus adveniente . Alia argumenta omittimus , & quia parvi momenti , & quia facilè solvantur ex alibi dictis , & dicendis .

## Q U Æ S T I O II.

De ultimis prædicamentis in speciali.

1 **A**ctio sic definitur à Gilberto: *Est secundum quam in id, quod subiicitur, agere dicimur*. Sed quia potest esse aliqua æquivocatio, notandum est, quod nomen *actio*, plura significat. Primò, operationes immanentes, ut sunt intellectio; & volitio. Secundò, respectum producentis ad productum, in quo sensu pater dicitur causa agens filii. Tertiò, respectum inducentis ad inductum, seu educentis ad eductum; in quo sensu ignis dicitur causa agens caloris; & quia illum educit de potentia passiva ligni, & illum inducit in lignum. Quarto, significat rem in fieri. Quintò, respectum transmutantis ad transmutatum; & in hoc sensu constituit hoc prædicamentum; & explicando definitionem Gilberti, sic communiter definitur ab Scotistis: *Actio est relatio extrinsecus adveniens transmutatio ad transmutatum*. Dicitur: *Relatio extrinsecus adveniens*, in quo convenit cum quinque sequentibus prædicamentis. Dicitur: *Transmutantis ad transmutatum*, per quod differt ab illis. Similiter debent explicari definitiones sequentium prædicamentorum.

2 Arist. in hoc capite duas proprietates actionis enumeravit; scilicet, *habere contrarium*; & *suscipere magis, & minus*: quæ tantum conveniunt actioni ratione termini; & hoc quando terminus recipit magis, & minus, & habet contrarium. Gilberus autem alias duas proprietates assignavit, quæ conveniunt actioni in quarto modo, scilicet, *fieri cum motu, vel mutatione, & passionem inferre*, eo quod actio, & passio sint correlativa.

3 Hoc

3 Hoc prædicamentum sic potest coordinari. Actio in communi est genus supremum; & dividitur in actionem animæ, & corporis. Actio animæ dicitur illa, cuius principium est anima, vel quælibet substantia spiritualis, præter Deum. Actio corporis dicitur illa, cuius principium est inanimatum; quæ ulterius dividitur in substantialem, & est illa, cuius terminus est substantia, & in accidentalem, cuius terminus est accidens. Adhuc accidentalis subdividitur in instantaneam, quæ fit in instanti, & in successivam, quæ pro aliquo tempore durat. Denique, omnes subdividuntur in plures species infimas.

4 Cum passio correlativè opponatur actioni, & oppositorum eadem sit ratio, sic communiter definitur ab Scotistis; *Passio est relatio extrinsecus adveniens transmutati ad ad transmutans*, cui applicantur suo modo proprietates actionis, & ad similitudinem actionis dividitur, & coordinatur prædicamentum illius.

5 Gilbertus sic prædicamentum quando definit; *Est id id, quod ex adiacentia temporis relinquitur in re temporali*. Id enim, quod ex tali adiacentia in re temporali relinquitur; *Est relatio extrinsecus adveniens coexistentie, seu presentia rei temporalis, & mensurabilis ad tempus, cui coexistit, seu a quo mensuratur*. Sic explicant Scotistæ prædicamentum quando.

6 Gilbertus tres proprietates huius prædicamenti enumeravit, scilicet, *non habere contrarium, & non suscipere magis, & minus, & solum convenire illis, quæ incipiunt esse*. Prima, & secunda non conveniunt illi in quarto modo, quia etiam conveniunt aliis prædicamentis; tertia vero in quarto modo illi convenit.

7 Hoc prædicamentum sic solet coordinari. Quando in communi est genus supremum, & juxta varias differentias temporis di-

videtur in præsens, præteritum, & futurum. Quando præsens est, ratione cuius res dicuntur esse in tempore, quod potest subdividi in *mane*, & *vespere*. Quando præteritum est, ratione cuius res dicuntur fuisse in tempore, & potest dividi in *heri*, *nudius tertius*, &c. Quando futurum est, ratione cuius res dicuntur futuras esse in tempore, & potest dividi in *cras*, *sequentem mensem*, &c. Vidi, si hæc coordinatio sustineri possit, nam aliquas instantias pati videtur, sed difficulter altera aptior coordinatio inveniri poterit.

8 Gilbertus sic ubi definivit: *Est circumscriptio passiva a circumscriptioe loci, vel spatii proveniens*. Ubi tantum videtur definisse ubi passivum, quod communiter dicitur *esse in loco*, tamen communiter dividitur ubi ab Scotistis in activum, & passivum. *Ubi activum est relatio extrinsecus adveniens continentis ad rem contentam*, ut est relatio vasis ad aquam, quam continet. *Ubi passivum est relatio extrinsecus adveniens rei contenta ad continens*, ut relatio aquæ ad vas.

9 Duæ proprietates huius prædicamenti assignantur a Gilberto, scilicet, *non habere contrarium*, & *non suscipere magis, & minus*, quæ non conveniunt illi in quarto modo, sicut neque duæ sequentes, quæ ab aliquibus assignantur, scilicet, *esse immobile*, & *esse corruptibile*; nam etiam conveniunt aliquibus aliis prædicamentis. Quintam addunt aliqui, scilicet, *per se acquiri per motum localem*, quæ convenit illi in quarto modo.

10 Hoc prædicamentum sic coordinatur, ubi est genus supremum, & dividitur in definitivum, & circumscriptivum. Ubi definitivum consistit in hoc, quod res contenta sit tota in toto loco, & tota in qualibet parte loci. Ubi circumscriptivum consistit in hoc, quod res contenta sit tota in toto loco, & pars in parte lo.

loci. Deinde. Ubi cūcūscriptivum potest dividi in sex species, juxta sex differentias loci, scilicet, *sursūm*, *deorsūm*, *ante*, *retro*, *dextrorsūm*, & *sinistrorsūm*.

11 Gilbertus sic *situm* definivit: *est positio partium corporis, & generationis ordinatio*, quæ definitio sic explicatur ab Scotistis: *Situs est relatio extrinsecus adveniens, quam inter se dicunt partes, quæ sunt in loco*. Vnde colligitur, *situm* distingui ab *ubi*, quia *ubi* solum dicit præsentiam rei in loco, *situs* verò positionem partium, & sic invariato situ, potest variari *ubi*, nam si homo sedens transeat ad alium locum, mutatur *ubi*, licet non varietur *situs*.

12 Duas proprietates huius prædicamenti enumerat Gilbertus, quæ sunt communes aliis prædicamentis, scilicet, *non habere contrarium, neque suscipere magis, & minus*, & alteram, quam dicit, esse maximè propriam, huius prædicamenti, scilicet, quod positio semper competit substantiæ, aliis formis præsuppositis, & ipsam efficientibus. Vbi aliqui advertunt, *situm* propriè solum convenire corpori animato, nam *situs* est dispositio partium in loco existentium, ut subiectum aptius suas operationes exercent, & sic seipsum conservet, quapropter dicitur in definitione: *Generationis ordinatio*.

13 Hoc prædicamentum sic coordinatur, *situs* est genus supremum, quod dividitur in rectum, & flexum, & deinde quodlibet in aliquas species, ut sunt *statio*, *sessio*, *recubatio*, &c.

14 Gilbertus sic *habitum* definivit: *Est corporum, & eorum, quæ circa corpus sunt, adiacentia*. Quæ definitio sic explicatur ab Scotistis: *Habitus est relatio extrinsecus adveniens, vestiti ad vestem*.

15 Duas proprietates, huius prædicamenti

enumerat Gilbertus, quæ etiam conveniunt aliis prædicamentis, scilicet, *non habere contrarium, neque suscipere magis, & minus, & aliam tertiam, scilicet, quod ad relationem habitus requiritur, quod unum sit actu in alio.*

16 Hoc prædicamentum sic coordinatur. *Habitus est genus supremum, quod videtur in esse armatum, & esse vestitum. Deinde hæc dividuntur in plures species habitus, juxta plures species vestium, & armorum. Plura alia ad intelligentiam omnium prædicamentorum in Physica disputantur.*

## PARS TERTIA

### De Postprædicamentis.

1 **P**ostquam egit Arist. de prædicamentis in speciali, per quinque posteriora capita huius tractatus, egit de aliquibus affectionibus illorum, quæ communiter vocantur Postprædicamenta, & sunt modi *oppositionis, prioris, simul motus, & habere.* De quibus cum ipso sigillatim ferè litteram recitando agemus, quia in illis nulla videtur apparere difficultas.

2 Arist. cap. 11. assignavit quatuor modos, seu species *oppositionis*. Prima oppositio dicitur relativa, quæ versatur inter correlativa, ut *pater, & filius*. Secunda est contraria, quæ versatur inter qualitates sibi repugnantes in eodem subiecto, ut *calor, & frigus*. Tertia dicitur privativa, quæ versatur inter formam, & eius privationem; ut *visus, & cecitas*. Quarta dicitur contradictoria, quæ versatur inter illa, quæ repugnant inter se per affirmationem, & negationem; ut *Petrus est albus, Petrus non est albus.*



3 Cap. 12. assignavit Arist. quinque modos prioris. Primus est, ratione cuius aliquid dicitur prius tempore alio, ut homo, qui hodie nascitur, dicitur prior eo, qui nascetur eras. Secundus est, ratione cuius unum dicitur prius alio, à quo non valet subsistendi consequentia; superius, verb. gratia dicitur prius inferiori, nam licet valeat: *est homo: ergo est animal*; non tamen valet è contra: *est animal: ergo est homo*. Tertiusest, ratione cuius unum dicitur prius alio in aliquo ordine; in exercitu, verb. gratia Dux dicitur prior cæteris. Quartus est, ratione cuius dignius dicitur prius minus dignis; hoc modo Prælati in Monasterio solet appellari prior. Quintus est, ratione cuius causa dicitur prior natura effectui, quomodocumque sumatur causa, hoc est, vel physicè, ut pater, respectu filii, non in esse relativo, sed absoluto, vel metaphysicè, ut essentia respectu passionum, seu proprietatum, quæ ab illa dimanant. Sextum modum prioritatis addunt Theologi, scilicet proprietatem originis, quæ una persona in divinis dicitur prior altera sine aliqua dependentia. Per oppositum faciliè deducitur, tot esse modos posterioritatis, quot sunt prioritatis.

4 Cap. 13. assignat Arist. tres modos simultatis. Primus est, ratione cuius aliqua dicuntur simul tempore, ut quando aliqua in eodem tempore ponuntur in rerum natura. Secundus est, ratione cuius aliqua dicuntur simul natura, quia non solum dicuntur ad convertentiam, sed neque unum est causa alterius, in quo sensu diximus loquendo de relatione *esse simul natura* esse proprietatem relativorum. Tertiusest, ratione cuius aliqua dicuntur etiam esse simul natura, quia sunt membra dividenda aliquod genus, unde hæc simultas naturæ non dicitur talis simpliciter, & absolute, sed cum addito *in participando genus*.

homo, & equus, v. gr. sunt simul natura in-  
participando animal; licet alias unus sit prior  
alio.

5. Cap. 14. enumerat Arist. sex modos, seu  
species motus, prout comprehendit, tam mo-  
tum instantaneum, quam successivum. Primus  
est, generatio, per quam producitur substan-  
tia. Secundus est, corruptio, per quam destrui-  
tur substantia. Tertius est, augmentatio, per  
quam aliqua res acquirit majorem quantitatem.  
Quartus est, diminutio, per quam aliqua res  
deperdet partem quantitatis. Quintus est, alte-  
ratio, & includit sub se intensiorem, quæ est  
acquisitio qualitatis, & remissionem, quæ est  
deperditio qualitatis. Sextus est, motus loca-  
lis, per quam acquiritur *ubi*. Vnde deducitur,  
tot modis dici quietem, quot dicitur motus, eo  
quod quies motui opponatur.

6. Cap. 15. enumerat Arist. septem modos  
habendi. Primus est, habere qualitatem, ut  
albedinem. Secundus est, habere quantitatem,  
ut esse bicubitum, &c. Tertius est, habere ea, quæ  
circumstant, ut habere vestem. Quartus est, ha-  
bere aliquid in aliqua parte corporis. ratione  
cuius dicitur, totum corpus illud habere, ut ha-  
bere annulum in manu. Quintus est, habere  
partes componentes, ut habere caput, manus,  
&c. Sextus est, habere aliquid per continentiam  
activam, ut vas continet aquam. Septimus est,  
habere aliquid per possessionem, ut habere Do-  
mum, agrum, &c.

# TRACTATUS<sup>731</sup> De Enuntiatione.

**P**ostquam egit Arist. de prædicamentis ;  
tanquam de principiis remotis syllogis-  
mi, statim de enuntiationibus, tanquam  
de materia proxima ipsius syllogismi,  
tractatum instituit, quem *Periermenias* græcè  
appellavit; latinè verò, *libros de interpretatione*,  
prout interpretatio dicit vocem articulatam  
significantem, aliquid esse, vel non esse, seu  
verum, vel falsum; non quia finis huius tracta-  
tus sit agere de enuntiatione vocali; sed quia  
de illa egit Arist. tanquam de signo enuntiationis  
mentalis, quæ propriè, & rigorosè dicitur  
enuntiatio. Plura, ad præsens institutum per-  
tinentia, in summulis disputavimus: unde so-  
lum restat sequens difficultas.

## DISP. ET QUÆST. UNICA.

*An enuntiatio possit transire de vera in fal-  
sam, & è contra.*

**1** **S**upponitur, veritatem, ut ad præsens at-  
tinet, consistere in conformitate actus  
intellectus enunciantis cum obiecto enunciato:  
hæc enim enuntiatio: *homo est animal*, est ve-  
ra, quia enunciatur obiectum, sicut se habet a  
parte rei: falsitatem autem consistere in non  
conformitate actus intellectus enunciantis cum  
obiecto enunciato; hæc enim enuntiatio: *ho-  
mo est lapis*, est falsa, quia non enunciatur ob-  
iectum, sicut se habet a parte rei, seu non se  
habet a parte rei obiectum, sicut enunciatur ab  
intellectu.

**2** Supponitur etiam, quod difficultas non

procedit de enunciationibus, quæ fiunt in materia necessaria, vel remota, certum enim est, prædictas propositiones, si sint affirmativæ in materia necessaria, & negativæ in materia remota, esse necessariò veras, & sic nullatenus posse transire in falsas, si autem sint negativæ in materia necessaria, & affirmativæ in materia remota, esse necessariò falsas, & sic nullatenus posse transire in veras. Difficultas ergo solum procedit de enunciationibus, quæ fiunt in materia contingenti, utrum, v. g. hæc propositio: *Petrus currit* possit, eadem numero manens, transire de vera in falsam; Partem affirmativam tenet Mastrius hic quæst. 2. art. 2. Partem verò negativam tenet Poncius disp. 19. Logicæ, quæst. 3. & Meron hic quæst. 3. Assertionem 4. Apud prædictos possunt videri plures Authores pro utraque sententia, quæ si rectè inspicitur, videtur æquè probabilis, ut autem aliquam partem determinatè proponamus.

3. Dicimus: eadem numero propositio, in sensu dicto, nequit transire de vera in falsam. Probatur; quia quando aliquis profert hanc propositionem: *Petrus currit*, vel intelligit, quòd currat pro aliqua parte determinati temporis, v. g. unius horæ, indeterminatè; vel quòd currat pro toto aliquo tempore determinato, v. g. pro tota hora, nam cum propositio sit de præsentis, aliquo ex prædictis modis necessariò debet intelligi: sed neutro modo potest propositio transire de vera in falsam: ergo. Prob. min. quia si primo modo intelligatur, propositio erit vera, si pro aliqua parte illius temporis Petrus currat, sive pro aliis partibus currat, sive non; si autem pro nulla parte illius temporis currat, propositio erit falsa. Si verò intelligatur secundo modo; propositio erit vera, si Petrus currat pro toto illo tempore; si autem non currat pro toto illo tempore, licet  
pro

pro aliqua parte ipsius temporis currat, propositio erit falsa; ergo nullo modo prædicta propositio potest transire de vera in falsam, vel è contra.

4 Confirmatur, & simul statuitur fundamentum sententiæ, quia hæc versatur differentia inter enunciationem indefinitam, seu indeterminatam in materia contingenti; & enunciationem indefinitam, & indeterminatam in materia necessaria, quòd enunciatio in materia necessaria expressa per verbum est, ampliatur ad omnem durationem, scilicet, ad tempus præteritum, præsens, futurum, ut patet in hac enunciatione: *homo est animal rationale*; quia nullo tempore potest homo existere, quin sine animal rationale, quapropter prædicta enunciatio, & aliæ similes dicuntur æternæ veritatis, at verò enunciatio in materia contingenti expressa per verbum est, non sic ampliatur, imò restringitur ad aliquam determinatam differentiam temporis, in hac enim propositione: *Petrus currit*; quæ idem valet, ac *Petrus est currens*: verbum est restringitur ad tempus præsens.

5 Ratio huius est, quia eodem modo loquendum est de ampliatione, aut restrictione verbi in propositionibus, quo loquitur de ampliatione, & restrictione subiecti, servata proportionem, iuxta materiæ diversitatem. Unde sequitur, quòd sicut, quotiescumque propositio indefinita sit in materia necessaria, æquivaleret propositioni universali, nam idem est dicere; *homo est animal rationale*, ac dicere; *Omnis homo est animal rationale*; & sicut quoties fit in materia contingenti, æquivaleret propositioni particulari, nam idem est dicere; *homo currit*, ac dicere; *aliquis homo currit*. Ita similiter propositio indeterminata, seu indefinita in materia necessaria, ratione verbi, correspondet omnibus temporis differentiis universaliter,  
ita

ut autem idem sit dicere; *homo est animal rationale*, ac dicere: *homo*, pro quacunque differentia temporis, est *animal rationale*: propositio verò indeterminata in materia contingenti, ratione verbi, correspondet alicui tantum differentie temporis, licet indeterminatè, ita ut idem sit dicere: *homo currit*: ac dicere *homo pro aliqua differentia temporis, currit*. Unde sequitur, quòd sicut hæc propositio: *aliquis homo currit*, est determinate vera, si unus homo currat, sive alii homines currant, sive non, & sic nullatenus potest esse falsa, & est determinatè falsa, si nullus homo currat, & sic nullatenus potest esse vera, ita similiter, hæc propositio: *Petrus currit*, sic indefinitè prolata ex parte verbi, quosensu, idem est, ac dicere: *Petrus pro aliqua differentia temporis currit*, erit determinatè falsa, si Petrus, pro nulla differentia temporis currat, & erit determinatè vera si pro aliqua differentia temporis, currat, sive pro aliis differentis temporis currat, sive non, & sic nullatenus potest transire de vera in falsam, vel è contra. Facile quælibet argumenta solventur, si quod dictum est, benè percipiatur: Aliqua tamen proponemus.

6 Arg. 1. Si aliquis iudicaret, Petrum currere, v. g. conservaret illud iudicium pro una hora, casu quo Petrus pro prima dimidia hora curreret, propositio esset vera, & casu, quo pro altera dimidia hora non curreret, propositio esset falsa: ergo iam transiret propositio de vera in falsam. Resp. nullatenus posse aliquem habere prædictum iudicium de præsentī, nisi pro aliquo tempore, vel determinatè, vel indefinitè, hoc est, vel ita quòd affirmet, Petrum currere pro tota hora determinatè, & sic propositio, in casu dicto, esset absolutè falsa, vel ita quòd affirmet, Petrum currere pro aliqua parte illius horæ, & sic propositio esse absolutè vera. Unde neg. consequ.

7 Dices : prædictum iudicium, pro primo instanti esse iudicium asserens, Petrum currere pro illo primo instanti, si autem conservetur pro alio instanti, esse iudicium asserens, Petrum currere pro illo alio instanti; ergo si Petrus currat pro primo instanti; & non pro secundo, iudicium transibit de vero in falsum. Resp. neg. quòd in hypotesi sit idem num. iudicium, nam cum propositiones de materia contingenti dependeant à tempore, iudicium asserens, Petrum currere primò instanti determinatè, nequit esse iudicium asserens, Petrum currere pro alio sequenti instanti, sicut iudicium asserens, aliquod individuum determinatum currere, nequit esse iudicium asserens, aliud individuum currere.

8 Arg. 2. Si intellectus iudicaret, ex aliquo motivo probabili, Petrum currere, non determinando tempus, & perseveraret in illo iudicio per spatium unius horæ, & g. si Petrus curreret in prima parte, & non in secunda parte horæ, propositio esset conformis obiecto, pro prima parte horæ, & sic vera, & non esset conformis obiecto pro secunda parte horæ, & sic falsa; ergo transiret de vera in falsam. Resp. neg. ant. nam tale iudicium nullatenus esset conforme obiecto; quia cum ut dictum est, propositiones contingentes dependent à tempore, tempus aliquomodo includitur in obiecto, in tali hypotesi, obiectum illius iudicii esset cursus Petri pro omnibus partibus horæ coniunctivè, & cum ad veritatem propositionis coniunctivæ requiratur veritas utriusque partis, hinc est, quòd licet pro prima parte horæ videatur, prædictum iudicium habere veritatem, cum tamen illam non habeat pro secunda parte horæ, tota propositio coniunctiva est falsa, sicut hæc propositio; *homo est animal, & brutum est* absolutè falsa, eo quòd sit coniunctiva, licet pro prima parte sit vera.

9 Arg. 2. Propositio de presenti non significat aliud instans, nisi illud, quod est, quando propositio est; ergo si quis conservaret hanc propositionem; *Petrus currit, in hoc instanti*, pro instanti sequenti significaret per eandem propositionem, Petrum currere, pro illo sequenti instanti: ergo si Petrus curreret pro primo instanti, & non pro sequent, eadem propositio, quæ pro primo instanti erat vera, pro secunda esset falsa. Resp. neg. suppositum; scilicet, quod sit eadem propositio; nam in hypothesi, variatur instans determinatum, & sic variatur illa determinata propositio, cum ut talis, dependeat ab instanti determinato, licet in nomine eadem propositio appareat, sicut non est eadem propositio, qua ego affirmo, v. g. Petrum currere, loquendo de uno individuo determinato, ac propositio, qua affirmo, Petrum currere, loquendo de alio individuo determinato, licet in nomine, eadem propositio appareat, eo quod in re varietur subiectum, sicut in supradicta propositione variatur instans.

10 Arg. 4. Conclusio opponitur Arist. qui cap. de substantia, tenet veritatem, & falsitatem accidentaliter convenire propositioni. Idem tenet Scotus in 4. dist. 8. quæst. 2. ergo. Resp. neg. quod conclusio opponatur Arist. nam ad hoc, quod veritas, & falsitas accidentaliter conveniant propositioni, non requiritur, quod propositio possit transire de vera in falsam, sed sufficit, quod propositio, quæ nunc est vera, posset in eodem instanti esse falsa, quod certe contingere potuit, hæc enim propositio *Petrus currit*, quæ in instanti, in quo fit, est vera, si pro illo instanti Petrus currit, esset falsa, si pro eodem instanti Petrus non curreret, quod evenire poterat, eo quod cursus contingenter convenit Petro, in quo distinguitur propositio de materia contingenti à propositionibus  
de



de materia necessaria, & remota, eo quod his prædicatum non convenit contingeret, sed necessario, vel repugnantes, unde propositio, quæ est vera, non potuit in eodem instanti esse falsa, neque propositio, quæ est falsa, potuit in eodem instanti esse vera. Hinc faciliè deducitur, quomodo veritas, & falsitas conveniant propositioni.

# TRACTATUS

## *De Demonstratione.*

**I**N libris Priorum egit Aristot. de syllogismo quoad formam, de quo cum ipso egimus lib. 3. Sumus. In libris Posteriorum egit de demonstratione, & de partibus illius, & nos similiter agimus in præsentī. Sit ergo

### DISPUT. UNICA.

### Q U Æ S T I O I.

*Quid, & quotuplex sit demonstratio?*

**I**Cimus 1. pro primo, quod inquit questio: *Demonstratio est syllogismus scientialis, seu faciens scire. Vel; demonstratio est syllogismus procedens ex veris, primis, & immediatis, prioribus, notioribus, & causis conclusionis.* Utraque definitio traditur ab Arist. 1. Posteriorum cap. 2. Prima rectè explicat demonstrationem per effectum, quia in hoc distinguitur demonstratio a syllogismo topico, & sophistico, quod demonstratio generat scientiam, syllogismus topicus generat opinionem, & syllogismus sophisticus generat errorem.

Secun-

Secunda rectè explicat demonstrationem per partes, ex quibus componitur, in quo etiam distinguitur ab aliis syllogismis. Particulæ huius definitionis ex se satis constat, solum est advertendum, quod *ly primis* denotat demonstrationem procedere ex primis principiis, id est, in demonstrabilibus *ly prioribus* denotat, quod præmissæ debent esse ex natura sua priores conclusionem. Vnde constat, quod Arist. tantum definivit demonstrationem *propter quid*, seu, *a priori*; non autem demonstrationem *quia*, seu, *a posteriori*; quia hæc, ut infra dicemus, non procedit ex primis, immediatis, notioribus, & prioribus.

2 Dicimus 2. pro secundo, quòd inquit quæstio, demonstratio dividitur in demonstrationem *propter quid*, seu *a priori*, & in demonstrationem *quia*, seu *a posteriori*. Demonstratio *propter quid*, seu, *a priori* dicitur illa, quæ non solum demonstrat, prædicatum convenire subiecto, sed etiam ostendit causam, propterquam illi convenit, ut quando per essentiam demonstratur passio, ut cum dicimus: *Omne rationale est risibile; Petrus est rationalis; ergo Petrus est risibilis*. Demonstratio *quia*, seu, *a posteriori* dicitur illa, quæ tantum denotat prædicatum convenire subiecto, non tamen ostendit, convenire illi propter aliquam causam, imo est demonstratio causæ per effectum, ut cum dicimus: *Omne risibile est rationale; Petrus est risibilis; ergo Petrus est rationalis*. Vnde facile cognoscitur, hanc divisionem esse adæquatam, quia quod demonstratur, vel demonstratur per aliquid, quod sit prius illo, & sic est demonstratio *a priori*, vel per aliquid quod sit posterius illo, & sic est demonstratio *a posteriori*: sed nequit assignari aliud medium per quod aliquid demonstretur: ergo talis divisio est adæquata.

3 Vbi advertendum est, quod quando passio, seu proprietas mediata demonstratur per pas-

passionem, seu proprietatem immediatam, reducitur ad demonstrationem *a priori*; ut cum dicimus: *Omne admirativum est risibile: Petrus est admirativus*; ergo *Petrus est risibilis*. Si autem è contra contingat reducitur ad demonstrationem *a posteriori*. Advertendum est etiam, quod quando definitio assumitur pro medio ad aliquid demonstrandum, demonstratio dicitur potissima, quia definitio est potissima causa illius, quod demonstratur, vel quia definitioni convenit, esse quid prius, & notius omnibus aliis, quæ in demonstratione possunt inveniri.

4 Dubitabis; an prædicta divisio sit generis in species? Resp. quod ratione formæ non est divisio generis in species; eadem enim forma syllogistica potest inveniri in demonstratione *a priori*, & *a posteriori*, ut patet ex dictis in summulis. Ratione verò materiæ potest dici divisio generis in species; nam duæ prædictæ demonstrationes conveniunt in ratione demonstrationis, & differunt essentialiter, quia constat diversis principiis, & diversis mediis, quæ sunt materia demonstrationis. Vnde sequitur, quod demonstratio genericè seu in communi sumpta, ut sub se comprehendit prædictas duas species, sic potest definiri: *Demonstratio est syllogismus constans præmissis certis, & evidentibus, ex eisque certo, & evidenter inferens consequentiam*.

## Q U Æ S T I O II.

*De præcognitis, & præcognitionibus demonstrationis.*

1 **P**Ræcognita dicuntur illa, quæ ante demonstrationem cognoscuntur, & sunt subiectum conclusionis demonstrativæ, prædicatum ipsius, & principium, scilicet præmissæ,

d  
n  
co  
in  
p  
d  
l  
i  
i  
i  
d  
fi  
ar  
in  
li  
&  
in  
di  
&  
fer  
dis  
rio  
gn  
lin  
arb

Leg. Mag. de De  
mō, hęc enim necessar  
demonstrationem,  
demonstrativā assentian  
sequit dari talis assensus  
cognoscantur, in quari  
ter includitur cognitio e  
si subiectum, & prædic  
nis non præcognoscerent  
cum medio: neque in co  
possent subici, & prædic  
debeat præcognosci defin  
in demonstratione potissi  
mer, tamen non nune  
bus prædictis præcogni  
non se habet, ut res, sed  
melius inter præcognitio  
cognita, numerari pote  
runt: in demonstratione  
sicut ponantur subiectu  
conclusionis, cognitio illi  
tione præmissarum, seu p  
tur reduci ad questionem  
illud teneat communiter  
hic.

Præcognitiones non a  
ctas, qui sunt cognitiones  
ergo ostendunt de supradictis  
demonstrationem, quæ  
licet, an sit? & quid sit? n  
quæ de quibus re possunt  
sit? Quis sit? Quæ sit? &  
men hæc duo ultima per  
gnoſcantur, nam cum de  
hinc & denotetur ratio  
de convenit. Quæ sit? &  
erunt præcognitiones. Adve  
quæ sit? vel potest inq  
sit? vel potest inq  
sit? vel potest inq  
sit? vel potest inq

*nomen?* Vel potest inquiri de re, & *quid sit res?* Nunc est difficultas, quæ præcognitionibus debeant cognosci prædictis præcognitis ante demon-

s. 1. de principio, seu præmissis non tur, *quid sit?* sed tantum, *an sit?* do de re, quam de veritate. Prima quia *quid sit?* Inquirat essentiam, seu rei, sed præmissæ, cum sint quid, nequeunt definiri: ergo nequit cognosci, *quid sit?* Secunda pars, quia veritas conclusionis infertur præmissarum: ergo debet præcognas præmissarum, sed nequit co-veritas quin cognoscatur in re esse ergo de principio, seu præmissis cognosci, *an sit?* Tam loquando de veritate.

s. 2. de subiecto debet præcognosci, *quid sit?* Probatur prima pars, quia debet præcognosci, ut aptum ad illo enunciatur passio, sed de illo, effectus habet, nequit aliqua passio ergo de subiecto debet præcognosci. Quod non debet intelligi de existens, quod cognoscatur possibitur secunda pars, quia definitio demonstrandam passionem: ergo cognosci de subiecto, de quo de passio, sed per definitionem respondet: ergo de subiecto debet præco-

s. 3. de prædicato, seu passione tan præcognosci *quid sit nomen?* seu, *significet?* Probatur, quia existenslibilitas passionis nequit cognosci in ead subiectum, sed hæc ostendit demonstratione: ergo nequit de passionosci, *an sit res?* & consequenter

ne.

de p  
consequ

neque *quid sit* res? quia *quid sit*? semper præsupponit, *an sit*? Deinde si ignoretur quid significet nomen passionis, v.g. risibilitas, nullatenus poterit demonstrari de homine: ergo necessario debet præcognosci de passione *quid nomen significet*? Ubi adverte, quod sufficit cognitio confusa significationis, seu rei significatæ per nomen, non autem requiritur cognitio clara, quia hæc nequit haberi, quin cognoscatur *an sit*? & *quid sit*? loquendo de re. Cum quo potest responderi ad aliqua argumenta.

### QUÆSTIO III.

*Quomodo præmissa concurrant ad assensum conclusionis?*

**P**Ræmissa, & similiter conclusio, possunt accipi, vel formaliter, ut dicunt actus intellectus, vel materialiter, ut dicunt obiecta prædictorum actuum disposita in forma syllogistica. In hoc secundo sensu non procedit difficultas, omnes enim fatentur, præmissas in genere causæ materialis posse dici causam conclusionis quia termini præmissarum sunt etiam termini, seu extrema conclusionis. Possunt etiam præmissæ, materialiter sumptæ, dici quomodo causa efficiens conclusionis; quia medium præmissarum, quod in potissima demonstratione est definitio, seu essentia subiecti, est quasi causa efficiens passionis, quæ in conclusione prædicatur de subiecto. Difficultas autem procedit de præmissis formaliter sumptis.

2. Aliqui negant causalitatem præmissarum, respectu conclusionis, præter causalitatem assignatam de præmissis materialiter sumptis. Communior tamen sententia asserit, quod præmissæ concurrunt simul cum intellectu in genere

re causæ efficientis ad assensum conclusionis; eo modo, quo obiectum concurret simul cum intellectu ad sui notitiam, vel per se immediatè, vel media sua specie. Videatur Maftrius in Log. disp. 11. quæst. 3. ubi adducit aliquos Auctores.

3 Dicimus 1. Præmissæ modo dicto, in genere causæ efficientis causant conclusionem. Pro hac conclusione citatur Scotus quæst. 1. prologi; §. *Ad secundum*, & in 1. dist. 3. quæst. 7. lit. A. & §. *Ad quæstionem*: quibus in locis loquitur de causalitate obiecti, respectu intellectio- nis.

4 Probatur 1. quia in præmissis inveniuntur omnia signa, quibus à posteriori arguitur, aliquid esse causam effectivam alterius, nam præmissæ continent virtualiter conclusionem, & conclusio assimilatur præmissis, ita ut si præmissæ sunt necessariæ, certæ, & evidentes, etiam conclusio est necessaria, certa, & evidens. Deinde conclusio essentialiter dependet à præmissis, ita ut sit impossibile, intellectum efficere conclusionem, quin præmissæ sint in ipso intellectu; conclusio enim, ut conclusio, dicit ordinem essentialem ad præmissas, unde si intellectus absque præmissis, aliquam eliceret propositionem, talis propositio non esset conclusio, quia conclusio est scientia, & propositio elicitæ, absque præmissis, non est scientia: ergo præmissa in genere causæ efficientis concurrunt ad conclusionem.

5 Probatur 2. Quia quod constituit potentiam in actu primo, concurret efficienter cum illa ad actum secundum, sed præmissæ constituunt intellectum in actu primo potentem elicere conclusionem: ergo præmissæ concurrunt efficienter cum intellectu ad conclusionem, & consequenter ex intellectu, & præmissis, ut causis partialibus, constituitur causa totalis effectiva conclusionis.

6 Respondentaliqui, præmissas tantum esse conditiones, ut intellectus conclusionem eliciat, non autem causam partialem ad producendam conclusionem simul cum intellectu. Sed contra est primo, quia differentia essentialis effectus nequit provenire originativè, nisi ab eo quod est causa efficiens, sed per præmissas differunt essentialiter originativè conclusiones, conclusio enim probabilis differt essentialiter à conclusione necessaria, eo quod præmissæ essentialiter differunt; ergo præmissæ non sunt conditiones, sed veræ causæ efficientes conclusionis. Secundo, quia effectus non assimilatur conditioni requisitæ ad productionem illius, sed veræ causæ illius productivæ; sed conclusio assimilatur præmissis, ut supra dictum est; ergo præmissæ non sunt conditio requisita, sed vera causa productiva conclusionis.

7 Arg. 1. Conclusio vera se sola potest movere intellectum ad sui cognitionem; ergo præmissæ non concurrunt efficienter ad assensum illius. Resp. disting. antec. conclusio, ut conclusio est, se sola potest movere intellectum ad sui cognitionem, nego, ut quædam propositio est præcisè, concedo. Etenim conclusio, ut propositio est præcisè, nullum ordinem dicit ad præmissas, & sic potest cognosci sine illis; at verò, ut conclusio est; dicit ordinem essentialem ad præmissas, & sic nequit movere intellectum ad sui cognitionem sine præmissis.

8 Arg. 2. In hoc enthymemate; *Omne animal rationale est homo; ergo Christus est homo*, consequens non causatur ab antecedenti, cum consequens sit supernaturale, & de fide, antecedens verò naturale, supernaturale autem nequit à naturali causari, alias effectus esset perfectior sua causa, quod nequit dici; ergo præmissæ non causant efficienter conclusionem. Resp. quod in prædicto enthymemate subintelligitur hæc propositio minor; *Christus est animal rationale*,  
quæ



quæ est supernaturalis, & de fide, unde bene potest causari à præmissis prædicta conclusio supernaturalis, quin sequatur effectum esse perfectiorem sua causa.

9 Arg. 3. Sicut requiritur assensus præmissarum ad assensum conclusionis, ita requiritur simplex apprehensio ad iudicium, & actus intellectus ad actum voluntatis, sed neque apprehensio est causa iudicii, neque actus intellectus est causa actus voluntatis, sed tantum sunt conditiones requisitæ: ergo idem dicendum est de præmissis respectu conclusionis. Resp. neg. paritatem, quia exigentia apprehensionis ad iudicium, & actus intellectus ad actum voluntatis se habet per modum applicationis obiecti, ut dicitur in libris de Anima, præmissæ verò se habent per modum vis illativæ, & impulsivæ, respectu conclusionis, & sic non est conditio, sed causa effectiva ipsius conclusionis.

10 Dicimus 2. Præmissæ sunt causæ efficientes conclusionis, vel immediatè per se ipsas, vel per suas species. Hæc conclusio ex ipsis terminis patet, quia cum præmissæ, in causando conclusionem, se habeant ad modum, quo obiectum est causa notitiæ, & hoc causat notitiam, vel per se ipsum immediatè, si sit proportionatum potentiae, vel per suam speciem, idem videtur dicendum de præmissis, respectu conclusionis. Solum est difficultas, an præmissæ existant, quando existit assensus conclusionis? Nam si tunc existant, dicendum est, ipsas immediatè causare conclusionem. Si autem non existant, dicendum est, ipsas non immediatè, sed mediis suis speciebus derelictis in intellectu, conclusionem causare.

11 Aliquid dicunt, præmissas non existere, quando existit conclusio, quia ut tenet Arist. 2. Topic. cap. 4. intellectus nequit habere plures actus simul. Alii autem dicunt, præmissas

existere, quando existit conclusio, quia licet intellectus nequeat simul habere plures actus disparatos, seu nullam inter se connexionem dicentes, tamen potest simul plures actus inter se essentialiter connexos, ut sunt assensus præmissarum, & conclusionis habere, & ita dicunt, debet intelligi Arist. Utrumque est probabile.

12 Ex dictis colligitur, assensum conclusionis realiter distingui ab assensu præmissarum, cum causa à suo effectu realiter distinguatur, & præmissæ, ut dictum est, sint causæ conclusionis.

13 Dubitabis, an posito assensu præmissarum, ita necessitetur intellectus ad assensum conclusionis demonstratæ, ut nequeat illi non assentiri? Resp. affirmativè. Probatur, quia potentia naturalis distinguitur à libera in eo quod potentia libera, positis omnibus requisitis ad agendum, potest non ponere suum actum, potentia verò naturalis, positis omnibus requisitis, nequit non ponere suum actum; sed intellectus est potentia naturalis; ergo positis omnibus requisitis, nequit non ponere suum actum, sed posito assensu præmissarum, ponantur omnia requisita ad agendum; ergo posito assensu præmissarum, nequit intellectus non ponere assensum conclusionis, & consequenter necessitatur ad assentiendum conclusioni.

14 Confirmatur, quia nequit potentia visiva non videre suum objectum debite approximatum, eo quod sit potentia naturalis; ergo nequit intellectus non assentiri conclusioni debite propositæ, cum etiam sit potentia naturalis, sed posito assensu conclusionis, debite proponitur intellectui conclusio; ergo posito assensu præmissarum, nequit intellectus non assentiri conclusioni. Ubi adverte, quod sicut nequit voluntas impedire visionem objecti debite propositi, nisi ponendo aliquod impedimentum ex parte

parte potentiae, ita nequit impedire assensum conclusionis, nisi ponendo aliquod impedimentum ex parte intellectus, scilicet, removendo illum ab objectis, seu à cognitione praemissarum, & proponendo illi alia objecta, circa quae suas operationes exerceat, sed hoc non est contra nos, quia tantum loquimur ex suppositione, quod intellectus rectè cognoscat praemissas, & ipsis assentiatur.

15 Arg. contra, in intellectu datur habitus ad faciliter assentiendum conclusioni, sed frustraneus esset talis habitus, si intellectus ex assensu praemissarum necessitaretur ad assensum conclusionis; ergo non sic necessitatur. Resp. neg. min. nam talis habitus ponitur in intellectu ad faciliter disponendas praemissas in forma syllogistica in ordine ad eliciendam conclusionem, cum sit habitus Logicae facilitans intellectum ad cognitionem artis syllogisticae, qua cognitione posita ex parte praemissarum, necessitatur intellectus ad assensum conclusionis. Si autem detur habitus scientiae, in qua sit demonstratio, v. g. Physicae, talis habitus faciliat intellectum ad conclusionem tantum materialiter sumptam, seu quatenus conclusio versatur circa objectum talis scientiae, non verò formaliter, seu in ratione formali consequentiae deductae ex praemissis.

#### Q U A E S T I O IV.

*Utrum praemissa demonstrationes debeant esse  
veriores, certiores, & eviden-  
tiores conclusione?*

1 S Upponitur, quod veritas est conformitas actus intellectus cum objecto enuntiato, ut dictum est disp. de enuntiat. num. 1. Evidentia verò est clara, & distincta cognitio rei

Secunda rectè explicat demonstrationem per partes, ex quibus componitur, in quo etiam distinguitur ab aliis syllogismis. Particulæ huius definitionis ex se satis constat, solum est advertendum, quod *ly primis* denotat demonstrationem procedere ex primis principiis, id est, in demonstrabilibus *ly prioribus* denotat, quod præmissæ debent esse ex natura sua priores conclusionem. Vnde constat, quod Arist. tantum definivit demonstrationem *propter quid*, seu, *a priori*; non autem demonstrationem *quia*, seu, *a posteriori*; quia hæc, ut infra dicemus, non procedit ex primis, immediatis, notioribus, & prioribus.

2 Dicimus 2. pro secundo, quòd inquit quæstio, demonstratio dividitur in demonstrationem *propter quid*, seu *a priori*, & in demonstrationem *quia*, seu *a posteriori*. Demonstratio *propter quid*, seu, *a priori* dicitur illa, quæ non solum demonstrat, prædicatum convenire subiecto, sed etiam ostendit causam, propterquam illi convenit, ut quando per essentiam demonstratur passio, ut cum dicimus: *Omne rationale est risibile; Petrus est rationalis; ergo Petrus est risibilis*. Demonstratio *quia*, seu, *a posteriori* dicitur illa, quæ tantum denotat prædicatum convenire subiecto, non tamen ostendit, convenire illi propter aliquam causam, imo est demonstratio causæ per effectum, ut cum dicimus: *Omne risibile est rationale; Petrus est risibilis; ergo Petrus est rationalis*. Vnde facile cognoscitur, hanc divisionem esse adæquatam, quia quod demonstratur, vel demonstratur per aliquid, quod sit prius illo, & sic est demonstratio *a priori*, vel per aliquid quod sit posterius illo, & sic est demonstratio *a posteriori*: sed nequit assignari aliud medium per quod aliquid demonstretur: ergo talis divisio est adæquata.

3 Vbi advertendum est, quod quando passio, seu proprietas mediata demonstratur per  
pas.

passionem, seu proprietatem immediatam, reducitur ad demonstrationem *a priori*; ut cum dicimus: *Omne admirativum est risibile: Petrus est admirativus; ergo Petrus est risibilis*. Si autem è contra contingat reducitur ad demonstrationem *a posteriori*. Advertendum est etiam, quod quando definitio assumitur pro medio ad aliquid demonstrandum, demonstratio dicitur potissima, quia definitio est potissima causa illius, quod demonstratur, vel quia definitioni convenit, esse quid prius, & notius omnibus aliis, quæ in demonstratione possunt inveniri.

4 Dubitabis; an prædicta divisio sit generis in species? Resp. quod ratione formæ non est divisio generis in species; eadem enim forma syllogistica potest inveniri in demonstratione *a priori*, & *a posteriori*, ut patet ex dictis in summulis. Ratione verò materiæ potest dici divisio generis in species; nam duæ prædictæ demonstrationes conveniunt in ratione demonstrationis, & differunt essentialiter, quia constat diversis principiis, & diversis mediis, quæ sunt materia demonstrationis. Vnde sequitur, quod demonstratio genericè seu in communi sumpta, ut sub se comprehendit prædictas duas species, sic potest definiri: *Demonstratio est syllogismus constans præmissis certis, & evidentibus, ex eisque certo, & evidenter inferens consequentiam*.

## Q U Æ S T I O II.

*De præcognitis, & præcognitionibus demonstrationis.*

1 **P**Ræcognita dicuntur illa, quæ ante demonstrationem cognoscuntur, & sunt subiectum conclusionis demonstrativæ, prædicatum ipsius, & principium, scilicet præmissæ,

missæ, hæc enim necessario debent præcognosci ante demonstrationem, quia cum conclusioni demonstrativæ assentiamur propter præmissas, nequit dari talis assensus, quin prius præmissæ cognoscantur, in quarum cognitione virtualiter includitur cognitio conclusionis. Deinde si subiectum, & prædicatum ipsius conclusionis non præcognoscerentur, neque in præmissis cum medio: neque in conclusione inter se, possent subici, & prædicari. Licet autem etiam debeat præcognosci definitio, quæ est medium, in demonstratione potissima, de qua hic loquimur, tamen non numeratur separatim a tribus prædictis præcognitis, & quia definitio non se habet, ut res, sed ut ratio rei, ideoque melius inter præcognitiones, quam inter præcognita, numerari potest, & quia cum non ponatur in demonstratione separatim a præmissis, sicut ponuntur subiectum, & prædicatum in conclusione, cognitio illius includitur in cognitione præmissarum, seu principii. Sed hoc videtur reduci ad quæstionem de nomine, sic tamen illud tenent communiter Philosophi cum Arist. hic.

1. Præcognitiones non dicuntur actus intellectus, qui sunt cognitiones formales, sed ea, quæ cognoscuntur de supradictis præcognitis, ante demonstrationem, quæ tantum sunt duæ, scilicet, *an sit?* & *quid sit?* nam licet sint quatuor, quæ de qualibet re possunt inquiri, scilicet, *an sit?* *Quid sit?* *Qualis sit?* & *propter quid sit?* Tamen hæc duo ultima per demonstrationem cognoscuntur, nam cum demonstretur passio de subiecto, & denotetur ratio propter quam subiecto conveniat, *Qualis sit?* & *propter quid sit?* Non debent præcognosci. Advertendum tamen est, quod *an sit?* vel potest inquiri de re, & dicitur, *an sit res?* Vel potest inquiri de veritate, & dicitur; *an sit veritas?* Similiter, *quid sit?* Vel potest inquiri de nomine, & dicitur; *quid sit?*  
*sen*

*seu significet nomen?* Vel potest inquiri de re, & dicitur, *quid sit res?* Nunc est difficultas, quænam ex his præcognitionibus debeant cognosci de tribus, supradictis præcognitis ante demonstrationem?

3 Dicimus 1. de principio, seu præmissis non præcognoscitur, *quid sit?* sed tantum, *an sit?* Tam loquendo de re, quam de veritate. Prima pars patet, quia *quid sit?* Inquirit essentiam, seu definitionem rei, sed præmissæ, cùm sint quid complexum, nequeunt definiri: ergo nequit de illis præcognosci, *quid sit?* Secunda pars etiam patet, quia veritas conclusionis infertur ex veritate præmissarum: ergo debet præcognosci veritas præmissarum, sed nequit cognosci talis veritas quin cognoscatur in re esse præmissas: ergo de principio, seu præmissis debet præcognosci, *an sit?* Tam loquendo de re: quam de veritate.

4 Dicimus 2. de subiecto debet præcognosci, *an sit?* & *quid sit?* Probatur prima pars, quia subiectum debet præcognosci, ut aptum ad hoc, ut de illo enunciatur passio, sed de illo, quod nullum esset habet, nequit aliqua passio enunciari: ergo de subiecto debet præcognosci, *an sit?* Quod non debet intelligi de existentia, sed sufficit, quod cognoscatur possibilitas. Probatur secunda pars, quia definitio est medium ad demonstrandam passionem: ergo debet præcognosci de subiecto, de quo demonstratur passio, sed per definitionem respondetur ad *quid sit*: ergo de subiecto debet præcognosci *quid sit?*

5 Dicimus 3. de prædicato, seu passione tantum debet præcognosci *quid sit nomen?* seu *quid nomen significet?* Probatur, quia existentia, vel possibilitas passionis nequit cognosci sine habitudine ad subiectum, sed hæc ostenditur in demonstratione: ergo nequit de passione præcognosci, *an sit res?* & consequenter  
nc.

neque *quid sit res* ? quia *quid sit* ? semper præsupponit, *an sit* ? Deinde si ignoretur quid significet nomen passionis, v.g. risibilitas, nullatenus poterit demonstrari de homine : ergo necessario debet præcognosci de passione *quid nomen significet* ? Ubi adverte, quod sufficit cognitio confusa significationis, seu rei significatæ per nomen, non autem requiritur cognitio clara, quia hæc nequit haberi, quin cognoscatur *an sit* ? & *quid sit* ? loquendo de re. Cum quo potest responderi ad aliqua argumenta.

### QUÆSTIO III.

*Quomodo præmissa concurrant ad assensum conclusionis ?*

1 **P**Ræmissa, & similiter conclusio, possunt accipi, vel formaliter, ut dicunt actus intellectus, vel materialiter, ut dicunt obiecta prædictorum actuum disposita in forma syllogistica. In hoc secundo sensu non procedit difficultas, omnes enim fatentur, præmissas in genere causæ materialis posse dici causam conclusionis quia termini præmissarum sunt etiam termini, seu extrema conclusionis. Possunt etiam præmissæ, materialiter sumptæ, dici aliquomodo causa efficiens conclusionis; quia medium præmissarum, quod in potissima demonstratione est definitio, seu essentia subiecti, est quasi causa efficiens passionis, quæ in conclusione prædicatur de subiecto. Difficultas autem procedit de præmissis formaliter sumptis.

2 Aliqui negant causalitatem præmissarum, respectu conclusionis, præter causalitatem assignatam de præmissis materialiter sumptis. Communior tamen sententia asserit, quod præmissæ concurrunt simul cum intellectu in gene-



re causæ efficientis ad assensum conclusionis; eo modo, quo obiectum concurret simul cum intellectu ad sui notitiam, vel per se immediate, vel media sua specie. Videatur Mastrius in Log. disp. 11. quæst. 3. ubi adducit aliquos Aucthores.

3 Dicimus 1. Præmissæ modo dicto, in genere causæ efficientis causant conclusionem. Pro hac conclusione citatur Scotus quæst. 1. prologi; §. *Ad secundum*, & in 1. dist. 3. quæst. 7. lit. A. & §. *Ad questionem*: quibus in locis loquitur de causalitate obiecti, respectu intellectio- nis.

4 Probatur 1. quia in præmissis inveniuntur omnia signa, quibus à posteriori arguitur, aliquid esse causam effectivam alterius, nam præmissæ continent virtualiter conclusionem, & conclusio assimilatur præmissis, ita ut si præmissæ sunt necessariæ, certæ, & evidentes, etiam conclusio est necessaria, certa, & evidens. Deinde conclusio essentialiter dependet à præmissis, ita ut sit impossibile, intellectum efficere conclusionem, quin præmissæ sint in ipso intellectu; conclusio enim, ut conclusio, dicit ordinem essentialem ad præmissas, unde si intellectus absque præmissis, aliquam eliceret propositionem, talis propositio non esset conclusio, quia conclusio est scientia, & propositio elicitæ, absque præmissis, non est scientia: ergo præmissa in genere causæ efficientis concurrunt ad conclusionem.

5 Probatur 2. Quia quod constituit potentiam in actu primo, concurret efficienter cum illa ad actum secundum, sed præmissæ constituunt intellectum in actu primo potentem elicere conclusionem: ergo præmissæ concurrunt efficienter cum intellectu ad conclusionem, & consequenter ex intellectu, & præmissis, ut causis partialibus, constituitur causa totalis effectiva conclusionis.

6 Respondentaliqui, præmissas tantum esse conditiones, ut intellectus conclusionem eliciat, non autem causam partialem ad producendam conclusionem simul cum intellectu. Sed contra est primo, quia differentia essentialis effectus nequit provenire originativè, nisi ab eo quod est causa efficiens, sed per præmissas differunt essentialiter originativè conclusiones, conclusio enim probabilis differt essentialiter à conclusione necessaria, eo quod præmissæ essentialiter differunt; ergo præmissæ non sunt conditiones, sed veræ causæ efficientes conclusionis. Secundo, quia effectus non assimilatur conditioni requisitæ ad productionem illius, sed veræ causæ illius productivæ; sed conclusio assimilatur præmissis, ut supra dictum est; ergo præmissæ non sunt conditio requisita, sed vera causa productiva conclusionis.

7 Arg. 1. Conclusio vera se sola potest movere intellectum ad sui cognitionem; ergo præmissæ non concurrunt efficienter ad assensum illius. Resp. disting. antec. conclusio, ut conclusio est, se sola potest movere intellectum ad sui cognitionem, nego, ut quædam propositio est præcisè, concedo. Etenim conclusio, ut propositio est præcisè, nullum ordinem dicit ad præmissas, & sic potest cognosci sine illis; at verò, ut conclusio est, dicit ordinem essentialem ad præmissas, & sic nequit movere intellectum ad sui cognitionem sine præmissis.

8 Arg. 2. In hoc enthymemate; *Omne animal rationale est homo; ergo Christus est homo*, consequens non causatur ab antecedenti, cum consequens sit supernaturale, & de fide, antecedens verò naturale, supernaturale autem nequit à naturali causari, alias effectus esset perfectior sua causa, quod nequit dici; ergo præmissæ non causant efficienter conclusionem. Resp. quod in prædicto enthymemate subintelligitur hæc propositio minor; *Christus est animal rationale*, quæ

quæ est supernaturalis, & de fide, unde bene potest causari à præmissis prædicta conclusio supernaturalis, quin sequatur effectum esse perfectiorem sua causa.

9 Arg. 3. Sicut requiritur assensus præmissarum ad assensum conclusionis, ita requiritur simplex apprehensio ad iudicium, & actus intellectus ad actum voluntatis, sed neque apprehensio est causa iudicii, neque actus intellectus est causa actus voluntatis, sed tantum sunt conditiones requisitæ: ergo idem dicendum est de præmissis respectu conclusionis. Resp. neg. paritatem, quia exigentia apprehensionis ad iudicium, & actus intellectus ad actum voluntatis se habet per modum applicationis obiecti, ut dicitur in libris de Anima, præmissæ verò se habent per modum vis illativæ, & impulsivæ, respectu conclusionis, & sic non est conditio, sed causa effectiva ipsius conclusionis.

10 Dicimus 2. Præmissæ sunt causæ efficientes conclusionis, vel immediatè per se ipsas, vel per suas species. Hæc conclusio ex ipsis terminis patet, quia cum præmissæ, in causando conclusionem, se habeant ad modum, quo obiectum est causa notitiæ, & hoc causat notitiam, vel per se ipsum immediatè, si sit proportionatum potentiae, vel per suam speciem, idem videtur dicendum de præmissis, respectu conclusionis. Solum est difficultas, an præmissæ existant, quando existit assensus conclusionis? Nam si tunc existant, dicendum est, ipsas immediatè causare conclusionem. Si autem non existant, dicendum est, ipsas non immediatè, sed mediis suis speciebus derelictis in intellectu, conclusionem causare.

11 Aliquid dicunt, præmissas non existere, quando existit conclusio, quia ut tenet Arist. 2. Topic. cap. 4. intellectus nequit habere plures actus simul. Alii autem dicunt, præmissas

existere, quando existit conclusio, quia licet intellectus nequeat simul habere plures actus disparatos, seu nullam inter se connexionem dicentes, tamen potest simul plures actus inter se essentialiter connexos, ut sunt assensus præmissarum, & conclusionis habere, & ita dicunt, debet intelligi Arist. Utrumque est probabile.

12 Ex dictis colligitur, assensum conclusionis realiter distingui ab assensu præmissarum, cum causa à suo effectu realiter distinguatur, & præmissæ, ut dictum est, sint causæ conclusionis.

13 Dubitabis, an posito assensu præmissarum, ita necessitetur intellectus ad assensum conclusionis demonstratæ, ut nequeat illi non assentiri? Resp. affirmativè. Probatur, quia potentia naturalis distinguitur à libera in eo quod potentia libera, positis omnibus requisitis ad agendum, potest non ponere suum actum, potentia verò naturalis, positis omnibus requisitis, nequit non ponere suum actum; sed intellectus est potentia naturalis; ergo positis omnibus requisitis, nequit non ponere suum actum, sed posito assensu præmissarum, ponuntur omnia requisita ad agendum; ergo posito assensu præmissarum, nequit intellectus non ponere assensum conclusionis, & consequenter necessitatur ad assentiendum conclusioni.

14 Confirmatur, quia nequit potentia visiva non videre suum objectum debitè approximatum, eo quod sit potentia naturalis; ergo nequit intellectus non assentiri conclusioni debitè propositæ, cum etiam sit potentia naturalis, sed posito assensu conclusionis, debitè proponitur intellectui conclusio; ergo posito assensu præmissarum, nequit intellectus non assentiri conclusioni. Ubi adverte, quod sicut nequit voluntas impedire visionem objecti debitè propositi, nisi ponendo aliquod impedimentum ex parte

parte potentia, ita nequit impedire assensum conclusionis, nisi ponendo aliquod impedimentum ex parte intellectus, scilicet, removendo illum ab objectis, seu à cognitione præmissarum, & proponendo illi alia objecta, circa quæ suas operationes exerceat, sed hoc non est contra nos, quia tantum loquimur ex suppositione, quod intellectus rectè cognoscat præmissas, & ipsis assentiatur.

15 Arg. contra, in intellectu datur habitus ad faciliter assentiendum conclusioni, sed frustraneus esset talis habitus, si intellectus ex assensu præmissarum necessitaretur ad assensum conclusionis; ergo non sic necessitatur. Resp. neg. min. nam talis habitus ponitur in intellectu ad faciliter disponendas præmissas in forma syllogistica in ordine ad eliciendam conclusionem, cum sit habitus Logicae facilitans intellectum ad cognitionem artis syllogisticae, qua cognitione posita ex parte præmissarum, necessitatur intellectus ad assensum conclusionis. Si autem detur habitus scientiae, in qua fit demonstratio, v. g. Physicae, talis habitus faciliat intellectum ad conclusionem tantum materialiter sumptam, seu quatenus conclusio versatur circa objectum talis scientiae, non verò formaliter, seu in ratione formali consequentiae deductae ex præmissis.

#### Q U Æ S T I O IV.

*Utrum præmissa demonstrationes debeant esse  
veriores, certiores, & eviden-  
tiores conclusione?*

1 S Upponitur, quod veritas est conformitas actus intellectus cum objecto enuntiato, ut dictum est disp. de enuntiat. num. 1. Evidentia verò est clara, & distincta cognitio rei.

Certitudo autem est firma adhæsiō intellectus ad verum, ut verum est, præscindendo à claritate. Unde certitudo, & evidentia se habent, tanquam superius, & inferius, nam certitudo est superior, & evidentia inferior, & sic valet: *actus est evidens: ergo est certus*; non tamen è converso: *actus est certus: ergo evidens*.

2 Supponitur etiam, præmissas demonstrationis scientificæ esse veras, certas, & evidentes, quia sunt causæ conclusionis scientificæ, quæ est vera, certa, & evidens. Neque valet, si dicas, præmissas posse esse falsas, eo quòd ex falso aliquando sequitur verum. Nam contra est, quòd ex falso, ut falsum est, nunquam sequitur verum, sed tantum ex falso, si teneatur, seu concedatur ut verum.

3 Supponitur denique ( ut ex superius dictis colligitur ) quòd certitudo, & evidentia magis, & minus suscipere possunt. Patet hoc de certitudine, nam cum hæc consistat in adhæsiōne firma intellectus ad verum, potest quidem intellectus magis, vel minus firmiter adhærere, vel quia major, vel minor potest esse immutabilitas obiecti veri, vel quia rationes adhærendi magis, vel minus necessariæ esse possunt, cum quo, quam optimè stat totalis exclusio formidinis, sicut stat amor magis, vel minus intensus cum totali carentia, seu exclusione odii. De evidentia etiam constat, nam cum hæc consistat in claritate, seu distinctione, qua intellectus videt obiectum, potest hoc magis, vel minus clarè, seu distinctè videri, ut est perspicuum.

4 Dicimus 1. pro primo quæsito quæstionis præmissæ demonstrationis non sunt veriores conclusione ex illis deducta, sed tam ipsæ inter se, quam cum conclusione sunt æquè veræ. Hæc conclusio est communis, & probatur sic: veritas formalis est conformitas, seu adhæ-

adæquatio actus cum objecto taliter, quod tunc est verus actus intellectus, quando repræsentat objectum, sicut se habet, falsus autem quando illud non repræsentat, sicut se habet in se, ab eo enim quod res est, vel non est, propositio dicitur vera, vel falsa, sed ista conformitas, seu adæquatio consistit in indivisibili, ita ut nequeat intelligi major, aut minor: ergo præmissæ nequeunt esse veriores conclusionem. Major est ipsa veritatis definitio, minor autem probatur, nam ex hypothese, quod Petrus, verb. gratia sit albus, tam vera est ista propositio: *Petrus est albus*, ac ista: *Petrus est homo*; æqualiter namque conformantur cum suis objectis, ut per se patet; ergo conformitas actus cum objecto, in qua veritas consistit, stat in indivisibili; ergo nequeunt præmissæ demonstrationis esse veriores conclusione ex ipsis deducta. Potest hoc confirmari ex Arist. citato à nostro Meron disp. de syl. demonstr. Assertionem 5. dicente, quod sic, servatis servandis, differendum est de veritate entis, quomodo de numero, sed si cuilibet numero addatur, aut detrahatur unitas, penitus ipse immutatur; ergo si veritati aliquis gradus intensivus addatur, aut detrahatur, talis veritas penitus aboletur.

5 Arg. 1. Una propositio magis necessaria, quam alia esse potest, ut patet in supra positis, magis enim necessaria est secunda, quam prima; ergo etiam una propositio potest esse magis certa, quam alia. Resp. neg. paritatem disparitas est, quod necessitas consistit in connexionem prædicati cum subiecto, & est certum, quod prædicatum secundæ propositionis majorem connexionem habet cum subiecto, quam prædicatum primæ, veritas autem stat in conformitate actus cum objecto, quæ ut dictum est, magis, & minus non admittit 6. Arg. 2. Unus actus intellectus potest esse perfectior alio; ergo &

verior. Prob. conseq. quia si actus perfectior non est verior alio imperfectior sequitur, quod veritas fidei non sit verior, quam quælibet alia veritas humana, sed hoc est absurdum: ergo actus perfectior est verior imperfectiori. Resp. neg. paritatem, quæ sit inter perfectionem actuum, & eorum veritatem, nam perfectio actus sumitur ex objecto, & ex modo tendendi circa illud, quare perfectissimum obiectum, ut est Deus, perfectissimum infert actum, & imperfectius obiectum, sicuti est quodvis obiectum humanum, imperfectiorem actum infert, veritas verò desumitur ex conformitate actus cum obiecto, quæ conformitas, ut ostensum, manet, in indivisibili consistit, unde licet actus fidei sit perfectior propter obiectum, quam actus tendens circa obiectum humanum, sunt tamen æquales in veritate, cum hæc magis, & minus non suscipiat. Deinde quia etiam ex modo attingendi obiectum, unus actus potest esse perfectior alio, ideòque actus beatificæ visionis perfectior est, quam actus fidei, eo quod ille perfectiori modo Deum attingit, in veritate tamen uterque est æqualis, nam æqualiter conformatur cum obiecto.

7. Arg. 3. Unus actus voluntatis est melior alio: ergo & unus actus intellectus alio verior. Patet consequentia, nam sicut veritas actus consistit in conformitate cum obiecto, ita bonitas actus voluntatis in conformitate cum ratione naturali. Deinde Arist. 4. Met. text. 18. dicit, quod magis mentitur, qui dicit, quatuor esse mille, quam qui dicit, quatuor esse quinque: ergo datur unus actus magis falsus, quàm alius: ergo & etiam unus verior alio, oppositorum enim eadem est ratio. Resp. ad argumentum neg. paritatem, nam conformitas voluntatis cum ratione sumitur ex pluribus circumstantiis, quæ bonitatem actuum illius augere, vel minuere possunt, ut dicitur latè in mate-



materiale de actibus humanis, conformitas verò actus intellectus cum obiecto, in qua veritas consistit, sumitur ex representatione obiecti, sicuti est, unde nequit unus actus esse magis, vel minus verus, quam alius, cum non possit magis, vel minus conformari cum obiecto. Ad illud Arist. dicimus, quod unus actus intellectus potest esse magis falsus, quam alius, sed hoc tantum materialiter, seu ratione materiæ, & juxta communem loquendi modum, non verò formaliter, seu in ratione formali falsitatis; quæ est non conformitas cum obiecto, seu representatio illius aliter, ac est, quæ est quid indivisibile, ut dictum est de conformitate, & hoc est, quod intendit Arist. in textu præallegato.

8 Dicimus 2. Præmissæ demonstrationis sunt certiores, & evidentiores conclusionem ex ipsis deducta. Hanc conclusionem tenet major pars Scotistarum. Probatur, præmissæ sunt certiores, & evidentiores conclusionem, si firmitus illis adhæreat intellectus, quam conclusioni, & clarius, distinctiusque illas intuetur, quam istam, sed intellectus firmitus adhæret præmissis, quam conclusioni, clariusque, & distinctius illas intuetur quam istam: ergo præmissæ sunt certiores, & evidentiores conclusionem. Major est certa, & minor, in qua est difficultas, probatur, nam ut inquit Arist. propter quod unumquodque tale, & illud magis, sed præmissæ causant certitudinem, & evidentiam conclusionis, seu ita est certa, & evidens propter illas: ergo præmissæ sunt certiores, & evidentiores conclusionem. Minor patet quoad certitudinem, quia ideò adhæret intellectus conclusioni, quia adhæret firmiter præmissis, ut per se constat. Patet etiam quoad evidentiam ex Arist. 1. Posterior. cap. 2. dicente: *Non solum autem oportet eum, qui habiturus est scientiam per demonstrationem, magis principia cognoscere, & magis eis credere, quam rei demonstrata: ergo.*

9 Arg. 1. Major certitudo alicuius actus sumitur ex rationibus, quibus movemur ad assentiendum, sed non sunt plures rationes, quæ potius moveant ad assentiendum præmissis, quam conclusioni; ergo præmissæ non sunt certiores, & evidentiores conclusionem. Prob. min. nam ideò assentimur, extrema uniri inter se in conclusione, quia assentimur, ipsa in præmissis uniri cum medio, sed eadem est unio, & connexio extremorum cum medio, ac ipsorum inter se, juxta illud commune principium: *Quæ sunt eadem uni tertio*, &c. ergo non est ratio assentiendi potius præmissis, quam conclusioni. Consequentia patet, quia eademmet veritas, & connexio nequit esse evidentior, aut certior se ipsa. Deinde nam ut aliquis actus sit certior alio, necesse est, quod habeat obiectum motivum, seu principium formale assentiendi diversum, sed hoc est idem, tam in præmissis, quam in conclusione, quippe est connexio essentialis, quæ sicut versatur inter extremitates, & medium, ita & inter ipsas, inter se comparatas: ergo.

10 Resp. neg. min. Cuius probationis etiam negatur minor, quia non eodem modo, nec eadem unione extrema uniuntur cum medio, ac inter se, nam unio cum medio est immediata, & independens, unio autem inter se est mediata, & dependens. Neque ex prædicto principio aliquid contra hoc infertur, imò quia, in illo unio extremorum cum medio assignatur, ut causa unionis illorum inter se, aperte deducitur, hanc esse distinctam unionem ab illa, Cum ergo unio immediata, & independens, quæ est, quæ versatur inter extrema, & medium in præmissis, sit intimior, & manifestior, ideò intellectus certius, evidentiusque præmissis, quam conclusioni assentitur. Et licet eadem sit veritas connexionis extremorum cum medio, ac connexionis illoꝝ inter se, diver.

diversotamen modo concipitur in præmissis , ac in conclusione , nam unio in præmissis concipitur cum habitudine extremorum ad tertium , in conclusione autem cum habitudine extremorum inter se , & cum illa unio , prout importat habitudinem ad tertium , sit intimior , & manifestior , ideò intellectus certius , & evidentius assentitur ei , quācumque eam concipit cum habitudine extremorum inter se , eadem namque veritas , prout diverso modo conceptibilis , potest esse se ipsa certior , ut patet in veritate huius propositionis ; *Densest* , quæ quatenus ei assentitur per divinam revelationem , certior est se ipsa , quatenus per naturalem discursum demonstrata . Ex quo patet ad primam rationem pro consequentia adductam , atque etiam ad secundam , essentialis enim connexio non movet eodem modo in conclusione , ac in præmissis , nam in illa est mediata , & dependens in istis verò independens , & immediata , ut sæpè dictum est .

II Arg. 2. Hæc conclusio ; *Deus est* , est tam certa , & evidens Philosopho , quā omnes effectus , ex quibus cognitis , in cognitionem Dei ducitur ; ergo præmissæ non sunt certiores , & evidentiores conclusione . Confirmatur , nam conclusio deducta ex uno principio revelato , & alio naturaliter noto , æquè certa est , ac ipsa principia revelata , ut patet ; ergo necesse non est , præmissas esse certiores conclusione . Resp. ad argumentum , quòd & si hæc propositio ; *Densest* , sit æquè certa , imò certior , quā omnes effectus , ex quibus deduci potest , si consideretur , ut cognita per fidem , considerata tamen , ut educta , seu illata ex effectibus creatis , tanquam ex præmissis , non habet tantam certitudinem , neque evidentiam , quantam habent ipsi effectus , seu præmissæ , ex quibus deducitur ; magis enim movet Philosophum naturalem , illique magis patet natura

hominis, plantæ, &c. quam natura Dei, quatenus ex his effectibus agnoscitur, etiam si ex eis evidenter inferatur. Ad confirmat. respond. quod conclusio deducta ex duobus principiis, altero revelato, & altero lumine naturali noto, qualis est in hoc syllogismo: *Omnis homo est rationalis; Christus est homo: ergo Christus est rationalis*, dupliciter considerari potest; Primo, quatenus subesset divinæ revelationi, in quo casu est omnino certum, quod non haberet minorem certitudinem, quam præmissæ, seu propositiones jam assignatæ, imò esset certior quam altera illarum, quæ est naturali lumine nota. Secundo considerari potest, ut educta, seu illata ex illis præmissis, in quo sensu est minus certa illis, & non est propriè conclusio de fide, nam actus fidei immediatè innititur divina veritate revelanti, & non mediante discursu, non enim conclusionibus revelatis assentimur, quatenus per discursum inferuntur ex præmissis, alioquin actus fidei non esset obscurus, sed clarus, utpotè demonstratus, quod est absurdum. Ex quo patet, præmissas semper esse certiores, & evidenciores conclusione ex ipsis illata.

12 Dubitabis 1. quomodo intelligi debeat illud commune principium, nempe: *Conclusio sequitur debiliorem partem*? Resp. ita intelligi debere nimirum, quod quando aliqua ex præmissis est probabilis, & si altera præmissa evidens sit, conclusio tantum probabilis evadit. Similiter conclusio semper conformatur cum præmissa minus certa, minusque evidenti. Cujus ratio est, nam conclusioni assentimur propter præmissas, ita ut istæ sint causæ illius, sed effectus non potest esse perfectior sua causa, ergo conclusio necessario sequitur præmissam imperfectionem, atque ideo sequitur debiliorem partem.

13 Dubitabis 2. Quænam sint conditiones requi-

requisitæ ad hoc , ut valeat , & sic verum illud prædictum principium ; *Propter quod unum-quodque tale , &c.* Resp. quòd quatuor communiter ad hoc requirunt conditiones. Prima est , quòd illa ratio , quæ dicitur conveniens , uni propter alterum , utrique convenire possit. Ob defectum huius conditionis non bene inferitur : *Homo fit ebrius propter vinum* : ergo *vinum est magis ebrium* . Secunda est , quòd talis ratio magis , & minus suscipiat. Defectu cuius conditionis non valet hæc illatio ; *Filius est homo propter patrem* ; ergo *pater est magis homo , quàm filius* . Tertia est , quòd illa ratio conveniens sit realiter distincta , seu non sit eadem numero in uno extremo , ac in altero . Propter defectum huius conditionis non bene inferes : *Homo est risibilis propter rationalitatem* ; ergo *rationalitas est magis risibilis , quàm homo* ; quia eadem met numero risibilitas utrique convenit. Quarta denique conditio est , quòd id , propter quod aliud est tale , non communicet illam rationem , seu formam in eodem gradu , in quo ipsum illam habet . Ex defectu huius non bene sequitur ; *Aliquid est calidum , ut quatuor propter aliud calidum , ut quatuor* ; ergo *unum calidum , ut quatuor , est magis calidum , quàm aliud calidum , ut quatuor* . His conditionibus servatis , semper erit firmum prædictum principium. Quæ si bene perpendantur , absque dubio conveniunt præmissis , & conclusioni respectu evidentiae , & certitudinis , unde in illis valet prædictum principium .

## Q U Æ S T I O V.

*Verum præmissa demonstrationis debeant esse de omni, & per se & de prædicato universalis?*

1. **S**upponitur 1. Quod illud commune principium: *dici de omni*, est duplex. Aliud prioristicum, posterioristicum aliud. Prioristicum est, quando de subiecto ita enunciatur prædicatum, ut nihil sit in subiecto de quo prædicatum non dicatur, & hoc, si prædicatum sit necessarium, si contingens, si verum, si falsum, cum in forma syllogistica disponi possit, ut, *omnis homo currit: omnis homo est animal, &c.* Et dicitur prioristicum, quia pertinet ad libros priorum, in quibus solum agitur de syllogismo, quatenus ratione formæ est necessarius in qualibet materia. *Dici de omni* posterioristicum est, quando nullum datur subiectum, de quo prædicatum non enunciatur, nec ullum tempus, in quo prædicatum subiecto non conveniat, ut in hac propositione: *homo est risibilis*, &c. Vocatur posterioristicum, eo quod ad libros Posteriorum spectat.

2. Supponitur 2. Propositionem *de per se* quadrupliciter sumi. Primò, quando prædicatum est de essentia subiecti, ut cum definitio, vel partes eius prædicantur de subiecto. Ut in hac, *homo est animal rationale*. Hic dicitur primus modus dicendi per se. Secundò, quando prædicatum est propria passio subiecti. Cuiusmodi est ista propositio: *homo est risibilis*. Ille vocatur secundus modus dicendi per se, ad quem reducuntur omnia illa, quæ appellantur *proprium*. Tertiò, quando substantia dicitur existere per se, prout contrahitur modo essendi in alio. Hic dicitur tertius modus essendi per se. Ad quem reducun-

dūcuntur accidentia in abstracto, licet enim hæc inhæreant subiecto, talis tamen inhærentia non exprimitur in huiusmodi prædicatione, ut in ista propositione: *albedo est color*. Quartò tandem, quando denotatur causa efficiens, vel quævis alia; ut in his propositionibus: *Medicus medetur: Ædificator adificat*, in illis enim subiectum est causa prædicati. Hic dicitur quartus modus dicendi per se.

3. Supponitur 3. Quòd pro prædicato universali non intelligimus in præsentì, prædicatum universale logicum, quod est multis commune, sed prædicatum necessarium. Ad quod tria requirunt. Primum, quòd dicatur de omni subiecto propositionis: unde in hoc sensu hæc propositio: *vivens est animal*, non est de prædicato universali, eo quòd animalitas non enunciatur de omni viventi. Secundum est, quòd prædicatum conveniat per se subiecto: quia propter ista propositio: *omnis Cygnus est albus*, non est de prædicato universali, ut hoc usurpatur in præsentì. Tertiū denique est, quòd conveniat subiecto cōvertibiliter: propter quod ista propositio: *homo est animal*, non est, in hoc sensu, de prædicato universali; quia quamvis prædicatum dicatur de omni subiecto; non tamen convertibiliter, ut per se patet.

4. Dicimus 1. Præmissæ demonstrationis debent esse de omni, & per se, modo supra explicato. Probatur; nam præmissæ debent esse necessariæ; sed quælibet propositio necessaria continetur sub aliquo ex prædictis modis dicendi per se; ergo præmissæ debent esse propositiones de per se: sed omnis propositio de per se, est etiam de omni, ut illas examinanti patebit; ergo præmissæ debent esse de omni, & per se.

5. Dicimus 2. Aliqua ex præmissis debet esse de prædicato universali (in sensu jam explicato) in demonstratione *propter quid*, in demonstratione.

monstratione autem *quia* non requiritur hoc necessariò. Probatur prima pars; nam in demonstratione potissima passio demonstratur de proprio, & adæquato subiecto; sed passio enunciatur convertibiliter de proprio, & adæquato subiecto; ergo aliqua ex præmissis debet esse de prædicato universalis. Non tamen est necessarium, quòd utraque præmissa semper sit de prædicato universalis. Patet hoc in hac demonstratione: *Omne rationale est risibile: Petrus est rationalis*; ergo *Petrus est risibilis*. Attamen perfectior est demonstratio, in qua propria passio demonstratur de proprio, & adæquato subiecto; passio enim per se primò convenit adæquato subiecto, & ratione huius convenit inferioribus sub eo contentis. Probatur secunda pars conclusionis: quia in hac demonstratione: *Omne risibile est animal: Petrus est risibilis*; ergo *Petrus est animal*; nulla propositio est de prædicato universalis, ut ex ipsa constat; ergo in demonstratione *quia* non est necessarium, quòd aliqua præmissa sit de prædicato universalis.

6 Dubitabis: 2. An demonstratio debeat procedere ex immediatis, & ex propriis? Ante resolutionem huius dubii notare oportet, quòd causa mediata dupliciter dici potest. Primò, quando verè influit in effectum, quamvis aliquid mediet inter istum, & illam; sic rationalitas dicitur causa respectu risibilitatis, licet enim hæc non sit immediata, & prima passio rationalis, quia priores sunt capacitas disciplinæ, & admirabilitas, hoc tamen non obstat, quominus risibilitas causetur, seu pullulet à rationalitate. Secundò, potest dici causa mediata, quando non influit verè in effectum per se, sed per aliud sibi adiunctum, diciturque solum causa, eo quòd sit subiectum, in quo est, vel recipitur causa propria talis effectus. V. g. aqua calida respectu caloris in manu producti:  
aqua



aqua quidem dicitur causa remota caloris producti, non quia per se illum causet; sed quia est subiectum receptivum caloris, qui est vera causa caloris producti.

7 Notari debet secundò, quod *proprium* dupliciter sumi potest. Primò, ut opponitur extraneo. Hoc modo *sensibile* dicitur proprium respectu hominis; etsi enim hoc sit commune equo, cæterisque animalibus, dicitur tamen proprium homini, eo quod non est extraneum, seu alienum ab illo, sed potius intrinsecum, & essentiale ei. Secundo sumitur proprium quatenus opponitur commune, ut *risibile*, quod convenit soli homini. His notatis, per partes, ut distinctius procedamus, ad propositum dubium respondebimus. Pro prima ergo.

8 Respondetur, quod demonstratio *propter quid* potest producere per causam remotam, seu mediatam in primo sensu ex duobus explicatis. Ratio huius est: quia illa est vera demonstratio *propter quid*, quæ per veram, & propriam causam procedit: sed causa mediata in primo sensu, est vera, & propria causa: ergo demonstratio *propter quid* potest procedere per causam mediatam in hoc sensu. Hoc videtur in hac demonstratione a priori, seu *propter quid*; *omne animal rationale est risibile*: sed *homo est animal rationale*: ergo *homo est risibilis*. Si autem causa mediata sumatur in secundo sensu supradicto, nequit demonstratio per illam procedere. Ratio est, quia in hoc sensu causa non est verè, & propriè causa, ut per, se constat.

9 Pro secunda parte dubii respondetur primo, quod demonstratio debet procedere ex propriis, quatenus *proprium* contraponitur extraneo, ita ut medium, quod assumitur in præmissis; necessario connectatur cum subiecto, & passione. Ratio huius est, quia si medium

dium non cōnecteretur necessariò cum aliqua extremitate, conclusio deducta esset contingens, & non scientifica; ergo ut conclusio sit scientifica, seu demonstrativa, debet procedere ex propriis, prout proprium opponitur extraneo.

10 Respondetur 2. quod si *proprium* sumatur, ut opponitur communi, non est necessarium, quod demonstratio procedat ex propriis. Ratio huius est; quia quando demonstratur aliquis effectus communis pluribus causis, per quamlibet ex his demonstrari potest, ut calor, qui potest demonstrari per ignem, aut per solem; ergo non est necessarium, quod demonstratio procedat ex propriis in hoc sensu.

11 Dubitatis 2. An demonstratio possit procedere ex singularibus, contingentibus, & corruptibilibus? Respondetur negativè. Ratio est; quia scientia seu demonstratio est cognitio invariabilis, & necessariæ veritatis; sed principia, quæ aliter se habere possunt, ac se de facto habent, cuiusmodi sunt singularia, contingentia, & corruptibilia, nequeunt causare invariabilem, & necessariam conclusionem; ut per se patet; ergo demonstratio non potest procedere ex singularibus, contingentibus, & corruptibilibus.

12 Argum. contra; existentia Dei demonstratur ex effectibus creatis; sed tales effectus sunt contingentes, siquidem sunt ad extra; ergo demonstratio ex contingentibus procedere potest. Confirmatur; nam plures sunt demonstrationes, quæ procedunt de singularibus omninò contingentibus; astrologus enim evidenter demonstrat futuram eclipsim ex singulari, & corruptibili situ, & positione astrorum; ergo. Ante responsionem nota, quod prædicti effectus possunt bifariam consi-

de-

derari : Primò , quatenus contingentes sunt , seu non necessarij quoad existentiam , ita quod hæc liberè conservatur à Deo. Secundò , quatenus jam positi talis effectus in rerum natura , dicunt necessariam connexionem cum sua causa prima , ad differentiam ipsorum effectuum , prout non necessariò , sed contingenter à causis secundis pendent ; Petrus enim , verb. gratia non solum contingenter existit , sed eadem contingentia à suo patre dependet , poterat quidem immediatè a solo Deo produci : dependentia tamen respectu Dei , ita est invariabilis , & necessaria , ut sit intrinseca effectui , realiterque cum illo identificata. Hoc notato.

2 Respondetur ad argumentum , quod quando ex effectibus demonstratur causa , non est , quatenus contingentes sunt , sed quatenus cum sua causa necessariò connectuntur : unde rectè ex existentia creaturarum inferitur existentia creatoris ; nam omne creatum ab aliquo creatore dependet , alioquin non daretur in causis ultimis terminus dependentiæ , quod est absurdum , quæ dependentia creaturæ respectu Dei est omninò invariabilis , & necessaria ; ideòque ex illa demonstrari potest Dei existentia. Ex quo patet ad confirmationem ; nam ex positione , & situ contingenti astrorum evidenter inferitur futura eclipsis , licet enim hæc positio sit in se contingens , illa tamen supposita , connexio cum tali effectui , nempe eclipsi , est omninò necessaria.

## Q U Æ S T I O VI.

*Quid, & quod duplex sit propositio per se nota?*

**I** Thomistę sic communiter propositionem per se notam definiunt : *est cuius prædicatum est de ratione subiecti*. Quam definitionem reiiciunt omnes Scotistę : ideòque illa sic impugnatur ; propositio, in qua prima, & immediata passio prædicatur de definitione primi, & adæquati subiecti, est propositio per se nota : sed talis passio non est de ratione formali subiecti, ut patet in hac propositione : *animal rationale est capax disciplina* ; in qua prædicatum non est de ratione formali subiecti, ut nullus ignorat : ergo prædicta definitio non est bona, siquidem omni suo definito non congruit. Prob. mai. prima, & immediata passio est indemonstrabilis à priori de definitione subiecti, sed prædicatum, quod à priori est indemonstrabile, est per se notum : convenire subiecto : ergo talis propositio est per se nota. Contra prædictam definitionem sic arguitur secundò : aliquę sunt propositiones, in quibus prædicatum est de ratione subiecti, & non sunt per se notę, ergo supra data definitio non est bona, eo quod convenit aliis à suo definito. Prob. anteced. propositiones, in quibus ratio superior de suo inferiori prædicatur, cujuscmodi est hæc : *homo est animal*, habent prædicatum, quod est de ratione subiecti : sed tales propositiones non sunt per se notę : ergo. Prob. min. quia propositio per se nota ex ipsis terminis ( ut statim dicemus ) debet esse nota, taliter, quòd nullo alio indigeat, ut eius veritas omnibus innotescat, sed hoc prædicatum *animal*, ut hac voce profertur, est indifferens ad hominem, & brutum : ergo ex ipsis terminis non ha.

habet necessariam , & determinatam connexionem cum homine , nisi aliquid addatur , per quod ad esse hominis determinetur ; ergo propositio hæc , & aliæ huiusmodi aliquo alio egent , ut earum veritas innotescat , atque adeò non sunt propositiones per se notæ ; consequenterque , &c. Hac igitur definitione impugnata.

2 Dicimus 1. *Propositio per se nota est illa , qua ex ipsis terminis confuse cognitis , ut sunt eius , nata est habere evidentem veritatem* . Hæc definitio ferè verbaliter decerpitur ex Scotto in 1. dist. 2. quæst. 2. §. *Quoniam* , litt. A. quem omnes Scotistæ sequuntur . Ex qua duæ colliguntur conditiones ad propositionem per se notam requisitæ . Prima est , quod ad sui cognitionem non egeat alterius propositionis , sive aliorum terminorum cognitione . Secunda est , quod ex sola cognitione confusa terminorum cognoscatur . Quæ conditio exprimitur ab Arist. 1. Posterior. text. 21. dicente , quod prima principia cognoscimus , in quantum terminos cognoscimus : ergo propositio per se nota , quæ est quoddam primum principium , non indiget aliqua cognitione , præter ipsius terminorum cognitionem . ~~Et vel maxime~~ quòd propositio , quæ indiget ad sui cognitionem cognitione alterius , nequit dici nota per se , sed per accidens .

3 Probatur secunda definitionis conditio : omnis propositio per se nota excludit quamlibet cognitionem distinctam à cognitione priorum ipsius terminorum : ergo quoties propositio ultra cognitionem ipsius terminorum , etiam cognitorum confuse , indiget cognitione definitionis illorum , non erit propositio per se nota . Patebit hoc ; quia definitio , & definitum sunt termini distincti , in demonstratione enim potissima ( ut inquit Scotus ) definitio subiecti est medium ad demonstrandam  
pas-

passionem de ipso: sed in tali demonstratione per definitionem subiecti ostenditur, passionem convenire illi: ergo definitio, & definitum sunt termini distincti; nam si non essent distincti; in demonstratione tantum essent duo termini: quod formæ syllogisticæ omninò contrariatur; ac per consequens quævis propositio per se nota excludit quamlibet cognitionem à cognitione priorum terminorum distinctam.

4 Nec valet, si respondeas, quod definitio, & definitum sunt termini diversi penes diversos concipiendi modos; non tamen obiectivè, seu ex parte rei. Nam contra est: quia licet definitio, & definitum eandem rem significant, ipsi tamen termini non sunt idem, sive pro vocibus, sive pro conceptibus accipiantur. Quod voces sint distinctæ, ex se patet. Quod etiam conceptus distincti sint, perspicuum est: nam conceptus definiti est confusus; conceptus autem definitionis est distinctus, seu clarus; & hoc independentè à nostri intellectus operatione; ergo absolutè loquendo alius terminus est definitio, & alius definitum; ac per consequens, &c.

5 Confirmatur: nam multa prædicata sunt à priori demonstrabilia de definito, quæ de definitione sic demonstrari nequeunt; ergo definitio, & definitum sunt inter se termini distincti. Prob. antec. quia prima passio est demonstrabilis à priori de subiecto, seu definito per essentiam, seu per definitionem, quæ tamen passio de definitione est sic indemonstrabilis. Patet hoc in hac demonstratione; *Animal rationale est capax disciplina; homo est animal rationale: ergo homo est capax disciplina*. In qua de homine, qui est definitum, demonstratur a priori capacitas disciplinæ; sed de animali rationale, quod est definitio, nequit sic demonstrari, eo quod non est causa, per quam demon-

monstretur; & ideò hæc propositio: *animal rationale est capax disciplina*, est per se nota: ergo definitio, & definitum sunt termini distincti, consequenterque, &c.

6 Arg. 1. contra nostram definitionem: ista propositio: *homo est animal*, & aliz huiusmodi, in quibus superius de inferiori prædicatur, sunt per se notæ; sed non ex propriis terminis, ut sunt eius; animal enim est commune pluribus speciebus; ergo ut propositio sit per se nota, non requiritur, quòd ex propriis terminis, ut sunt eius, pateat. Prob. mai. quia eiusmodi propositiones sunt sufficientes, ut causent demonstrationem *propter quid*; ergo vel sunt per se notæ, vel deductæ ex primis; sed non hoc secundum, quia sunt immediatæ; ergo primum. Respond. quod huiusmodi propositiones æquivalent in demonstratione propositioni per se notæ, quantum ad veritatem intelligibilem; in quo sensu existimari possunt propositiones per se notæ, eo quod carent medio, quo demonstrantur à priori; non tamen sunt (absolutè loquendo) propositiones per se notæ; quia ex propriis terminis, ut sunt eius, nullatenus patent, ut ex dictis constat.

7 Réplicabis; ista propositio: *homo est animal rationale*; vel ista; *homo est rationalis*, est per se nota; ergo etiam hæc; *homo est animal*. Resp. neg. conseq. nam quando superius prædicatur de inferiori, non habet evidentem connexionem cum illo, ratione indifferentiæ, quam ex se tale superius importat, ideòque ad sui evidentiam indiget alio, nempe prædicato tale superius contrahente, & determinate; unde talis propositio non est per se nota; quando autem de subiecto prædicatur tota essentia, vel eius essentialis differentia; prædicatum non importat indifferentiam, atque adeò ex se causat evidentiam, & demonstrationem; nullatenusque ad hoc indiget alio.

8. Arg.

8 Arg. 2. Scotus docet, quod hæc propositio; *Deus est*, est per se nota, eo quod extrema illius nata sunt causare evidentiam huiusmodi complexionis cuilibet intellectui perfecte apprehendenti illius extrema; sed apprehensio perfecta idem est, ac distincta; ergo in propositione per se nota debent ejus termini apprehendi, non confusè, sed distinctè. Respond. quod idè ad notitiam per se hujus propositionis; *Deus est*, requirit Scotus distinctam apprehensionem terminorum, non quia propositio, ut est per se nota, exigit talem distinctam extremorum cognitionem, sed ut hæc propositio sit cognoscibilis evidenter ex suis terminis propriis, ut sunt ejus, unde cum in tali propositione subiectum non apprehendatur, ut terminus proprius, nisi distinctè cognoscatur, idè ad per se notum in prædicta propositione specialiter repertum, requirit Scotus distinctam terminorum cognitionem, non ob rationem propositionis per se notæ, ut sic; sed ut ejus termini, quatenus proprii, cognoscantur.

9 Dicimus 2. pro secundo, quod inquit questio; nulla propositio dicitur per se nota à nostra actuali cognitione, sed quævis propositio in se, & per se nota est cuiuscumque intellectui per se nota, & si actualiter non cognoscatur, quia quantum est ex terminis ipsius, est evidenter nota. Sic Scotus supra citatus, *vers. Ex his patet*, ante litt. B. quem omnes Scotistæ sequuntur contra Thomistas communiter asserentes, propositionem per se notam dividi in per se notam in se, & in per se notam quoad nos. Probatur conclusio; si ex eo propositio diceretur per se nota quoad nos, quia actualiter conciperetur ab intellectu, sequeretur, quod omnis propositio à nobis evidenter cognita, sive mediata, sive immediata, esset per se nota; sed hoc est falsum, ut patet; ergo. Patet sequela maioris, nam si omnis propositio, ut sit per se nota, dependet  
ex



ex actuali nostra cognitione; ergo quoties noster intellectus concipit aliquam veram, & evidentem propositionem, talis propositio, quæcumque sit, erit per se nota; sed hoc est absurdum; ergo. Confirmatur hæc ratio, & simul impugnatur divisio propositionis per se notæ à Thomistis statuta; propositio non dicitur per se nota, ex eo quòd actu cognoscatur, vel non cognoscatur, sed ex aptitudine ad causandam sui evidentiam in intellectu, quovis alio secluso; sed in huiusmodi aptitudine omnes propositiones per se notæ conveniunt, & eodem modo se habet penes quemcumque intellectum; ergo nulla est prædicta divisio. Prob. min. nam propositio per se nota, vel nata est cognosci ex propriis ipsius terminis, vel ex aliis? Si ex propriis; ergo omnes propositiones per se notæ in hoc conveniunt, respectu cuiusvis intellectus. Si ex aliis; ergo non est per se nota, sed per aliud, consequenterque nulla datur propositio, quæ sit per se nota in se, & non quoad nos.



<sup>768</sup>  
TRACTATUS

De Syllogismo topico, &  
sophistico.

**D**Iximus lib. 3. Sumul. syllogismum, ratione materiz, dividi in demonstrativum, topicum, & sophisticum. Ideoque, cum jam in antecedenti tractatu de syllogismo demonstrativo egerimus, in hoc de topico, & sophistico consequenter agemus. Pro quibus sit.

DISP. UNICA.

*Utrumque syllogismum complectens :*

**L**icet Aristot. de syllogismo topico per octo libros topicorum disputaverit, & de syllogismo sophistico per duos libros Elenchorum ( quem sequentes aliqui, valdè fusè, sed non minus confusè, de prædictis syllogismis sermonem instituunt ) nos tamen, brevitatis possibilibi, in hac unica disputatione aliqualem notitiam illorum tyronibus proponemus, quæ & ad illorum intelligentiam sufficiens videatur, & ab intellectus confusione pro viribus subterfugiat.

## Q U Æ S T I O I.

*De pertinentibus ad syllogismum topicum.*

**I** Dicimus syllogismus topicus, ex Arist. hic, *est, qui ex probabilibus est collectus.* Hæc definitio ab omnibus Philosophis admittitur, eo quod rectè explicat syllogismum topicum, ut distinctum, tam à demonstrativo, qui constat ex necessariis, certis, & evidentibus; quàm à sophistico, qui procedit ex apparentibus. Deinde, sicut syllogismus demonstrativus definitur per effectum, scilicet per scientiam, sic etiam per effectum potest definiri syllogismus topicus: *est, qui generat opinionem*, per quod distinguitur à demonstrativo, & etiam à sophistico, qui generat errorem.

2 Pro intelligentia syllogismi topici aliqua sunt observanda. Primum, quod Aristot. assignavit tanquam materiam remotam illius, hæc quatuor: definitionem, genus, proprium, & accidens, quæ prædicata topica appellavit, non quia judicaverit, prædicata tantum esse materiam remotam huius syllogismi (nam omnes termini, ex quibus propositiones constituuntur, dicuntur, & sunt materia remota syllogismi) sed quia ex diversitate prædicatorum desumitur diversitas problematum dialecticorum, quæ sunt materia proxima, ut infra dicetur. Sufficienciam horum prædicatorum desumpsit Arist. ex eo quod omne prædicatum, vel convenit subiecto communi convertibiliter, vel inconvertibiliter: si convertibiliter, aut essentialiter, & sic est definitio; aut accidentaliter, & sic proprium: si inconvertibiliter, aut essentialiter, & sic est genus; aut accidentaliter, & sic est accidens. Ubi advertendum est, quod differentia specifica in ordine ad speciem, & generica in ordine ad genus, non est prædicatum topicum distinctum à definitione, cum essentialiter convertibiliter prædicentur; si verò comparentur ad inferiora, non distinguuntur in ratione prædicati topici à

genere, cum essentialiter inconvertibiliter prædicentur. Idem dicendum est de transcendentibus, respectu suorum inferiorum.

3. Secundum, quod Arist. assignavit pro materia proxima syllogismi topici problema dialecticum, quod est quaestio de utraque parte contradictionis, vel contrarietatis, ut cum dicimus, v.g. *an terra sit frigida, vel calida?* Vel: *an terra sit frigida, vel non?* Dicitur problema dialecticum, quia utraque pars illius est probabilis. Ubi advertendum est, quod non dixit Arist. problema dialecticum esse materiam proximam syllogismi topici, eo quod totum problema ponatur, tanquam propositio prædicti syllogismi; sed quia tam præmissæ, quam conclusio illius, cum tantum debeant esse propositiones probabiles, necessario sunt partes problematis, ita ut non assentiatur alicui illarum, absque alterius partis formidine; ideoque appellantur propositiones problematicæ, ad differentiam propositionum, ex quibus syllogismus demonstrativus constituitur, quæ cum sint evidentes, certæ, & necessariae, nullatenus possunt ad problema, seu ad dubium reduci.

4. Ex quatuor supradictis prædicatis possunt deduci plures maximæ, seu plura loca dialectica ad probandam affirmativè, vel negativè quamcumque partem problematis, quæ omnia enumerat Aristot. à lib. 2. usque ad 8. ubi fere quingenta loca assignat, quæ ut advertit Merinerus, non melius possunt explicari, quam ipsum textum describendo, quod nos omittimus brevitate gratia, & quia quæ sunt communiora apud recentiores possunt videri, præcipuè apud nostros Mastrium, & Meron hic. Sit tamen regula generalis, quod quæcumque maxima probabilis dicitur locus dialecticus, eo quod est sufficiens ad probandam aliquam partem problematis, quæ est conclusio syllogismi topici. Ubi advertendum est, quod quando maxima, quæ  
de-

deducitur ex aliquo ex supradictis prædicatis : est necessaria, & ex illa necessario intertur aliqua conclusio; tunc prædicta maxima non dicitur locus dialecticus, seu probabilis, sed maxima demonstrativa, quia non ad probandam conclusionem syllogismi topici, sed ad probandam conclusionem syllogismi demonstrativi deservit. Neque hoc est contra Philosophum; nam solum intendit, quod ex quatuor prædictis prædicatis possint deduci plures maximæ ad probandam conclusionem syllogismi topici, non tamen negat, quod aliquæ maximæ deducantur ad probandam conclusionem syllogismi demonstrativi.

## Q U Æ S T I O II.

### *De spectantibus ad syllogismum sophisticum.*

1 **S**upponitur, hoc nomen *Sophistes* esse æquivocum, aliquando enim sumitur pro excellentia in aliqua arte, seu scientia, unde antiquitus professores sapientiæ, aut artis *Sophista* dicebantur. Aliquando verò sumitur pro habentibus aliquam apparentiam sapientiæ, & in hoc sensu jam communiter sumitur, & ipsum assumit Arist. in duobus libris *Elenchorum*, in quibus agit de syllogismo sophistico, qui etiam dicitur syllogismus falsigraphus, & contentiosus. Nunc.

2 Dicimus 1. Syllogismus sophisticus in communi sic potest describi: *Est qui cum propter aliquem defectum, verè syllogismus non sit, appareat syllogismus.* Quæ descriptio ex ipsis terminis patet, & benè explicatur per illam distinctionem syllogismi sophistici à verò syllogismo. Ubi advertendum est, quod ad rationem syllogismi sophistici necessario requiritur, quod falsitas illius aliquomodo sit occulta, nam si falsitas appareat, jam non erit syllogismus sophisticus.

3 Dicimus 2. Syllogismus sophisticus dividitur in syllogismum peccantem ratione materię, & ratione formę. Syllogismus sophisticus ratione formę sic potest describi: *Est, qui apparet formatus, iuxta regulas Logica; cū tamen, iuxta tales regulas non sit formatus, & potest dividi, juxta defectus, qui possunt occurrere in dispositione formę syllogisticę, quę possunt videri lib. 3. Sumul. Syllogismus Sophisticus ratione materię est, qui constat præmissis rectè dispositis in forma syllogistica, quarum aliqua, vel utraque, cū sit falsa, apparet vera. Aliter per effectum potest describi syllogismus sophisticus; est enim syllogismus generans errorem. Quęlibet definitio explicat syllogismum sophisticum, ut distinctum à syllogismo vero, topico, & demonstrativo.*

4 Dicimus 3. Syllogismus sophisticus ratione materię ex duplici capite potest provenire, scilicet ex fallacia in dictione, & ex fallacia extra dictionem. Fallacia in dictione dicitur, quando causa apparentię syllogismi sophistici, provenit ex ipsa dictione, sumpta dictione pro quocunque signo ad placitum, sive sit incomplexum, sive complexum: Fallacia extra dictionem dicitur, quando causa apparentię syllogismi sophistici, non provenit ex ipsa dictione, sed ex parte rei significatę per dictionem. Ex hoc duplici capite plures fallacias assignavit Arist. scilicet, ex dictione, fallaciam equivocationis, amphibologia, compositionis, divisionis, accentus, & figura dictionis. Ex alio verò capite, fallaciam accidentis, secundum quid ad simpliciter, ignorantia Elenchi, petitionis principii, consequentis, non causa ut causa, plurium interrogationum, ut unius. Quas omnes figillatim explicabimus; non ut sophisticè arguatur, hoc enim indecens viro sapienti videtur; sed ut sic arguentibus faciliè responderi possit.

## De fallaciis ex dictione.

5 Fallacia æquivocationis dicitur, quando aliqua dictio incomplexa manens una, pluram æquivocè significat, & in una præmissa sumitur in diversa significatione, ac in altera; ut cum dicimus: *omnis canis currit; sydus est canis: ergo sydus currit*, in quo syllogismo deceptio stat in hoc, quòd terminus *canis* in maiori sumitur pro cane latrabili; & in minori pro cane cælesti. Idem dicendum est de quocumque syllogismo, in quo aliquis terminus est æquivocus, ex quocumque capite proveniat æquivocatio, si non in eodem sensu, sed in diverso accipiat in præmissis.

6 Fallacia amphibologiæ dicitur, quando aliqua dictio complexa manens una, diversos habet sensus, & in una præmissa sumitur in diverso sensu ac in altera, vel in conclusione ut cum dicimus: *quicquid est Arist. possidetur ab Arist. hic liber est Arist. ergo hic liber possidetur ab Arist.* in quo syllogismo deceptio stat in hoc, quòd *liber Aristotelis* in minori sumitur, quatenus scriptus fuit ab Aristotele; & in conclusione, quatenus ab Aristotele possidetur. Similiter, cum dicimus: *Quicumque sunt Episcopi, sunt Sacerdotes; isti equi sunt Episcopi; ergo isti equi sunt Sacerdotes*, in quo syllogismo deceptio stat in hoc, quòd *isti sunt Episcopi*, denotat in maiori dignitatem Episcopalem, & in minori possessionem. Unde constat, fallaciam æquivocationis distingui à fallacia amphibologiæ, in eo, quòd æquivocatio in fallacia æquivocationis stat in dictione incomplexa; in fallacia verò amphibologiæ æquivocatio stat in dictione complexa.

7 Fallacia compositionis dicitur, quando ex sensu divisio inferitur sensus compositus ut cum dicimus: *qui sedet, potest ambulare, Petrus se-*

*det, ergo Petrus sedens potest ambulare.* Qui syllogismus est falsus, si maior sumatur in sensu diviso, & consequens in sensu composito.

8 Fallacia divisionis est, quando ex sensu composito infertur sensus divisus, ut cum dicimus: *Qui sedet, non potest ambulare; Petrus sedet; ergo Petrus sedens non potest ambulare.* Qui syllogismus est falsus, si maior sumatur in sensu composito, & consequens in sensu diviso:

9 Fallacia accentus dicitur, quando eadem vox diverso modo profertur, ut cum dicimus: *Qui habet leporem habet animal; lingua sapientis habet leporem: ergo lingua sapientis habet animal.* In quo syllogismo est deceptio, quia *leporem* in maiori sumitur pro animali, Hispanè dictum *Libre*, eo quod penultima est brevis, in minori verò est penultima longa, & ut sic significat elegantiam in dicendo.

10 Fallacia figuræ dictionis dicitur, quando propter similitudinem duarum dictionum, id quod convenit uni, infertur alteri convenire, quod tripliciter potest venire. Primò, si propter definitionem dictionum tribuitur illi eadem affectio grammaticalis, ut cum dicimus: *Musa est feminini generis; ergo & poeta*, vel logicalis, ut cum dicimus: *Facies est de prædicamento substantia: ergo & species*, in quibus syllogismis tribuitur poetæ; & speciei affectio grammaticalis, vel logicalis, quæ convenit Musæ, vel faciei, eo quod similem definitionem habeant.

11 Secundò, quando arguitur à significatione substantiæ rei tantum ad significationem substantiæ, & alicuius accidentis, ut cum dicimus: *Quidquid emisisti, comedisti; carnes crudas emisisti ergo carnes crudas comedisti.* In quo syllogismo deceptio stat in hoc, quod in maiori sumitur significatio quoad substantiam tantum, & in minori quoad substantiam, & quoad accidens.



12 Tertiò, quando dictio, quæ convenit superiori, ut abstrahit ab inferioribus, applicatur etiam inferioribus, & è contra, ut cum dicimus: *Homo est species: Petrus est homo; ergo Petrus est species*. In quo syllogismo deceptio provenit ex eo quòd ly *homo* in majori sumitur, ut abstrahit ab inferioribus, non verò in minori. Etiam hoc tertio modo potest dici fallacia, quando ex convenientia aliquorum in ratione communi, infertur convenientia illorum in ratione particulari, seu mutando *quale quid* in *hoc aliquid*, ut cum dicimus: *Petrus est homo: Ioannes est homo; ergo Petrus est Ioannes*. Cuius syllogismi deceptio stat in hoc, quòd ex convenientia, quam habent Petrus, & Ioannes in ratione hominis, arguitur convenientia illorum in rationibus individualibus.

## De fallaciis extra dictionem:

13 Fallacia accidentis dicitur, quando aliquid videtur concludi, ex eo quòd per se est tale, cum tamen non concludatur, nisi ex aliquo accidenti, ut cum dicimus: *Homo non est Rex; Carolus est homo; ergo Carolus non est Rex*. In quo syllogismo videtur concludi, Carolum non esse Regem, ex eo quòd sit homo, quòd nullatenus sequitur, nam si non esset Rex, hoc proveniret ex accidenti, accidentale enim est, quòd aliquis sit, vel non sit Rex.

14 Fallacia secundum quid simpliciter dicitur, quando arguitur ab eo quòd secundum quid est tale ad probandum esse tale simpliciter; ut cum dicimus; *Æriops est albus secundum dentes, ergo est albus*.

15 Fallacia ignorantie Elenchi dicitur, quando ex apparenti contradictione in præmissis infertur contradictio in conclusione, ut cum dicimus; *Petrus dormit noctu; Petrus non dormit*

*die: ergo Petrus dormit, & non dormit.* Cuius syllogismi deceptio stat in hoc, quod in præmissis appareat contradictio, cum re vera contradictio non sit. Dicitur hæc fallacia ignorantie Elenchi, quia Elenchus dicitur syllogismus consistens, & probativus conclusionis contrariæ, vel contradictoriæ propositioni concessæ à respondente, seu est syllogismus, per quem respondens reducitur ad impossibile, scilicet ad concedendum duo contraria, vel contradictoria, & ex ignorantia huius syllogismi potest aliquis decipi, & duo contraria, seu contradictoria concedere.

16 Fallacia petitionis principii dicitur, quando ad probandam aliquam conclusionem accipitur aliquid æquè, vel magis ignotum, ut cum dicimus: *Omne animal rationale currit: omnis homo est animal rationale: ergo omnis homo currit.* Cujus syllogismi deceptio stat in hoc, quod iuxta regulas Logicæ videtur evidenter probare conclusionem; cum tamen ratione materiæ nullatenus illam probet, eo quod major, quæ assumitur est æquè incerta, ac conclusio, ad quam probandum, assumitur.

17 Fallacia consequentis dicitur, quando ex consequenti arguitur ad antecedens, ut cum dicimus: *est animal: ergo est homo.* Cujus argumentationis deceptio stat in hoc, quod appareat ex animali (quod est consequens) bene argui ad hominem (qui est antecedens) sicut bene arguitur ab homine ad animal. Etiam negativè potest committi hæc fallacia arguendo à negatione antecedentis ad negationem consequentis, v.g. *non est animal: ergo non est homo.* Hæc ultima fallacia vocatur ab aliquibus fallacia antecedentis. Videantur, quæ diximus in Summulis loquendo de terminis inter se comparatis, & de regulis bonæ consequentiæ.

18 Fallacia non causæ, ut causa dicitur quando assumitur pro causa, quod re vera causa non est,

est, ut cum dicimus: *Arma attulerunt perniciem civibus*: ergo *non sunt permittenda*. Cuius argumentationis deceptio stat in hoc, quod tenentur arma, ut causa perniciæ, cum tamen illa non sint talis causa, sed illorum abusus.

18 Fallacia plurium interrogationum, ut unius dicitur, quando fit una interrogatio de pluribus, quorum aliquod est verum, & aliquod falsum, ut cum interrogatur: *an Petrus sit homo, & lapis?* in responsione cuius potest esse deceptio, fit ad utrumque simul respondeatur; si enim respondeatur affirmativè; bene infertur: ergo *Petrus est lapis*: si vero negativè respondeatur, recte sequitur: ergo *Petrus non est homo*. Vnde, non unica, sed pluribus responsionibus utendum est, dicendo: *est homo, & non esse lapis*.

20 Aliter solent explicari ab aliquibus aliquæ ex supradictis fallaciis, sed quælibet explicatio coincidit cum præcedentibus. Advertendum tamen est, quod aliqua fallacia potest fieri in dictione, & extra dictionem, quod provenit ex diversis acceptionibus terminorum, vel quoad ipsam dictionem, vel quoad significatum illius. Quæ omnia magis usu, & frequenti exercitio, quam regulis, & præceptis cognoscuntur. Quare sufficiant dicta pro totius Logicæ tractatu, & cedant in laudem, & gloriam Omnipotentis Dei, & Beatissimæ Virginis Mariæ, cuius descensionis festivitatem Ecclesia Toletana solemniter celebrat die 24. Mensis Januarii, in quo & nos huic operi ultimam manum imponebamus. Anno Domini 1692.

F I N I S.

# I N D E X

Tam Capitulorum, quæ in Logica parva, quam Disputationum, Quaestionum, & Sectionum, quæ in Logica, tam parva, quam magna continentur.

*Pars I. Logica parva, seu Sumularum.*

## L I B E R P R I M U S.

- Primum cap. *In quo agitur de termino, & eius divisionibus.* pag. 22  
Secundum cap. *In quo traditur aliqua signorum notitia.* 34  
Tertium cap. *In quo agitur de aliquibus affectionibus terminorum.* 36  
Quartum cap. *In quo agitur de Nomine, Verbo, & Oratione.* 46

## L I B E R S E C U N D U S.

- Primum cap. *In quo agitur de modo sciendi.* pag. 50  
Secundum cap. *In quo agitur de Enunciatione, & de eius divisionibus.* 57  
Tertium cap. *In quo agitur de Oppositione propositionum.* 63  
Quartum cap. *In quo agitur de Æquipollentia simplicium propositionum.* 69  
Quintum cap. *In quo agitur de conversione simplicium propositionum.* 76  
Sextum cap. *In quo agitur de propositione modali, & eius divisionibus.* 79  
Septimum cap. *In quo agitur de Oppositione, & Æqui-*

*Æquipollentia, & Conversione propositionum modalium.* 84

*Octavum cap. In quo agitur de propositionibus exponibilibus.* 99

## LIBER TERTIUS.

*Primum cap. In quo agitur de Argumentatione, & de eius divisionibus.* 92

*Secundum cap. In quo agitur de divisione syllogismi.* 98

*Tertium cap. In quo agitur de regulis observandis ad consistentiam syllogismorum.* 105

*Quartum cap. In quo agitur de reductione syllogismorum imperfectorum ad perfectos?* 108

*Quintum cap. In quo agitur de aliquibus divisionibus syllogismi.* 113

*Sextum cap. In quo agitur de arte inveniendi medium.* 115

### *Pars 2. Logica parva, seu Sumularum.*

*Proponitur modus arguendi.* 118

#### *Disp. 1. De pertinentibus ad terminum.*

*Quæst. 1. An terminus rectè definiatur?* 122

*Quæst. 2. An extra propositionem detur formaliter terminus?* 125

*Quæst. 3. Qualis sit divisio termini in subiectum, & prædicatum?* 127

*Quæst. 4. Utrum voces non significative habeant rationem formalem termini?* 129

*Quæst. 5. Utrum copula habeat rationem formalem termini?* 131

*Quæst. 6. De cæteris terminorum divisionibus.* 134

Disp. 2. De signo, & significatione.

- Quæst. 1. In quo consistat ratio signi? 137  
Quæst. 2. An voces significant res, an conceptus  
rerum? 140

Disp. 3. De modo sciendi.

- Quæst. Unica, In qua proponuntur aliqua dubia  
circa modum sciendi. 144

Disp. 4. De pertinentibus ad enunciationem.

- Quæst. 1. Quomodo enuntiatio rectè definiatur? 147  
Quæst. 2. Quales sint divisiones propositionis? 151  
Quæst. 3. In qua resolvuntur aliqua de oppositio-  
ne, & conversione simplicium propositionum? 155  
Quæst. 4. Quales sint divisiones propositionis mo-  
dalis? 160

Disp. 5. De pertinentibus ad argu-  
mentationem.

- Quæst. 1. Quales sint divisiones argumentatio-  
nis? 161  
Quæst. 2. An detur quarta figura Syllogistica? 162

L O G I C A M A G N A

Disp. 1. Proœmialis de ente rationis

- Quæst. 1. An detur, & quid sit ens rationis? 167  
Quæst. 2. Utrum ens rationis habeat proprias affe-  
ctiones? 175  
Quæst.

Quæst. 3. Utrum denominationes extrinsecæ sint entia rationis?	279
Quæst. 4. Quomodo ens rationis dividatur?	183
Quæst. 5. Utrum solus intellectus sit causa effectiua entis rationis?	189
Quæst. 6. Per quam operationem intellectus fiat ens rationis?	194
Quæst. 7. Utrum intellectus Divinus cognoscat, & efficiat ens rationis?	199
Quæst. 8. An secunda intentionis sint entia rationis?	212

## Disp. 2. Proæmialis de Naturâ Logicæ.

Quæst. 1. An, 'quid', & quotuplex sit Logica?	pag. 214
Quæst. 2. Utrum Logica docens, & utens distinguantur?	219
Quæst. 3. Quomodo concurrat Logica ad actus aliarum scientiarum.	229
Quæst. 4. Utrum Logica sit scientia?	239
Quæst. 5. Utrum Logica sit scientia practica, vel speculativa,	247
Sectio 1. Quid sint praxis, & speculatio, declaratur.	248
Sectio 2. In quo resolvitur quæstio.	257
Quæst. 6. Quodnam sit obiectum Logicæ?	263
Sect. 1. In qua agitur de obiecto in communi.	pag. 264
Sect. 2. In quo resolvitur quæstio.	271
Quæst. 7. Utrum Logica versetur circa modum sciendi formalem, vel obiectivum?	281
Quæst. 8. Utrum obiectum Logicæ pro formali sit quid reale, vel rationis?	287
Quæst. 9. Utrum Logica sit una, & quomodo?	297
Sectio 1. Exagitur Quæstio de Logica in effectu.	297.
	Seq.

Sect. 1. Exagitur Quæstio de logica in esse scibili.	307
Quæst. 10. Utrum logica sit necessaria ad alias scientias acquirendas?	309

-Tractatus de quinque vocibus, seu  
universalibus Porphyrii.

Disp. 1. De universali Metaphysico, &  
unitate formali.

Quæst. 1. Utrum natura, qua denominantur universales, dentur à parte rei?	317
Quæst. 2. Utrum naturis, qua denominantur universales, conveniat unitas formalis à parte rei?	323
Quæst. 3. In quo statu conveniat natura unitas formalis?	330
Quæst. 4. Utrum multiplicetur unitas formalis ad multiplicationem individuum?	334
Quæst. 5. An natura per unitatem formalem sit communis pluribus, & quomodo?	341
Sectio. 1. De communitate natura per indifferentiam.	343
Sect. 2. De communitate natura per inexisten- tiam.	355

Disp. 2. De distinctionibus:

Quæst. 1. Quor sint genera distinctionum?	365
Quæst. 2. Quid sit res? quid formalitas? Ubi ponuntur via, ad distinctiones cognoscendas?	369
Quæst. 3. Utrum simul cum identitate reali detur distinctio formalis ex natura rei?	373
Quæst. 4. Quomodo natura superiores ab inferioribus distinguantur?	398

Dis.



Disp. 3. De predicationibus,

Quæst. 1. Quid, & quomplex sit prædicatio?

pag.

400

Quæst. 2. Quid significet concretum primum, &

per se.

412

Quæst. 3. quibus terminis fiat prædicatio?

416.

Disp. 4. De universali Logico..

Quæst. 1. In quo consistat ratio formalis universa-  
lis logici?

424

Quæst. 2. Per quam operationem intellectus fiat  
universale logicum,

434

Quæst. 2. Quodnam sit definitum in definitione  
universalis?

449

Quæst. 4. Verum universalia, seu prædicabilia  
sint tantum quinque?

461

Quæst. 5. Verum universale sit genus ad quinque  
prædicabilia?

465

Quæst. 6. In qua resolvuntur aliqua dubia circa  
universale..

470

Disp. 5. De Genere primo prædicabili.

Quæst. 1. An genus rectè definiatur:

477

Quæst. 2. An genus prædicetur de speciebus, ut  
pars, uel ut totum?

484

Quæst. 3. Quomodo genus contineat de indivi-  
duis?

491

Quæst. 4. Quomodo genus contineat differen-  
tias?

496

Disp. 6. De specie secundo prædicabili.

Disp. 1. Verum species rectè definiatur à Por-  
phyrio.

504

Quæ.

Quæst. 2. De specie predicabili, & subiicibili inter se comparatis. 509

Disp. 7. De individuo.

Quæst. 1. An individuum rectè definiatur à Porphyrio? 514

Quæst. 2. Vtū Individuum, primò intentionaliter sumptum possit quidditative definiri? pag. 520

Disp. 8. De differentia tertio predicabili.

Quæst. 1. Quid, & quod simplex sit differentia primò intentionaliter sumpta? 528

Quæst. 2. An prædicta divisio differentia sit adequata, & qualis sit? 531

Quæst. 3. Vtū differentia includat genus? pag. 537

Quæst. 4. De pertinentibus ad differentiam secundo intentionaliter sumptam. 540

Disp. 9. De proprio quarto predicabili.

Quæst. unica, An proprium rectè definiatur à Porphyrio? 543

Disp. 10. De accidenti quinto predicabili.

Quæst. unica, An rectè à Porphyrio definiatur accidens? 547

Tractatus in Librum Categoriarum Aristotelis.

Part. 1. De Antepredicamentis.

Disp. 1. De Univocis, equivocis, analogis,  
denominativis.

- Quæst. 1. De pertinentibus ad univoca, equivoca,  
& denominativa. 534  
Quæst. 2. Quid, & quoduplex sit Analogia?  
pag. 558  
Quæst. 3. In qua aliqua dubia circa analogiam re-  
solvantur. 561

Disp. 2. De predicamentis in communi.

- Quæst. 1. An rectè dividatur ens in decem pradi-  
camenta? 564  
Quæst. 2. Quanam sint qua in predicamento col-  
locantur? 570  
Quæst. 3. Quomodo distinguantur inter se pradi-  
camenta? 575

Pars 2. De predicamentis in speciali.

Disp. 1. De substantia primò predicamento.

- Quæst. 1. Quanam sit ratio formalis substantia?  
pag. 579  
Quæst. 2. Qualis sit divisio substantia in primam,  
& secundam? 582  
Quæst. 3. Quanam sint proprietates substan-  
tia? 584  
Quæst. 4. Quanam sint, qua in hoc predicamento  
collocantur? 587

Disp. 2. De Accidenti predicamentali in  
communi.

- Quæst. 1. Quanam sit ratio formalis acciden-  
tis? 590  
Quæst.

Quæst. 2. Utrum inhærentia actualis pertineat ad aliquod determinatum predicamentum? 596

Disp. 3. De Quantitate secundo predicamento.

Quæst. 1. Quanam sit ratio formalis quantitatis? 603

Quæst. 2. Quanam sint proprietates quantitatis? 609

Quæst. 3. Utrum substantia materialis habeat partes realiter distinctas, seclusa quantitate? 611

Quæst. 4. Quomodo quantitas dividatur. 626

Quæst. 5. Quales sint divisiones quantitatis? pag. 627

Sectio 1. Qualis sit divisio quantitatis in continuam, & discretam? 628

Sectio 2. De divisione quantitatis continua. 632

Sectio 3. De divisione quantitatis discreta. 638

Disp. 4. De relatione tertio predicamento.

Quæst. 1. An dentur relationes reales. 643

Quæst. 2. Quid, & quotuplex sit relatio realis? 647

Quæst. 3. De relationis intrinsecus advenientis divisione? 652

Sectio 1. De relationibus primi generis. 653

Sectio 2. De relationibus secundi generis. 656

Sectio 3. De relationibus tertii generis. 666

Quæst. 4. An relatio predicamentalis distinguatur realiter à suo fundamento? 664

Quæst. 5. An relatio terminetur ad absolutum, vel respectivum? 672

Quæst. 6. Utrum multiplicatis terminis, multiplicentur relationes in eodem fundamento. 686

Quæ-

Quæst. 7. Unde sumatur unitas, & distinctio relationum?	692
Quæst. 8. Quanam sint proprietates relationis?	696

### Disp. 5. De qualitate quarto predicamento.

Quæst. 1. Quid sit qualitas, seu quomodo definatur?	701
Quæst. 2. Quomodo qualitas dividatur.	703
Sectio 1. De membris dividendibus qualitatem.	704
Sectio 2. An prædicta divisio sit generis in species?	713
Quæst. 3. Quanam sint proprietates qualitatis?	715

### Disp. 6. De sex ultimis predicamentis?

Quæst. 1. Quid pro formali importent sex ultima predicamenta?	718
Quæst. 2. De ultimis predicamentis in speciali.	724

### Pars 3. De post predicamentis.

#### Tractatus de Enunciatione.

Disp. & quæst. unica, An enuntiatio possit transire de vera in falsam, & è contra?	731
--	-----

#### Tractatus de demonstratione.

Quæst. 1. Quid, & quoruplex sit demonstratio.	737
Quæst. 2. De præcognitis, & præcognitionibus demonstrationis.	739

Quæ-

Quæst. 3. Quomodo præmissa concurrant ad assensum conclusionis. 743

Quæst. 4. Utrum præmissa demonstrationes debeant esse veriores, certiores, & evidentiores conclusione. 747

Quæst. 5. Utrum præmissa demonstrationes debeant esse de omni, & per se, & de predicato universalis. 756

Quæst. 6. Quid, & quotuplex sit propositio per se nota. 762

Tractatus de Syllogismo topico, & sophistico.

Disp. Unica utrumque Syllogismum complectens.

Quæst. 1. De pertinentibus ad syllogismum topicum. 769

Quæst. 2. De spectantibus ad syllogismum sophisticum. 771



F I N I S.

